






Th. Ascet. 1263a

P. lat. 1256. ⁹Th. Apr.

Thom. Kemp

Sec. XV. 1407.

pag. 3706.

R. P. GEORGII HESERI
THOMAS a KEMPIS,
CEU
S U M M A
THEOLOGIÆ
M Y S T I C Æ,
ET

MANTISSA ASCESEOS RYTHMICÆ
R. P.

FRANCISCI NEUMAYR,
PERINDE
AD EXERCITIA SPIRITUALIA
S. P. N. IGNATII
ACCOMMODATA
PRO LECTIONE SPIRITUALI,
ET

D. D. SODALIBUS
CONGREGATIONIS MAJORIS LATINÆ
MATRIS PROPITIÆ
B. V. MARIÆ
AB ANGELO SALUTATÆ
PRO XENIO OBLATA,
ANNO M. D. CC. XCIII. MONACHII.

LITTERIS FRANZIANIS.





PRÆFATIO.

Ut bonum sit ex integra causa, post
editam abhinc diemini Alcega Rych-
micam R.P. Francisci Neumayr pro Me-
ditatione Alcega aliam pro Lectione
etiam submittendam esse existimavi



PRAEFATIO.

Ut bonum sit ex integra causa, post editam abhinc biennium *Ascesin Rythmicam* R. P. Francisci Neumayr pro *Meditatione*, *Ascesin* aliam pro *Lectiōe* etiam submitteudam esse existimavi



Post longam vero deliberationem aptio-
rem non inveni librum, quam eum ip-
sum, quem Sanctus Ignatius optimus
rerum spiritualium æstimator, ipsemet
non suis modo Sociis, sed omnibus om-
nium ordinum hominibus, salutis suæ
studiosioribus, præ ceteris commendat,
Venerabilis Dei Servi Thomæ a Kem-
pis, Canonici Regularis Ordinis S. Au-
gustini.

Præsentio quidem, quod hi, qui com-
munem de imitatione Christi libellum
in manu & usu habent, in Thoma He-
seri Thomam ipsum desiderabunt. Quid
vero desiderabunt? Non Spiritum opi-
nor,

Post longam vero deliberationem
nor, sed corpus. Imo corpus etiam sic
ordinatum est ab Hefero, ut Thomas
ipse aliud optare non potuisset, quo
Spiritus suum luculentius & ex ordine
nobiscum communicaret. In hoc autem
ordine nihil a me mutari debuit, nisi
Sententiarum Summaria, quæ dicuntur
marginalia. Cum enim Typi nostri an-
gustior esset margo, quam ut absque
libelli incommodo circumscribi posset,
formas e margine in medium ad inter-
calandum transtuli.

Thesaurus iste diu delituit, donec
tandem in lucem protractus est a doc-
tissimo Viro, Eusebio Amort, Canonico

Re-



Regulari Lateranensi ad SS. Salvatorem
Pollingæ, cujus testimonium tanto li-
bentius commemoro, quanto majus pon-
dus habet in Dedicatione ejusdem libri
ad Abbatem Generalem Ordinis Cano-
nicorum Regularium Rev. & Illustr. DD.
Antonium Mangilium. Tenorem ejus
sic habeto :

„Jam quinquaginta ferme anni sunt,
„a quibus Manuscriptum Theologiæ hu-
„jus Mysticæ in florentissimæ Dieffen-
„sionis Canonice Bibliotheca servatum, & mor-
„te intercipiente ultimam Authoris ma-
„num, necdum numeris omnibus abso-
„lutum, infelix Thesaurus ! delituit :

„nunc



„nunc tandem, dum exquirendis Manu-
„scriptis Codicibus intentus varias Bo-
„jariæ Bibliothecas perlustrarem, & hoc
„ipsum, votis nostris provide servatum
„in nostras manus incidit, inque opta-
„tam, quam diu speraverat, lucem e-
„mergit. Vix Codicem aperui, mox
„perfectam librorum triadem in uno re-
„peri atque integrum systema doctrinæ
„Asceticæ, aureum Exercitiorum S. Ig-
„natii libellum, & divinum Kempensis
„nostri de Imitatione librum intimo quo-
„dam nexu colligata deprehendi, dum
„Author omnia & singula Kempensis
„verba veluti pretiosos lapides Musivo
„ac Tesserulato oper e dispositos arte mi-

66

„rabili in hoc splendidissimum opus con-
„texta digessit. Quis meos tunc repe-
„rienti ac cernenti talia plenos beata
„consolatione sensus explicet? recurre-
„bat subin illud Regum sapientissimi
„Proverb. 3. Beatus, qui invenit sa-
„pientiam, quia viæ illius pulchræ, &
„omnes semitæ illius pacificæ. Mox
„vero & illud Eccles. 20. monitum men-
„tem subiit: Thesaurus invisus, & sa-
„pientia absconsa, quæ utilitas in utris-
„que? Quid agerem? Utilitas publica,
„& Memoria Authoris clarissimi, Pro-
„machi in Causa Kempensi fortissimi, cha-
„rum hoc depositum jam tandem in ap-
„ricum protrahi jussit, omniumque con-


„filio actum est, ut pios A. R. P. He-
„feri S. J. manes hoc publico gratitu-
„dinis nostræ monumento veluti Civica
„quadam, fera quamvis, publice coro-
„narem, atque ipsum Kempenfis nostri
„opusculum, novo hoc respersum lu-
„mine, illustrius ante omnium oculos
„collocarem. Hæc series facti.”

Reliquum est, ut MM. DD. Sodales
ad Festum tituli quam humanissime in-
vitem, quod hoc anno, sic exigente
ritu ecclesiastico, transfertur post Domi-
nicani in albis 8. Aprilis.

Silentio etiam præteriri non oportet, quod novum feretri tegumen confectum sit mille florenorum pretio, quo anno hoc ineunte duorum clariorum Sodalium funera contexta sunt, nimirum: Illustriss. & Excellentiss. DD. Sigismundi S. R. J. Comitis de, & in Haimhausen, Inn- & Oettershausen, Balzing, Gerlhausen & Helfenbrun, Dom. in Kutenplan, Kotten, Rha, S. Crucis, Neudorf, Rittergut, Herruberg, in Regno Bohemiæ; S. E. P. B. Camer. & Consil. intim. ac Ord. S. Huberti Commend. & Suprem. Rei monetariæ Præsidis, nec non Rer. Metall. in Bavar. & Super. Palatinatu Directoris, & Elector. Academ. Scien-

222

Scientiar. Præsidis Monachii. Et alterius Domini Antonii S. R. J. Equitis Nobilis de Danzer, S. E. P. B. Consil. actual. & Stat. Provinc. Cæsæ comulativæ Aerarii, nec non Congregationis Majoris latinæ Thesaurarii, amborum Pactistarum; quorum numerum cum mors hoc etiam anno valde imminuit, ut restitui possit, Candidati quam decentissime invitantur. His autem duobus, quos anno hoc extulimus, singularem honorem exhibuimus, justa persolventes in odeo nostro ad luctum exornato, quia optime de Congregatione sunt meriti; prior quidem tanquam singularis Benefactor, sæpe Consultor, & omnium



omnium facile Senior Sodalium. Alter
vero Thesaurarii munus summa cum di-
ligentia per annos septendecim obiit,
in rationibus reddendis usque ad vitæ
finem accuratus, cui Mater propitia to-
tam mercedem persolvat, ex cujus o-
deo has literas dedimus ipsis Calendis
Martii, 1793.

Infimus

in Christo & Maria

Servus

Ludovicus Seccard

PRIMA



Allet omnium facile Senior Societatis.

vero Thelutari manus summa cum die

lignitia per annos septendecim obti-

in rationibus redendis ad vice

PRIMA PARS

Summæ Theologiæ Mysticæ

THOMÆ a KEMPIS.

PROEMIUM.

PRIMA

Ea communis jam est Ascetarum fere omnium methodus, atque in rebus spiritualibus tractandis disciplina, ut, cum devotas Deo animas ad cœlestem illam Patriam e terra hac peregrinationis deducere cogitant, tres illis vias designent, tanquam veris Israelitis, ex Egipto in terram

PRIMA pro-

promissionis itinere trium dierum tendentibus ad immolandum Domino. Primam vocant viam Purgativam, secundam Illuminativam, tertiam Unitivam.

Purgativa est via compunctionis, qua absterginus peccatorum maculas per lacrymas contriti cordis, hauritas e puteo abyssi, & procellis sonantibus Judiciorum Divinorum, ut deinceps simus inter Immaculatos, qui ambulant in lege Domini, & fiant aspera in vias planas.

Via hac Purgativa emensa, in qua, ut D. Ambrosius loquitur, ita admissa plangimus, ut plangenda non admittamus; ingredienda est Via Illuminativa, de qua Ecclesiasticus: Dat Dominus poenitentibus viam justitiæ, illisque educit, quasi lumen, justiti-
am,

am, defursum a Patre luminum, &
Candore Lucis æternæ, Filio Dei in-
carnato, ejusque sanctissima doctrina,
Hæc est, quæ te deducat in nube diei,
& in luce stellarum per noctem: id
est, dictis & factis Christi Salvatoris
tui ac Sanctorum erudiat in fructum
lucis, in sanctificationem.

Ex via luminosa porro Anima de-
vota opportune transit ad viam, quæ
dicitur Unitiva, complectentem in se
altitudinem diei. Hæc via illa est,
qua Dilectus votorum nostrorum ab
itineribus æternitatis suæ, factus ad
nos viator; in propria venit, exultans
ut Gigas ad currendam viam, quam
media charitate contravit, faciens u-
traque unum, ut unus cum Deo spi-
ritus simus, dicentes cum S. Paulo:
Quis separabit nos a charitate Christi?

Me-

Methodum hanc in suis Exerci-
tiis spiritualibus singulari quodam or-
dine, illuminante Spiritu sancto, ob-
servavit S. P. Ignatius: quæ cum tot
animarum, per sacras illas exercita-
tiones viam salutis ingressarum, ex-
perimento probata sit, ad eorundem
Exercitiorum fere normam Liber hic
Illuminatissimi nostri Ascetæ ita di-
stributus est, ut spirituali huic exer-
citationi, & animæ solitudini, per
dies aliquot obeundæ, omniumque
sedulo legentium devotioni excitan-
dæ, ac conservandæ, sit apprime ser-
viturus, cum solatio & certissimo
fructu, in vitam æternam redunda-
turo.





VIAE
PURGATIVAE
SEMITA PRIMA.

De Expurgatione peccatorum.

Passus I.

Propter quem finem creatus sit Homo?

Sententia I. *Finis hujus sublimitas.*

Fili, ego debeo esse finis tuus supremus & ultimus, si vere desideras esse beatus. Ex hac intentione purificabitur affectus tuus, sapius ad seipsum, & ad creaturas male incurvatus. *Lib. 3. cap. 9. §. 1.*

II. *Universalitas.*

In omni re attende tibi, quid facias, & quid dicas: & omnem intentionem tuam ad hoc dirige, ut mihi soli placeas, & extra me nihil cupias, vel quæras *Lib. 3. cap. 25. §. 3.*

III. *Necessitas.*

Si teipsum in aliquo quæris, statim in te deficiis & arescis. Omnia ergo ad me principaliter



referas, quia ego sum, qui omnia dedi. Sic singula considera, sicut ex summo bono manantia: & ideo ad me, tanquam ad suam originem, cuncta sunt reducenda. *Lib. 3. cap. 9. §. 1.*

IV. *Modus tendendi ad hunc finem.*

Duabus alis homo sublevatur a terrenis, simplicitate scilicet & puritate. Simplicitas debet esse in intentione, puritas in affectione. Simplicitas intendit Deum, puritas apprehendit & gustat. *Lib. 2. cap. 4. §. 1.*

V. *Utilitas.*

Purus, simplex, & stabilis spiritus, in multis operibus non dissipatur: quia omnia ad Dei honorem operatur, & in se otiosus, ab omni propria exquisitione esse nititur. *Lib. 1. cap. 3. §. 3.*

Passus II.

Reliqua creata sunt hominis ipsius causa.

I. *Omnis creatura, speculum, & liber.*

Si rectum cor tuum est, tunc omnis creatura speculum vitæ, & liber sanctæ doctrinæ est. Non est creatura tam parva & vilis, quæ Dei bonitatem non repræsentet. Si tu es intus bonus & purus, tunc omnia sine impedimento videbis & bene capies. Cor purum penetrat cælum & infernum. Qualis unusquisque intus est, taliter judicat exterius. *Lib. 2. cap. 4. §. 1. & 2.*

II. *Cælum, terra, Angeli, Christus propter hominem.*

Ecce cælum & terra, quæ in ministerium hominis creasti, præsto sunt, & faciunt quotidie, quæ-



quæcumque mandasti. Et hoc parum est: quin etiam Angelos in ministerium hominis ordinasti. Transcendit autem hæc omnia, quod tu ipse homini servire dignatus es, & te ipsum daturum ei promissii. *Lib. 3. cap. 10. §. 3.*

III. *Affectus & Propositum.*

Quid dabo tibi, pro omnibus istis millibus bonis? Utinam possem tibi servire cunctis diebus vitæ meæ! utinam vel uno die, dignum servitium exhibere sufficerem! vere tu es dignus omni servitio, omni honore, & laude æterna. Vere Dominus meus es, & ego pauper servus tuus, qui totis viribus teneor tibi servire, nec unquam in laudibus tuis debeo fastidire. Sic volo, sic desidero; & quidquid mihi deest, tu digneris supplere. *Lib. 3. cap. 10. §. 4.*

Passus III.

Difficultas eligendi hoc, vel illud medium.

I. *Difficultas propter humanos affectus.*

Fili, sine me tecum agere, quod volo: ego scio, quid expedit tibi. Tu cogitas ut homo: tu sentis in multis, sicut humanus suadet affectus. *Lib. 3. cap. 17. §. 1.*

II. *Quod agnoscit anima pia.*

Domine, verum est, quod dicis. Major est sollicitudo tua pro me, quam omnis cura, quam ego gerere possum pro me. Nimis enim casualiter stat, qui non projicit omnem sollicitudinem suam in te. Domine, dummodo voluntas mea



recta & firma ad te permaneat, fac de me, quidquid tibi placuerit. Non enim potest esse nisi bonum, quidquid de me feceris. *Lib. 3. cap. 17. §. 1.*

III. Ideoque se componit ad indifferentiam.

Si me vis esse in tenebris, sis benedictus: & si me vis esse in luce, sis iterum benedictus. Si me dignaris consolari, sis benedictus: & si me vis tribulari, sis æque semper benedictus. *Lib. 3. cap. 17. §. 2.*

IV. Quam quia Christus tantopere suadet.

Fili, sic oportet te stare, si mecum desideras ambulare. Ita promptus esse debes ad patientium, sicut ad gaudendum. Ita libenter debes esse inops & pauper, sicut plenus & dives. *Lib. 3. cap. 17. §. 3.*

V. Omnibus modis illa amplectitur.

Domine, libenter patiar pro te, quidquid voveris venire super me. Indifferenter volo de manu tua, bonum & malum, dulce & amarum, lætum & triste suscipere: & pro omnibus mihi contingentibus, gratias agere: Custodi me ab omni peccato, & non timebo mortem, nec infernum. Dummodo in æternum me non projicias, nec deleas de libro vitæ: non mihi nocebit, quidquid venerit tribulationis super me. *Lib. 3. cap. 17. §. 4.*

Passus IV.

De pura in rebus omnibus intentione.

I. Sit oculus intentionis simplex & rectus.

Tota intentio mentis, ad debitum & optimum proficiat finem. Nam sic poterit unus & idem,
in-



inconcussusque permanere, simplici intentionis oculo, per tot varios eventus, ad me imprætermisere directo. Quanto autem purior fuerit intentionis oculus, tanto constantius inter diversas itur procellas. Sed in multis caligat oculus puræ intentionis: respicitur enim cito in aliquod delectabile, quod occurrit. Mundandus est ergo intentionis oculus, ut sit simplex & rectus, atque ultra omnia varia media ad me dirigendus. *Lib. 3. cap. 33. §. 1. & 2.*

II. *Supra se respiciens solum Deum;
infra se omnia despiciens.*

Nil magnum, nil altum, nil gratum, nil acceptum tibi sit, nisi pure Deus, aut de Deo sit. Totum vanum existima, quidquid consolationis occurrit de aliqua creatura. Amans Deum anima, sub Deo despicit universa. Solus Deus æternus & immensus, implens omnia, solatium animæ, & vera cordis lætitia. *Lib. 2. cap. 5. §. 3.*

III. *In rebus suis nihil æstimans,
nisi quod æternum.*

Nihil magnum tibi videatur ex omnibus, quæ agis. Nil grande, nil pretiosum, & admirabile, nil reputatione appareat dignum: nil altum, nihil vere laudabile & desiderabile, nisi quod æternum est. Elaceat tibi super omnia æterna veritas. *Lib. 3. cap. 4. §. 3.*

VI. *Oratio.*

Domine, verum est, sicut dicis: ita, quæso, mecum fiat. Veritas tua me doceat, ipsa me custodiat, & usque ad salutarem finem conservet.
Ipsa



Ipsa me liberet ab omni affectione mala, & inordinata dilectione: & ambulabo tecum, in magna cordis libertate. Lib. 3. cap. 4. §. 1.

Passus V.

De vanitate rerum omnium extra ultimum finem.

I. Vanitas in divitiis, honoribus, voluptatibus.

Vanitas est, divitias perituras quærere, & in illis sperare. Vanitas quoque est, honores ambire, & in altum statum se extollere. Vanitas est, carnis desideria sequi: & illud desiderare, unde postmodum graviter oportet puniri. *Lib. 1. cap. 1. §. 4.*

II. Vanitas in vita longa, præsentium cura, neglectu futurorum.

Vanitas est, longam vitam optare, & de bona vita parum curare. Vanitas est, præsentem vitam solum attendere: & quæ futura sunt, non prævidere. Vanitas est, diligere, quod cum omni celeritate transit: & illuc non festinare, ubi sempiternum gaudium manet. *Lib. 1. cap. 1. §. 4.*

III. Omnia vana præter Deum.

Vanitas vanitatum, & omnia vanitas, præter amare Deum, & illi soli servire. *Lib. 1. cap. 1. §. 3.*

IV. Affectus & oratio.

Nihil permanens sub sole, ubi omnia vanitas, & afflictio spiritus. O quam sapiens, qui ita considerat! Da mihi, Domine, coelestem sapientiam,



tiam, ut discam te super omnia quærere, & invenire, super omnia sapere & intelligere: & cætera, secundum ordinem sapientiæ tuæ, prout sunt, intelligere. Da prudenter declinare blandientem, & patienter ferre adversantem: quia hæc magna sapientia, non moveri omni vento verborum, nec aurem male blandienti præbere sireni: sic enim incepta pergitur via secure. *Lib. 3. cap. 27. §. 4. & 5.*

Passus VI.

Exemplum & Propositum tendendi
ad ultimum finem.

I. *Exemplo Sanctorum omnium ad æterna anhelantium,*

Sancti Dei & omnes devoti amici Christi non attenderunt, quæ carni placuerunt, nec quæ in hoc tempore floruerunt: sed tota spes eorum, & intentio ad æterna bona anhelabat. Ferebatur totum desiderium ipsorum sursum ad mansura, & invisibilia, ne amore visibilium traherentur ad infima. *Lib. 1. cap. 22. §. 4.*

II. *Quæram in omnibus Deum,*

Super omnia & in omnibus, requiesces, Anima mea, in Domino semper, quia ipse Sanctorum æterna requies. *Lib. 3. cap. 21. §. 1.*

III. *Quidquid alii quærant:*

Quærant alii pro se aliud, quodcunque libuerit: mihi aliud interim nil placet, nec placebit, nisi tu Deus meus, spes mea, salus æterna. *Lib. 3. Cap. 21. §. 5.*

IV.



IV. *Quia nihil est ubivis simile Deo.*

Non enim est similis tui in cunctis mirabilibus coeli & terræ. Sunt opera tua bona valde, judicia vera, & Providentia tua reguntur universa. Laus ergo tibi & gloria, o Patris sapientia: te laudet, & benedicat os meum, anima mea, & cuncta creata simul. *Lib. 3. Cap. 21. §. 7.*

Passus VII.

Damna deflectentis ab ultimo fine.

I. *Diu parvus,*

Diu parvus erit, & infra jacebit, qui aliquid magnum æstimat, nisi solum unum, immensum, æternum bonum. Et quidquid Deus non est, nihil est, & pro nihilo computari debet. *Lib. 3. Cap. 31. §. 2.*

II. *Ubique miser,*

Miser es, ubicumque fueris, & quocumque te verteris, nisi ad Deum te convertas. *Lib. 1. Cap. 22. §. 1.*

III. *In tristitia & angore,*

Qui extra me voluerit gloriari, vel in aliquo privato bono delectari, non stabilietur in vero gaudio, neque in corde suo dilatabitur, sed multipliciter impediatur & angustiabitur. *Lib. 3. cap. 9. §. 2.*

IV. *In perpetuis doloribus versabitur,*

Qui aliud quærit, quam pure Deum, & animæ suæ salutem, non inveniet, nisi tribulationem & dolorem. *Lib. 1. cap. 17. §. 2.*



V. *Qui relicto creatore, creaturas respicit.*

Quando tu respicis ad creaturas, subtrahitur tibi aspectus creatoris. Quantumcumque modicum sit, si inordinate diligitur, & respicitur, retardat a summo, & vitiat. *Lib. 3. cap. 42. §. 2.*

Passus VIII.

Ardens desiderium consequendi hunc finem.

I. *Desidero Deum præ omni eo, quod Deus non est.*

Da mihi, dulcissime & amantissime Jesu, in te super omnem creaturam requiescere; super omnem salutem, & pulchritudinem, super omnem gloriam & honorem, super omnem potentiam & dignitatem, super omnem scientiam, & subtilitatem; super omnes divitias & artes; super omnem lætitiā & exultationem, super omnem famam & laudem, super omnem suavitatem & consolationem, super omnem spem & promissionem, super omne meritum & desiderium; super omnia dona & munera, quæ potes dare & infundere, super omne gaudium & jubilationem, quam potest mens capere & sentire: denique super Angelos & Archangelos, & super omnem exercitum cœli: super omnia visibilia & invisibilia: & super omne, quod tu Deus meus non es. *Lib. 3. cap. 21. §. 1.*

II. *Omnia solus hic est.*

Quia tu Domine Deus meus super omnia optimus es: tu solus altissimus: tu solus potentissimus:



mus: tu solus sufficientissimus & plenissimus, tu solus suavissimus & solatiofissimus: tu solus pulcherrimus & amantissimus: tu solus nobilissimus & gloriosissimus super omnia: in quo cuncta bona simul & perfecte sunt, & semper fuerunt & erunt. *Lib. 3. cap. 21. §. 2.*

III. *Cætera cuncta nihil.*

Atqui ideo minus est & insufficiens, quidquid præter teipsum mihi donas, aut de te ipso revelas, vel promittis, te non viso, nec plene adeptus: quoniam quidem non potest cor meum veraciter requiescere, nec totaliter contentari, nisi in te requiescat, & omnia dona, omnemque creaturam transcendat. *Lib. 3. cap. 21. §. 2.*

Passus IX.

De primo peccato Angelorum.

I. *Unicum Angelorum peccatum tremore & pudore nos obruit.*

Intonas super me judicia tua Domine, & timore ac tremore concutis omnia ossa mea, & expavescit anima mea valde. Sto attonitus, & confidero; quia cœli non sunt mundi in conspectu tuo. Si in Angelis reperisti pravitatem, nec tamen pepercisti, quid fiet de me? ceciderunt stellæ de cœlo, & ego pulvis, quid præsumo? Quorum opera videbantur laudabilia, ceciderunt ad infima: & qui comedebant panem Angelorum, vidi siliquis delectari porcorum. *Lib. 3. cap. 14. §. 1.*



II. *Impellit ad Humilitatem.*

O quam profunde submittere me debeo, sub abyssalibus judiciis tuis Domine: ubi nihil aliud me esse invenio, quam nihil & nihil! O pondus immensum! o pelagus intransnatabile! ubi nihil de me reperio, quam in toto nihil: ubi est ergo latebra gloriæ? ubi confidentia de virtute concepta? Absorpta est omnis gloriatio vana in profunditate judiciorum tuorum super me. *Lib. 3. cap. 14. §. 3.*

III. *Fugat omnem vanam gloriam.*

Quid est omnis caro in conspectu tuo? Nunquid gloriabitur lutum, contra formantem se? Quomodo potest erigi vaniloquio, cujus cor in veritate subiectum est Deo? Non eum totus mundus eriget, quem veritas sibi subjecit; nec omnium laudantium ore movebitur, qui totam spem suam in Deo firmavit. Nam & ipsi, qui loquuntur, ecce omnes nihil; deficient enim cum sonitu verborum: veritas autem Domini manet in æternum. *Lib. 3. cap. 14. §. 4.*

Passus X.

De peccato primorum Parentum.

I. *Ex peccato primorum Parentum corruptio totius naturæ humanæ.*

Natura ad malum semper prona ab adolescentia sua. Nam per primum hominem Adam lapsa, & vitata per peccatum, in omnes homines poena hujus maculæ descendit: ut ipsa natura, quæ bene & recta a te condita fuit, pro vicio jam, & infirmitate corruptæ naturæ ponatur,
eor



eo quod motus ejus sibi relictus, ad malum & inferiora trahat. *Lib. 3. cap. 55. §. 2.*

II. *Obcæcatio intellectus,*

Modica vis, quæ remansit, est tanquam scintilla quædam latens in cinere. Hæc est ipsa ratio naturalis, circumfusa magna caligine, adhuc judicium habens boni & mali, veri falsique distantiam, licet impotens sit adimplere omne, quod approbat, nec pleno jam lumine veritatis, nec sanitate affectionum suarum potiatur. *Lib. 3. cap. 55. §. 2.*

III. *Infirmitas voluntatis.*

Hinc est Deus meus, quod condelector legi tuæ secundum interiorem hominem, sciens, mandatum tuum fore bonum, justum & sanctum, arguens etiam omne malum & peccatum fugiendum. Carne autem servio legi peccati, dum magis sensualitati obedio, quam rationi. Hinc est, quod velle bonum mihi adjacet; perficere autem non invenio. Hinc sæpe multa bona propono, sed quia gratia deest ad adjuvandum infirmitatem meam, ex levi resistantia resilio & deficio. Hinc accidit, quod viam perfectionis agnosco, & qualiter agere debeam, clare satis video: sed propriæ corruptionis pondere pressus, ad perfectiora non assurgo. *Lib. 3. cap. 55. §. 3.*

IV. *Peccatum Dolor & Miseria.*

Quamdiu istud fragile corpus gerimus, sine peccato esse non possumus, nec sine tædio & dolore vivere. Libenter haberemus ab omni miseria quietem; sed quia per peccatum perdidimus innocentiam, amisimus etiam veram beatitudinem, *Lib. 1. cap. 22. §. 5.*

Do-



Documentum.

Ideo oportet nos tenere patientiam, & Dei expectare misericordiam, donec transeat iniquitas hæc, & mortalitas absorbeatur a vita. *Ibidem.*

Passus XI.

De miseriis hujus vitæ propter peccatum.

I. Enumerantur miseriæ hujus vitæ.

Dies hujus temporis parvi & mali, pleni doloribus & angustiiis: ubi homo multis peccatis inquinatur, multis passionibus irretitur, multis timoribus stringitur, multis curis distenditur, multis curiositatibus distrahitur, multis vanitatibus implicatur, multis erroribus circumfunditur, multis laboribus atteritur, tentationibus gravatur, deliciis enervatur, egestate cruciatur. *L. 3. c. 48. §. 2.*

Affectus.

O quanto finis horum malorum? quando liberabor a misera servitute vitiorum? quando memorabor Domine tui solius? quando ad plenum lætabor in te? quando ero sine omni impedimento in vera libertate, sine omni gravamine mentis & corporis? Relictus sum pauper & exul in terra hostili, ubi bella quotidiana, & infortunia maxima. *Ibidem §. 3.*

II. Deploratur perpetuitas malorum hujus vitæ,

Heu qualis est hæc vita, ubi non desunt tribulationes & miseriæ: ubi plena laqueis & hostibus sunt omnia? Nam una tribulatione seu ten-



tatione récedente, alia accedit: sed & priore adhuc durante conflictu, alii plures superveniunt, & insperate. *Lib. 3. cap. 20. §. 3.*

III. *Utique non amandæ.*

Et quomodo potest amari vita, tantas habens amaritudines, tot subjecta calamitatibus & miseriis? Quomodo etiam dicitur vita, tot generans mortes & pestes? Et tamen amatur, & delectari in ea a multis quæritur. *Lib. 3. cap. 20. §. 4.*

Passus XII.

De noxiis curis, & indigno amore hujus vitæ.

I. *Rerum caducarum curæ, neglectus æternarum,*

O Domine, quousque venimus? Ecce damnum desletur temporale, pro modico quæstu laboratur & curritur, & spirituale detrimentum in oblivionem transit, & vix fero reditur. Quod parum vel nihil prodest, attenditur; & quod summe necessarium est, negligenter præteritur: quia totus homo ad externa defluit, & nisi cito resipiscat, libens in exterioribus jacet. *Lib. 3. cap. 44. §. 2.*

II. *Et insanus amor vitæ,*

Sed væ, non cognoscentibus suam miseriam: & amplius væ illis, qui diligunt hanc miseram & corruptibilem vitam. Nam in tantum quidam hanc amplectuntur, licet etiam vix necessaria laborando, aut mendicando habeant, ut, si possent
hic



hic semper vivere, de regno Dei nihil curarent.
Lib. 1. cap. 22. §. 3.

III. *In fine graviter affligent.*

O infani & infideles corde, qui tam profunde in terrenis jacent, ut nihil, nisi carnalia sapiant. Sed miseri, adhuc in fine graviter sentient, quam vile & nihilum erat, quod amaverunt.
Lib. 1. cap. 22. §. 4.

Passus XIII.

De peccatis propriis identidem in memoriam revocandis.

I. *Quomodo revocanda in memoriam peccata totius vitæ.*

Ego te docebo (ait Veritas) quæ recta sunt, & placita coram me. Cogita peccata tua, cum displicentia magna & mœrore: & nunquam reputes te aliquid esse, propter opera bona. Revera peccator es, & multis passionibus obnoxius & implicatus. Ex te semper ad nihil tendis; cito laberis, cito vinceris, cito turbaris, cito dissolveris. Non habes quidquam, unde possis gloriari, sed multa, unde te debeas vilificare: quia multo infirmior es, quam vales comprehendere.
Lib. 3. cap. 4. §. 2.

II. *Quantum & ex quo motivo displicere debeant.*

Displiceat tibi semper tua maxima vilitas. Nil sic timeas, sic vituperes & fugias, sicut vitia & peccata tua: quæ magis displicere debent, quam quælibet rerum damna. Time judicia Dei,
ex-



expavesce iram omnipotentis. Noli autem discutere opera Altissimi, sed tuas iniquitates perscrutare, in quantis deliquisti, & quam multa bona neglexisti. *Lib. 3. cap. 4. §. 3. & 4.*

III. Ad quantam humilitatem & suimet contemptum inducere.

Exardeſce contra te, nec patiaris tumorem in te vivere; ſed ita ſubjectum & parvulum te exhibe, ut omnes ſuper te ambulare poſſint, & ſicut lutum platearum conculcare. Quid habes homo inanis conqueri? quid ſordide peccator poteſ contradicere exprobrantibus tibi, qui toties Deum offendisti, & infernum multoties meruiſti? Sed pepercit tibi oculus meus, quia preſtioſa fuit anima tua in conſpectu meo: ut cognoſceres delectionem meam, & gratus ſemper beneficiis meis exiſteres. & ut ad veram ſubjectionem & humilitatem, te jugiter dares, patienterque proprium contemptum ferres. *Lib. 3. cap. 13. §. 3.*

Paſſus XIV.

De ſui ipſius ſalutari cognitione.

I. In valle nihilitatis meæ videbo, quid ſim, quid fuerim, quid de me futurum ſit.

Loquar ad Dominum meum, cum ſim pulvis & cinis? ſi me amplius reputavero, ecce tu ſtas contra me: & dicunt teſtimonium verum iniquitates meæ, nec poſſum contradicere. Si autem me vilificavero, & ad nihilum redegero, & ab omni propria reputatione defecero, atque (ſicut ſum)

sum) pulverisa vero, erit mihi propitia gratia tua, & vicina cordi meo lux tua: & omnis æstimatio, quantulacumque minima, in valle nihilitatis meæ submergetur, & peribit in æternum. Ibi ostendis me mihi, quid sum, quid fui, & quo deveni: quia nihil sum & nescivi. Si mihi ipsi relinquer, ecce nihil, & tota infirmitas. *Lib. 3. cap. 8. §. 1.*

II. *Præfente vel absente gratia Dei,*

Domine, quid est homo, quod memor es ejus: aut filius hominis, quia visitas eum? quid promeruit homo, ut dares illi gratiam tuam? Domine, quid possum conqueri, si me deseris? aut quid juste obtendere possum, si, quod peto, non feceris? certe hoc in veritate cogitare possum, nihil boni ex me habeo, sed in omnibus deficio, & ad nihil semper tendo. Et nisi a te fuero adjutus, & interius informatus, totus efficior tepidus & dissolutus. *Lib. 3. cap. 40. §. 1.*

III. *Quid ergo, nisi ut humiliem me?*

Quid habet ultra dicere servus tuus coram te, nisi ut humiliet se valde ante te, memor semper propriæ iniquitatis & vilitatis. *Lib. 3. cap. 21. §. 6.* Qui bene seipsum cognoscit, sibi ipsi vilescit, nec laudibus delectatur humanis. *Lib. 1. cap. 2. §. 1.*

Passus XV.

De animo parato ad pœnas propter culpam.

I. *Quia dignus sum pœna.*

Quia frequenter & graviter peccavi tibi, merito armatur contra me omnis creatura. Mi-



hi iuste debetur confusio & contemptus. *Lib. 3. cap. 41. §. 2.*

II. *Arguam peccata mea, priusquam moriar.*

In veritate confiteor, quoniam dignus sum omni ludibrio & contemptu, nec decet me inter tuos devotos commemorari. Et licet hoc ægre audiam, tamen adversum me, pro veritate, peccata mea arguam, ut facilius misericordiam tuam merear impetrare. Quid dicam reus, & omni confusione plenus? Non habeo os loquendi, nisi hoc tantum verbum: Peccavi, Domine, peccavi: miserere mei, ignosce mihi. *Sine me paululum, ut plangam dolorem meum, antequam vadam ad terram tenebrosam & opertam mortis caligine?* Quid tam maxime a reo & misero peccatore requiris, nisi ut conteratur & humiliet se pro delictis suis? *Lib. 3. cap. 52. §. 2. & 3.*

III. *Oblatio ad omnem castigationem.*

Ecce Pater dilecte, in manibus tuis sum ego, sub virga correctionis tuæ me inclino: percutere dorsum meum, & collum meum, ut incurvem ad voluntatem tuam, tortuositatem meam. Fac me piū & humilem discipulum, sicut benefacere consuevisti, ut ambulem ad omnem natum tuum. Tibi me, & omnia mea, ad corrigendum commendo: melius est hic corripui, quam in futuro. Tu scis omnia & singula, & nihil te latet in humana conscientia. Tu scis, quid expedit ad profectum meum, & quantum deservit tribulatio ad rubiginem vitiorum purgandam. Fac mecum desideratum beneplacitum tuum, & ne despicias peccaminosam vitam meam, nulli melius, nec clarius, quam tibi soli notam. *Lib. 3. cap. 50. §. 6.*
Pas-



Passus XVI.

Contritio & Confessio peccatorum.

I. *Bona contritionis.*

Humilis peccatorum contritio, acceptabile tibi est Domine sacrificium, longe suavius odorans in conspectu tuo, quam thuris incensum. Hæc est gratum etiam unguentum, quod sacris pedibus tuis infundi voluisti: *quia cor contritum & humiliatum nunquam despexisti.* Ibi est locus refugii a facie iræ inimici. Ibi emendatur & abluitor, quidquid aliunde contractum est, & inquinatum. *Lib. 3. cap. 52. §. 4.*

II. *Examinanda conscientia. Integra facienda confessio.*

Diligenter examina conscientiam tuam; & pro posse tuo, vera contritione & humili confessione eam munda & clarifica: ita ut nihil grave habeas, aut scias, quod te remordeat. *Lib. 4. cap. 7. §. 1.*

III. *Colloquium ad Deum.*

Non reticēbo, neque deprecari cessabo, donec gratia tua revertatur, mihi que tu intus loquaris: Ecce adsum: Ecce ego ad te, quia invocasti me, lacrymæ tuæ, & desiderium animæ tuæ, humiliatio tua, & contritio cordis, inclinaverunt me, & adduxerunt ad te. Et dixi; Domine invocavi te, & desideravi frui te, paratus omnia respuere propter te. Tu enim prior excitasti me, ut quærerem te. Sis ergo benedictus Domine, qui fecisti hanc bonitatem cum servo tuo, secundum infinititudinem misericordiæ tuæ, *Lib. 3. cap. 21. §. 5*



Passus XVII.

Firma proposita emendationis in posterum.

I. *Proposita de Peccatis vitandis.*

Pro nulla re mundi, & pro nullius hominis dilectione aliquod malum est faciendum. *Lib. 1. cap. 15. §. 1.*

II.

Eligendum est magis, totum mundum habere contrarium, quam Jesum offensum. *Lib. 2. cap. 8. §. 3.*

III.

Qui perdit Jesum, perdit nimis multum; & plus quam totum mundum, *Lib. 2. cap. 8. §. 2.*

IV.

Potes cito fugare Jesum, & gratiam eius perdere, si volueris ad exteriora declinare. *Lib. 2. cap. 8. §. 3.*

V. *De Passionibus refrœnandis.*

Sequentes suam sensualitatem, maculant conscientiam, & perdunt Dei gratiam. *Lib. 1. cap. 1. §. 5.*

VI.

Non est molestior & peior animæ hostis, quam tu ipse tibi, non bene concordans spiritui. *Lib. 3. cap. 13. §. 1.*

VII.

Sæpe male agimus & pejus excusamus. *Lib. 2. cap. 5. §. 1.*

VIII.



VIII. *De procuranda bona conscientia.*

Nemo secure gaudet, nisi qui bonæ conscientiaæ testimonium habet. *Lib. 1. cap. 20. §. 3.*

IX.

Mali nunquam habent veram lætitiā, nec internam sentiunt pacem; quia non est pax impiis, dicit Dominus. Et si dixerint; In pace sumus, non venient super nos mala: & quis nobis nocere audebit? Ne credas eis: quoniam repente exurget ira Dei, & in nihilum redigentur actus eorum, & cogitationes eorum peribunt. *Lib. 2. cap. 6. §. 1.*

X.

Bona conscientia valde multa potest portare, & valde læta est inter adversa. Mala conscientia semper timida est & inquieta. *Lib. 2. cap. 6. §. 1.*

XI.

Gloria boni hominis, testimonium bonæ conscientiaæ. Habe bonam conscientiam, & habebis semper lætitiā. *Lib. 2. cap. 6. §. 1.*

XII. *De assumendo timore Dei.*

Non est vera libertas, nec bona lætitiā, nisi in timore Dei cum bona conscientia. Felix, qui a se abdicat, quidquid conscientiam suam maculare potest & gravare. *Lib. 1. cap. 21. §. 2.*

XIII. *De studio melioris vitæ.*

Si est gaudium in mundo, hoc utique possidet puri cordis homo: & si est alicubi tribulatio,



tio, & angustia, hoc melius novit mala conscientia. *Lib. 2. cap. 4. §. 2.*

XIV.

Bona vita, facit hominem sapientem secundum Deum, & expertum in multis. *Lib. 1. cap. 4. §. 2.*

XV.

Pauci ex infirmitate meliorantur: sic & qui multum peregrinantur, raro sanctificantur. *Lib. 1. cap. 23. §. 4.*

Passus XVIII.

De beneficio conversionis ad Deum.

I. *Peccator non nisi a Deo reducitur.*

Nunc iterum loquar Domine, & non filebo; dicam in auribus Dei mei, Domini mei, & Regis mei, qui est in excelsis. O quam magna multitudo dulcedinis tuæ Domine, quam abscondisti timentibus te! Sed quid es amantibus? quid toto corde tibi fervientibus? vere ineffabilis dulcedo contemplationis tuæ, quam largiris amantibus te. In hoc maxime ostendisti mihi dulcedinem charitatis tuæ, quia cum non essem, fecisti me: cum errarem longe a te, reduxisti me, ut servirem tibi: & præcepisti, ut diligam te. *Lib. 3. cap. 10. §. 1.*

II. *Cui propterea grates habet.*

O fons amoris perpetui, quid dicam de te? Quomodo potero tui oblivisci, qui mei dignatus es recordari, etiam postquam contabui & perii? Fecisti ultra omnem spem, misericordiam cum
fer-

fervo tuo: & ultra omne meritum, gratiam & amicitiam exhibuisti. Quid retribuam tibi pro gratia ista? *Lib. 3. cap. 10. §. 2.*

III. *Et servire promittit.*

Nunquid magnum est, ut tibi serviam, cui omnis creatura servire tenetur? Non magnum mihi videri debet servire tibi: sed hoc potius magnum mihi, & mirandum apparet, quod tam pauperem & indignum, dignaris in servum recipere, & dilectis servis tuis adunare. *Lib. 3. cap. 10. §. 2.*

Passus XIX.

Invitatur peccator ad SS. Communionem.

I. *Invitanti Christo respondet peccator animo grato,*

*Venite ad me omnes, qui laboratis & onerati estis, & ego reficiam vos. Dicit Dominus. Hæc sunt verba tua Christe, veritas æterna. Quia ergo tua sunt, & vera, gratanter mihi & fideliter cuncta sunt accipienda. Tua sunt, & tu ea protulisti: & mea quoque sunt, quia pro salute mea ea edidisti. Libenter suscipio ea ex ore tuo, ut arctius inferantur cordi meo. Excitant me verba tantæ pietatis, plena dulcedinis & dilectionis. Sed terrent me delicta propria: & ad capienda tanta mysteria, me reverberat impura conscientia. Provocat me dulcedo verborum tuorum, sed onerat me multitudo vitiorum meorum. *Lib. 4. cap. 1. §. 1.**



II. *Humili & compuncto.*

Jubes ut fiducialiter ad te accedam, si tecum velim habere partem: & ut immortalitatis accipiam alimoniam, si æternam cupiam obtinere vitam & gloriam. *Venite, inquis, ad me omnes, qui laboratis, & onerati estis, & ego reficiam vos.* O dulce & amicabile verbum in aure peccatoris, quod tu, Domine Deus meus, egenum & pauperem invitas, ad communionem tui sanctissimi corporis. Sed quis ego sum Domine, ut ad te præsumam accedere? Ecce, Cœli Cœlorum te non capiunt, & tu dicis; venite ad me omnes. *Lib. 4. cap. 1. §. 2.*

III. *Nec sine veniendi verecundia.*

Quid sibi vult ista piissima dignatio, & tam amicabile invitatio? Quomodo ausus ero venire, qui nihil boni mihi conscius sum, unde possim præsumere? Quomodo te introducam in domum meam, qui sæpius offendi benignissimam faciem tuam? Reverentur Angeli & Archangeli, metuunt sancti & justi, & tu dicis: Venite ad me omnes? Nisi tu Domine hoc diceres, quis verum esse crederet? Et nisi tu juberes, quis accedere attentaret? *Lib. 4. cap. 1. §. 3.*

Passus XX.

**Accedit homo peccator, humiliter
ac reverenter.**

I. *Confessio propriæ vilitatis.*

Super bonitate tua, & magna misericordia tua Domine confisus, accedo æger ad Salvatorem, esuriens & sitiens ad fontem vitæ, egenus ad Regem



gem Cœli, fervus ad Dominum, creatura ad Creatorem, desolatus ad meum pium Consolatorem. Sed unde hoc mihi, ut venias ad me? Quis ego sum, ut præstes mihi teipsum? Quomodo audet peccator coram te apparere? & tu quomodo dignaris ad peccatorem venire? Tu nosti servum tuum, & scis, quia nil boni in se habet, unde hoc illi præstes? Confiteor igitur vilitatem meam, agnosco tuam bonitatem, laudo pietatem, & gratias ago propter nimiam charitatem. Propter temetipsum enim hoc facis, non propter mea merita: ut bonitas tua mihi magis innotescat, charitas amplior ingeratur, & humilitas perfectius commendetur. Quia ergo tibi hoc placet, & tu sic fieri iussisti, placet & mihi, dignatio tua, & utinam iniquitas mea non obsistat. *Lib. 4. cap. 2. §. 1.*

II. *Desiderium dignæ sumptionis, quam*

O Dulcissime & Benignissime Jesu, quanta tibi reverentia & gratiarum actio cum perpetua laude pro susceptione Sacri Corporis tui debetur, cujus dignitatem nullus hominum explicare potens invenitur. Sed quid cogitabo in hac Communionem, in accessu ad Dominum meum, quem debite venerari nequeo, & tamen devote suscipere desidero? Quid cogitabo melius & salubrius, nisi meipsum totaliter humiliando coram te, & tuam infinitam bonitatem exaltando supra me? Laudo te, Deus meus, & exalto in æternum. Despicio me & subijcio tibi, in profundum vilitatis meæ. *Lib. 4. cap. 2. §. 2.*

III. *Humilitas maxime procurat.*

Ecce tu Sanctus Sanctorum, & ego fordes peccatorum. Ecce tu inclinas te ad me, qui non
sum



sum dignus ad te respicere. Ecce tu venis ad me, tu vis esse mecum, tu invitas ad convivium tuum. Tu mihi dare vis Cœlestem Cibum, & panem Angelorum ad manducandum: non alium fane, quam teipsum, panem vivum, qui de Cœlo descendisti, & das vitam mundo. *Lib. 4. cap. 2. §. 3.*

Passus XXI.

Aspirationes sub ipsam Sacram Synaxin.

I. *Clamat de profundis miseriæ suæ.*

O dulcissime atque amantissime Domine, quem nunc devote desidero suscipere, tu scis infirmitatem meam, & necessitatem, quam patior, in quantis malis & vitiis jaceo; quam sæpe sum gravatus, tentatus, turbatus, & inquinatus. Pro remedio ad te venio, pro consolatione & sublevamine te deprecor. Ad omnia scientem loquor, cui manifesta sunt omnia interiora mea, & qui solus potes me perfecte consolari, & adjuvare. Tu scis, quibus bonis indigeo præ omnibus, & quam pauper sum in virtutibus. *Lib. 4. cap. 16. §. 1.*

II. *Implorat divinam clementiam.*

Ecce, sto ante te pauper & nudus, gratiam postulans, & misericordiam implorans. Refice esurientem mendicum tuum, accende frigiditatem meam claritate præsentiae tuæ. Verte mihi omnia terrena in amaritudinem, omnia gravia & contraria in patientiam, omnia infima & creata in contemptum & oblivionem. Erige cor meum ad te in Cœlum, & ne dimittas me vagari super terram. Tu solus mihi ex hoc jam dulcescas usque

que in seculum; quia tu solus cibus & potus meus, amor meus & gaudium meum, dulcedo mea, & totum bonum meum. *Lib. 4. cap. 16. §. 2.*

III. *Exclamat ob admirabilem Dei dignationem.*

O mira circa nos tuæ pietatis dignatio, quod tu Domine Deus meus, creator, & vivificator omnium spirituum, ad pauperculam dignaris venire animam, & cum tota divinitate tua ac humanitate, ejus impinguare esuriem! O felix mens & beata anima, quæ te Dominum Deum suum meretur devote suscipere, & in tui susceptione, spirituali gaudio repleri! *Lib. 4. cap. 3. §. 4.*

Passus XXII.

Affectus pii post SS. Communionem.

I. *Celebrat utilitates Eucharistiæ.*

Est hoc altissimum & dignissimum Sacramentum salus animæ & corporis, medicina omnis spiritualis languoris: in quo vitia mea curantur, passiones frænantur, tentationes vincuntur aut minuuntur: gratia major infunditur, virtus incepta augetur, firmatur fides, spes roboratur, & charitas ignescit ac dilatatur. *Lib. 4. cap. 4. §. 2.*

II. *Orat ut suppleat Deus, quæ desunt.*

Quidquid mihi deest, Jesu bone, Salvator sanctissime, tu pro me supple benigne & gratiose, qui omnes ad te dignatus es vocare dicens; *Venite ad me omnes, qui laboratis & onerati estis, & ego reficiam vos.* Ego quidem laboro in sudore vultus mei, dolore cordis torqueor, peccatis



tis oneror, tentationibus inquietor, multis malis passionibus implicor & premor: & non est qui adjuvet, non est qui liberet, & saluum faciat, nisi tu Domine Deus Salvator meus: cui committo me & omnia mea, ut me custodias, & perducas in vitam æternam. *Lib. 4. cap. 4. §. 4. & 5.*

III. *Offert Deo; sed quid? omnia peccata sua:*

Domine offero tibi omnia peccata & delicta mea, quæ commisi coram te, & sanctis Angelis tuis, a die quo primum peccare potui usque ad horam hanc, super placabili altari tuo: ut tu omnia pariter incendas, & comburas igne charitatis tuæ, & deleas universas maculas peccatorum meorum, & conscientiam meam ab omni delicto emendes, & restituas mihi gratiam tuam, quam peccando amisi, omnia mihi plene indulgendo, & in osculum pacis me misericorditer assumendo. *Lib. 4. cap. 9. §. 2.*

IV. *Propter quæ dolet, æternumque dolebit,*

Quid possum agere pro peccatis meis, nisi humiliter ea confitendo, & lamentando, & tuam propitiationem incessanter deprecando? Deprecor te, exaudi me propitius, ubi adsto coram te Deus meus. Omnia peccata mea mihi maxime displicent, nolo ea unquam amplius perpetrare: sed pro eis doleo & dolebo, quamdiu vixero, paratus pœnitentiam agere; & pro posse satisfacere. Dimitte mihi Deus, dimitte mihi peccata mea, propter nomen sanctum tuum: salva animam meam, quam pretioso sanguine tuo redemisti. Ecce committo me misericordiæ tuæ,
re-



resigno me manibus tuis. Age mecum secundum bonitatem tuam, non secundum meam malitiam & iniquitatem. *Lib. 4. cap. 9. §. 3.*

V. Utens Eucharista in plenissimam satisfactionem.


Non est oblatio dignior, & satisfactio major pro peccatis diluendis, quam seipsum pure & integre, cum oblatione Corporis Christi in Missa, & in Communionem Deo offerre. *Lib. 4. cap. 7. §. 4.* Charitas etenim Christi nunquam minuitur, & magnitudo propitiationis ejus nunquam exhauritur. Ita magnum, novum, & jucundum tibi videri debet, cum celebras, aut Missam audis, ac si eadem die Christus primum in uterum virginis descendens, homo factus esset: aut in cruce pendens, pro salute hominum pateretur, & moreretur. *Lib. 4. cap. 2. §. 6.*

Passus XXIII.

Non tantum utile, sed & necessarium, frequenter communicare.

I. Communio a passionibus & vitiis curat, contra tentationes munit,

Frequenter recurrendum est ad fontem gratiae, & divinae misericordiae, ad fontem bonitatis & totius puritatis: quatenus a passionibus tuis & vitiis curari valeas, & contra universas tentationes & fallacias diaboli, fortior atque vigilantior effici merearis. *Lib. 4. cap. 10. §. 1.*



II. *In anima vires amissas reparat.*

O admirabilis & abscondita gratia sacramenti, quam norunt tantum Christi fideles; infideles autem, & peccatis fervientes, experiri non possunt! In hoc Sacramento conferitur spiritualis gratia, & reparatur in anima virtus amissa: & per peccatum deformata, redit pulchritudo. Tanta est aliquando hæc gratia, ut ex plenitudine collatæ devotionis, non tantum mens, sed & debile corpus, vires sibi præstitas sentiat ampliores. *Lib. 4. cap. 1. §. 11.*

III. *Sancta proposita confirmat.*

Necessarium quidem mihi est, qui tam sæpe labor, & pecco, tam cito torpesco & deficio; ut per frequentes orationes & confessiones, ac sacram Corporis tui perceptionem, me renovem, mundem & accendam; ne forte diutius abstinendo, a sancto proposito defluam. *Lib. 4. cap. 3. §. 2.*

IV. *Retrahit a malo, confortat in bono.*

Proni enim sunt sensus hominis ad malum, ab adolescentia sua, & nisi succurrat divina medicina, labitur homo mox ad pejora. Retrahit ergo sancta Communio a malo, & confortat in bono. Si enim modo tam sæpe negligens sum & tepidus, quando communico aut celebros; quid fieret, si medelam non sumerem, & tam grande juvamen non quærerem? *Lib. 4. cap. 3. §. 3.*



Passus XXIV.

Votum peccatoris : ejusdemque Oratio
pro offensis.

I. *Cupit pro se orare omnes sacer-
dotes, & devote communicantes.*


Accipe vota mea Domine Deus meus. Qui-
cumque reverenter ac devote altissimum Sa-
cramentum tuum celebrant, & plena fide reci-
piunt, gratiam & misericordiam apud te invenire
mereantur, & pro me peccatore suppliciter ex-
orent. Cumque optata devotione, ac fruibili
unione potiti fuerint, & bene consolati, & mi-
rifice refecti, de sacra mensa cœlesti abscesse-
rint, mei pauperis recordari dignentur. *Lib. 4.
cap. 17. §. 5.*

II. *Orat pro offendentibus & offensis.*

Offero etiam tibi preces & hostias placationis, pro illis specialiter, qui me in aliquo læ-
ferunt, contristaverunt, aut vituperaverunt, vel
aliquod damnum vel gravamen intulerunt : pro his
quoque omnibus, quos aliquando contristavi,
conturbavi, gravavi, & scandalizavi, verbis, factis
scienter vel ignoranter, ut nobis omnibus pari-
ter indulgeas peccata nostra & mutuas offensiones.
Lib. 4. cap. 9. §. 6.

III. *Petit mutuam vigere charitatem.*

Aufer Domine a cordibus nostris omnem su-
spicionem, indignationem, iram & disceptationem,
& quidquid potest charitatem lædere, & fraternam
dilectionem minuere. Miserere, miserere Domi-
ne



ne misericordiam tuam poscentibus, da gratiam indigentibus, & fac nos tales existerere, ut simus digni gratia tua perfrui, & ad vitam proficiamus æternam. Amen. *Lib. 4. cap. 9. §. 6.*

Passus XXV.

De nova & interna conversatione.

I. *Vere se convertere ad Deum,*

Regnum Dei intra vos est, dicit Dominus. Convertite te ex toto corde ad Dominum: & relinque hunc miserum mundum, & inveniet anima tua requiem. Disce exteriora contemnere, & ad interiora te dare, & videbis regnum Dei in te venire. Est enim regnum Dei, pax & gaudium in Spiritu Sancto, quod non datur impiis. *Lib. 2. cap. 1. §. 1.*

II. *Quis tandem possit?*

Amator Jesu & veritatis, & verus internus & liber ab affectionibus inordinatis, potest se ad Deum libere convertere, & elevare supra se ipsum in spiritu, ac fruitive quiescere. *Lib. 2. cap. 1. §. 6.*

III. *Et quo fructu fiat.*

Sicut ferrum missum in ignem, amittit rubiginem, & totum candens efficitur: sic homo integre ad Deum se convertens, a torpore exuitur, & in novum hominem transmutatur. *Lib. 2. cap. 4. §. 2.*

Paf-



Passus XXVI.

De necessitate gratiæ divinæ, ad novam conversationem.

I. *Summa gratiæ necessitas:*

Domine Deus meus, qui me creasti ad imaginem & similitudinem tuam, concede mihi hanc gratiam, quam ostendisti tam magnam & necessariam ad salutem: ut vincam pessimam naturam meam, trahentem ad peccata, & in perditionem. Sentio enim in carne mea legem peccati, contradicentem legi mentis meæ, & captivam me ducentem ad obediendum sensualitati in multis: nec possum resistere passionibus ejus, nisi assistat tua sanctissima gratia, cordi meo ardentem infusa. Opus est gratia tua & magna gratia, ut vincatur natura ad malum semper pronā ab adolescentia sua. *Lib. 3. cap. 55. §. 1. & 2.*

II. *Sine qua totus homuncio nil est.*

Nulla est sanctitas, si manum tuam Domine subtrahas. Nulla prodest sapientia, si gubernare desistas. Nulla juvat fortitudo, si conservare desinas. Nulla secura castitas, si eam non protegas. Nulla propria custodia, si non adsit tua sacra vigilantia. Nam relictī, mergimur & perimus: visitati vero, erigimur & vivimus. Instabiles quippe sumus, sed per te confirmamur: tepescimus, sed a te accendimur. *Lib. 3. cap. 14. §. 2.*

III. *Orationes sæpius dicendæ.*

Robora me cœlesti fortitudine, ne vetus homo, misera caro spiritui necdum plene subacta, prævaleat dominari; adversus quam certare oportet.



tebit, quamdiu spiratur in hac vita miserrima. *Lib. 3. cap. 20. §. 3.* Emitte lucem tuam, & veritatem, ut luceant super terram: quia terra sum inanis & vacua, donec illumines me. Effunde gratiam desuper: perfunde cor meum rore cœlesti: ministra devotionis aquas, ad irrigandam faciem terræ, ad producendum fructum bonum & optimum. Eleva mentem pressam mole peccatorum, & ad cœlestia totum desiderium meum suspende: ut gustata suavitatem supernæ felicitatis, pigeat de terrenis cogitare. *Lib. 3. cap. 23. §. 9.* Concede mihi, benignissime Jesu, gratiam tuam, ut mecum sit, & mecum laboret, mecumque in finem usque perseveret. *Lib. 3. cap. 15. §. 3.* Fiat Domine mihi possibile per gratiam, quod mihi impossibile videtur per naturam. *Lib. 3. cap. 19. §. 4.*

Passus XXVII.

Efficax & quotidiana renovatio propositorum.

1. Tantus est profectus noster, quantum est propositum; Nunquam desertum,

Secundum propositum nostrum, cursus profectus nostri: & multa diligentia opus est, bene proficere volenti. Quod si fortiter proponens, sæpe deficit: quid ille, qui raro aut minus fixe aliquid proponit? Variis tamen modis contingit desertio propositi nostri: & levis omissio exercitiorum, vix sine aliquo dispendio transit. Justorum propositum in gratia Dei potius, quam in propria sapientia pendet: in quo semper confidunt, quidquid arripiunt.

In



In gratia Dei fundatum,

Nam homo proponit, sed Deus disponit, nec est in homine via ejus. *Lib. 1. cap. 19. §. 2.*

II. Et quotidie renovatum,

Omni die renovare debemus propositum nostrum, & ad fervorem nos excitare: quasi hodie primum ad conversionem venissemus, atque dicere; Adjuva me Domine Deus in bono proposito, & sancto servitio tuo: & da mihi nunc hodie perfecte incipere, quia nihil est, quod hactenus feci. *Lib. 1. cap. 19. §. 1.*

III. Adversus gulam.

Accinge te sicut vir, contra diabolicas nequitias. Frena gulam, & omnem carnis inclinationem facilius frenabis.

Et otium præcipue.

Nunquam sis ex toto otiosus; sed aut legens aut scribens, aut orans, aut meditans, aut aliquid utilitatis pro communi laborans. *Lib. 1. cap. 19. §. 4.*

Passus XXVIII.

De nimia fragilitate naturæ corruptæ.

I. Fragilitatem meam nimiam

Omnes fragiles sumus, sed tu neminem fragiliorem te ipso tenebis. *Lib. 1. cap. 2. §. 4.*
Occasiones hominem fragilem non faciunt, sed qualis sit, ostendunt, *Lib. 1. cap. 16. §. 4.*



II. *Confitebor Deo,*

Confitebor adversum me injustitiam meam: confitebor tibi Domine infirmitatem meam. Sæpe parva res est, quæ me dejicit & contristat. Propono me fortiter acturum, sed cum modica tentatio venerit, magna mihi angustia fit. Valde vilis quandoque res est, unde gravis tentatio provenit. Et dum puto me aliquantulum tutum, cum non sentio, invenio me nonnunquam pœne devictum ex levi flatu. *Lib. 3. cap. 20. §. 1.*

III. *Ut misereatur mei.*

Vide ergo Domine humilitatem meam, & fragilitatem tibi undique notam. Miserere, & eripe me de luto, ut non infigar, non permaneam dejectus usquequaque. *Lib. 3. cap. 20. §. 2.* Utinam fortissime Deus Israel, zelator animarum fidelium, respicias servi tui laborem & dolorem, assistasque illi in omnibus, ad quæcumque perrexerit. *Ibid. §. 3.* Quis omnia prævidere, quis præcavere futura mala sufficit? Si prævisa sæpe etiam lædunt, quid improvisa, nisi graviter feriunt? *Lib. 3. cap. 45. §. 3.*

Passus XXIX.

De facili relapsu in pristina peccata.

I. *Tam facilis in priora relapsus,*

O quanta fragilitas humana, quæ semper prona est ad vitia! Hodie confiteris peccata tua, & cras iterum perpetras confessa. Nunc proponis cavere, & post horam agis, quasi nihil proposuisses. Merito ergo nos ipsos humiliare possumus, nec unquam aliquid magni de nobis sentire; quia tam fragiles & instabiles sumus. *Lib. 1. cap. 22. §. 6.*

II.

II. *Causa est meæ confusionis:*

Hoc est, quod me frequenter reverberat, & coram te confundit; quod tam labilis sum, & infirmus ad resistendum passionibus. Etsi non omnino ad consensionem, tamen mihi etiam molesta & gravis est earum infectatio, & tædet valde sic quotidie vivere in lite. Et hinc nota mihi fit infirmitas mea: quia multo facilius irruunt abominandæ semper phantasiæ, quam discedunt.
Lib. 3. cap. 20. §. 2.

III. *Et clamoris ad Deum.*

Tu autem Domine, semper idem ipse es, & permanes in æternum semper bonus, justus & sanctus, bene, juste, ac sancte agens omnia, & disponens in sapientia. Sed ego, qui ad defectum sum magis pronus, quam ad profectum, non sum semper in uno statu perdurans: quia septem tempora mutantur super me. Verum tamen cito melius fit, cum tibi placuerit, & manum porrexeris adjutricem: quia tu solus sine humano suffragio poteris auxiliari, & in tantum confirmare, ut vultus meus amplius in diversa non mutetur, sed in te uno cor meum convertatur, & quiescat.
Lib. 3. cap. 40. §. 3.

Passus XXX.

Examen conscientiae generale quotidie faciendum.

Quoties per diem faciendum.

Si non continue te vales colligere, saltem interdum: & ad minus semel in die, mane videlicet aut vespere. Mane propone, vespere discu-



cute mores tuos, qualis hodie fuisti in verbo, opere & cogitatione, quia in his sæpius forsitan offendisti Deum & proximum. *Lib. 1. cap. 19. §. 4.* Gaudebis semper vespere, si diem expendas fructuose. *Lib. 1. cap. 25. §. 11.*

Examinis generalis modus, particulas seu puncta quinque complectentis.

PUNCTUM PRIMUM.

Deo pro beneficiis acceptis, gratiæ agendæ.

Gratiæ agendæ Deo.

Da mihi Domine, cum magna reverentia ac diligenti consideratione beneficia tua, tam in generali quam in speciali memorari; ut digne tibi ex hinc, valeam gratias referre. Verum scio, & confiteor, nec pro minimo puncto, me posse debitas gratiarum laudes persolvere. Minor ego sum, omnibus bonis mihi præstitis: & cum tuam nobilitatem attendo, deficit præ magnitudine spiritus meus. Omnia quæ in anima habemus & corpore, & quæcumque exterius vel interius, naturaliter vel supernaturaliter possidemus, tua sunt beneficia, & te beneficum, pium, ac bonum commendant, a quo bona cuncta accepimus. Et si alius plura, alius pauciora accepit, omnia tamen tua sunt: & sine te, nec minimum potest haberi. Omnia ex te, & ideo in omnibus es laudandus. *Lib. 3. cap. 22. §. 1. 2. 3.*

PUNC-

PUNCTUM SECUNDUM.

Pro cognitione & expulsiōe peccatorum gratia flagitanda.

Postulanda peccatorum cognitio.

Clarifica me, Jesu bone, claritate interni luminis: & educ de habitaculo cordis mei, tenebras universas. *Lib. 3. cap. 23. §. 4.* Ego sum pauperrimus servulus tuus & abjectus vermiculus: multo pauperior & contemptibilior, quam scio, & dicere audeo. Memento tamen Domine, quia nihil sum, nihil habeo, nihilque valeo. Tu solus bonus, justus & sanctus; tu omnia potes, omnia præstas, omnia imples, solum peccatorem inanem relinquens. Reminiscere miserationum tuarum, & imple cor meum gratia tua, qui non vis esse vacua opera tua. *Lib. 3. cap. 3. §. 6.*

PUNCTUM TERTIUM.

De admittis præsentis die peccatis, rationem ab anima nostra exigere.

Ad trutinam vocandum, quid cogitaris, dixeris, feceris.

Discute mores tuos; qualis hodie fuisti in verbo, opere, & cogitatione: quia in his sæpius forsitan offendisti Deum & proximum. *Lib. 1. cap. 19. §. 4.*

Hanc ad rem serviet etiam perfectis hæc, quam ex *lib. 4. cap. 7. §. 2. subdimus,*

Tabella Peccatorum & Defectuum.

1. Ingemisce, & dole, quod adhuc ita carnalis sis & mundanus.



2. Tam immortificatus a passionibus.
3. Tam plenus concupiscentiarum motibus.
4. Tam incustoditus in sensibus exterioribus.
5. Tam sæpe multis vanis phantasiis implicatus.
6. Tam multum inclinatus ad exteriora.
7. Tam negligens ad interiora.
8. Tam levis ad risum & dissolutionem.
9. Tam durus ad fletum & compunctionem.
10. Tam promptus ad laxiora, & carnis com-
moda.
11. Tam segnis ad rigorem & fervorem.
12. Tam curiosus ad nova audienda, & pulchra
intuenda.
13. Tam remissus ad humilia, & abjecta am-
plectenda.
14. Tam cupidus ad multa habenda.
15. Tam parcus ad dandum.
16. Tam tenax ad retinendum.
17. Tam inconsideratus in loquendo.
18. Tam incontinens in tacendo.
19. Tam incompositus in moribus.
20. Tam importunus in actibus.
21. Tam effusus super cibum.
22. Tam surdus ad Dei verbum.
23. Tam velox ad quietem.
24. Tam tardus ad laborem.
25. Tam vigilans ad fabulas.
26. Tam somnolentus ad vigiliis sacras.
27. Tam festinus ad finem.
28. Tam vagus ad attendendum.
29. Tam negligens in horis persolvendis.
30. Tam tepidus in celebrando.
31. Tam aridus in communicando.
32. Tam cito distractus.
33. Tam raro plene tibi collectus.



34. Tam subito commotus ad iram.
35. Tam facilis ad alterius displicentiam.
36. Tam pronus ad iudicandum.
37. Tam rigidus ad arguendum.
38. Tam latus ad prospera.
39. Tam debilis in adversis.
40. Tam sæpe multa bona proponens, & modicum ad effectum perducens. *Lib. 4. cap. 7. §. 2.*

PUNCTUM QUARTUM.

Poscere veniam de delictis.

Veniam posce de præteritis.

Habeas displicentiam omnium peccatorum tuorum in generali, & pro quotidianis excessibus magis in speciali doleas & gemas. Et si tempus patitur, Deo in secreto cordis, cunctas confitere passionum tuarum miserias. *Lib. 4. cap. 7. §. 1.*

In vera contritione & cordis humiliatione, nascitur spes veniæ, reconciliatur perturbata conscientia, reparatur gratia perdita, tuetur homo a futura ira, & occurrunt sibi mutuo in osculo sancto Deus & pœnitens anima. *Lib. 3. cap. 52. §. 3.*

PUNCTUM QUINTUM.

Proponere cum Dei gratia emendationem.

Propone de futuris.

His & aliis defectibus tuis, cum dolore & magna displicentia propriæ infirmitatis confesis ac deploratis, firmum statue propositum semper emendandi vitam tuam, & in melius proficiendi. *Lib. 4. cap. 7. §. 3.*



Si fecerit homo, quod in se est, & vere pœnituerit; quotiescunque pro venia & gratia ad me accesserit, vivo ego, dicit Dominus, qui nolo mortem peccatoris, sed ut magis convertatur & vivat: quoniam peccatorum suorum non recordabor amplius, sed cuncta sibi indulta erunt. *Lib. 4. cap. 7. §. 4.*

Passus XXXI.

Examen particulare, ad faciliorem & celeriore peccati, seu vitii cujusvis extirpationem.

I. *Necessitas hujus examinis.*

Proh dolor! statim post modicam recollectionem foras erumpimus: nec opera nostra, districta examinatione trutinamus. Ubi jacent affectus nostri, non attendimus: & quam impura sint omnia, non deploramus. Omnis quippe caro corruerat viam suam, & ideo sequebatur diluvium magnum. Cum ergo interior affectus noster multum corruptus sit, necesse est, ut actio sequens, index carentiæ interioris vigoris, corrumpatur. Ex puro corde, procedit fructus bonæ vitæ. *Lib. 3. cap. 31. §. 4.*

II. *Modus & materia circa quam.*

Conemur, quantum possumus, adhuc leviter deficimus in multis. Semper tamen aliquid certi proponendum est, & contra illa præcipue, quæ amplius nos impediunt. Exteriora nostra & interiora pariter, nobis scrutanda sunt & ordinanda; quia utraque expediunt ad profectum. *Lib. 1. cap. 19. §. 3.*

III.

III. *Fructus.*

Si tantum in exterioribus observantiis, profectum religionis ponimus, cito finem habebit devotio nostra. Sed ad radicem securim ponamus, ut purgati a passionibus, pacificam mentem possideamus. *Lib. I. cap. II. §. 4.* Si modicam violentiam faceremus in principio, tunc postea cuncta possemus facere cum levitate & gaudio. *cap. eod. §. 5.*

IV.

Si omni anno, unum vitium extirparemus, cito viri perfecti efficeremur. Sed modo e contrario sæpe sentimus; ut meliores & puriores in initio conversionis, nos fuisse inveniamus, quam post multos annos professionis. *Lib. I. cap. II. §. 5.*

Passus XXXII.

Examen pro suo cujusque statu, certis temporibus anni renovandum.

I. *Alia aliis, vel alias conducunt.*

Non possunt omnes habere unum exercitium: sed aliud isti, aliud illi, magis deservit. Etiam pro temporis congruentia, diversa placent exercitia: quia alia in festis, alia in feriatis, magis sapiunt diebus. Aliis indigemus tempore tentationis, & aliis tempore pacis & quietis. Alia, cum tristamur, libet cogitare, & alia, cum læti in Domino fuerimus. *Lib. I. cap. 19. §. 5.*

II. *Instituenda renovatio, ac si mors immineret:*

Circa principalia festa, renovanda sunt bona exercitia: & sanctorum suffragia ferventius implo-



ploranda. De festo in festum proponere debemus, quasi tunc de hoc sæculo migraturi, & ad æternum festum perventuri. Ideoque sollicitè nos præparare debemus in devotis temporibus, & devotius conversari, atque omnem observantiam strictius custodire, tanquam in brevi præmium laboris nostri a Deo percepturi. *Lib. I. cap. 19. §. 6.*

III. *Qua non secuta, quid cogitandum.*

Et si dilatum fuerit, credamus nos minus bene præparatos, atque indignos tantæ adhuc gloriæ, quæ revelabitur in nobis tempore præfinito: & studeamus nos melius ad exitum præparare. Beatus fervus (ait Evangelista Lucas) quem, cum venerit Dominus, invenerit vigilantem. Amen dico vobis, super omnia bona sua constituet eum. *Lib. I. cap. 19. §. 7.*

Passus XXXIII.

De sancta cordis compunctione.

I. *Commota sanctæ compunctionis.*

Date ad cordis compunctionem, & invenies devotionem. Compunctio multa bona aperit, quæ dissolutio cito perdere consuevit. Mirum est, quod homo potest unquam perfecte in hac vita lætari: qui suum exilium, & tam multa pericula animæ suæ considerat, & pensat. *Lib. I. cap. 21. §. 1.*

II. *Incommota neglectæ,*

Propter levitatem cordis, & negligentiam defectuum nostrorum, non sentimus animæ nostræ
do-



dolores: sed sæpe vane ridemus, quando merito flere deberemus. Felix, qui abjicere potest omne impedimentum distractionis, & ad unionem se recolligere sanæ compunctionis. *Lib. 1. cap. 21. §. 2.*

III. *Materia sufficiens compunctionis.*

Quando homo est perfecte, compunctus, tunc gravis & amarus est ei totus mundus. Bonus homo sufficientem invenit materiam dolendi & flendi. Sive enim se considerat, sive de proximo pensat, scit, quia nemo sine tribulatione hic vivit. Et quanto strictius sese considerat, tanto amplius dolet. Materię justi doloris & internę compunctionis, sunt peccata ac vitia nostra, quibus ita involuti jacemus, ut raro cœlestia contemplari valeamus. *Lib. 1. Cap. 21. §. 4.*

IV. *Affectus.*

Nolo consolationem, quæ mihi aufert compunctionem. *Lib. 2. cap. 10. §. 3.* Opto magis sentire compunctionem, quam scire ejus definitionem. *Lib. 1. cap. 1. §. 3.*

Passus XXXIV.

De ratione conservandi spiritum compunctionis.

I. *Vera sui cognitione.*

Da Deo, quod Dei est: & tibi adscribe, quod tuum est: hoc est, Deo gratias pro gratia tribue; tibi autem soli culpam, & dignam poenam pro culpa deberi sentias. *Lib. 2. cap. 10. §. 3.*

II.



II. Solitudine.

Si vis corde tenus compungi, intra cubile tuum, & exclude tumultus mundi, sicut scriptum est: *In cubilibus vestris compungimini: In cella invenies, quod deforis sæpius amittes. Lib. 1. cap. 20. §. 5.*

III. Lẽctione accomoda.

Quære aptum tempus vacandi tibi, & de beneficiis Dei frequenter cogita. Relinque curiosa. Tales perlege materias, quæ compunctionem magis præstant, quam occupationem. *Lib. 1. c. 20. §. 1.*

IV. Oratione devota.

Fili pretiosa est gratia mea, non patitur se misceri extraneis rebus, nec consolationibus terrenis. Abjicere ergo oportet omnia impedimenta gratiæ, si optas ejus infusionem suscipere. Pete secretum tibi, ama solus habitare tecum, nullius require confabulationem: sed magis ad Deum devotam effunde precem, ut compunctam teneas mentem, & puram conscientiam. Totum mundum nihil æstima: Dei vacationem, omnibus exterioribus antepone. Non enim poteris mihi vacare, & in transitoriis pariter delectari. *Lib. 3. cap. 53. §. 1.*

Passus XXXV.

De commodis sanctæ compunctionis.

I. Consolatio cœlestis.

Nemo dignus est cœlesti consolatione, nisi diligenter se exercuerit in sancta compunctione. *Lib. 1. cap. 20. §. 5.* Tamen quod divinas con-
so-



solationes non habemus, aut rarius sentimus, nos in culpa sumus: quia compunctionem cordis non quærimus, nec vanas & externas omnino abjicimus, *Lib. 1. cap. 21. §. 3.*

II. *Intellectus divinarum Scripturarum.*

In silentio & quiete proficit anima devota, & discit abscondita Scripturarum. Ibi invenit fluenta lacrymarum, quibus singulis noctibus se lavet & mundet, ut Conditori suo tanto familiarior fiat, quanto longius ab omni sæculari tumultu degit. *Lib. 1. cap. 20. §. 6.*

III. *Unctio Spiritus.*

Sæpe est inopia spiritus, unde tam leviter conqueritur miserum corpus. Ora igitur humiliter ad Dominum, ut det tibi compunctionis spiritum, & dic cum Propheta: Ciba me Domine pane lacrymarum, & potum da mihi, in lacrymis, in mensura. *Lib. 1. cap. 21. §. 6.*

IV. *Colloquium ex affectu.*

Domine Deus meus, omnia bona mea tu es. Et quis ego sum, ut audeam ad te loqui? Quomodo possum me tolerare in hac misera vita: nisi me confortaverit misericordia & gratia tua? Noli avertere faciem tuam a me: noli visitationem tuam prolongare: noli consolationem tuam abstrahere, ne fiat anima mea sicut terra sine aqua tibi. Domine, doce me facere voluntatem tuam; doce me coram te digne & humiliter conversari: quia sapientia mea tu es, qui in veritate me cognoscis, & cognovisti, antequam fieret mundus, & antequam natus essem in mundo *Lib. 3. cap. 3. §. 6. & 7.*



Passus XXXVI.

De bono timoris Dei.

I. *Timor Dei necessarius ad profectum;*

Si vis aliquid proficere, conserva te in timore Dei, & noli esse nimis liber: sed sub disciplina cohibe omnes sensus tuos, nec ineptæ te tradas lætitiæ. *Lib. 1. cap. 21. §. 1.* Non vera libertas, nec bona lætitia, nisi in timore Dei, cum bona conscientia. *Ib. §. 2.*

II. *Et ad gratiam Dei conservandam:*

Non satis discrete agit, qui se totum lætitiæ tradit, obliviscens pristinæ inopiæ suæ, & casti timoris Domini, qui timet gratiam oblatam amittere. *Lib. 3. cap. 7. §. 3.*

III. *Immo ad perseverandum in bono,*

Bonum est, ut, si necdum amor a malo te revocat, saltem timor gehennalis coerceat. Qui vero timorem Dei postponit, diu stare in bono non valebit, sed diaboli laqueos citius incurret. *Lib. 1. cap. 24. §. 7.*

IV. *Omniū Sanctorum exemplo.*

Semper Sanctorum securitas plena timoris Dei extitit. Nec eo minus solliciti, & humiles in se fuerunt, quia magnis virtutibus & gratia emicuerunt. *Lib. 1. cap. 20. §. 3.*



Passus XXXVII.

De diligenti custodia sui ipsius.

I. *Ne cito perdas, quod vix tandem acquisitum.*

Cito potest perdi per negligentiam, quod multo labore vix tandem acquisitum est per gratiam. *Lib. 1. cap. 21. §. 6.* Esto vigilans & diligens in Dei servitio: & cogita frequenter: ad quid venisti, & cur sæculum reliquisti? Nonne ut Deo viveres, & spiritualis homo fieres? Igitur ad profectum ferveas, quia mercedem laborum tuorum in brevi recipies: nec erit tunc amplius timor aut dolor in finibus tuis. Modicum nunc laborabis, & magnam requiem, imo perpetuam lætitiā invenies. Si tu permanferis fidelis & fervidus in agendo, Deus procul dubio erit fidelis & locuples in retribuendo. *Lib. 1. cap. 25. §. 1.*

II. *Quidquid sit de aliis hominibus;*

Vigila super te ipsum, excita te ipsum, admone te ipsum; & quidquid de aliis sit, non negligas te ipsum. *Lib. 1. cap. 25. §. 11.* Cave a multiloquio, mane in secreto, & fruiere Deo tuo. Ipsum enim habes, quem totus mundus tibi auferre non potest. *Lib. 4. cap. 12. §. 4.*

III. *De cæteris omnibus rebus, tu tui curam gere.*

Internus homo sui ipsius curam omnibus curis anteponit: & qui sibi ipsi diligenter intendit, faciliter de aliis tacet. Nunquam eris internus & devotus, nisi de alienis filueris, & ad te ipsum specialiter respexeris. Si tibi & Deo totaliter



intendis, modicum te movebit, quod foris percipis. Ubi es, quando tibi ipsi præsens non es? Et quando omnia percurristi, quid (te neglecto) profecisti? Si debes habere pacem, & unionem veram: oportet, quod totum adhuc postponas, & te solum præ oculis habeas. *Lib. 2. cap. 5. §. 2.*

Passus XXXVIII.

De tepore profligando.

I. *Tepidus parva metuit.*

Si incipis tepescere, incipies male habere. *Lib. 1. cap. 25. §. 11.* Quando homo incipit tepescere, tunc parvum metuit laborem, & libenter externam accipit consolationem. *Lib. 2. cap. 4. §. 3.*

Patitur angustias undique.

Religiosus negligens & tepidus, habet tribulationem super tribulationem, & ex omni parte patitur angustiam: quia interiori consolatione caret, & exteriorem quærere prohibetur. Religiosus extra disciplinam vivens, gravi patet ruinæ. Qui laxiora quærît & remissiora, semper in angustis erit: quia aut unum, aut reliquum sibi displicebit. *Lib. 1. cap. 25. §. 7.*

II. *Magnum sibi accersit malum:*

Quid fiet de nobis adhuc in fine, qui tepescimus tam mane? Væ nobis, si sic volumus declinare ad quietem, quasi jam pax sit & securitas, cum necdum appareat vestigium veræ sanctitatis, in conversatione nostra. *Lib. 1. cap. 22. §. 7.*

III.



III. *Aliis tristitiam.*

Quam triste est & grave, videre inordinate ambulantes: qui ea, ad quæ vocati sunt, non exercent. Quam nocivum est, negligere vocationis suæ propositum: & ad non commissa sensum inclinare! Memor esto arrepti propositi, & imaginem tibi propone Crucifixi. Bene verecundari potes, inspecta vita Jesu Christi, quia necdum magis illi te conformare studuisti. *Lib. 1. cap. 25. §. 5. & 6.*

IV. *Obligatio proficiendi,*

Fervor & profectus noster quotidie deberet crescere; sed nunc pro magno videtur: si quis primi fervoris partem possit retinere. *Lib. 1. cap. 11. §. 5.* Jam magnus putatur, si quis transgressor non fuerit: si quis, quod accepit, cum patientia tolerare potuerit. Ah tepor & negligentia status nostri! quod tam cito declinamus a pristino fervore; & jam tædet vivere, præ lassitudine & tepore. Utinam in te penitus non dormiret profectus virtutum, qui multa sæpius exempla vidisti devotorum. *Lib. 1. cap. 18. §. 5. & 6.*

V. *Et memoria mortis excitant tepentes.*

Si frequentius de morte tua, quam de longitudine vitæ cogitares, non dubium, quin ferventius te emendares. Si etiam futuras inferni sive purgatorii pœnas cordialiter perpenderes, credo, quod libenter laborem & dolorem sustineres, & nihil rigoris formidares. Sed quia ad cor ista non transeunt, & blandimenta adhuc amamus, ideo frigidi & valde pigri remanemus. *Lib. 1. cap. 21. §. 5.*



DE MEMORIA NOVISSIMORUM.

Passus XXXIX.

Mortem non procul abesse.

I. *Homo brevi vivens tempore,*

Valde cito erit tecum hic factum: vide aliter, quomodo te habeas. Hodie homo est, & cras non comparet. Cum autem sublatus fuerit ab oculis, etiam cito transit a mente. O hebetudo & duritia cordis humani, quod solum præsentia meditatur, & futura non magis prævidet. *Lib. 1. cap. 23. §. 1.*

II. *Nullum tempus sibi certo polliceatur,*

Cum mane fuerit, puta te ad vesperum non perventurum. Vespere autem facto, mane non audeas tibi polliceri. Semper ergo paratus esto, & taliter vive, ut nunquam te imparatum mors inveniat. Multi subito & improvise moriuntur: nam hora, qua non putatur, Filius hominis venturus est. *Lib. 1. cap. 23. §. 3.*

III. *Quotidianis exemplis doctus.*

Quam multi decepti sunt, & insperate de corpore extracti? Quoties audisti a dicentibus, quia ille gladio cecidit, ille submersus est, ille ab alto ruens cervicem fregit, ille manducando obrigit, ille ludendo finem fecit? Alius igne, alius ferro, alius peste, alius latrocinio interiit: & sic omnium finis mors est, & vita hominum tanquam umbra subito pertransit. *Lib. 1. cap. 23. §. 7.*

Passus



Passus XL.

Bonæ conscientiæ, mortem horro-
ri non esse.

I. *Homo bonus mortem non timet:*

Si bonam conscientiam haberes, non multum mortem timeres. Melius esset, peccata cavere, quam mortem fugere. *Lib. I. cap. 23. §. 1.*

II. *Sed ad eam se disponit.*

Beatus, qui horam mortis suæ semper ante oculos habet, & ad moriendum quotidie se disponit. *Lib. I. cap. 23. §. 2.*

III. *Talis jam, qualis tunc esse cupit.*

Quam felix & prudens, qui talis nunc nititur esse in vita, qualis optat inveniri in morte. Dabit namque magnam fiduciam feliciter moriendi, perfectus contemptus mundi, fervens desiderium in virtutibus proficiendi, amor disciplinæ, labor pœnitentiæ, promptitudo obedientiæ, abnegatio sui, & supportatio cujuslibet adversitatis pro amore Christi. *Lib. I. cap. 23. §. 4.*


Passus XLI.

Quid faciendum ante Mortem?

I. *Sic te geras, quasi hodie moriturus,*

Sic te in omni facto & cogitatu deberes tenere, quasi hodie esses moriturus. Si hodie non es paratus, quomodo cras eris? Cras est dies incerta, & qui scis, si crastinum habebis? *Lib. I. cap. 23. §. 1.*

II.



II. *Simili cæteris conditione.*

Si vidisti aliquando hominem mori, cogita, quia & tu per eandem transibis viam. *Lib. 1. cap. 23. §. 2.*

III. *Bona operare, dum sanus es;*

Multa bona potes operari, dum sanus es: sed infirmitatus, nescio, quid poteris. *Lib. 1. cap. 23. §. 4.* Pauci ex infirmitate meliorantur: sic & qui multum peregrinantur, raro sanctificantur. *Ibidem.*

IV. *Dum tempus habes acceptabile.*

Melius est nunc tempestive providere, & aliquid boni præmittere, quam super aliorum auxilio post mortem sperare. Nunc tempus est valde pretiosum, nunc sunt dies salutis, nunc tempus acceptabile. Sed proh dolor, quod hoc utilius non expendis, in quo promereri vales, unde æternaliter vivas! *Lib. 1. cap. 23. §. 5.*

V. *Semper memento mori.*

Memento semper finis, & quia perditum non redit tempus. *Lib. 1. cap. 25. §. 11.* Non habes hic manentem civitatem; & ubicumque fueris, extraneus es & peregrinus: nec requiem aliquando habebis, nisi Christo intime fueris unitus. *Lib. 2. cap. 1. §. 3.*

Passus XLII.

Sensa hominis in articulo mortis.

I. *De tota vita præterita.*

Quando illa extrema hora venerit, multum aliter sentire incipies de tota vita tua præterita-



rita: & valde dolebis, quod tam negligens & remissus fuisti. *Lib. 1. cap. 23. §. 3.*

II. *De angusto tempore emendationis.*

Veniet, quando unum diem seu horam pro emendatione desiderabis, & nescio, an impetabis. *Lib. 1. cap. 23. §. 5.*

III. *Ergo jam time, ne timeas tunc.*

Eja charissime, de quanto periculo te poteris liberare, de quam magno timore eripere, si modo semper timoratus fueris, & suspectus de morte. Stude nunc taliter vivere, ut in hora mortis valeas potius gaudere quam timere. *Lib. 1. cap. 23. §. 6.*

IV. *Jam affectus tuos depone.*

O quanta fiducia erit morituro, quem nullius rei affectus detinet in mundo. Sed sic segregatum cor habere ab omnibus, æger necdum capit animus, nec animalis homo novit interni hominis libertatem. *Lib. 3. cap. 53. §. 2.*

Passus XLIII.

Quid futurum post mortem?

I. *Nulla tui memoria.*

Cum homo sublatus fuerit ab oculis, etiam cito transit a mente. *Lib. 1. cap. 23. §. 1.* Quis memorabitur tui post mortem? & quis orabit pro te? Age, age nunc charissime, quidquid agere potes; quia nescis, quando morieris: nescis etiam, quid te post mortem sequetur. *Lib. 1. cap. 23. §. 8.*



II. *Incuria tuorum amicorum.*

Noli confidere super amicos & proximos, nec in futurum tuam differas salutem; quia citius obliviscentur tui homines, quam æstimas. Si non es pro te ipso sollicitus modo, quis erit pro te sollicitus in futuro? *Lib. 1. cap. 23. §. 5.*

III. *Translatio munerum ad alios.*

Dic mihi, ubi sunt modo omnes illi domini & magistri, quos bene novisti, dum adhuc viverent, & studiis flourerent? Jam eorum præbendas alii possident; & nescio, utrum de eis recogitent. In vita sua aliquid esse videbantur, & modo de illis tacetur. *Lib. 1. cap. 3. §. 5.* O quam cito transit gloria mundi! *Ibid. §. 6.*

Passus LXIV.

Dispositiones ad felicem mortem.

I. *Cura rerum cælestium.*

Dum tempus habes, congrega tibi divitias immortales. Præter salutem tuam, nihil cogites: solum quæ Dei sunt, cures. Fac nunc tibi amicos, venerando Dei Sanctos, & eorum actus imitando: ut cum defeceris in hac vita, illi te recipiant in æterna tabernacula. *Lib. 1. cap. 23. §. 8.*

II. *Contemptus mundanarum.*

Disce nunc mori mundo, ut tunc incipias vivere cum Christo. Disce nunc omnia contemnere, ut tunc possis libere ad Christum pergere. Castiga nunc corpus tuum per pœnitentiam, ut tunc certam valeas habere confidentiam. *Lib. 1. cap. 23. §. 6.*

III.



III. *Status peregrinationis in hoc orbe.*

Serva te tanquam peregrinum & hospitem super terram, ad quem nihil spectat de mundi negotiis. Serva cor liberum, & ad Deum sursum erectum, quia non habes hic maurentem civitatem. Illuc preces & gemitus quotidianos cum lacrymis dirige, ut spiritus tuus mereatur ad Dominum post mortem feliciter transire. Amen. *Lib. 1. cap. 23. §. 9.*

Passus XLV.

Ignis vivus ex meditatione mortis excussus.


I. *Quid cogitas diu vivere?*

Ah stulte, quid cogitas te diu victurum, cum nullum diem habeas hic securum? Quam multi decepti sunt, & insperate de corpore extracti? *Lib. 1. cap. 23. §. 7.* Subeat in animum hic divitis cujusdam mors, qui dixit animæ suæ; *Anima, habes multa bona posita in annos plurimos: requiesce, comede, bibe, epulare. Dixit autem illi Deus: stulte, hac nocte animam tuam repetunt a te: quæ autem parasti, cujus eruunt?*

II. *Cum sæpe non profit diu vivere.*

Quid prodest diu vivere, quando tam parum emendamur? Ah longa vita non semper emendat, sed sæpe culpam magis auget. Utinam per unam diem bene essemus conversati in hoc mundo. Multi annos computant conversionis, sed sæpe parvus est fructus emendationis. Si formidolosum est mori, forsitan periculosius erit diutius vivere. *Lib. 1. cap. 23. §. 2.*

III.



III. *Quid juvant honor & voluptas?*

Si usque in hodiernum diem, semper in honoribus & voluptatibus vixisses; quid totum tibi profuisset, si jam mori in instanti contingeret? Omnia ergo vanitas, præter amare Deum, & illi soli servire. *Lib. 1. cap. 24. §. 7.*

IV. *Transeunt omnia, & tu cum eis.*

Quid hic circumspicis, cum iste non sit locus tuæ requietionis: in cœlestibus debet esse habitatio tua, & sicut in transitu, cuncta terrena sunt aspicienda. Transeunt omnia, & tu cum eis pariter, vide ut non inhæreas: ne capiaris, & pereas. Apud altissimum sit cogitatio tua, & deprecatio tua ad Christum sine remissione dirigatur. *Lib. 2. cap. 1. §. 4.*

Passus XLVI.

DE JUDICIO.

Semper illius memoriam habendam.

I. *Quia DEus iudex Iustus,*

In omnibus rebus respice finem, & qualiter ante districtum stabis iudicem, cui nihil est occultum; qui muneribus non placatur, nec excusationes recipit: sed quod justum est, judicabit. *Lib. 1. cap. 24. §. 1.*

II. *Qui omnia mala tua scit:*

O miserrime & insipiens peccator, quid respondebis Deo, omnia mala tua scienti, qui interdum formidas vultum hominis irati? *Lib. 1. cap. 24. §. 1.*

III.

III. *Et te nemo, nemo defendet.*

Ut quid non prævides tibi in die Judicii, quando nemo poterit per alium excusari, vel defendi: sed unusquisque, sufficiens onus erit sibi ipsi? *Lib. 1. cap. 24. §. 1.*

Passus XLVII.

Quid agendum ante, quam detur
Judicium.

I. *Utendum tempore acceptabili.*

Nunc labor tuus est fructuosus, fletus acceptabilis, gemitus audibilis, dolor satisfactorius, & purgativus. *Lib. 1. cap. 24. §. 1.*

II. *Evellendus amor carnis.*

Melius est modo purgare peccata, & vitia refecare, quam in futuro purganda reservare. Vere nos ipsos decipimus per inordinatum amorem, quem ad carnem habemus. *Lib. 1. cap. 24. §. 2.*

III. *Sustinenda modica.*

Esto modo sollicitus & dolens, pro peccatis tuis: ut in die judicii, securus sis cum beatis. *Lib. 1. cap. 24. §. 4.* Disce te nunc in modico pati, ut tunc a gravioribus valeas liberari. Hic primum proba, quid possis postea. *Ibid, §. 6.*

Passus XLVIII.

Quibus judicium formidabile futurum;
quibus non?

I. *Nihil formidabunt servi crucis:*

Qui modo libenter audiunt, & sequuntur verbum crucis; tunc non timebunt ab auditione
aeternæ



æternæ damnationis. Hoc signum crucis erit in cœlo, cum Dominus ad judicandum venerit. Tunc omnes servi crucis, qui se crucifixo conformaverunt in vita, accedent ad Christum judicem, cum magna fiducia. *Lib. 2. cap. 12. §. 1.*

II. *Nihil justus humilis, pauper.*

Tunc justi stabunt in magna constantia adversus eos, qui se angustiaverunt, & deprefferunt. Tunc stabit ad judicandum, qui modo se subjicit humililiter judiciis hominum. Tunc magnam fiduciam habebit pauper & humilis, & pavebit undique superbus. *Lib. 1. cap. 24. §. 4.*

III. *Nihil despectus propter Christum, patiens, devotus, carnis osor.*

Tunc videbitur sapiens in hoc mundo fuisse, qui pro Christo didicit stultus & despectus esse. Tunc placebit omnis tribulatio patienter perpeſſa, & omnis iniquitas opilabit os suum. Tunc gaudebit omnis devotus, & mœrebit omnis irreligiosus. Tunc plus exultabit caro afflicta, quam si in deliciis fuisset semper nutrita. *L. 1. c. 24. §. 5.*

Passus XLIX.

Quæ tunc futura sint solatio.

I. *Paupertas, patientia, obedientia.*

Tunc splendeat habitus vilis, & obtenebrescat vestis subtilis. Tunc plus laudabitur pauperculum domicilium, quam deauratum palatium. Tunc juvabit plus constans patientia, quam omnis mundi potentia. Tunc amplius exaltabitur simplex obedientia, quam omnis sæcularis astutia. *Lib. 1. cap. 24. §. 5.*

II.



II. *Bona conscientia, contemptus divitiarum, oratio devota.*

Tunc plus lætificabit pura & bona conscientia, quam docta Philosophia. Tunc plus ponderabit contemptus divitiarum, quam totus thesaurus terrigenarum. Tunc magis consolaberis super devota oratione, quam super delicata comestione. *Lib. 1. cap. 24. §. 6.*

III. *Silentium, opera bona, pœnitentia.*

Tunc potius gaudebis de servato silentio, quam de longa fabulatione. Tunc plus valebunt sancta opera, quam multa pulchra verba. Tunc plus placebit stricta vita & ardua pœnitentia, quam omnis delectatio terrena. *Lib. 1. cap. 24. §. 6.*

Passus L.

De pœnis peccatorum in Inferno

I. *Peccator pœnas in Inferno*

Quid merui pro peccatis meis, nisi Infernum & ignem æternum? *Lib. 3. cap. 52. §. 2.* Quid aliud ignis ille devorabit, nisi peccata tua? Quanto amplius tibi ipsi nunc parcis, & carnem sequeris; tanto durius postea lues, & majorem materiam comburendi reservas. *Lib. 1. cap. 24. §. 3.*

II. *Dabit gravissimas,*

Ibi erit una hora gravior in pœna, quam hic centum anni in amarissima pœnitentia. Ibi nulla requies est, nulla consolatio damnatis: hic tamen interdum cessatur a laboribus, atque amicorum fruitur solatiis. *Lib. 1. cap. 24. §. 4.*

III.



III. *Et peccatis proportionatas.*

In quibus homo peccavit, in illis gravius punietur. Ibi acediosi, ardentibus stimulis perurgentur: & gulosi ingenti siti ac fame cruciabuntur. Ibi luxuriosi, & voluptatum amatores, ardenti pice & foetido sulphure perfundentur: & sicut furiosi canes, præ dolore invidiosi ululabunt. Nullum vitium erit, quod suum proprium cruciatum non habebit. Ibi superbi omni confusione replebuntur: & avari, miserrima egestate ardebuntur. *Lib. 1. cap. 24. §. 3. & 4.*

Passus LI.

Stricturæ chalybis, ex Inferni consideratione ignitæ.

I. *Si qua dura hic sunt, duriora ibi.*

Durus multis hic videtur sermo: abnega te-
met ipsum, tolle crucem tuam, & sequere
Jesum. Sed multo durius erit, audire illud extre-
mum verbum: Discedite a me maledicti in ignem
æternum. *Lib. 2. cap. 12. §. 1.*

II. *Si jam parum pati, difficile; quid æternum?*

Si nunc tam parum vales sustinere, quomodo
æterna tormenta poteris sufferre? Si te modo
modica passio tam impatientem efficit, quid ge-
henna tunc faciet? Ecce vere non potes duo gau-
dia habere, delectari hic in mundo, & postea reg-
nare cum Christo. *Lib. 1. cap. 24. §. 6.*



III. *Ferendum igitur.*

Ut ergo æterna futura supplicia possis evadere, mala præsentia studeas pro Deo æquanimiter tolerare. *Lib. 3. cap. 12. §. 2.*

Passus LII.

De Purgatorio hujus & alterius vitæ.

I. *Comparatione Purgatorii, pati est facile.*


Oportet te transire per ignem & aquam, antequam venias in refrigerium. *Lib. 1. Cap. 22. §. 5.* Si dixeris, te non posse multa pati, quomodo tunc sustinebis ignem Purgatorii? De duobus malis, minus est semper eligendum. *Lib. 3. Cap. 12. §. 2.*

II. *Quod sit Purgatorium in hoc mundo?*

Habet magnum & salubre purgatorium patiens homo, qui suscipiens injurias, plus dolet de alterius malitia, quam de sua injuria: qui pro contrariantibus sibi libenter orat, & ex corde culpas indulget, qui veniam ab aliis petere non retardat: qui facilius miseretur, quam irascitur: qui sibi ipsi violentiam frequenter facit, & carnem omnino spiritui subjugare conatur. *Lib. 1. Cap. 24. §. 2.*

III. *Oblatio ad patiendum, exemplo Christi.*

Domine quia tu patiens fuisti in vita tua, in hoc maxime implendo præceptum Patris tui: dignum est, ut ego misellus peccator secundum voluntatem tuam patienter me sustineam: & donec ipse



ipse volueris, onus corruptibilis vitæ pro salute mea portem. Nam etsi onerosa sentitur præsens vita, facta est tamen jam per gratiam tuam valde meritoria: atque exemplo tuo, & Sanctorum tuorum vestigiis, infirmis tolerabilior & clarior. Sed & multo magis consolatoria, quam olim in lege vetere fuerat, cum porta cœli clausa persisteret: & obscurior etiam via ad cœlum videbatur, quando tam pauci regnum cœlorum quærere curabant. Sed neque qui tunc iusti erant & salvandi, ante Passionem tuam, & sacræ mortis debitum, cœleste regnum poterant introire. *Lib. 3. cap. 18. §. 2.*

Passus LIII.

Quid augeat, minuatque metum Novissimorum?

I. *Minuit Amor Dei: auget Peccatum.*

Qui Deum ex toto corde amat; nec Mortem, nec Infernum metuit: quia perfectus amor securum ad Deum accessum facit. Quem autem adhuc peccare delectat, non mirum, si mortem & iudicium timeat. *Lib. 1. cap. 24. §. 7.*

II. *Minuit Patientia,*

Pro amore Dei, debes omnia libenter subire, labores scilicet & dolores, tentationes, vexationes, anxietates, necessitates, infirmitates, iniurias, oblocutiones, reprehensiones, humilia-
tiones, confusiones, correctiones, & despectiones. Hæc juvant ad virtutem: hæc probant Christi tironem: hæc fabricant cœlestem coronam. Ego reddam mercedem æternam pro brevi labore, & infinitam gloriam pro transitoria confusione. *Lib. 3. ap. 35. §. 2.*

III.



III. *Præsertim alacris.*

Quando ad hoc veneris, quod tribulatio tibi dulcis est, & sapit pro Christo: tunc bene tecum esse æstima, quia invenisti Paradisum in terra. *Lib. 2. cap. 12. §. 11.* Quis est, qui melius habet? utique qui pro Deo aliquid pati valet. *Lib. 1. cap. 12. §. 1.*

Passus LIV.

Fructus ex meditatione Novissimorum,
velox & seria vitæ emendatio sine
torpore.

I. *Dic cum Davide; Nunc cœpi.*

Noli frater amittere confidentiam proficiendi ad spiritualia: adhuc habes tempus & horam. Quare vis procrastinare propositum tuum? Surge, & in instanti incipe & dic: Nunc tempus est faciendi, nunc tempus est pugnandi, nunc aptum tempus est vitam emendandi. *Lib. 1. cap. 22. §. 4. & 5.*

II. *Bene spera.*

Spem bonam retinere debes, quod ad palmam pervenies: sed securitatem capere non oportet, ne torpeas, aut elatus fias. *Lib. 1. cap. 25. §. 1.*

III. *Exercitia temere non omitte.*

Si pietatis causa, aut fraternæ utilitatis proposito, quandoque consuetum omittitur exercitium, facile postea poterit recuperari. Si autem tœdio animi, aut negligentia, faciliter relinquitur, satis culpabile est, & nocivum sentietur. *Lib. 1. cap. 19. §. 3.*



Passus LV.

De præcipua remora Emendationis: & de adminiculis ejusdem.

I. *Unum quod retrahit.*

Unum est, quod multos a profectu, & ferventi emendatione retrahit: Horror difficultatis, seu labor certaminis. Enimvero illi maxime præ cæteris in virtutibus proficiunt, qui ea, quæ sibi magis gravia, & contraria sunt, viriliter vincere nituntur. Nam ibi homo plus proficit, & gratiam meretur ampliore, ubi magis se ipsum vincit, & in spiritu mortificat. Sed non omnes habent æque multum, ad vincendum & mortificandum. Diligens tamen æmulator, valentior erit ad proficiendum, etiam si plures habeat passionem, quam alius bene morigeratus, minus tamen fervens ad virtutes. *Lib. 1. cap. 25 §. 3. & 4.*

II. *Duo, quæ plurimum promovent.*

Duo specialiter ad magnam emendationem juvant: videlicet, subtrahere se violenter, ad quod natura vitiose inclinatur: & ferventer instare pro bono, quo amplius quis indiget. Illa etiam studeas magis cavere & vincere, quæ tibi frequentius in aliis displicent. *Lib. 1. cap. 25. §. 4.*

III. *Functis exemplis & bonorum & malorum.*

Ubique profectum tuum capias: ut si bona exempla videas, vel audias, ad imitandum accendaris. Si quid autem reprehensibile consideraveris, cave, ne idem facias; aut si aliquando fecisti, citius emendare te studeas. Sicut oculus tuus alios considerat, sic iterum ab aliis notaris. *Lib. 1. cap. 25. §. 5.*



VIAE
PURGATIVAE
SEMITA SECUNDA.

*Qua viriliter contra tentationes pug-
nandum, ne in pristina peccata
homo relabatur.*

Passus LVI.

Nullus homo liber a Tentationibus.

I. *Quia diabolus non dormit?*

Non dormit diabolus, nec caro adhuc mor-
tua est: ideo non cesses te præparare ad cer-
tamen, quia a dextris & a sinistris hostes sunt,
qui nunquam quiescunt. *Lib. 2. cap. 9. §. 8.* Anti-
quus hostis, omnibus bonis adversans, a tenta-
tione non cessat: sed die noctuque graves moli-
tur infidias, si forte in laqueum deceptionis pos-
sit præcipitare incautum. *Vigilate & orate, di-
cit Dominus, ut non intretis in tentationem.*
Lib. 3. cap. 39. §. 3.

II. *Nec caro adhuc mortua:*

Non est homo securus a tentationibus totali-
ter, quamdiu vixerit: quia in nobis est, unde ten-
tamur, ex quo in concupiscentia nati sumus.
Lib. 1. cap. 13. §. 3.



III. *Hinc illæ perpetuæ tentationes.*

Una tentatione seu tribulatione recedente, alia supervenit: & semper aliquid ad patiendam habebimus, nam bonum felicitatis primordialis perdidimus. *Lib. 1. cap. 13. §. 3.*

Passus LVII.

Nulla tempore, nullo loco quis immunis a tentationibus.

I. *Omnes sancti sunt tentati.*

Nemo tam perfectus est & sanctus, qui non habeat aliquando tentationes, & plene eis carere non possumus. *Lib. 2. cap. 9. §. 7.*

II. *Immo hæc est via Sanctorum.*

Omnes Sancti per multas tribulationes & tentationes transierunt, & profecerunt. Et qui tentationes sustinere nequiverunt, reprobi facti sunt, & defecerunt. Non est aliquis Ordo tam sanctus, nec locus tam secretus, ubi non sint tentationes, vel adversitates. *Lib. 1. cap. 13. §. 2.*

III. *Non igitur alia inquirenda.*

Quid turbaris, quia non succedit tibi, sicut vis & desideras? Quis est, qui habet omnia secundum suam voluntatem? Nec ego, nec tu, nec aliquis hominum super terram. Nemo est in mundo, sine aliqua tribulatione vel angustia, quamvis Rex sit, vel Papa. *Lib. 1. cap. 22. §. 1.*



Passus LVIII.

Eorum qui tentantur, varia genera.

I. *Quod ad tempus.*

Quidam in principio conversionis suæ, graviores tentationes patiuntur; quidam autem in fine. Quidam vero, quasi per totam vitam suam male habent. *Lib. I. cap. 13. §. 6.*

II. *Quod ad modum.*


Nonnulli satis leniter tentantur, secundum divinæ ordinationis sapientiam & æquitatem; quæ statum & merita hominum pensat, & cuncta ad electorum suorum salutem præordinat. *Lib. I. cap. 13. §. 6.*

III. *Omniū tamen finis Proventus.*

Ideo non debemus desperare, cum tentamur: sed eo ferventius Deum exorare, quatenus nos in omni tribulatione dignetur adjuvare: qui utique secundum dictum Pauli, talem facit cum tentatione proventum, ut possimus sustinere. *Lib. I. cap. 13. §. 7.*

IV. *Est & diversitas in eodem homine.*

Quidam a magnis tentationibus custodiuntur, & in parvis quotidianis sæpe vincuntur: ut humilitati, nunquam de seipsis in magnis confidant, qui in tam modicis infirmantur. *Lib. I. cap. 13. §. 8.*



Passus LIX.

Oratio, primum generale remedium
contra tentationes.

I. *Oratio semper necessaria est;*

Quamdiu in mundo vivimus, sine tribulatione
& tentatione esse non possumus. Unde in
Job scriptum est: Tentatio est vita humana super
terram. Ideo unusquisque sollicitus esse deberet
circa tentationes suas, & vigilare in orationibus;
ne diabolus locum inveniret decipiendi, qui nun-
quam dormitat, sed circuit quærens, quem de-
voret. *Lib. I. cap. 13. §. I.*

II. *Præsertim malis cogitationibus de- pellendis,*

Oratio contra tentationes malas.

Domine Deus meus, ne elongeris a me: Deus
meus in auxilium meum respice: quoniam insur-
rexerunt in me variæ cogitationes, & timores mag-
ni, affligentes animam meam. Quomodo pertran-
sibo illæsus? quomodo perfringam eas? Ego in-
quit, ante te ibo, & gloriosos terræ humiliabo.
Aperiam januam carceris, & arcana secretorum
revelabo tibi. Fac Domine, ut loqueris: &
fugiant a facie tua omnes iniquæ cogitationes.
Hæc spes & unica consolatio mea, ad te in omni
tribulatione confugere, tibi confidere, te ex in-
timo invocare, & patienter consolationem tuam
expectare. *Lib. 3. cap. 23. §. 3.*



III. *Et illuminationi mentis impetrandæ.*

Oratio pro illuminatione mentis.

Clarifica me, Jesu bone, claritate interni luminis, & educ de habitaculo cordis mei, tenebras universas. Cohibe evagationes multas, & vim facientes elide tentationes. Pugna fortiter pro me, & expugna malas bestias, concupiscentias dico illecebrosas: ut fiat pax in virtute tua, & abundantia laudis tuæ resonet in aula sancta, hoc est, in conscientia pura. Impera ventis & tempestatibus: dic mari: Quiesce: & Aquiloni; Ne flaveris: & erit tranquillitas magna. L.3. c.23. §.4.

Passus LX.

Patientia & humilitate (quæ sunt alia duo generalia remedia) vinci tentationes, & non fuga.

I. *Tentatos scutum Patientiæ protegit:*

Paulatim, & per patientiam cum longanimitate (Deo juvante) melius superabis, quam cum duritia & importunitate propria. Lib. I. cap. 13. §. 4. Fili, nunquam securus es in hac vita, sed quoad vixeris, semper arma spiritualia tibi sunt necessaria. Inter hostes versaris, & a dextris & a sinistris impugnaris. Si ergo non uteris undique scuto Patientiæ, non eris diu sine vulnere. Insuper si non ponis cor tuum fixe in me, cum mera voluntate cuncta patiendi propter me, non poteris ardorem istum sustinere, nec ad palmam pertingere beatorum. Oportet te ergo viriliter omnia pertransire, & potenti manu uti adversus objecta. Nam vincenti datur manna, & torpenti relinquitur multa miseria. Lib. 3. cap. 35. §. I. II.



II. *Humilitas salvat & exaltat:*

Humiliemus animas nostras sub manu Dei, in omni tentatione & tribulatione: quia humiles spiritu salvabit, & exaltabit, *Lib. 1. cap. 13. §. 7.* Humilem Deus protegit, & liberat: humilem cili-
git, & consolatur: humili homini se inclinat: humili largitur gratiam magnam, & post ejus de-
pressionem, levat ad gloriam. *Lib. 2. cap. 2. §. 2.*

III. *Fuga nihil prodest.*

Multi quærunt tentationes fugere, & gravius incidunt in eas. Per solam fugam non possumus vincere, sed per patientiam & veram humilitatem, omnibus hostibus efficimur fortiores. *Lib. 1. cap. 13. §. 3.*

Passus LXI.

Quartum generale remedium, vigilan-
tia circa initium & progressum
Tentationis.

I. *Principiis obstandum.*

Vigilandum est, præcipue circa initium tenta-
tionis: quia tunc facilius hostis vincitur, si
ostium mentis nullatenus intrare finitur: sed ex-
tra limen, statim ut pulsaverit, illi obviatur. Un-
de quidam dixit:

Principiis obsta; sero medicina paratur:

Cum mala per longas invaluere moras.

Lib. 1. cap. 13. §. 5.

II. *Progressus tentationis.*

Nam primo occurrit menti simplex cogitatio:
deinde fortis imaginatio: postea delectatio, &
in-

motus pravus, & assensio. Sicque paulatim ingreditur hostis malignus ex toto, dum illi non resistitur in principio. *Lib. 1. cap. 13. §. 5.*

III. *Damna torporis.*

Et quanto diutius ad resistendum quis torpuerit, tanto in se quotidie debilior fit, & hostis contra eum potentior. *Lib. 1. cap. 13. §. 5.*

Passus LXII.

Generale remedium quintum & sextum;
uti consilio aliorum, & securim ponere ad radicem.

I. *Necesse, consulere virum discretum,*

Qui adhuc novi sunt, & imperiti, in via Domini, nisi consilio discretorum se regant, faciliter decipi possunt & elidi. *Lib. 3. cap. 7. §. 2.*

II. *Mansuetum, suavem,*

Sæpius accipe consilium in tentatione, & cum tentato noli duriter agere: sed consolationemingere, sicut tibi optares fieri. *Lib. 1. cap. 13. §. 4.*

Sapientem & conscientiosum.

Cum sapiente & conscientioso viro consilium habe: & quære potius a meliore instrui, quam tuas adinventiones sequi. *Lib. 1. cap. 4. §. 2.*
Interroga libenter, & audi tacens verba Sanctorum: nec displiceant tibi parabola seniorum; sine causa enim non proferuntur. *Lib. 1. cap. 5. §. 1.*



III. *Nisi evellatur radix, tentatio repellat.*

Qui tantummodo exterius declinat, nec radicem evellit, parum proficiet: imo citius ad eum tentationes redibunt, & pejus sentiet. *Lib. 1. cap. 13. §. 4.*

Passus LXIII.

Origo duplex omnium Tentationum malarum.

I. *Prima, Inconstantia animi.*

Initium omnium malarum tentationum, inconstantia animi, & parva ad Deum confidentia. Quia sicut navis sine gubernaculo, hinc inde a fluctibus impellitur; ita homo remissus, & suum propositum deserens, varie tentatur. *Lib. 1. cap. 13. §. 5.*

II. *Altera parva in Deum confidentia:*

Fili, ego Dominus, confortans in die tribulationis. Venias ad me, cum tibi non fuerit bene. Hoc est, quod maxime consolationem impedit coelestem, quia tardius te convertis ad orationem. Nam antequam me intente roges, multa interim solatia quæris, & recreas te in externis. *Lib. 3. cap. 30. §. 1.*

III. *Qui tamen unus est omnia.*

Ideoque fit, ut parum omnia profint, donec advertas, quia ego sum, qui eruo sperantes in me: nec est extra me valens auxilium, neque utile consilium, sed neque durabile remedium. *Lib. 3. cap. 30. §. 1.*

IV.



IV. *Affectus & colloquium.*

Domine, quæ est fiducia mea, quam in hac vita habeo? aut quod majus solatium meum, ex omnibus apparentibus sub cælo? Nonne tu Domine Deus meus, cujus misericordiæ non est numerus? ubi mihi bene fuit sine te? aut quando male esse potuit, præsentem te? ubi tu, ibi cælum: atque ibi mors & infernus, ubi tu non es. *Lib. 3. cap. 59. §. 1.*

Passus LXIV.

Utiles tentationes, in singulis viis vitæ spiritualis.

I. *Utilitas tentationum in via Pur- gativa.*

Sunt tentationes homini sæpe valde utiles, licet molestæ sint, & graves: quia in illis homo humiliatur, purgatur, & eruditur. *Lib. 1. cap. 13. §. 2.* Quando male habes, & tribularis, tunc tempus est promerendi. *Lib. 1. cap. 22. §. 5.*

II. *In via Illuminativa.*

Ignis probat ferrum, & tentatio hominem justum. Nescimus sæpe, quid possumus: sed tentatio aperit, quid sumus. *Lib. 1. cap. 13. §. 5.* In tentationibus & tribulationibus probatur homo, quantum profecit, & ibi majus meritum existit, & virtus melius patescit. Nec magnum est, si homo devotus sit & fervidus, cum gravitatem non sentit: sed si tempore adversitatis, patienter se sustinet, spes magni profectus erit. *Lib. & cap. eod. §. 8.*

III.



III. *In via Unitiva.*

Nullus Sanctus fuit tam alte raptus & illuminatus, qui prius vel postea, non fuerit tentatus. Non enim dignus est alta Dei contemplatione, qui pro Deo non est exercitatus aliqua tribulatione. Solet enim sequentis consolationis, tentatio præcedens esse signum. Nam tentationibus probatis cœlestis promittitur consolatio. Qui vicerit, inquit, dabo ei edere de ligno vitæ. Datur etiam consolatio divina, ut homo fortior sit ad sustinendum adversa. Sequitur etiam tentatio, ne se elevet de bono. *Lib. 2. cap. 9. §. 7. & 8.*

Passus LXV.

Utilitates aliæ, provenientes ex tentationibus.

I. *Homo tentatus cognoscit, Deum esse sibi necessarium.*

Quando homo bonæ voluntatis tribulatur, vel tentatur, aut malis cogitationibus affligitur: tunc Deum sibi magis necessarium intelligit, sine quo nihil se posse deprehendit. *Lib. 1. cap. 12. §. 2.*

II. *Gemit, & orat:*

Tunc etiam tristatur, gemit, & orat pro miseriis, quas patitur. Tunc tædet eum diutius vivere, & mortem optat venire: ut possit dissolvi, & cum Christo esse. Tunc etiam bene advertit, perfectam securitatem, & plenam pacem in mundo non posse constare. *Lib. 1. cap. 12. §. 2.*

III.

III. *Sed animatur a Deo.*

Sed jam resumpto spiritu post tempestatem, reconvalesce in luce miserationum mearum: quia prope sum (dicit Dominus) ut restaurem universa, non solum integre, sed & abundanter ac cumulate. Numquid mihi quidquam est difficile, aut ero similis dicenti & non facienti? ubi est fides tua? sta firmiter, & perseveranter. Esto longanimis, & vir fortis, veniet tibi consolatio in tempore suo. Exspecta me, exspecta: veniam & curabo te. Tentatio est, quæ te vexat: & formido varia, quæ te exterret. *Lib. 3. cap. 30. §. 1. & 2.*

Passus LXVI.

Qualiter, instante tribulatione, Deus invocandus est, & benedicendus.

I. *Agendæ gratiæ Deo.*

Sit nomen tuum, Domine, benedictum in sæcula: qui voluisti hanc tentationem & tribulationem venire super me. Non possum eam effugere, sed necesse habeo ad te confugere: ut me adjuves, & in bonum mihi convertas. Domine modo sum in tribulatione, & non est cordi meo bene, sed multum vexor a præsentī passione. Et nunc, Pater dilecte, quid dicam? deprehensus sum inter angustias. Salvifica me ex hora hac. Sed propterea veni in hanc horam, ut tu clarificeris, cum fuero valide humiliatus, & per te liberatus. *Lib. 3. cap. 29. §. 1.*

II. *Implorandum auxilium Dei, qui*

Complacet tibi, Domine, ut eruas me: nam ego pauper, quid agere possum, & quo ibo sine te?



te? Da patientiam, Domine, etiam hac vice. Adjuva me, Deus meus, & non timebo, quantumcumque gravatus fuero. Et inter hæc quid dicam? Domine fiat voluntas tua. Et bene merui tribulari, & gravari. Oportet utique, ut sustineam: & utinam patienter, donec transeat tempestas, & melius fiat. *Lib. 3. cap. 29. §. 1. & 2.*

III. maxime potest juvare.

Potens est autem omnipotens manus tua, etiam hanc tentationem a me auferre, & ejus impetum mitigare: ne penitus succumbam, quemadmodum & prius sæpius egisti mecum, Deus meus, misericordia mea. Et quanto mihi difficilius, tanto tibi facilior est hæc mutatio dexteræ Excelsi. *Lib. 3. cap. 29. §. 2.*

Passus LXVII.

De quibusdam tentationibus in particulari: ut de tentationibus contra Fidem, earumque remediis.

I. Tentare contra fidem, permittitur diabolo propter nostram utilitatem.

Quidam graviter tentantur de Fide & Sacramento: sed non est hoc ipsis imputandum, sed potius inimico. Sæpe multum prodest, quod talia sustinet Dei servus. Nam infideles & peccatores non tentat, quos secure iam possidet: fideles autem devotos variis modis tentat & vexat. *Lib. 4. cap. 18. §. 3.*

II. Remedium primum.

Noli curare, noli disputare cum cogitationibus tuis, nec ad immixtas a diabolo dubitationes re-



responde: sed crede verbis Dei, crede Sanctis ejus, & Prophetis, & fugiet a te nequam inimicus. *Lib. 4. cap. 18. §. 3.*

Secundum.

Subdere Deo, & humilia sensum tuum fidei: & dabitur tibi scientiæ lumen, prout tibi fuerit utile & necessarium. Fides a te exigitur, & sincera vita; non altitudo intellectus, neque profunditas mysteriorum Dei. *Lib. 4. cap. 18. §. 2.*

III. Tertium.

Omnis ratio, & naturalis investigatio, Fidem sequi debet, non præcedere, nec infringere. *Lib. 4. cap. 18. §. 5.* Plus valet Deus operari, quam homo intelligere potest. Tolerabilis, pia & humilis inquisitio veritatis, parata semper doceri, & per sanas Patrum sententias studens ambulare. *Lib. 4. cap. 18. §. 1.* Si non intelligis, nec capis, quæ infra te sunt, quomodo comprehendes, quæ supra te sunt? *Lib. 4. cap. 18. §. 2.* Ratio humana debilis est, & falli potest: Fides autem vera falli non potest. *Ibidem §. 4.* Si talia essent opera Dei, ut facile ab humana ratione caperentur, non essent mirabilia, nec ineffabilia dicenda. *Lib. 4. cap. 18. §. 5.*

Passus LXVIII.

De tentationibus contra Fidem SS. Eucharistiæ; earumque remediis.

I. Cavenda curiose perscrutatio.

Cavendum est tibi a curiosa, & inutili perscrutatione hujus profundissimi Sacramenti, si non vis in dubitationis profundum submergi. Qui
scru-



scrutator est Majestatis, opprimetur a gloria. *Lib. 4. cap. 18. §. 1.* Deus æternus & immensus, infinitæque potentia, facit magna & inscrutibilia in coelo & in terra, nec est investigatio mirabilium operum ejus. *Lib. 4. cap. 18. §. 5.*

II. *Sed credendum simpliciter,*

Fides & amor ibi maxime præcellunt, & occultis modis in hoc sanctissimo & superexcellen-
tissimo Sacramento operantur. *Lib. 4. cap. 18. §. 5.*
Beata simplicitas, quæ difficiles quæstionum relin-
quit vias, & plana ac firma pergit semita manda-
torum Dei. Multi devotionem perdiderunt,
cum altiora scrutari voluerunt. *Lib. 4. cap. 18. §. 2.*

III. *Quia non fallit Deus.*

Perge ergo cum simplici & indubitata fide,
& cum supplici reverentia ad Sacramentum acce-
de. Et quicquid intelligere non vales, Deo om-
nipotenti secure committe. Non fallit te Deus:
fallitur, qui sibi ipsi nimium credit. Graditur
Deus cum simplicibus, revelat se humilibus, dat
intellectum parvulis, aperit sensum puris menti-
bus, & abscondit gratiam curiosis & superbis.
Lib. 4. cap. 18. §. 4.

Passus LXIX.

De tentationibus Blasphemiae, earum-
que remediis.

I. *Non sis in iis pusillanimis.*

Non est ideo totum perditum, si quandoque mi-
nus bene de me, vel de Sanctis meis sentis,
quam velles. Affectus ille bonus & dulcis,
quem



quem interdum percipis, effectus gratiæ præsentis est, & quidam prægustus patriæ cœlestis: super quo non nimium inuitendum, quia vadit, & venit. Certare autem adversus incidentes malos motus animi, suggestionemque spernere diaboli, insigne est virtutis, & magni meriti. *Lib. 3. cap. 6. §. 2.*

II. *Sed serva propositum, & rectam intentionem.*

Non ergo te conturbent alienæ phantasiæ, de quacumque materia ingestæ. Forte serva propositum, & intentionem rectam ad Deum. Nec est illusio, quod aliquando in excelsum subito raperis, & statim ad solitas ineptias cordis reverteris. Illas enim invite magis pateris, quam agis: & quamdiu displicent, & reniteris, meritum est, & non perditio. *Lib. 3. cap. 6. §. 3.*

III. *Noveris, quid dæmone quærat his tentationibus.*

Scito, quod antiquus inimicus omnino nititur impedire desiderium tuum in bono, & ab omni devoto exercitio evacuare: a Sanctorum scilicet cultu, a pia passionis meæ memoria, a peccatorum utili recordatione, a proprii cordis custodia, & a firmo proposito proficiendi in virtute. Multas malas cogitationes ingerit, ut tœdium tibi faciat, & horrorem: ut ab oratione revocet, & sacra lectione. Displicet sibi humilis confessio, &, si posset, a Communionem cessare, faceret. Non credas ei, neque cures illum, licet sæpius tibi deceptionis tetenderit laqueos. *Lib. 3. c. 6. §. 4.*



Passus LXX.

De Tentationibus carnis : earumque remediis.

I. *Protestatio non consentiendi.*

Sibi (intellige, Diabolo) imputa, cum mala inferit, & immunda: Dico illi: Vade immunde spiritus, erubescere miser, valde immundus es tu, qui talia inferis auribus meis. Discede a me seductor pessime, non habebis in me partem ullam: sed Jesus mecum erit, tanquam bellator fortis, & tu stabis confusus. Malo mori, & omnem poenam subire, quam tibi consentire. Tace & obmutesce, non audiam te amplius, licet plures mihi moliaris molestias. Dominus illuminatio mea, & salus mea, quem timebo? si consistent adversum me castra, non timebit cor meum. Dominus adiutor meus, & redemptor meus. *Lib. 3. cap. 6. §. 4.*

II. *Remedium Obedientia.*

Qui non libenter & sponte suo Superiori se subdit, signum est, quod caro sua necdum perfecte sibi obedit, sed saepe recalcitrat & remurmurat. Disce ergo celeriter Superiori tuo te submittere, si carnem propriam optas subjugare. Citius namque exterior vincitur inimicus, si interior homo non fuerit devastatus. Oportet omnino, verum te assumere tui ipsius contemptum, si vis prevalere adversus carnem & sanguinem. *Lib. 3. cap. 13. §. 1.*

III. *Remedium Mortificatio.*

Interdum vero oportet violentia uti, & viriliter appetitui sensitivo contraire, nec advertere,
quid

quid velit caro, & quid non velit: sed hoc magis fatagere, ut subjecta sit etiam nolens spiritui. Et tamdiu castigari debet, & cogi servituti subesse, donec parata sit ad omnia, paucisque contentari discat, & simplicibus delectari, nec contra aliquod inconueniens mustitare. *Lib. 3. cap. 11. §. 3.*

Passus LXXI.

Tentutio dæmonis retrahentis a S.
communione.

I. Ut tanto fructu nos defraudet,

Inimicus sciens fructum & remedium maximum, in sacra communione positum, omni modo & occasione nititur fideles & devotos, quantum prævalet retrahere & impedire. *Lib. 4. cap. 10. §. 1.*

II. Laborat facere timidos, aut tepidos.

Cum enim quidam sacre Communioni se aptare disponunt, peiores satanæ immisiones patiuntur. Ipse nequam spiritus (ut in Job scribitur) venit inter filios Dei, ut solita illos nequitia sua perturbet, aut timidos nimium reddat, & perplexos: quatenus affectum eorum minuat, vel fidem impugnando auferat: si forte aut omnino Communionem relinquant, aut cum tepore accedant. *Lib. 4. cap. 10. §. 2.*

III. Sed non est curandus.

Sed non est quidquam curandum, de versutiis & phantasiis illius quantumlibet turpibus & horridis, sed cuncta phanthasmata in caput ejus sunt retorquenda; contemnendus est miser & de-



ridendus, nec propter insultus ejus & commotiones, quas suscitatur, sacra est omittenda Communio. *Lib. 4. cap. 10. §. 2.*

Passus LXXII.

Anxietas quorundam, ante S. Communionem.

I. Propter nimiam sollicitudinem.

Sæpe etiam impedit nimia sollicitudo pro devotione habenda, & anxietas quædam de confessione facienda. Age secundum consilium sapientum, & depone anxietatem & scrupulum: quia gratiam Dei impedit, & devotionem mentis destruit. Propter aliquam parvam turbationem vel gravitatem, sacram ne dimittas Communionem: sed vade citius confiteri, & omnes offensiones aliis libenter indulge. Si vero tu aliquem offendisti, veniam humiliter precare, & Deus libenter indulget tibi. *Lib. 4. cap. 10. §. 3.*

II. Non differenda confessio & communio:

Quid prodest diu tardare confessionem, aut sacram differre Communionem? Expurga te cumprimis, exspue velociter venenum, festina accipere remedium, & senties melius, quam si diu distuleris. Si hodie propter istud dimittis, cras forsitan aliud majus eveniet, & sic diu posses a Communionem impediri, & magis ineptus fieri. *Lib. 4. cap. 10. §. 4.*

III. Quia plurimum nocet dilatio.

Quanto citius vales, a præsentem gravitate & inertia te excutias: quia nihil importat diu an



xiari, diu cum turbatione transire, & ob quotidiana obstacula, se a divinis sequestrare. Immo plurimum nocet, diu Communionem protelare, nam & gravem torporem consuevit inducere. Proh dolor! quidam tepidi & dissoluti, moras confitendi libenter accipiunt, & Communionem sacram idcirco differri cupiunt, ne ad maiorem sui custodiam se dare teneantur. *Lib. 4. cap. 10. §. 4.*

Passus LXXIII.

Quid cogitandum ante Tentationem:
quid, cum Tentatione vinceris.

I. *In copia de inopia: in pace de bello.*


Cogita in gratia, quam miser & inops esse soles sine gratia. *Lib. 3. cap. 7. §. 1.* Qui tempore pacis, nimis securus esse voluerit; sæpe tempore belli, nimis dejectus & formidolosus reperietur. Si scires semper humilis & modicus in te permanere, nec non spiritum tuum bene moderare, & regere, non incideres tam cito in periculum & offensam. *Lib. 3. cap. 7. §. 4.*

II. *In luce de tenebris, & vicissim.*

Consilium bonum est, ut fervoris spiritu concepto, mediteris, quid futurum sit abscedente lumine. Quod dum contigerit, recogita, & de novo lucem posse reverti, quam ad cautelam tibi, mihi autem ad gloriam, ad tempus subtraxi. *Lib. 3. cap. 7. §. 4.*

III. *Cecidisti? fortior resurge.*

Certa tamquam miles bonus: & si interdum ex fragilitate corruis, resume vires fortiores prioribus,



bus, confidens de ampliori gratia mea: & multum præcave a vana complacentia & superbia. Propter hoc multi in errorem ducuntur, & in cæcitatem poene incurabilem quandoque labuntur.

Superbiam cave.

Sit tibi in cautelam, & perpetuam humilitatem ruina hæc superborum, de se stulte præsumendum. *Lib. 3. cap. 6. §. 5.*

Passus LXXIV.

In Desolationibus, non cessandum a consuetis.

I. *Spiritualis vitæ profectus in quo consistat.*

Non est in eo tantum spiritualis vitæ profectus, cum consolationis habueris gratiam: sed cum humiliter, & abnegate, patienterque tuleris ejus subtractionem: ita, quod tunc ab orationis studio non torpeas, nec reliqua opera tua ex usu facienda, omnino dilabi permittas: sed sicut melius potueris, & intellexeris, libenter, quod in te est, facias: nec propter ariditatem, seu anxietatem mentis, quam sentis, te totaliter negligas. *Lib. 3. cap. 7. §. 1.*

II. *Dei est, dare consolationem hominibus.*

Multi enim sunt, qui, cum non bene eis successerit, statim impatientes fiunt, aut desides. Non enim semper est in potestate hominis via ejus, sed Dei est dare, & consolari, quando vult, & quantum vult, & cui vult, sicut sibi placuerit, & non amplius. *Lib. 3. cap. 7. §. 2.*



III. *Qualiter homo desolatus se debet in manus Dei offerre.*

Domine Deus, sancte Pater, sis nunc, & in æternum benedictus: quia sicut vis, sic factum est: & quod facis, bonum est. Lætetur in te servus tuus, non in se, nec in aliquo alio: quia tu solus lætitia vera, tu spes mea & corona mea, tu gaudium meum & honor meus, Domine. Quid habet servus tuus, nisi quod a te accepit, etiam sine merito suo? Tua sunt omnia, quæ dedisti, & quæ fecisti. Pauper sum, & in laboribus meis a juventute mea: & contristatur anima mea nonnunquam usque ad lacrimas: quandoque etiam conturbatur ad se, propter imminentes passionēs. *Lib. 3. cap. 50. §. 1.*

Passus LXXV.


*Affectiones hominis consolati, ac
desolati.*

I. *Votum consolati.*

Desidero pacis gaudium, pacem filiorum tuorum flagito, qui in lumine consolationis a te pascuntur. Si das pacem, si gaudium sanctum infundis, erit anima servi tui plena modulatione, & devota in laude tua. *Lib. 3. cap. 50. §. 2.*

II. *Planctus desolati,*

Sed si te subtraxeris, sicut sapissime soles, non poterit currere viam mandatorum tuorum: sed magis ad tundendum pectus genua ejus incurvantur, quia non est illi, sicut heri & nudius tertius, quando splendebat lucerna tua super caput ejus, & sub umbra alarum tuarum protegēbatur a tentationibus irruentibus. *Lib. 3. cap. 50. §. 2.*



III. *Quem nulla humana consolatio lenit.*

Super quid igitur sperare possum, aut in quo confidere debeo, nisi in sola magna misericordia Dei, & in sola spe gratiæ cœlestis? siue enim adsint homines boni, siue devoti fratres, vel amici fideles; siue libri sancti, vel tractatus pulchri; siue dulcis cantus & hymni; omnia hæc modicum juvant, modicum sapiunt, quando desertus sum a gratia, & in propria paupertate relictus, Tunc non est melius remedium, quam patientia, & abnegatio mei in voluntate Dei. *Lib. 2. C. 9. §. 6.*

IV. *Elevatio mentis ad Deum.*

Gratias tibi ago, quia non pepercisti malis meis, sed attrivisti me verberibus amaris, infligens dolores, & immittens angustias foris & intus. Non est, qui me consoletur ex omnibus, quæ sub cœlo sunt, nisi tu Domine Deus meus, cœlestis medicus animarum: qui percutis, & sanas; deducis ad inferos, & reducis. Disciplina tua super me, & virga tua ipsa me docebit. *Lib. 3. cap. 50. §. 5.*

Passus LXXVI.

Consolationum & desolationum solemnis in homine alternatio. Exemplum in Davide.

I. *Cum consolatio datur, agendæ gratiæ:*

Cum spiritualis a Deo consolatio datur, cum gratiarum actione accipe eam: sed Dei munus intellige esse, non tuum meritum. Noli extol-



tolli, noli nimium gaudere, nec inaniter præsumere: sed esto magis humilior ex dono, cautior quoque & timorator in cunctis actibus tuis: quoniam transibit hora illa, & sequetur tentatio. *Lib. 2. cap. 9. §. 4.*

II. *Cum aufertur, non desperandum.*

Cum ablata fuerit consolatio, non statim desperes: sed cum humilitate & patientia expecta cœlestem visitationem: quoniam potens est Deus ampliorem tibi redonare consolationem. Istud non est novum, nec alienum viam Dei expertis; quia in magnis Sanctis, & in antiquis Prophetis, fuit sæpe alternationis modus. *Lib. 2. cap. 9. §. 4.*

III. *Exemplo Davidis.*

Unde quidam, præsentē jam gratia, dicebat; *Ego dixi in abundantia mea, non movebor in æternum.* Absente vero gratia, quid in se fuerit expertus, adjungit dicens: *Avertisti faciem tuam a me, & factus sum conturbatus.* Inter hæc tamen nequaquam desperat, sed instantius Dominum rogat, & dicit: *Ad te Domine clamabo, & ad Deum meum deprecabor.* Denique orationis suæ fructum reportat, & se exauditum testatur, dicens: *Audivit Dominus, & misertus est mei: Dominus factus est adjutor meus.* Sed in quo? Convertisti, inquit, planctum meum in gaudium mihi. & circumdediti me lætitia. *Lib. 2. cap. 9. §. 5.*



Passus LXXVII.

Spes anchora Desolatorum.

I. *Hominem, qui videt tribulationes Sanctorum,*

Si sic actum est cum magnis Sanctis, non est desperandum nobis infirmis & pauperibus, si interdum in fervore, & interdum in frigiditate sumus: quoniam spiritus venit, & recedit, secundum suæ beneplacitum voluntatis. Unde beatus Job ait: *Visitas eum diluculo, & subito probas illum. Lib. 2. cap. 9. §. 5.*

II. *Et omnium cæterorum mortalium,*

Nunquam inveni aliquem tam religiosum & devotum, qui non habuerit interdum gratiæ subtractionem, aut non senserit fervoris diminutionem. Non enim dignus est alta Dei contemplatione, qui pro Deo non est exercitatus aliqua tribulatione. *Lib. 2. cap. 9, §. 7.*

III. *Deus erigit ad fiduciam.*

Crede in me, & in misericordia mea habeto fiduciam. Quando tu putas te elongatum a me, sæpe sum propinquior. Quando tu æstimas pœne totum perditum, tunc sæpe majus merendi instat lucrum. Non est totum perditum, quando res accidit in contrarium. Non debes judicare secundum præsens sentire, nec sic gravitati alicui, undecumque venienti, inhærere, & accipere, tamquam omnis spes sit ablata emergendi. *Lib. 3. Cap. 30. §. 3.* Nec etiam satis virtuose sapit, qui tempore adversitatis, & cujusque gravitatis, nimis desperate se gerit, & minus fidenter de me quam oportet, recogitat ac sentit. *Lib. 3. Cap. 7. §. 3.*

Passus



Passus LXXVIII.

Sermo Dei ad desolatum.

I. *Non esse relictum ex toto.*

Noli putare de relictum ex toto, quamvis ad tempus tibi miserim aliquam tribulationem, vel etiam optatam subtraxerim consolationem: sic enim transitur ad regnum cœlorum. Et hoc sine dubio magis expedit tibi, & cæteris fervis meis, ut exercitemini adversis, quam si cuncta ad libitum haberetis. *Lib. 3. cap. 30. §. 4.*

II. *Expedire ad salutem*

Ego novi cogitationes absconditas: quia multum expedit pro salute tua, ut interdum sine sapore relinquaris: ne forte eleveris in bono successu, & tibi ipsi placere velis in eo, quod non es. Quod dedi, auferre possum: & restituere, cum mihi placuerit. *Lib. 3. cap. 30. §. 4.*

III. *Se dare, se rursus auferre.*

Cum dederò, meum est: cum retraxero, tuum non tuli: quia meum est omne datum bonum, & omne donum perfectum. Si tibi admisero gravitatem aut quamlibet contrarietatem, nec indigneris, neque concidat cor tuum: ego cito sublevare possum, & omne onus in gaudium transmutare. Verum tamen justus sum, & commendabilis multum, cum sic facio tecum. *Lib. 3. cap. 30. §. 5.*



Passus LXXIX.

Sermo desolati ad Deum.

I. *Resignat se divinæ voluntati.*

Pater juste, sancte, & semper laudande, venit hora, ut probetur servus tuus. Pater amande, dignum est, ut hac hora patiatur pro te aliquid servus tuus. Pater perpetuo venerande, venit hora, quam ab æterno præsciebas affuturam: ut ad modicum tempus succumbat foris servus tuus; vivat vero semper apud te intus. Paululum vilipendatur, humilietur, & deficiat coram hominibus, passionibus conteratur & languoribus: ut iterum tecum in aurora novæ lucis resurgat, & in cœlestibus clarificetur. Pater sancte, tu sic ordinasti, & sic voluisti: & hoc factum est, quod ipse præcepisti. *Lib. 3. Cap. 50. §. 3.*

II. *Agnoscit gratiam pro Deo pati.*

Hæc est enim gratia ad amicum tuum, pati & tribulari in mundo pro amore tuo, quotiescumque, & a quocumque id permiseris fieri. Sine consilio & providentia tua, & sine causa, nihil fit in terra. Bonum mihi, Domine, quod humiliasti me, ut discam justificationes tuas, & omnes elationes cordis, atque præsumptiones abjiciam. Utile mihi, quod confusio cooperuit faciem meam, ut te potius, quam homines, ad consolandum requiram. *Lib. 3. cap. 50. §. 4.*

III. *Adorat divinum justitiam.*

Didici etiam ex hoc, inscrutabile judicium tuum expavescere: qui affligis justum cum impio, sed non sine æquitate & justitia. *Lib. 3. cap. 50. §. 4.*

Do-



Domine, non sum dignus consolatione tua, nec aliqua spirituali visitatione: & ideo iuste mecum agis, quando me inopem & desolatum relinquis. Si enim ad instar maris lacrimas fundere possem, adhuc consolatione tua dignus non essem. Unde nihil dignus sum, quam flagellari & puniri: quia graviter & sæpe te offendi, & in multis valde deliqui. Ergo vera pensata ratione, nec minima sum dignus consolatione. *Lib. 3. cap. 52. §. 1.*

Passus LXXX.

De periculosa Tentatione Præsumptionis.

I. *Præsumptuosus effert se de donis Dei.*

Fili, utilius est tibi & securius, devotionis gratiam abscondere, nec in altum te efferre, nec multum inde loqui, neque multum ponderare: sed magis temetipsum despiciere, & tanquam indigno datam timere. Non est huic affectioni tenacius inhærendum, quæ citius potest mutari in contrarium. *Lib. 3. cap. 7. §. 1.*

II. *Plus tentat quam possit.*

Quidam incauti, propter devotionis gratiam, seipfos destruxerunt: quia plus agere voluerunt, quam potuerunt, non pensantes suæ parvitatæ mensuram, sed magis cordis affectum sequentes, quam rationis iudicium. Et quia maiora præsumpserunt, quam Deo placitum fuit, idcirco gratiam cito perdiderunt. *Lib. 3. cap. 7. §. 2.*



III. *Præcavendæ ruinæ unicum*

Facti sunt inopes, & viles relictī, qui in cœlum posuerunt nidum sibi: ut humiliati & depauperati, discant non in alis suis volare, sed sub pennis meis sperare.

Remedium.

Qui adhuc novi sunt, & imperiti, in via Domini, nisi consilio discretorum se regant, faciliter decipi possunt, & elidi. *Lib. 3. cap. 7. §. 2.*

Passus LXXXI.

De Tentationibus provenientius a spiritu mundano; quo multi decipiuntur.

I. *Mundus reprehenditur, nec relinquitur.*

Reprehenditur frequenter Mundus, quod fallax sit & vanus, nec tamen facile relinquitur, quia concupiscentiæ carnis nimis dominantur. Sed alia trahunt ad amandum, alia ad contemnendum. Trahunt ad amorem mundi, desiderium carnis, desiderium oculorum, & superbia vitæ: sed pœnæ ac miseriæ juste sequentes ea, odium mundi pariunt & tœdium. Sed vincit, præh dolor! delectatio prava mentem mundo deditam, & esse sub sentibus delicias reputat: quia Dei suavitatem, & internam virtutis amœnitatem, nec vidit, nec gustavit. *Lib. 3. cap. 20. §. 4. & 5.*

II. *In homines vere mundanos.*

Plures mundum libentius audiunt, quam Deum: facilius sequuntur carnis suæ appetitum, quam Dei beneplacitum. Promittit mundus tempo-



poralia, & parva; & fervitur ei aviditate magna: ego promitto summa, & æterna; & torpescunt mortalium corda. Quis tanta cura mihi in omnibus fervit, & obedit, sicut mundo, & dominis ejus fervitur? *Lib. 3. cap. 3. §. 2.*

III. *Gravis increpatio.*

Erubescere Sidon, ait mare. Et si causam quaeris, audi quare. Pro modica præbenda, longa via curritur: pro æterna vita, a multis vix pes semel a terra levatur. Vile pretium quaeritur: pro uno numismate interdum turpiter litigatur: pro vana re & parva promissione, die noctuque fatigari non timetur. Sed proh dolor! pro bono incommutabili, pro præmio inæstimabili, pro summo honore & gloria interminabili, vel ad modicum fatigari pigritatur. *Lib. 3. cap. 3. §. 2. & 3.*

Passus LXXXII.

Gravis Oratio Dei ad hominem mundanum.

I. *Quid mundus, quid Deus promittat.*

Erubescere ergo serve piger & querulose, quod illi paratiores inveniuntur ad perditionem, quam tu ad vitam. Gaudent illi amplius ad vanitatem, quam tu ad veritatem. Equidem a spe sua nonnunquam frustrantur, sed promissio mea neminem fallit, nec confidentem mihi dimittit inanem. Quod promisi dabo, quod dixi implebo; si tamen usque in finem, fidelis in dilectione mea quis permanferit. Ego remunerator sum omnium bonorum, & fortis probator omnium devotorum. *Lib. 3. cap. 3. §. 3.*



II. *Verba Dei scripta in corde,*

Scribe verba mea in corde tuo, & pertracta diligenter: erunt enim in tempore tentationis, valde necessaria. Quod non intelligis, cum legis, cognosces in die visitationis. Dupliciter soleo electos meos visitare, tentatione scilicet & consolatione. *Lib. 3. cap. 3. §. 4.*

III. *Hunc affectum exprimunt.*

Oratio hominis ad Deum.

O Deus meus, dulcedo ineffabilis, verte mihi in amaritudinem, omnem consolationem carnalem, ab æternorum amore me abstrahentem, & ad se intuitu cujusdam boni delectabilis præsentis, male allicientem. Non me vincat, Deus meus, non me vincat caro & sanguis: non me decipiat mundus, & brevis gloria ejus: non me supplantet diabolus, & astutia illius. Da mihi fortitudinem resistendi, patientiam tolerandi, constantiam perseverandi. Da pro omnibus mundi consolationibus, suavissimam spiritus tui unctionem: & pro carnali amore, tui nominis infunde amorem. *Lib. 3. cap. 26. §. 3.*

Passus LXXXIII.

Abundantiam rerum temporalium non facere felices.

I. *Imperfectorum sensus de divitibus.*

Dicunt multi imbecilles & infirmi; Ecce quam bonam vitam ille homo habet, quam dives, quam magnus, quam potens & excelsus! sed attende ad cœlestia bona, & videbis, quod omnia ista

ista temporalia, nulla sunt; sed valde incerta, & magis gravantia, quia nunquam sine sollicitudine & timore possidentur. *Lib. 1. cap. 22. §. 2.*

II. *Non est felix, qui abundat temporalibus:*

Non est hominis felicitas, habere temporalia ad abundantiam; sed sufficit ei mediocritas. Vere miseria est, vivere super terram. Quanto homo voluerit esse spiritualior, tanto præsens vita fit ei amarior; quia sentit melius, & videt clarius humanæ corruptionis defectus. *Lib. 1. cap. 22. §. 2.*

III. *Sed miser est, qui his indiget.*

Nam comedere, bibere, vigilare, dormire, quiescere, laborare, & cæteris necessitatibus naturæ subjacere; vere magna miseria est, & afflictio homini devoto, qui libenter esset absolutus, & liber ab omni peccato. Valde enim gravatur interior homo, necessitatibus corporalibus in hoc mundo. Unde Propheta devote rogat, quatenus liber ab istis esse valeat, dicens; *De necessitatibus meis erue me Domine. Lib. 1. cap. 22. §. 2. & 3.*

Passus LXXXIV.

De nimia sollicitudine rerum ad vitam necessariarum.

I. *Quis spiritus, sollicite querere,*

Nescio quid est, quo spiritu ducimur, & quid prætendimus, qui spirituales dici videmur: Quod tantum laborem, & ampliorem sollicitudinem, pro transitoriis & vilibus rebus agimus, &



de interioribus nostris vix aut raro, plene recollectis sensibus, cogitamus. *Lib. 3. cap. 31. §. 3.*

II. *Quibus felicius caremus;*

O si nunquam indigeres comedere, nec bibere, nec dormire: sed semper posses Deum laudare, & solummodo spiritualibus studiis vacare: tunc multo felicior esses, quam modo, cum carni ex qualicumque necessitate servis. Utinam non essent istæ necessitates, sed solummodo spirituales animæ refectiones, quas (heu!) satis raro degustamus. *Lib. 1. cap. 25. §. 9.*

III. *Et quæ onerosa sunt spiritui.*

Ecce cibus, potus, vestis, ac cætera utensilia, ad corporis sustentaculum pertinentia, ferventi spiritui sunt onerosa. Tribue talibus fomenti temperate uti, non desiderio nimio implicari. Abjicere omnia non licet, quia natura sustentanda est: requirere autem superflua, & quæ magis delectant, lex sancta prohibet: nam alias caro adversus spiritum insolesceret. Inter hæc, quæso, manus tua me regat, & doceat, ne quid nimium fiat. *Lib. 3. cap. 26. §. 4.*

Passus LXXXV.

Solatia mundi, nec beare, nec satiare.

I. *Satius est, ab esse solatia mundi:*

Utilius est sæpe & securius, quod homo non habeat multas consolationes in hac vita, secundum carnem præcipue. *Lib. 1. cap. 21. §. 3.*

II.



II. *Ut quæ non diu durant,*

Quod si omnia solatia mundi solus haberem, & omnibus delitiis frui possem, certum est, quod diu durare non possent. Unde non poteris, anima mea, plene consolari, nec perfecte recreari, nisi in Deo consolatore pauperum, ac susceptore humilium. *Lib. 3. cap. 16. §. 1.*

III. *Et animam non beant.*

Etiam si omnia creata bona haberes, non posses esse felix & beata: sed in Deo, qui cuncta creavit, tota beatitudo tua & felicitas consistit: non qualis videtur, & laudatur a stultis mundi amatoribus: sed qualem expectant boni Christi fideles, & prægustant interdum spirituales ac mundi corde, quorum conversatio est in cœlis. *Lib. 3. cap. 16. §. 2.*

IV. *Affectus.*

Quidquid desiderare possum, vel cogitare ad solatium meum, non hic expecto, sed imposterum. Expecta modicum, anima mea: expecta divinum promissum, & habebis abundantiam omnium bonorum in cœlo. *Lib. 3. cap. 16. §. 1.*

Colloquium.

Obsecro te, piissime Deus meus, præserva me a curis hujus vitæ, ne nimis implicer; a multis necessitatibus corporis, ne voluptate capiar; ab universis animæ obstaculis, ne molestiis fractus dejiciar. Non dico ab his rebus, quas toto affectu ambit vanitas mundana: sed ab his inferiis, quæ animam fervi tui, communi maledicto mortalitatis, pœnaliter gravant & retardant: ne in libertatem spiritus, quotiescunque libuerit, valeat introire. *Lib. 3. cap. 26. §. 2.*



Passus LXXXVI.

Solatia mundi, maximo esse incommodo.

I. *Subtrahunt enim cœlestia:*

Si nimis inordinate ista appetis præsentia, perdes æterna & cœlestia. Sint temporalia in usu, æterna in desiderio. Non potes aliquo bono temporali satiari, quia ad hæc fruenda non es creata (o anima mea!) *Lib. 3. cap. 16. §. 1.* Vanum est & breve, omne humanum solatium. Beatum & verum solatium, quod intus a veritate percipitur. *cap. eod. §. 2.*

II. *Enervant spem gratiæ,*

Unde si bene scirem, omnem humanam consolationem abjicere, siue propter devotionem adipiscendam, siue propter necessitatem, qua compellor te quærere, quia non est homo, qui me consoletur: tunc possem merito de gratia tua sperare, & de dono novæ consolationis exultare. *Lib. 3. cap. 40. §. 3.*

III. *Quæ non patitur se misceri terrenis.*

Fili, pretiosa est gratia mea, non patitur se misceri extraneis rebus, nec consolationibus terrenis. Abjicere ergo oportet omnia impedimenta gratiæ, si optas ejus infusionem suscipere. *Lib. 3. cap. 53. §. 1.* Tanto homo Deo magis appropinquat, quanto ab omni solatio terreno longius recedit. *Lib. 3. cap. 42. §. 1.*



Passus LXXXVII.

Consolationes divinas cæteris omnibus præstare, darique præter meritum.

I. *Delitiæ mundi aut vanæ sunt, aut turpes.*

Quis sæcularium, non libenter consolationem & lætitiâ spirituales acciperet, si semper obtinere posset? Excedunt enim spirituales consolationes, omnes mundi delicias, & carnis voluptates. Nam omnes delitiæ mundanæ, aut vanæ sunt, aut turpes. Spirituales vero delitiæ, solæ jucundæ & honestæ, ex virtutibus progeneritæ, & a Deo puris mentibus infusæ. *Lib. 2. cap. 10. §. 1.*

II. *Divinis non semper frui potest homo;*

Sed istis divinis consolationibus nemo semper pro suo affectu frui valet; quia tempus tentationis non diu cessat. *Lib. 2. cap. 10. §. 1.* Cognosce te indignum divina consolatione, sed magis dignum multa tribulatione. *Lib. 1. cap. 21. §. 4.*

III. *Dantur tamen præter omne meritum.*

Ergo vera pensa ratione, nec minima sum dignus consolatione. Sed tu clemens & misericors Deus, qui non vis perire opera tua, ad ostendendum divitias bonitatis tuæ in vasa misericordiæ, etiam præter omne proprium meritum, dignaris consolari servum tuum supra humanum modum. Tuæ enim consolationes, non sunt sicut humanæ confabulationes. Quid egi, Domine,



ne, ut mihi conferres aliquam cœlestem consolationem? Ego nihil boni me egisse recolo, sed semper ad vitia pronum, & ad emendationem pigrum fuisse. Verum est, & negare non possum. Si aliter dicerem, tu stares contra me, & non esset, qui defenderet. *Lib. 3. cap. 52. §. 1. & 2.*

Passus LXXXVIII.

Consolationibus divinis non nimis inhiandum.

I. *Quia hic non est locus proprius.*

Cur quæris quietem, cum natus sis ad laborem? Pone te ad patientiam magis, quam ad consolationes: & ad crucem portandam magis, quam ad lætitiā. *Lib. 2. cap. 10. §. 1.*

II. *Et sancti non semper habuerunt.*

Putas tu, quod semper habebis pro tua voluntate consolationes spirituales? Sancti mei non semper habuerunt tales, sed multas gravitates, & tentationes. Sed patienter sustinuerunt se in omnibus, & magis confisi sunt Deo, quam sibi: scientes, quia non sunt condignæ passionēs hujus temporis, ad futuram gloriam promerendam. *Lib. 3. cap. 35. §. 3.*

III. *Nec tu nimis appetite, nec diffide.*

Vis tu statim habere, quod multi post multas lacrimas, & magnos labores, vix obtinuerunt? Expecta Dominum, viriliter age, & confortare: noli diffidere, noli discedere: sed corpus & animam



nam expone constanter, pro gloria Dei. Ego reddam plenissime : ego tecum ero, in omni tribulatione. *Lib. 3. cap. 35. §. 3.*

Passus LXXXI.

Eum esse magnum, qui omni solatio carere possit.

I. *Quis homo vere magnus?*

Non est grave, humanum contemnere solatium, cum adest divinum. Magnum est, & valde magnum, tam humano quam divino posse carere solatio : & pro honore Dei, libenter exilium cordis velle sustinere : & in nullo se ipsum quærere, nec ad proprium meritum respicere. *Lib. 2. cap. 9. §. 1.*

II. *Quis minime mirandus?*

Quid magni est, si hilaris sis & devotus, adveniente gratia? optabilis cunctis hæc hora. Satis suaviter equitat, quem gratia Dei portat. Et quid mirum, si onus non sentit, qui portatur ab omnipotente, & ducitur a summo ductore? *Lib. 2. cap. 9. §. 1.*

III. *Quis pronus ad consolationes humanas?*

Quando homo stat super se ipsum, facile labitur ad consolationes humanas. Sed verus amator Christi, & studiosus sectator virtutum, non cadit super consolationes, nec quærît tales sensibiles dulcedines : sed magis fortes exercitationes, & pro Christo duos sustinere labores. *Lib. 2. cap. 9. §. 3.*



VIÆ PURGATIVÆ SEMITA TERTIA.

*Pro extirpatione malorum Ha-
bituum.*

Sunt autem habitus mali, pravæ quædam inclinationes animi, ex frequentatis actibus vitiis acquisitæ. Istæ, ad consequendam perfectionem, omnibus viribus laborandum est, ut radicitus evellantur. Ad quod strenue perficiendum animos addit Thomas noster, *Lib. 1. cap. 21. § 2.* *Certa, inquit, viriliter, consuetudo consuetudine vincitur.* Agit autem hoc in libello de cura non omnium, sed præcipuorum habituum malorum, qui hominum spiritualium animis perniciosius insident. Primum igitur unumquemque admonet, *Lib. 1. cap. 20. §. 1.* his duabus vocalis: *Relinque curiosa.*

Passus XC.

De curiositate inquirendi in vitam
aliorum.

I. *Hanc curiositatem luit homo;*

Si tu scis homines dimittere, ipsi bene te dimittent tua facta facere. Non attrahas tibi res aliorum, nec te implices causis majorum. Habe semper oculum super te primum, & admoneas te ipsum specialiter, præ omnibus tibi dilectis. *Lib. 1. cap. 21. §. 2. & 3.*

II.

II. *Improbat Deus,*

Fili noli esse curiosus, nec vacuas gerere sollicitudines. Quid hoc vel illud ad te? tu me sequere. Quid enim ad te, utrum ille sit talis vel talis, aut iste sic & sic agit, vel loquitur? Tu non indiges respondere pro aliis, sed pro te ipso rationem reddes. Quid ergo te implicas? *Lib. 3. cap. 24. §. 1.*

III. *Qui solus omnia singulorum novit.*

Ecce ego omnes cognosco: & cuncta, quæ sub sole fiunt, video: & scio, qualiter cum unoquoque sit, quid cogitet, quid velit, & ad quem finem tendat ejus intentio. Mihi igitur omnia committenda sunt: tu vero serva te in bona pace, & dimitte agitantem agitare, quantum voluerit. Veniet super eum, quidquid fecerit, vel dixerit, quia me fallere non potest. *Lib. 3. cap. 24. §. 1.*

IV. *Affectus & Propositum.*

O quam bonum & pacificum de aliis filere, nec indifferenter omnia credere, neque de facili ulterius effari: paucis se ipsum revelare, te semper inspectorem cordis quærere: nec omni vento verborum circumferri, sed omnia intima, & externa secundum placitum tuæ voluntatis, optare perfici. *Lib. 3. cap. 45. §. 5.*

Passus XCI.

De curiositate innotescendi hominibus.

I. *Damnum erga se.*

Non sit tibi curæ de magni nominis umbra, non de multorum familiaritate, nec de privata ho-



hominum dilectione. Ista enim generant distractiones, & magnas in corde obscuritates. *Lib. 3. cap. 24. §. 2.*

II. *Damnum erga alios.*

Quandoque accidit, ut persona ignota ex bona fama luceat: cujus tamen præsentia oculos intuentium offuscat. Putamus aliquando aliis placere, ex conjunctione nostra: & incipimus magis displicere, ex morum improbitate in nobis considerata. *Lib. 1. cap. 8. §. 2.*

III. *Damnum erga Deum.*

Si non habes favorem hominum, noli ex hoc tristari: sed hoc sit tibi grave, quia non habes te satis bene & circumspicere, sicut deceret Dei servum, & devotum religiosum conversari. *Lib. 1. cap. 21. §. 3.*

IV. *Fructus occultæ vitæ.*

Quam tutum, pro conservatione cœlestis gratiæ, humanam fugere apparentiam, nec appetere, quæ foris admirationem videntur præbere: sed ea, tota sedulitate sectari, quæ vitæ emendationem dant & fervorem. *Lib. 3. cap. 45. §. 5.*

Passus CXII.

De curiositate videndi.

I. *Videre & non habere,*

Quid vis videre, quod non licet habere? Transiit mundus, & concupiscentia ejus. Quid potes alibi videre, quod hic non vides? Ecce cœlum & terra, & omnia elementa; nam ex istis omnia sunt facta. *Lib. 1. cap. 20. §. 7.*

II.



II. *Immo nec satiari posse,*

Quid potes alicubi videre, quod diu potest sub sole permanere? Credis te forsitan satiari, sed non poteris pertingere. Si cuncta videres præsentia, quid esset nisi visio vana. *Lib. 1. cap. 20. §. 8.*

III. *Magna vanitas.*

Leva oculos tuos ad Deum in excelsis, & ora pro peccatis tuis & negligentis. Dimitte vana vanis: tu autem intende illis, quæ tibi præcepit Deus. *Lib. 1. cap. 20. §. 8.*

Passus XCIII.

De curiositate sciendi & audiendi
nova.

I. *Multa in Scripturis simpliciter,*

Curiositas nostra sæpe nos impedit, in lectione scripturarum: cum volumus intelligere & discutere, ubi simpliciter esset transeundum. Si vis profectum haurire, lege humiliter, simpliciter, & fideliter: nec unquam velis habere nomen scientiæ. *Lib. 1. cap. 5. §. 2.*

II. *In mundo surda prætereas aure:*

Ex quo nova delectat aliquando audire, oportet te exinde turbationem cordis tolerare. *Lib. 1. cap. 20. §. 8.* Fili, in multis oportet te esse inscium, & æstimare te tamquam mortuum super terram, & cui totus mundus crucifixus sit. Multa etiam oportet surda aure pertransire, & quæ tuæ pacis sunt, magis cogitare. *Lib. 3. cap. 44. §. 1.*

III.



III. *Et te ad æterna transfer.*

Memento illius frequenter proverbii, quia non satiatur oculus visu, nec auris impletur auditu. Stude ergo cor tuum, ab amore visibilium abstrahere, & ad invisibilia te transferre. Nam sequentes suam sensualitatem, maculant conscientiam, & perdunt Dei gratiam. *Lib. 1. cap. 1. §. 5.*

Passus XCIV.

De bono curiositatis compressæ.

I. *Tempus sufficiens sacris meditationibus.*

Si te subtraxeris a superfluis locutionibus, & otiosis circuitationibus, nec non a novitatibus & rumoribus audiendis; invenies tempus sufficiens & aptum, pro bonis meditationibus insistendis. *Lib. 1. cap. 20. §. 1.*

II. *Tranquilla conscientia.*

O qui nunquam transitoriam lætitiā quæret: qui nunquam cum mundo se occuparet, quam bonam conscientiam fervaret! O qui omnem vanam sollicitudinem amputaret, & duntaxat salutaria ac divina cogitaret, & totam spem suam in Deo constitueret, quam magnam pacem & quietem possideret. *Lib. 1. cap. 20. §. 4.*

III. *Pax & quies.*

Multam possemus pacem habere, si non vellemus nos cum aliorum dictis & factis, & quæ ad nostram curam non spectant, occupare. Quomodo potest ille diu in pace manere, qui alienis curis se intermiscet? qui occasiones forinsecus quæ-



quærit? qui parum vel raro se intrinsecus colligit? Beati simplices, quoniam multam pacem habebunt. *Lib. 1. cap. 11. §. 1.*

Passus XCV.

De curiositate perscrutandi judicia Dei.

I. *Propter hanc multi graviter labuntur.*

Quidam non sincere coram me ambulant, sed quadam curiositate & arrogantia ducti, volunt secreta mea scire, & alta Dei intelligere, se & suam salutem negligentes. Hi sæpe in magnas tentationes & peccata, propter suam superbiam & curiositatem, me eis adversante, labuntur. Time judicia Dei, expavesce iram omnipotentis. Noli discutere opera Altissimi, sed tuas iniquitates perscrutare, in quantis deliquisti, & quam multa bona neglexisti. *Lib 3. cap. 4. §. 3. & 4.*

II. *Et quia nemo hominum potest investigare,*

Fili, caveas disputare de altis materiis, & de occultis Dei judiciis: cur iste sic relinquitur, & ille ad tantam gratiam assumitur. Cur etiam iste tantum affligitur, & ille tam eximie exaltatur. Ista omnem humanam facultatem excedunt: nec ad investigandum judicium divinum, ulla ratio prævalet, vel disputatio. *Lib. 3. cap. 58. §. 1.*

III. *Quomodo huic tentationi obviandum?*

Quando ergo hæc tibi suggerit inimicus, vel etiam quidam curiosi inquirunt homines, responde



de illud Prophetæ; *Iustus es, Domine; & rectum
judicium tuum. Et illud; Judicia Domini ve-
ra, justificata in semetipsa. Judicia mea metuen-
dā sunt, non discutienda, quia humano intellec-
tui sunt incomprehensibilia. Lib. 3. cap. 58. §. 1.*

Passus XCVI.

De anxia curiositate sciendi suam præ-
destinationem.

I. *Creditur fuisse ipse Thomas a Kempis.*

Cum quidam anxius, inter metum & spem fre-
quenter fluctuaret, & quadam vice mœrore
confectus, in Ecclesia ante quoddam altare se in
oratione prostravisset, hæc inter se revolvit di-
cens: O si scirem, quod adhuc perseveraturus
essem! *Lib. 1. cap. 25. §. 2.*

II. *Quid audierit.*

Statim audivit divinum intus responsum: Quod,
si hoc scires, quid facere velles? Fac nunc, quod
tunc facere velles, & bene securus eris. *Ibidem.*

Quem fructum inde tulerit.

Mox consolatus, & confortatus, divinæ se
commisit voluntati, & cessavit anxia fluctuatio.
Noluitque amplius curiose investigare, ut sciret,
quæ sibi essent futura: sed magis studuit inquire-
re, quæ esset voluntas Dei beneplacens & per-
fecta, ad omne opus bonum inchoandum & per-
ficiendum *Lib. 1. cap. 25. §. 2.* Spera in Domi-
no, & fac bonitatem, ait Prophetæ, & inhabita
terram, & pascaris in divitiis ejus. *Ibid. §. 3.*

Passus

Passus XCVII.

De curiositate inquirendi, quis Sanctus altero major sit.

I. *Damna multa hinc sequuntur.*

Noli inquirere nec disputare de meritis Sanctorum, quis alio sit sanctior, aut quis major fuerit in regno cœlorum. Talia generant sæpe lites & contentiones inutiles, nutriunt quoque superbiam & vanam gloriam: unde oriuntur invidia & dissensiones, dum iste illum Sanctum, & alius alium conatur superbe præferre. Talia autem velle scire & vestigare, nullum fructum afferunt, sed magis Sanctis displicent: quia non sum Deus dissensionis, sed pacis, quæ pax magis in humilitate vera, quam in propria exaltatione consistit. *Lib. 3. cap. 58. §. 2.*

II. *Deus Sanctis omnia contulit:*

Quidam Zelo dilectionis, trahuntur ad hos vel ad illos ampliori affectu, sed humano potius, quam divino. Ego sum, qui cunctos condidi Sanctos, ego donavi gratiam: ego præstiti gloriam. Ego novi singulorum merita: ego præveni eos in benedictionibus dulcedinis meæ. Ego præscivi dilectos ante sæcula; ego eos elegi de mundo, non ipsi me præelegerunt. Ego vocavi per gratiam, attraxi per misericordiam: ego perduxi eos per tentationes varias. Ego infudi consolationes magnificas; ego dedi perseverantiam: ego coronavi eorum patientiam. *Lib. 3. cap. 58. §. 3.*



III. *Deo igitur omnia tribuenda.*

Ego primum & novissimum agnosco; ego omnes inæstimabili dilectione amplector. Ego laudandus sum in omnibus Sanctis meis; ego super omnia benedicendus sum, & honorandus in singulis, quos sic gloriose magnificavi, & prædestinavi sine ullis præcedentibus propriis meritis. Qui ergo unum de minimis meis contempserit, nec magnum honorat, quia pusillum & magnum ego feci. Et qui derogat alicui Sanctorum, derogat & mihi, & cæteris omnibus in regno cælorum. Omnes unum sunt per charitatis vinculum: idem sentiunt, idem volunt, & omnes in unum se diligunt. *Lib. 3. cap. 58. §. 4.*

IV. *Nec indulgendum affectibus humanis.*

Taceant igitur carnales & animales homines, de Sanctorum statu differere, qui non norunt nisi privata gaudia diligere. Demunt & addunt, pro sua inclinatione, non prout placet æternæ veritati. In multis est ignorantia, eorum maxime, qui parum illuminati, raro aliquem perfectæ dilectione spirituali diligere norunt. Multum adhuc naturali affectu & humana amicitia, ad hos vel ad illos trahuntur: & sicut in inferioribus se habent, ita & de cœlestibus imaginantur. Sed est distantia incomparabilis, quæ imperfecti cogitant, & quæ illuminati viri per revelationem supernam speculantur. *Lib. 3. cap. 58. §. 5. & 6.*



Passus XCVIII.

Quomodo se peccator gerat erga
Sanctos?

I. *Ut sit & ipse vel minimus Sanctorum,*

Cave ergo, fili, de istis curiose tractare, quæ
tuam scientiam excedunt: sed hoc magis sata-
ge & intende, ut vel minimus in regno Dei queas
inveniri. *Lib. 3. cap. 58. §. 7.*

II. *Coram Deo se humiliet,*

Etsi quispiam sciret, quis alio sanctior esset,
vel major haberetur in regno cœlorum: quid ei
hæc notitia prodesset, nisi se ex hac cognitione
coram me humiliaret, & in maiorem mei nomi-
nis laudem exurgeret? *Ibid.*

III. *Cogitet, quantum distet a per-
fectione Sanctorum:*

Multo acceptius Deo facit, qui de peccato-
rum suorum magnitudine, & virtutum suarum
parvitate cogitat, & quam longe a perfectione
Sanctorum distat; quam is, qui de eorum mayo-
ritate vel parvitate disputat. *Lib. 3. cap. 58. §. 7.*

IV. *Et eorum suffragia devote imploret.*

Melius est Sanctos devotis precibus & lacri-
mis exorare, & eorum gloriosa suffragia humili
mente implorare; quam eorum secreta, vana in-
quisitione perscrutari. Illi bene & optime con-
tentantur, si homines scirent contentari, & vani-
loquia sua compefcere. Non gloriantur de pro-
priis meritis, quippe qui sibi nihil bonitatis ad-
scribunt, sed totum mihi, quoniam ipsis cuncta



ex infinita charitate mea donavi. Tanto amore divinitatis, & gaudio supereffluenti replentur, ut nihil eis desit gloriæ, nihilque possit deesse felicitatis. *Lib. 3. cap. 58. §. 7. & 8.*

Passus XCIX.

Humilitas Sanctorum potius imitanda, quam de iis litigandum.

I. *Maximi meritis minimi sunt humilitate.*

Omnes Sancti, quanto altiores in gloria, tanto humiliores in se ipsis, & mihi viciniore & dilectiores existunt. Ideoque habes scriptum, quia mittebant coronas suas ante Deum, & ceciderunt in facies suas coram Agno, & adoraverunt viventem in sæcula sæculorum. *Lib. 3. cap. 58. §. 8.*

II. *Omnes in cælo magni sunt.*

Multi quærunt, quis major sit in regno Dei: qui ignorant, an cum minimis erunt digni computari. Magnum est, vel minimum esse in cælo, ubi omnes magni sunt: quia omnes filii Dei vocabuntur & erunt. Minimus erit in mille, & peccator centum annorum morietur. *Lib. 3. cap. 58. §. 9.*

III. *Ut simus & nos, studeamus humilitati.*

Cum enim quærerent discipuli, quis major esset in regno cælorum? tale audierunt responsum: *Nisi conversi fueritis, & efficiamini sicut parvuli, non intrabitis in regnum cælorum. Qui-*
cum-



camque ergo humiliaverit se, sicut parvulus iste, hic major est in regno cœlorum. Væ eis, qui cum parvulis humiliare se sponte dedignantur: quoniam humilis janua regni cœlestis eos non admittet intrare. Lib. 3. cap. 58. §. 9. & 10.

Passus C.

De cavenda superfluitate verborum.

I. *Propter damnum emergens:*


Caveas tumultum hominum, quantum potes: multum enim impedit tractatus sæcularium gestorum, etiam si simplici intentione proferantur. Cito enim inquinamur vanitate, & captivamur. Vellem me pluries tacuisse, & inter homines non fuisse. *Lib. 1. cap. 10. §. 1.*

II. *Propter exemplum Sanctorum,*

Maximi Sanctorum humana consortia, ubi poterant, vitabant, & Deo in secreto vivere eligebant. *Lib. 1. cap. 20. §. 1,*

III. *Et quotidianam experientiam,*

Dixit quidam; Quoties inter homines fui, minor homo redii. Hoc sæpius experimur, quando diu confabulamur. Facilius est, omnino tacere, quam verbo non excedere. Nemo secure loquitur, nisi qui libenter tacet. *Lib. 1. cap. 20. §. 2.*



Passus CI.

Loqui & confabulari cur tantopere inter nos desideremus.

I. *Propter consolationem externam,*

Quare tam libenter loquimur, & invicem fabulamur: cum tamen raro, sine læsione conscientiae, ad silentium redimus? Ideo tam libenter loquimur; quia per mutuas locutiones, ab invicem consolari quærimus: & cor diversis cogitationibus fatigatum optamus relevare. Et multum libenter de his, quæ multum diligimus, vel cupimus, vel quæ nobis contraria sentimus, libet loqui & cogitare. *Lib. 1. cap. 10. §. 1.*

II. *Quæ tamen valde obest internæ.*

Sed proh dolor! sæpe inaniter & frustra. Nam hæc exterior consolatio, interioris & divinæ consolationis non modicum detrimentum est. Ideo vigilandum est, & orandum, ne tempus otiose transeat. *Lib. 1. cap. 10. §. 2.*

III. *Quid igitur loquemur?*

Si loqui licet & expedit, quæ ædificabilia sunt, loquere. Malus usus & negligentia profectus nostri, multum facit ad incustodiam oris nostri. Juvat tamen non parum, ad profectum spirituales, devota spiritualium rerum collatio: maxime ubi pares animo & spiritu, in Deo sibi sociantur. *Lib. 1. cap. 10. §. 2.*



Passus CII.

De amore solitudinis & silentii.

I. *Ama solus habitare tecum.*

Pete secretum tibi, ama solus habitare tecum, nullius require confabulationem: sed magis ad Deum devotam effunde precem, ut compunctam teneas mentem, & puram conscientiam. Totum mundum nihil æstima: Dei vocationem omnibus exterioribus antepone. Non enim poteris mihi vacare, & in transitoriis pariter delectari. *Lib. 3. cap. 53. §. 1.*

II. *Exemplo D. N. Jesu Christi:*

Facilius est domi latere, quam foris se posse sufficienter custodire. Qui igitur intendit ad interiora & spiritualia pervenire, oportet eum cum Jesu a turba declinare. Nemo secure apparet, nisi qui libenter latet. *Lib. 1. cap. 20. §. 2.*

III. *Quem tibi cella custodita,*

In cella invenies, quod deforis sæpius amittes. Cella continuata dulcescit, & male custodita tædium generat. Si in principio conversionis tuæ, bene eam incolueris & custodieris, erit tibi postea dilecta amica, & gratissimum solatium. In silentio & quiete, proficit anima devota, & discit abscondita Scripturarum. *Lib. 1. cap. 20. §. 5. & 6.*

IV. *Cum Angelis sanctis adducet.*

Qui ergo se abstrahit a notis & amicis, approximabit illi Deus, cum Angelis sanctis. Melius est latere, & sui curam agere, quam se neglecto



lecto signa facere. Claude super te ostium tuum, & voca ad te Jesum, dilectum tuum. Mane cum eo in cella, quia non invenies alibi tantam pacem. *Lib. 1. cap. 20. §. 6. & 8.*

Passus CIII.

De damnis vagabundorum.

I. *Non permanent in pace.*

Laudabile est homini religioso, raro foras ire, fugere videri, nolle etiam homines videre. *Lib. 1. cap. 20. §. 6.* Si non exisses, nec quidquam de rumoribus audisses, melius in bona pace permanisses. *Ibidem §. 8.*

II. *Tristitiam reportant.*

Trahunt desideria sensualitatis ad spatiandum: sed cum hora transierit, quid nisi gravitatem conscientiae, & cordis dispersionem reportas? Lætus exitus, tristem sæpe reditum parit: & læta vigilia ferotina triste mane facit. Sic omne carnale gaudium blande intrat; sed in fine mordet, & perimit. *Lib. 1. cap. 20. §. 7.*

III. *Gratiam divinam facile perdunt.*

Quam tutum pro conservatione cœlestis gratiae, humanam fugere apparentiam, nec appetere, quæ foris admirationem videntur præbere: sed ea, tota sedulitate sectari, quæ vitæ emendationem dant & fervorem. Quam multis nocevit virtus scita, ac præpropere laudata! quam sane profuit gratia silentio servata in hac fragili vita, quæ tota tentatio fertur & militia! *Lib. 3. cap. 45. §. 5. & 6.*

Passus CIV.

De nimia Credulitate.

I. *Non facile cuilibet credendum.*

Non est credendum omni verbo, nec instinctui; sed cante & longanimiter res est secundum Deum ponderanda. Proh dolor! sæpe malum facilius, quam bonum, de alio creditur & dicitur, ita infirmi sumus. Sed perfecti viri non facile credunt omni enarranti: quia sciunt infirmitatem humanam, ad malum proclivem, & in verbis fatis labilem. *Lib. 1. cap. 4. §. 1.*

II. *Quod credis, non illico effutiendum.*

Magna sapientia est, non esse præcipitem in agendis, nec pertinaciter in propriis stare sensibus. Ad hanc etiam pertinet, non quibuslibet hominum verbis credere, nec audita vel credita, mox ad aliorum aures effundere. *Lib. 1. cap. 4 §. 2.*

III. *Josue deceptus, quod nimium credulus.*

Multi multa loquuntur, & ideo parva fides est adhibenda. *Lib. 3. cap. 36. §. 1.* Propterea namque Josue & Filii Israel a Gabaonitis leguntur decepti, quia os Domini prius non interrogaverunt, sed nimium creduli dulcibus sermonibus, falsa pietate delusi sunt. *Lib. 3. cap. 38. §. 2.*

IV. *Affectus & colloquium.*

Quare mihi misero non melius providi? Cur etiam tam facile aliis credidi? Sed homines sumus, nec aliud, quam fragiles homines sumus, etiam si



etiamſi Angeli a multis æſtimamur & dicimur. Cui credam Domine, cui, niſi tibi? Veritas es, quæ non fallis, nec falli poteſ. Et rurſum, *omnis homo mendax*, infirmus, inſtabilis, & labilis maxime in verbis: ita ut ſtatim vix credi debeat, quod rectum in facie ſonare videtur. Quam prudenter præmonuiſti, cavendum ab hominibus: & quia *inimici hominis domeſtici ejus*: nec credendum, ſi quis dixerit: Ecce hic, aut ecce illic. *Lib. 3. cap. 45. §. 3. & 4.*

Paſſus CV.

Secreta non evulganda.

I. *Non cuilibet te revela,*

Non omni homini reveles cor tuum: ſed cum ſapiente, & timente Deum, age cauſam tuam. *Lib. 1. cap. 8. §. 1.*

II. *Niſi velis prodi.*

Doctus ſum damno meo, & utinam ad cautelam majorem, & non ad inſipientiam mihi. Cautus eſto (ait quidam) cautus eſto, ſerva apud te, quod dico. Et dum ego ſileo, & abſconditum credo, nec ille ſilere poteſt, quod ſilendum petiit, ſed ſtatim prodit me & ſe, & abiit. *Lib. 3. cap. 45. §. 4.*

III. *Oratio & Propoſitum.*

Ab huiusmodi fabulis, & incautis hominibus protege me Domine, ne in manus eorum incidam, nec unquam talia committam. Verbum verum & ſtabile da in os meum, & linguam callidam longe fac a me. Quod pati nolo, omnimode cavere debeo. *Lib. 3. cap. 45. §. 4.*

Paſſus



Passus CVI.

De temerario judicio vitando.

I. *Neminem, nisi te ipsum judica:*

Ad te ipsum oculos reflecte, & aliorum facta caveas judicare. In judicando alios, homo frustra laborat, sæpius errat, & leviter peccat: se ipsum vero judicando, & discutiendo, semper fructuose laborat. Sicut nobis res cordi est, sic de ea frequenter judicamus: nam verum judicium, propter privatam amorem, faciliter perdimus. Si Deus semper esset pura intentio nostri desiderii, non tam faciliter turbaremur pro resistantia sensus nostri. *Lib. 1. cap. 14. §. 1.*

II. *Vel multæ orientur dissensiones.*

Sed sæpe aliquid ab intra latet, vel etiam ab extra concurrit, quod nos etiam pariter trahit. Multi occulte se ipsos quærunt in rebus, quas agunt, & nesciunt. Videntur etiam in bona pace stare, quando res pro eorum velle fiunt, & sentire. Si autem aliter fit, quam cupiunt, cito moventur, & tristes fiunt. Propter diversitatem sensuum & opinionum, satis frequenter oriuntur dissensiones, inter amicos & cives, inter religiosos & devotos. *Lib. 1. cap. 14. §. 2.*

III. *Et tarde eris homo illuminatus.*

Antiqua consuetudo difficulter relinquitur: & ultra proprium videre, nemo libenter ducitur. Si rationi tuæ magis inniteris vel industriæ, quam virtuti subjectivæ Jesu Christi, raro & tarde eris homo illuminatus; quia Deus vult nos sibi perfecte subjici, & omnem rationem per inflammatum amorem transcendere. *Lib. 1. cap. 14. §. 3.*



Passus CVII.

De elatione cohibenda in bonis fortunæ, corporis, animi.

I. *Non te extollant bona Fortunæ;*

Ne glorieris in divitiis, si adsunt: nec in amicis, quia potentes sunt; sed in Deo, qui omnia præstat, & seipsum super omnia dare desiderat. *Lib. 1. cap. 7. §. 2.*

II. *Non bona Corporis;*

Non te extollas de magnitudine, vel pulchritudine corporis, quæ modica infirmitate corrumpitur, & defœdatur. *Lib. 1. cap. 7. §. 2.*

III. *Non bona Animi;*

Non placeas tibi ipsi, de habilitate, aut ingenio tuo: ne displiceas Deo, cujus est totum, quidquid boni naturaliter habueris. *Lib. 1. c. 7. §. 2.*

IV. *Vel Deus te humiliabit.*

Non confidas in tua scientia, vel astutia cujuscumque viventis: sed magis in Dei gratia, qui adjuvat humiles, & de se præsumentes humiliat. *Lib. 1. cap. 7. §. 1.*

Passus CVIII.

De elatione fugienda in bonis operibus.

I. *Nulli te præferas,*

Non te reputes aliis meliorem, ne forte coram Deo deterior habearis, qui scit, quid est in homine. *Lib. 1. cap. 7. §. 3.*

II.



II. *Nec propter opera bona:*

Non superbias de operibus bonis: quia aliter sunt judicia Dei, quam hominum: cui sæpe displicet, quod hominibus placet. *Lib. 1. cap. 7. §. 3.*

III. *Sed semper crede de aliis meliora.*

Si aliquid boni habueris, crede de aliis meliora, ut humilitatem conserves. Non nocet, si omnibus te supponas: nocet autem plurimum, si vel uni te præponas. Jugis pax cum humili: in corde autem superbi zelus & indignatio frequens. *Lib. 1. Cap. 7. §. 3.*

Passus CLX.

Vana spes, quæ ponitur in hominibus.

I. *Sperandum in solo Deo.*

Vanus est, qui spem suam ponit in hominibus, aut in creaturis. Non stes super te ipsum, sed in Deo spem tuam constitue. Fac quod in te est, & Deus aderit voluntati tuæ. *Lib. 1. Cap. 1. §. 1.*

II. *Spes humana decipit.*

Non confidas, nec innitaris super calamus ventosum: quia omnis caro fœnum, & omnis gloria ejus, ut flos fœni cadet. Cito decipieris, si ad externam hominum apparentiam tantum aspexeris. Si enim tuum in aliis quæris solatium, & lucrum, sentis sæpius detrimentum. *Lib. 2. cap. 7. §. 2. & 3.*

III.



III. *Homo multum variabilis.*

Non est magna fiducia ponenda, in homine fragili & mortali, etiamsi utilis sit & dilectus: neque tristitia multa ex hoc capienda, si interdum adverfetur & contradicat. Qui hodie tecum sunt, cras contrariari possunt; & e converso, saepe ut aura vertuntur. Pone totam fiduciam tuam in Deo, & sit ipse timor tuus, & amor tuus. Ipse pro te respondebit, & faciet bene, sicut melius fuerit. *Lib. 2. cap. 1. § 3.*

IV. *Oratio ad Deum.*

Da mihi auxilium Domine de tribulatione, quia vana salus hominis. Quam saepe ibi non inveni fidem, ubi me habere putavi! Quoties etiam ibi reperi, ubi minus praesumpsi! Vana ergo spes in hominibus, salus autem justorum, in te Deus. *Lib. 3. cap. 45. §. 1.*

Passus CX.

Vana spes, quæ ponitur in amicis.

I. *Rarus amicus fidus, præter Deum.*

Rarus fidus amicus, in cunctis amici perseverans pressuris. Du Domine, tu solus es fidelissimus in omnibus, & præter te non est alter talis. O quam bene sapuit sancta illa anima, quæ dixit: Mens mea solidata est, & in Christo fundata. Si ita mecum foret, non tam facile timor humanus me sollicitaret, nec verborum jacula moverent. *Lib. 3. cap. 45. §. 2, & 3.*



II. *Omnes amici olim relinquendi.*

Ab omnibus (amicis) oportet te aliquando separari, siue velis, siue nolis. *Lib. 2. cap. 7. §. 1.* A notis & a charis oportet elongari, & ab omni temporali solatio mentem tenere privatam. Sic obsecrat B. Apostolus Petrus, ut tanquam advenas & peregrinos in hoc mundo se contineant Christi fideles. *Lib. 3. cap. 53. §. 1.*

III. *Quomodo diligendus amicus.*

Fili, si ponis pacem tuam cum aliqua persona, propter tuum sentire & convivere, instabilis eris & implicatus. Sed si recursum habes, ad semper viventem & manentem veritatem, non contristabit amicus recedens aut moriens. In me debet amici dilectio stare: & propter me diligendus est, & multum charus in hac vita. Sine me non valet, nec durabit amicitia, nec est vera & munda dilectio, quam ego non copulo. Ita mortuus debes esse talibus affectionibus dilectorum hominum, ut (quantum ad te pertinet) sine omni humano optares esse consortio. *Lib. 3. cap. 42. §. 1.*

Passus CXI.

Exemplum ordinatæ dilectionis, quod præbuit S. Laurentius.

I. *Laurentius Sixtum ferebat a se tolli.*

Libenter habemus aliquid pro solatio, & difficulter homo exuitur a se ipso. Vicit Sanctus Martyr Laurentius sæculum cum suo Sacerdote: quia omne, quod in mundo delectabile videbatur, despexit: & summum Dei Sacerdotem
Six-



Sixtum, quem maxime diligebat, pro amore Christi, etiam a se tolli clementer ferebat. Amore igitur Creatoris, amorem hominis superavit: & pro humano solatio, divinum beneplacitum magis elegit. *Lib. 2. cap. 9. §. 2.*

II. *Disce relinquere & relinqui.*

Ita & tu aliquem necessarium & dilectum amicum, pro amore Dei disce relinquere. Nec graviter feras, cum ab amico derelictus fueris, sciens, quoniam oportet nos omnes tandem ab invicem separari. *Lib. 2. cap. 9. §. 2.*

III. *Charitas, sæpe carnalitas.*

Sæpe videtur esse charitas, & est magis carnalitas: quia naturalis inclinatio, propria voluntas, spes retributionis, affectus commoditatis, raro abesse volunt. *Lib. 1. cap. 15. §. 2.*

Passus CXII.

Quorum familiaritas fugienda, & quorum expetenda.

I. *Fugienda juvenum, extraneorum, divitum,*

Cum juvenibus, & extraneis, rarus esto. Cum divitibus noli blandiri, & coram magnatibus non libenter appareas. Cum humilibus & simplicibus, cum devotis & morigeratis sociare; & quæ ædificationis sunt, pertracta. *Lib. 1. cap. 8. §. 1.*

II. *Mulierum.*

Non sis familiaris alicui mulieri: sed in communi, omnes bonas mulieres Deo commenda. *Lib. 1. cap. 8. §. 1.*

III.

III. *Expetenda Dei & Angelorum.*

Soli Deo & Angelis ejus, opta familiaris esse, & hominum notitiam devita. Charitas habenda est ad omnes, sed familiaritas non expedit. *Lib. 1. cap. 8. §. 1. & 2.*

Passus CXIII.

De abnegatione sensus proprii.

I. *Est necessaria propter bonum pacis:*

Verum est, quod unusquisque libenter agit pro sensu suo; & inclinatur ad eos magis, qui secum sentiunt. Sed si Deus est inter nos, necesse est, ut relinquamus etiam quandoque nostrum sentire, propter bonum pacis. Quis est ita sapiens, qui omnia plene scire potest? Ergo noli nimis in sensu tuo confidere: sed velis etiam libenter aliorum sensum audire: *Lib. 1. cap. 9. §. 2.*

II. *Utilis majori profectui.*

Si bonum est tuum sentire, & hoc ipsum propter Deum dimittis, & alium sequeris, magis exinde proficies. Audivi enim sæpe, securius esse audire & accipere consilium, quam dare: potest etiam contingere, ut bonum sit uniuscujusque sentire: sed nolle aliis acquiescere, cum id ratio, aut causa postulat, signum est superbiæ & pertinaciæ. *Lib. 1. cap. 9. §. 2. & 3.*

III. *Incipientes sunt sine hac in manifesto periculo.*

Qui adhuc novi sunt, & imperiti, in via Domini, nisi consilio discretorum se regant, faciliter



ter decipi possunt & elidi. Quod si suum sentire magis sequi, quam aliis exercitatis credere volunt, erit eis periculosus exitus, si tamen retrahi a proprio conceptu noluerint. *Lib. 3. cap. 7. §. 2. & 3.*

Passus CXIV.

Non despondendus animus propter obtrectatores.

I. *Dummodo Deus a tuis partibus sit.*

Non magni pendas, quis pro te, vel contra te sit: sed hoc age & cura, ut Deus tecum sit in omni re, quam facis. Habeas conscientiam bonam, & Deus bene te defensabit. Quem enim Deus adjuvare voluerit, nullius perversitas nocere poterit. Si tu scis tacere & pati, videbis procul dubio auxilium Domini. Ipse novit tempus, & modum liberandi te, & ideo te debes illi resignare. Dei est adjuvare, & ab omni confusione liberare. *Lib. 2. cap. 2. §. 1.*

II. *Crede deteriora de te, quam dicantur.*

Fili, non ægre feras, si quidam de te male senserint: & dixerint, quod non libenter audias. Tu deteriora de te ipso sentire debes, & neminem infirmiores te credere. Si ambulas ab intra, non multum ponderabis volantia verba. Est non parva prudentia, filere in tempore malo, & introrsus ad me converti, nec humano iudicio disturbari. *Lib. 3. cap. 28. §. 1.*

III. *Non est ideo alius homo, quid- quid dicatur.*

Non sit pax tua in ore hominum. Sive enim bene, sive male interpretati fuerint, non es ideo alter homo: Ubi est vera pax, & vera gloria? Nonne in me? Et qui non appetit hominibus placere, nec timet displicere, multa perfruetur pace. Ex inordinato amore, & vano timore, oritur omnis inquietudo cordis, & distractio sensuum. *Lib. 3. cap. 28. §. 2.*

Passus CXV.

Cœlestis medici emplastrum, verborum
vulneribus imponendum.

I. *Quid cogitandum, sive reus sis, sive innocens.*

Fili, sta firmiter, & spera in me. Quid enim sunt verba, nisi verba? Per aerem volant, sed lapidem non lædunt. Si reus es, cogita, quod libenter emendare te velis. Si nihil tibi conscius es, pensa, quod velis libenter pro Deo hoc sustinere. Parum satis est, ut vel verba interdum sustineas, qui necdum fortia verbera tolerare vales. Et quare tam parva tibi ad cor transeunt, nisi quia adhuc carnalis es, & homines magis, quam oportet, attendis? Nam quia despici metuis, reprehendi pro excessibus non vis, & excusationum umbracula quæris. *Lib. 3. cap. 46. §. 1.*

II. *Videndum, an sis mundo mortuus,*

Sed inspicite te melius, & agnosces, quia vivit adhuc in te mundus, & vanus amor placendi
I ho-



hominibus. Cum enim bassari refugis, & confundi pro defectibus, constat utique, quod nec verus humilis sis, nec vere mundo mortuus, nec mundus tibi crucifixus. Sed audi verbum meum, & non curabis decem millia verba hominum.

Et nunquid tibi noceatur.

Ecce, si cuncta contra te dicerentur, quæ fingi malitiosissime possent; quid tibi nocerent, si omnino transire permitteres, nec plus quam festucam perpenderes? Nunquid vel unum capillum tibi extrahere possent? *Lib. 3. cap. 46. §. 2.*

III. Confidendum in Deo.

Sed qui cor intus non habet, nec Deum præ oculis, faciliter verbo movetur vituperationis. Qui autem in me confidit, nec proprio iudicio stare appetit, absque humano terrore erit. Ego enim sum iudex, & cognitor omnium secretorum: ego scio, qualiter res acta sit: ego injuriantem novi, & sustinentem. A me exiit verbum istud, me permittente hoc accidit, ut revelentur ex multis cordibus cogitationes. Ego reum & innocentem iudicabo, sed occulto iudicio utrumque ante probare volui. *Lib. 3. cap. 46. §. 3.*

Passus CXVI.

Alterum malagma, leniendo verborum dolori.

I. Iudicium Dei verissimum.

Testimonium hominum sæpe fallit: meum iudicium verum est, stabit, & non subvertetur. Latet plerumque, & paucis ad singula patet: nunquam

quam tamen errat, nec errare potest, etiamsi oculis insipientium non rectum videatur. Ad me ergo currendum est in omni iudicio, nec proprio innitendum arbitrio. *Lib. 3. cap. 46. §. 4.*

II. *Deus scrutatur corda & renes.*

Iustus non conturbabitur, quidquid a Deo ei acciderit. Etiamsi injuste aliquid contra eum prolatum fuerit, non multum curabit. Sed nec vane exultabit, si per alios rationabiliter excusetur. Pensat namque, quia ego sum scrutans corda & renes, qui non iudico secundum faciem & humanam apparentiam. Nam sæpe in oculis meis reperitur culpabile, quod hominum iudicio creditur laudabile. *Lib. 3. cap. 46. §. 4.*

III. *Affectus & oratio.*

Domine Deus, iudex iuste, fortis & patiens, qui hominum nosti fragilitatem & pravitatem, esto robur meum, & tota fiducia mea; non enim mihi sufficit conscientia mea. Tu nosti, quod ego non novi: & ideo in omni reprehensione humiliare me debui, & mansuete sustinere. Ignosce quoque mihi propitius, quoties sic non egi, & dona iterum gratiam amplioris sufferentiae. Melior est enim mihi tua copiosa misericordia, ad consecutionem indulgentiae: quam mea opinata iustitia, pro defensione latentis conscientiae. Et si nihil mihi conscius sum, tamen in hoc iustificare me non possum: quia remota misericordia tua, non iustificabitur in conspectu tuo omnis vivens. *Lib. 3. cap. 46. §. 5.*



Passus CXVII.

De noxia securitate non habenda.

I. *Pravorum securitas oritur ex superbia,*

Nemo secure gaudet, nisi bonæ conscientiae in se testimonium habeat. Pravorum autem securitas, ex superbia & præsumptione oritur, & in fine in deceptionem sui ipsius vertitur. Nunquam promittas tibi securitatem in hac vita, quamvis bonus videaris cœnobita, aut devotus eremita. *Lib. 1. cap. 20. §. 3.*

II. *Et ex nimia sui confidentia.*

Sæpe meliores in æstimatione hominum, gravius periclitati sunt, propter suam nimiam confidentiam. Unde multis utilius est, ut non penitus tentationibus careant, sed sæpius impugnentur, ne nimium securi sint: ne forte in superbiam eleventur; ne etiam ad exteriores consolationes licentius declinent. *Lib. 1. cap. 20. §. 4.*

III. *Oratio ad Deum.*

Benedictus sis Domine Deus meus in omnibus, quæ accidunt nobis. Infirmi sumus & instabiles, cito fallimur, & permutamur. Quis est homo, qui ita caute & circumspecte in omnibus se custodire valet, ut aliquando in aliquam deceptionem, vel perplexitatem non veniat? Sed qui in te Domine confidit, ac simplici ex corde quærit, non tam facile labitur: Et si inciderit in aliquam tribulationem, quocumque modo fuerit etiam implicatus, citius per te eruetur, aut a te consolabitur: quia tu non deseres in te sperantem usque in finem. *Lib. 3. cap. 45. §. 1. & 2.*

Passus



Passus CXVIII.

De vanitate scientiarum naturalium.

I. *Quid prodest scientia, sine Timore Dei?*

Omnis homo naturaliter scire desiderat: sed scientia sine timore Dei, quid importat? Melior est profecto humilis rusticus, qui Deo servit, quam superbus Philosophus, qui, se neglecto, cursum cœli considerat. *Lib. 1. cap. 2. §. 1.*

II. *Sine charitate?*

Si scirem omnia, quæ in mundo sunt, & non essem in charitate: quid me juvaret coram Deo, qui me judicaturus est ex facto. *Lib. 1. cap. 2. §. 1.*

III. *Sine notitia rerum utilium & necessariarum?*

Quid prodest magna cavillatio, de occultis & obscuris rebus, de quibus nec arguemur in iudicio, quia ignoravimus? Grandis insipientia, quod neglectis utilibus & necessariis, ultro intendimus curiosis & damnosis: oculos habentes non videmus. *Lib. 1. cap. 3. §. 1.*

IV. *Sine verbo æterno;*

Et quid curæ nobis, de Generibus & Speciebus? Cui æternum verbum loquitur, a multis opinionibus expeditur. Ex uno verbo omnia, & unum loquuntur omnia: & hoc est principium, quod & loquitur nobis. Nemo sine illo intelligit, aut recte judicat.

Quod



Quod est verum objectum attributionis.

Cui omnia unum sunt, & omnia ad unum trahit, & omnia in uno videt; potest stabilis corde esse, & in Deo pacificus permanere. O veritas Deus, fac me unum tecum in charitate perpetua. *Lib. 1. cap. 3. §. 2.*

Passus CXIX.

De vanitate scientiarum etiam sacrarum absque virtute.

I. *Quid Theologus sine humilitate?*

Quid prodest tibi, alta de Trinitate disputare: si careas humilitate, unde displiceas Trinitati? Vere alta verba, non faciunt sanctum & justum: sed virtuosa vita, efficit Deo charum. Opto magis sentire compunctionem, quam scire ejus definitionem. *Lib. 1. cap. 1. §. 3.*

II. *Quid divinarum scripturarum interpretes, sine charitate?*

Si scires totam Bibliam exterius, & omnium Philosophorum dicta: quid totum prodesset, sine charitate Dei & gratia? Vanitas vanitatum & omnia vanitas, præter amare Deum, & illi soli servire. Ista est summa sapientia, per contemptum mundi tendere ad regna cœlestia. *Lib. 1. cap. 1. §. 3.*

III. *Quid Concionator, sine exemplo?*

Certe adveniente die Judicii, non quæritur a nobis, quid legimus, sed quid fecimus: nec quam bene diximus, sed quam religiose viximus. *Lib. 1. cap. 3. §. 5.*



Passus CXX.

Per vanam scientiam multos periisse.

I. *Ob distractionem, deceptionem, & humanam laudem.*

Quiesce a nimio sciendi desiderio; quia magna ibi invenitur distractio, & deceptio. Scientes, libenter volunt videri, & sapientes dici. Multa sunt, quæ scire, parum vel nihil animæ profunt. Et valde insipiens est, qui aliquibus intendit, quam his quæ salutis suæ deserviunt. Multa verba non satiant animam, sed bona vita, refrigerat mentem: & pura conscientia, magnam ad Deum præstat confidentiam. *Lib. 1. cap. 2. §. 2.*

II. *Ob scandala & dissolutionem.*

Quia plures magis student scire, quam bene vivere; ideo sæpe errant, & pene nullum, vel modicum fructum ferunt. O si tantam adhiberent diligentiam, ad extirpanda vitia, & virtutes inferendas, sicuti ad movendas quæstiones: non fierent tanta mala & scandala in populo, nec tanta dissolutio in coenobiis. *Lib. 1. cap. 3. §. 4. & 5.*

III. *Ubi modo sunt, qui nuper studiis floruerunt?*

Dic mihi, ubi sunt modo omnes illi domini & magistri, quos bene novisti, dum adhuc viverent, & studiis flourerent? Jam eorum præbendas alii possident; & nescio, utrum de eis recogitant. In vita sua aliquid esse videbantur, & modo de illis tacetur. *Lib. 1. cap. 3. §. 5.*



IV. *Utinam vita eorum doctrinæ concordasset!*

O quam cito transit gloria mundi! utinam vita eorum scientiæ ipsorum concordasset: tunc bene studuissent, & legissent. Quam multi pereunt per vanam scientiam in sæculo, qui parum curant de Dei servitio! Et quia magis eligunt magni esse, quam humiles, ideo evanescunt in cogitationibus suis. *Lib. 1. cap. 3. §. 6.*

V. *Raro docti sinunt se regi.*

Raro sibi ipsis sapientes, ab aliis regi humiliter patiuntur. Melius est, sapere modicum cum humilitate, & parva intelligentia, quam magni scientiarum thesauri, cum vana complacentia. Melius est tibi minus habere, quam multum, unde posses superbire. *Lib. 3. cap. 7. §. 3.*

Passus CXXI.

Tria doctis viris inculcanda.

I. *Multa scis? de multis exigetur ratio.*

Quanto plus & melius scis, tanto gravius inde judicaberis, nisi sanctius vixeris. Noli ergo extolli de ulla arte, vel scientia: sed potius time, de data tibi notitia. *Lib. 1. cap. 2. §. 3.*

II. *Multa scis? plura nescis.*

Si tibi videtur, quod multa scis, & satis bene intelligis: scito tamen, quia sunt multo plura, quæ nescis. Noli altum sapere, sed ignorantiam tuam magis fatere. *Lib. 1. cap. 2. §. 3.*

III.

III. *Multa scis? plurimi sunt doctiores te.*

Quid te vis alicui præferre, cum plures doctiores te inveniantur, & magis in lege periti? Si vis utiliter aliquid scire, & discere: Ama nesciri, & pro nihilo reputari. *Lib. 1. cap. 2. §. 3.*

Passus CXXII.

Quibus rebus ante omnia studendum.

I. *Veræ humilitati:*

Haec est altissima & utilissima lectio, sui ipsius vera cognitio, & despectio. De se ipso nihil tenere, & de aliis semper bene & alte sentire, magna sapientia est, & perfectio. Si videres alium aperte peccare, vel aliqua gravia perpetrare, non deberes te tamen meliorem æstimare: quia nescis, quamdiu possis in bono stare. *Lib. 1. cap. 2. §. 4.*

II. *Cognitioni sui:*

Omnis perfectio in hac vita, quandam imperfectionem sibi habet annexam; & omnis speculatio nostra, quadam caligne non caret. Humilis tui cognitio, certior via est ad Deum, quam profunda scientiæ inquisitio. *Lib. 1. cap. 3. §. 4.*

Abnegationi voluntatis:

Vere bene doctus est, qui Dei voluntatem facit, & suam voluntatem relinquit. *Ibidem §. 6.*

III. *Vitæ virtuosæ:*

Non est culpanda scientia, aut quælibet simplex rei notitia, quæ bona est in se considerata,
&



& a Deo ordinata: sed præferenda est semper bona conscientia, & virtuosa vita. *Lib. 1. cap. 3. §. 4.*

Propter ultimum summi rigoris examen.

Veniet tempus, quando apparebit magister magistrorum Christus, Dominus Angelorum, cunctorum auditurus lectiones, hoc est, singulorum examinaturus conscientias. Et tunc scrutabitur Jerusalem in lucernis, & manifesta erunt abscondita tenebrarum, tacebuntque argumenta linguarum. *Lib. 3. cap. 43. §. 2.*

Passus CXXIII.

De modo studendi, quem tradidit Christus.

I. *Non delectandum pulchris hominum dictis;*

Fili, non te moveant pulchra, & subtilia hominum dicta. Non enim est regnum Dei in sermone, sed in virtute. Attende verba mea, quæ corda accendunt, & mentes illuminant: inducunt compunctionem, & variam ingerunt consolationem. *Lib. 3. cap. 43. §. 1.* Audi fili verba mea, verba suavissima, omnem Philosophorum & Sapientium hujus mundi scientiam excedentia.

Sed verbis Dei.

Verba mea spiritus & vita sunt, nec humano sensu pensanda. Non sunt ad vanam complacentiam trahenda, sed in silentio audienda, & cum omni humilitate atque magno affectu suscipienda.

Et



Et dixi: Beatus, quem tu erudieris Domine, & de lege tua docueris eum: ut mitiges a diebus malis ei, & non desoletur in terra. *Lib. 3. cap. 3. §. 1.*

II. *Non studendum, ut videaris sapientior.*

Nunquam ad hoc legas verbum, ut doctior aut sapientior possis videri. Stude mortificationi vitiorum, quia hoc amplius tibi proderit, quam notitia multarum difficilium quæstionum. *Lib. 3. cap. 43. §. 1.*

III. *Omnia ad unum principium referenda.*


Cum multa legeris & cognoveris, ad unum semper oportet redire principium. Ego sum, qui doceo hominem scientiam: & clariorem intelligentiam parvulis tribuo, quam ab homine possit doceri. Cui ego loquor, cito sapiens erit, & multum in spiritu proficiet. Væ eis, qui multa curiosa ab hominibus inquirunt, & de via mihi serviendi parum curant. *Lib. 3. cap. 43. §. 2.*

Passus CXXIV.

De excellentia divini magisterii.

I. *Quomodo doceat Christus.*

Ego sum, qui humilem in puncto elevo mentem: ut plures æternæ veritatis capiat rationes, quam si quis decem annis studuisset in scholis. Ego doceo sine strepitu verborum, sine confusione opinionum, sine fastu honoris, sine pugnatione argumentorum. *Lib. 3. cap. 43. §. 3.*



II. *Quid doceat.*

Ego sum, qui doceo terrena despiciere, præsentia fastidire, æterna quærere, æterna sapere; honores fugere, scandala sufferre, omnem spem in me ponere, extra me nil cupere, & super omnia me ardentè amare. *Lib. 3. cap. 43. §. 3.*

III. *Ex quo libro :*

Sed aliis loquor communia, aliis specialia: aliquibus in signis & figuris dulciter appareo, quibusdam vero in multo lumine revelo mysteria. Una vox librorum, sed non omnes æque informat: quia intus sum doctor veritatis, scrutator cordis, cogitationum intellectus, actionum promotor, distribuens singulis, sicut dignum judicaverò. *Lib. 3. cap. 43. §. 4.*

IV. *Et quot in singulos dies lectionibus.*

Ego duas lectiones electis meis quotidie lego: unam, increpando eorum vitia; alteram, exhortando ad virtutum incrementa. Qui habet verba mea, & spernit ea, habet, qui judicet eum in novissimo die. *Lib. 3. cap. 3. §. 4.*

Passus CXXV.

De felicitate discipulorum Jesu Christi.

I. *Ob infallibilitatem doctrinæ :*

Felix, quem veritas per se docet, non per figuras & voces transeuntes, sed sicuti se habet. Nostra opinio, & noster sensus, sæpe nos fallit, & modicum videt. *Lib. 1. cap. 3. §. 1.*



II. *Quæ simul est compendium omnis scientiæ.*

Tædet me sæpe, multa legere, & audire: in te est totum, o veritas Deus, quod volo & desidero. Taceant omnes Doctores: fileant universæ creaturæ, in conspectu tuo; tu mihi loquere solus. Quanto aliquis magis sibi unitus, & interius simplificatus fuerit, tanto plura & altiora, sine labore intelligit: quia desuper lumen intelligentiæ accipit. *Lib. 1. cap. 3. §. 2. & 3.*

III. *Idea talis discipuli.*

Quidam amando me intime, didicit divina, & loquebatur mirabilia. Plus profecit in relinquendo omnia, quam in studendo subtilia. *Lib. 3. cap. 43. §. 4.* Cui sapiunt omnia, prout sunt, non ut dicuntur, aut æstimantur: hic vere sapiens est, & doctus magis a Deo, quam ab hominibus. *Lib. 2. cap. 1. §. 7.*

Passus CXXVI.

De differentia discipulorum Christi, & Mundi.

I. *Illi facile, isti laboriose addiscunt.*

Est magna differentia, sapientia illuminati & viri devoti, & scientia litterati atque studiosi clerici. Multo nobilior est illa doctrina, quæ de sursum ex divina influentia manat: quam quæ laboriose, humano acquiritur ingenio. *Lib. 3. cap. 31. §. 2.*



II. *Illorum scientia Deus, horum, vanitas & mors.*

Ecce Deus meus & omnia. Cui tu sapias, quid ei recte non sapiet? & cui tu non sapias, quid ei ad jucunditatem esse poterit? Sed deficient in sapientia tua mundi sapientes, & qui carnem sapiunt: quia ibi plurima vanitas, & hic mors invenitur. Qui autem te per contemptum mundanorum, & carnis mortificationem sequuntur, vere sapientes esse cognoscuntur: quia de vanitate ad veritatem, de carne ad spiritum transferuntur. *Lib. 3. cap. 34. §. 2.*

III. *Illi interiora curant; isti externa considerant.*

Quantum quis fecerit, quæritur: sed ex quanta virtute agit, non tam studiose pensatur. Si fuerit fortis, dives, pulcher, habilis vel bonus scriptor, bonus cantor, bonus laborator, investigatur: quam pauper sit spiritu: quam patiens & mitis: quam devotus & internus a multis tacetur. Natura exteriora hominis respicit, gratia ad interiora se convertit. Illa frequenter fallitur, ista in Deo sperat, ut non decipiatur. *Lib. 3. cap. 31. §. 5.*



VIÆ PURGATIVÆ SEMITA QUARTA.

*Pro mortificatione Passionum,
seu victoria sui.*

Passus CXXVII.

De damnis, quæ invehunt immortificatæ passiones.

I. *Homo passionatus sibi molestissimus.*

Quis te magis impedit & molestat, quam tua immortificata affectio cordis. *Lib. 1. cap. 3.*

§. 3. Homo, qui necdum perfecte in se mortuus est, cito tentatur, & vincitur in parvis & vilibus rebus. *Lib. 1. cap. 6. §. 1.*

Vincitur & vincitur ubique.

Compediti sunt omnes proprietarii, & sui ipsius amatores, cupidi, curiosi, gyrovagi, quærentes semper mollia, non quæ Jesu Christi, sed hoc sæpe fingentes & componentes, quod non stabit. Peribit enim totum, quod non est ex Deo ortum. *Lib. 3. cap. 32. §. 1.*

II. *Etiam bonum in malum trahit.*

Homo passionatus, etiam bonum in malum trahit, & faciliter malum credit. Bonus pacificus homo, omnia ad bonum convertit. Qui bene
in



in pace est, de nullo suspicatur. Qui autem male contentus est, & commotus, variis suspitionibus agitur: nec ipse quiescit, nec alios quiescere permittit. Dicit sæpe, quod dicere non deberet: & omittit, quod sibi magis facere expediret. Considerat, quod alii facere tenentur: & negligit, quod ipse teneatur. Habe ergo primo zelum super te ipsum, & tunc juste zelare poteris etiam proximum tuum. *Lib. 2. cap. 3. §. 1.*

III. *Inique alios censet.*

Passione interdum movemur, & zelum putamus. Parva in aliis reprehendimus, & nostra majora pertransimus. Satis cito sentimus & ponderamus, quid ab aliis sustinemus: sed quantum alii de nobis sustinent, non advertimus. Qui bene & recte sua ponderaret, non esset, quod de alio graviter judicaret. *Lib. 2. cap. 5. §. 1.*

Passus CXXVIII.

Passionibus viriliter resistendum.

I. *Quod maximum nostrum certamen, & labor est.*

Quis habet fortius certamen, quam qui nititur vincere seipsum? Et hoc deberet esse negotium nostrum; vincere videlicet seipsum, & quotidie seipso fortiolem fieri, atque in melius aliquid proficere. *Lib. 1. cap. 3. §. 5.* Major labor est, resistere vitiis & passionibus, quam corporalibus insudare laboribus. Qui parvos non vitat defectus, paulatim labitur ad majores. *Lib. 1. Cap. 25. §. 11.*



II. *Resistendum in principio ;*

Grave est assueta dimittere, sed gravius est contra propriam voluntatem ire. Sed si non vincis parva & levia, quando superabis difficiliora? Resiste in principio inclinationi tuæ, & malam dedisce consuetudinem: ne forte paulatim, ad maiorem te ducat difficultatem. O si adverteres, quantam tibi pacem, & aliis lætitiā faceres, teipsum bene habendo, puto, quod sollicitior esses, ad spirituales profectum. *Lib. 1. cap. 11. §. 6.*

III. *Quo vera pax inveniat.*

Resistendo passionibus, invenitur pax vera cordis, non autem eis ferviendo. Non est ergo pax in corde hominis carnalis: non in homine exterioribus dedito, sed in fervido & spirituali. *Lib. 1. cap. 6. §. 2.*

IV. *Et cætera facilius vincantur.*

Si modicam violentiam faceremus in principio, tunc postea cuncta possemus facere, cum levitate & gaudio. *Lib. 1. cap. 11. §. 5.* Nisi tibi vim feceris, vitium non superabis. *Lib. 1. cap. 22. §. 5.* Tantum proficies, quantum tibi ipsi vim intuleris. *Lib. 1. cap. 25. §. 11.*

Passus CXXIX.

De fructibus Victoriæ sui ipsius.

I. *Profectus in virtutibus.*

Enim vero illi maxime præ cæteris in virtutibus proficiunt, qui ea, quæ sibi magis gravia & contraria sunt, viriliter vincere nituntur.

K

Nam



Nam ibi homo plus proficit, & gratiam meretur ampliorem: ubi magis seipsum vincit, & in spiritu mortificat. Sed non omnes habent æque multum ad vincendum & moriendum. Diligens tamen æmulator, valentior erit ad proficiendum, etiamsi plures habeat passiones, quam alius bene morigeratus, minus tamen fervens ad virtutes. *Lib. 1. cap. 25. §. 3. & 4.*

II. *Lenimen difficultatum.*

Quando homo perfecte incipit se vincere, & viriliter in via Dei ambulare: tunc minus ea reputat, quæ sibi prius gravia esse sentiebat. *Lib. 2. cap. 4. §. 3.*

III. *Victoria facilis cæterorum.*

Si temetipsum perfecte viceris, cætera facilius subjugabis. Perfecta victoria est, de semetipso triumphare. Qui enim semetipsum subiectum tenet, ut sensualitas rationi, & ratio in cunctis obediat mihi, hic vere victor est sui, & Dominus mundi. *Lib. 3. cap. 53. §. 2.*

IV. *Extirpatio radicis.*

Si ad hunc apicem scandere gliscis, oportet viriliter incipere, & securim ad radicem ponere, ut evellas & destruas occultam inordinatam inclinationem ad teipsum, & ad omne privatum & materiale bonum. *Lib. 3. cap. 53. §. 3.*

V. *Emendatio malæ consuetudinis.*

Obfistet inolita consuetudo, sed meliori consuetudine devincetur. Remurmurabit caro: sed fervore spiritus frenabitur. Instigabit & exacerbabitur.

babit te serpens antiquus, sed oratione fugabitur: insuper & labore utili, aditus ei magnus obstruetur. *Lib. 3. cap. 12. §. 5.*

Passus CXXX.

Exempla victorum sui ipsius.

I. *Fiunt perfecti & contemplativi.*

Quare quidam Sanctorum tam perfecti & contemplativi fuerunt? Quia omnino seiplos mortificare ab omnibus terrenis desideriis, studuerunt: & ideo totis medullis cordis, Deo inhærere, atque libere sibi vacare potuerunt. Nos nimium occupamur propriis passionibus, & de transitoriis nimis sollicitamur. Raro etiam unum vitium perfecte vincimus, & ad quotidianum profectum non accendimur: ideo frigidi & tepidi remanemus. *Lib. 1. cap. 11. §. 2.*

II. *Sapiunt iis divina.*

Si essemus nobis ipsis perfecte mortui, & interius minime implicati, tunc possemus etiam divina sapere, & de cœlesti contemplatione aliquid experiri. Totum & maximum impedimentum est, quia non sumus a passionibus & concupiscentiis liberi: nec perfectam Sanctorum viam conamur ingredi. Quando etiam modicum adversitatis occurrit, nimis cito deijcitur, & ad humanas consolationes convertitur. *Lib. 1. cap. 11. §. 3.*

III. *Adjuvantur a Deo.*

Si niteremur, sicut viri fortes, stare in prælio, profecto auxilium Domini super nos, videremus de cœlo. Ipse enim certantes, & de sua



gratia sperantes, paratus est adjuvare: qui nobis certandi occasiones procurat, ut vincamus. *Lib. I, cap. II. §. 4.*

Passus CXXI.

Postulatur gratia vincendi seipsum.

I. *Status hominis veteris.*

Adhuc, proh dolor! vivit in me vetus homo, non est totus crucifixus, non est perfecte mortuus, adhuc concupiscit fortiter contra spiritum, bella movet intestina, nec regnum animæ patitur esse quietum. *Lib. 3. cap. 34. §. 3.*

II. *Proponitur ille Deo,*

Sed tu, qui dominaris potestati maris, & motum fluctuum ejus mitigas, exurge, adjuva me. Dissipa gentes, quæ bella volunt: contere eas in virtute tua: ostende, quæso, magnalia tua, & glorificetur dextera tua: quia non est spes alia, nec refugium mihi, nisi in te Domine Deus meus. *Lib. 3. cap. 34. §. 4.*

III. *Et petuntur suppetiæ.*

Libera me a passionibus malis, & sana cor meum ab omnibus affectionibus inordinatis: ut intus sanatus, & bene purgatus, aptus efficiar ad amandum, fortis ad patiendum, stabilis ad perseverandum. *Lib. 3. cap. 5. §. 2.*



DE PASSIONIBUS IN SPECIE.

Passus CXXXII.

De passione Amoris inordinati erga se ipsum.

I. *Ex amore proprio pendet radix omnium pœne malorum.*

Ex hoc vitio, quod homo semetipsum nimis inordinate diligit, pœne totum pendet, quidquid radicaliter vincendum est. Quo devicto & subacto malo, pax magna, & tranquillitas erit continuo. Sed quia pauci sibi ipsis perfecte mori laborant, nec plene extra se tendunt, propterea in se implicati remanent, nec supra se in spiritu elevari possunt. *Lib. 3. cap. 53. §. 3.*

II. *Cujus extirpatio summe necessaria est:*

Si dederit homo omnem substantiam suam, adhuc nihil est. Et si fecerit pœnitentiam magnam, adhuc exiguum est. Et si apprehenderit omnem scientiam, adhuc longe est. Et si habuerit virtutem magnam, & devotionem nimis ardentem, adhuc multum sibi deest: scilicet unum, quod summe sibi necessarium est. Quid illud? Ut omnibus relictis, se relinquat, & a se totaliter exeat, nihilque de privato amore retineat. Cumque omnia fecerit, quæ facienda noverit, nil se fecisse sentiat. *Lib. 2. cap. 11. §. 4.*

III. *Quia nil magis nocet;*

Fili, oportet te dare totum pro toto, & nihil tui ipsius esse. Scito, quod amor tui ipsius magis



gis nocet tibi, quam aliqua res mundi. *Lib. 3. cap. 27. §. 1.*

At expugnatus ingentia bona parit.

Nemo tamen isto ditior, nemo potentior, nemo liberior: qui se, & omnia relinquere scit, & ad infimum se ponere. *Lib. 2. cap. 11. §. 5.* Si scires te perfecte annihilare, atque ab omni creato amore avacuare, tunc deberem in te cum magna gratia emanare. *Lib. 3. cap. 42. §. 2.*

Passus CXXXIII.

De passione Amoris inordinati erga creaturas.

I. *Sicut diligis, ita captus es.*

Secundum Amorem & Affectum, quem geris, quælibet res plus vel minus adhæret. Si fuerit amor tuus purus, simplex, & bene ordinatus, eris sine captivitate rerum. *Lib. 3. cap. 27. §. 1.* Juvat igitur, non quælibet res adepta, vel multiplicata exterius; sed potius contempta, & decisa ex corde radicitus. Quod non tantum de censu æris, & divitiarum, intelligas, sed de honoris etiam ambitu, ac vanæ laudationis desiderio, quæ omnia transeunt cum mundo. *Lib. 3. cap. 27. §. 3.*

II. *Tantum distraheris, quantum res attrahis tibi.*

Tantum homo impeditur & distrahitur, quantum sibi res attrahit. Si recte tibi esset, & bene purgatus esses, omnia tibi in bonum eederent, & profectum. Nil sic maculat & implicat cor ho-
mi-



minis, sicut impurus amor in creaturis. Si re-
quis consolari exterius, poteris speculari coele-
stia, & frequenter jubulare interius. *Lib. 2. cap. 1.*
§. 7 & 8.

III. *Amoris mortificatio necessaria.*

Pro nulla re mundi, & pro nullius hominis
dilectione, aliquod malum est faciendum. *Lib. 1.*
cap. 15. §. 1. Qui autem libere mecum ambu-
lare desiderat, necesse est, ut omnes pravas &
inordinatas affectiones suas mortificet, atque nul-
li creaturæ, privato amore, concupiscenter in-
hæreat. *Lib. 3. cap. 53. §. 3.*

IV. *Hujus mortificationis fructus.*

Si veraciter vis delectari, & abundantius a
me consolari, ecce in contemptu omnium mun-
danorum, & in abscissione omnium infirmarum
delectationum, erit benedictio tua, & copiosa
tibi reddetur consolatio. Et quanto te plus ab
omni creaturarum solatio subtraxeris, tanto in me
suaviores & potentiores consolationes invenies.
Sed primo, non sine quadam tristitia & labore
certaminis, ad has pertinges. *Lib. 3. cap. 12. §. 5.*

Passus CXXXIV.

De passione Odii.

I. *Unde oriatur.*

Ideo multa tibi displicent, & sæpe conturbant:
quia adhuc non es perfecte tibi ipsi mortuus;
nec segregatus ab omnibus terrenis. *Lib. 2. cap.*
1. §. 9.



II. *Cur defectus aliorum tolerandi sint.*

Stude patiens esse in tolerando aliorum defectus, & qualescunque infirmitates; quia & tu multa habes, quæ ab aliis oportet tolerari. Si non potes te talem facere, qualem vis; quomodo poteris alium ad tuum habere beneplacitum? libenter habemus alios perfectos, & tamen proprios non emendamus defectus. *Lib. I. cap. 16. §. 2.*

III. *Quam sit iniqua hæc passio.*

Volumus, quod alii stricte corrigantur, & ipsi corrigi nolumus. Displicet larga aliorum licentia, & tamen nobis nolumus negari, quod petimus. Alios restringi per istatuta volumus, & ipsi nullatenus nos patimur amplius cohiberi. Sic ergo patet, quam raro proximum, sicut nos ipsos pensamas. *Lib. I. cap. 16. §. 3.*

Passus CXXXV.

De passione Desiderii.

I. *Hinc illa animi inquietudo,*

Quandocumque homo aliquid inordinate appetit, statim in se inquietus fit. Superbus, & avarus nunquam quiescunt: pauper & humilis spiritu, in multitudine pacis conversantur. *Lib. I. cap. 6. §. 1.* Bonus & devotus homo opera sua prius intus disponit, quæ foris agere debet. Nec illa trahunt eum ad desideria vitiosæ inclinationis, sed ipse inflectit ea ad arbitrium rectæ rationis. *Lib. I. cap. 3. §. 3.*

II. *Et privatio libertatis interioris.*

Noli concupiscere, quod non licet habere
Noli habere, quod te potest impedire, & liber
ta-



tate interiori privare. Mirum, quod non ex toto fundo cordis, teipsum mihi committis, cum omnibus, quæ desiderare potes, vel habere. *Lib. 3. cap. 27. §. 1.*

III. Refrænanda igitur hæc passio etiam in bonis studiis.

Expedit interdum refrænatione uti, etiam in bonis studiis & desideriis: ne per importunitatem, mentis distractionem incurras: ne aliis per indisciplinationem, scandalum generes: vel etiam per resistantiam aliorum, subito turberis & corruas. *Lib. 3. cap. 11. §. 2.*

Passus CXXXVI.

Desideria cordis esse examinanda, ac moderanda.

I. Quorsum tendant, vide; ad Deum vel ad te?

Fili, oporet te adhuc multa addiscere, quæ necdum bene didicisti. Quæ sunt hæc Domine? Ut desiderium tuum ponas totaliter secundum beneplacitum meum: & tui ipsius amator non sis, sed meæ voluntatis cupidus æmulator. Desideria te sæpe accendunt, & vehementer impellunt: sed considera, an propter honorem meum, an propter tuum commodum magis movearis. Si ego sum in causa, bene contentus eris, quomodocumque ordinavero: si autem de proprio quæsitu aliquid latet, ecce hoc est, quod te impedit & gravat. *Lib. 3. cap. 11. §. 1.*



II. *Prudentia itaque adhibenda est,*

Cave ergo, ne nimium innitaris super desiderio præconcepto, me non consulto: ne forte postea pœniteat, aut displiceat, quod primo placuit, & quasi pro meliore zelasti. Non enim omnis affectio, quæ videtur bona, statim est sequenda: sed neque omnis contraria affectio ad primum fugienda. *Lib. 3. cap. 11. §. 2.*

III. *Et nonnunquam etiam violentia.*

Interdum vero oportet violentia uti, & viriliter appetitui sensitivo contraire, nec advertere, quid velit caro, & quid non velit: sed hoc magis satagere, ut subiecta sit etiam nolens spiritui. Et tamdiu castigari debet, & cogi servituti subesse, donec parata sit ad omnia, paucisque contentari discat, & simplicibus delectari, nec contra aliquod inconveniens musitare. *Lib. 3. cap. 11. §. 3.*

Passus CXXXVII.

De passione Fugæ.

I. *Fuga tribulationem trahit secum, non tollit:*

Quamdiu pati grave tibi est, & fugere quæris, tamdiu male habebis, & sequetur te ubique fuga tribulationis. Si poniste, ad quod esse debes, videlicet ad patiendum & moriendum, fiet cito melius, & pacem invenies. *Lib. 2. cap. 12. §. 11. & 12.*

II. *Summo studio quæsitâ rejicit, aut damnat.*

Fili, sæpe homo rem aliquam vehementer agitat, quam desiderat: sed cum ad eam pervenerit, aliter sentire incipit: quia affectiones circa idem, non sunt durabiles: sed magis de uno ad aliud impellunt. *Lib. 3. Cap. 39. §. 2.*

III. *Mutatio locorum parum prodest.*

Munit parum locus, si deest spiritus fervoris: nec diu stabit pax illa quæsitâ forinsecus, si vacat a vero fundamento status cordis, hoc est, nisi steteris in me; permutare te potes, sed non meliorare. Nam occasione orta & accepta, invenies, quod fugisti, & amplius. *Lib. 3. cap. 27. §. 3.* Curre hic vel ibi, non invenies quietem, nisi in humili subjectione, sub prælati regimine. Imaginatio locorum & mutatio multos fefellit. *Lib. 1. cap. 9. §. 1.*

Passus CXXXVIII.

De passione Gaudii, five Lætitiæ.

I. *Omnis mundana lætitia, brevis:*

An putas, quod homines sæculi hujus, nihil vel parum patiantur? Nec hoc invenies, etiamsi delicatissimos quæsieris. Sed habent, inquis, multas delectationes, & proprias sequuntur voluntates: ideoque parum ponderant suas tribulationes. Esto, ita sit, ut habeant, quidquid voluerint: sed quamdiu, putas, durabit? *Lib. 3. cap. 12. §. 2.*



II. *Non absque tædio & timore:*

Ecce quemadmodum fumus deficient abundantes in sæculo, & nulla erit recordatio præteriorum gaudiorum. Sed & cum adhuc vivunt, non sine amaritudine & tædio ac timore, in eis quiescunt. Ex eadem namque re, unde sibi delectationem concipiunt, inde doloris pœnam frequenter recipiunt. Juste illis fit: ut quia inordinate delectationes quærunt & sequuntur, non sine confusione & amaritudine, eas expleant. *Lib. 3. cap. 12. §. 3.*

III. *Ad hæc falsa & turpis.*

O quam breves quam falsæ, quam inordinatæ & turpes omnes sunt! Verumtamen præ ebrietate & cæcitate non intelligunt: sed velut muta animalia, propter modicum corruptibilis vitæ delectamentum, mortem animæ incurrunt.

Adhortatio Christi.

Tu ergo Fili, post concupiscentias tuas non eas, & a voluntate tua avertere. Delectare in Domino, & dabit ibi petitiones cordis tui. *Lib. 3. cap. 12. §. 4.*

Passus CXXXIX.

De passione Tristitiæ.

I. *Unde oriatur Tristitia.*

Infirmus in spiritu, & quodammodo adhuc carnalis, & ad sensibilia inclinatus, difficulter se potest a terrenis desideriis ex toto abstrahere. Et ideo sæpe habet tristitiam, cum se subtrahit. *Lib. 1. cap. 6. §. 1.*

II. *Tristitiæ remedium ; Assuetudo malorum.*

Ut quid te contristat parvum factum contra te dictum ? Si amplius fuisset, commoveri non debuisses. Sed nunc permittite transire: non est primum, nec novum, nec ultimum erit, si diu vixeris. *Lib. 3. Cap. 57. §. 1.*

III. *Deum ita velle:*

Quare vano mœrore consumeris ? cur superfluis curis fatigaris ? Sta ad beneplacitum meum, & nullum patieris detrimentum. Si quæris hoc vel illud, & volueris esse ibi vel ibi, propter tuum commodum, & proprium beneplacitum magis habendum: nunquam eris in quietudine, nec liber a sollicitudine, quia in omni re reperietur aliquis defectus, & in omni loco erit, qui adversetur. *Lib. 3. cap. 27. §. 2.*

IV. *Cui propterea grates habendæ sint.*

Si recte sapis, & in veritate aspicias, nunquam debes propter adversa tam dejecte contristari, sed magis gaudere, & gratias agere: imo hoc unicum reputare gaudium, quod affligens te doloribus, non parco tibi. *Lib. 3. cap. 30. §. 6.*

Passus CXL.

De passione Spei.

I. *Non est ponenda spes in ulla creatura:*

Vanus est, qui spem suam ponit in hominibus, aut in creaturis. Non stes super te ipsum, sed in Deo spem tuam constitue. Non confidas
in



in tua scientia, vel astutia cujuscumque viventis. Ne glorieris in divitiis, si adsunt: nec in amicis, quia potentes sunt; sed in Deo, qui omnia præstat, & se ipsum super omnia dare desiderat. *Lib. 1. cap. 7. §. 1. & 2.*

II. *Sed in solo Deo,*

In te ergo, Domine Deus, pono totam spem meam & refugium: in te omnem tribulationem & angustiam meam constituo, quia totum infirmum, & instabile invenio, quidquid extra te conspicio. Non enim proderunt multi amici, neque fortes auxiliarii adjuvare poterunt, nec prudentes consiliarii responsum utile dare, neque libri Doctorum consolari, nec aliqua pretiosa substantia liberare, nec locus aliquis secretus & amœnus contutari: si tu ipse non assistas, juves, confortes, consolers, instruas, & custodias. *Lib. 3. cap. 59. §. 3.*

III. *Qui unus est præ omnibus.*

Cum Christum habueris, dives es, & sufficit tibi. Ipse erit provisor tuus, & fidelis procurator in omnibus, ut non sit opus in hominibus sperare. Homines enim cito mutantur, & deficiunt velociter: Christus autem manet in æternum, & adstat usque ad finem firmiter. *Lib. 2. cap. 1. §. 3.*

Passus CXLI.

De passione Desperationis.

I. *Non desperandum, cum tentamur.*

Non debemus desperare, cum tentamur: sed eo ferventius Deum exorare, quatenus
nos

nos in omni tribulatione dignetur adjuvare : qui utique secundum dictum Pauli , talem faciet cum tentatione proventum , ut possimus sustinere. *Lib. 1. cap. 13. §. 7.*

II. *Sed æquanimiter tolerandum.*

Animæquior esto , & ad majorem sustinentiam accingere. Non est totum frustratum , si te sæpius percipis tribulatum , vel graviter tentatum. Homo es , & non Deus : caro es , non Angelus. Quomodo tu posses semper in eodem statu virtutis permanere , quando hoc defuit Angelo in cælo , & primo homini in paradiso ? Ego sum , qui mœrentes erigo sospitate : & suam cognoscentes infirmitatem , ad meam proveho divinitatem. *Lib. 3. cap. 57. §. 3.*

III. *Quia tunc est tempus majoris meriti.*

Quando tu æstimas pœne totum perditum , tunc sæpe majus merendi instat lucrum. Non est totum perditum , quando res accidit in contrarium. Non debes judicare secundum præsens sentire : nec sic gravitati alicui , undecumque venienti , inhærere & accipere , tanquam omnis spes sit ablata emergendi. *Lib. 3. cap. 30. §. 3.*

Passus CXLII.

De passione Timoris.

I. *Vanum est , & inutile , de futuris conturbari.*

Formido vana est , quæ te exterret. Quid importat sollicitudo de futuris contingentibus,



bus, nisi ut tristitiam super tristitiam habeas? *Sufficit diei malitia sua.* Vanum est & inutile, de futuris conturbari vel gratulari, quæ forte nunquam evenient. *Lib. 3. cap. 30. §. 2.*

II. *Parvi adhuc animi signum.*

Sed humanum est, hujusmodi imaginationibus illudi: & parvi adhuc animi signum, tam leviter trahi ad suggestionem inimici. Ipse enim non curat, utrum veris an falsis illudat & decipiat: utrum præsentium amore, aut futurorum formidine prosterнат. Non ergo turbetur cor tuum, neque formidet. Crede in me, & in misericordia mea habeto fiduciam. *Lib. 3. cap. 30. §. 3.*

III. *Animatur timidus.*

Fili, satis virilis es, quamdiu nil obviat adversi: Bene etiam consulis, & alios nosti roborare verbis: sed cum ad januam tuam venit repentina tribulatio, deficis consilio & robore. Attende magnam fragilitatem tuam, quam sæpius experiris in modicis objectis: tamen pro salute tua ista finnt, cum hæc & similia contingunt. Adhuc vivo ego (dicit Dominus) juvare te paratus, & solito amplius consolari; si confusus fueris mihi, & devote invocaveris. *Lib. 3. cap. 57. §. 1. & 2.*

Passus CXLIII.

De passione Audaciæ.

I. *Magnum periculum creat.*

Sæpe meliores in æstimatione hominum, gravius periclitati sunt, propter suam nimiam
con-



confidentiam. Unde multis utilius est, ut non penitus tentationibus careant, sed sæpius impugnentur; ne nimium securi sint; ne forte in superbiam eleventur; ne etiam ad exteriores consolationes licentius declinent. *Lib. 1. cap. 20. §. 4.*

II. *Moderanda timore Dei.*

Semper Sanctorum securitas, plena timoris Dei extitit. Pravorum autem securitas, ex superbia & præsumptione oritur, & in fine in deceptionem sui ipsius vertitur. *Lib. 1. cap. 20. §. 3.* Non possumus nobis ipsis nimis credere, quia sæpe gratia nobis deest, & sensus. *Lib. 2. cap. 5. §. 1.* Multum autem contrariatur supernæ visitationi falsa libertas animi, & magna confidentia sui. *Lib. 2. cap. 10. §. 2.*

III. *Judicium temerarium vitandum.*

De aliorum dictis vel factis, nil temere judices: nec cum rebus tibi non commissis te implices; & poterit fieri, ut parum vel raro turberis. *Lib. 3. cap. 25. §. 3.*

Passus CXLIV.

De passione Iræ.

I. *Non est magnum cum mansuetis vivere.*

Non est magnum, cum bonis & mansuetis conversari; hoc enim omnibus naturaliter placet; & unusquisque libenter pacem habet, & secum sentientes magis diligit. Sed cum duris & perversis, aut indisciplinatis, aut vobis



contrariantibus, pacifice posse vivere, magna gratia est, & laudabile nimis, virileque factum. *Lib. 2. cap. 3. §. 2.*

II. *Quid faciendum, si irascaris.*

Pone, ut melius nosti, ex corde: & si tetigit, non tamen dejiciat, nec diu implicet. Ad minus sustine patienter, si non potes gaudenter. Etiam si minus libenter audis, & indignationem sentis: reprime te, nec patiaris aliquid inordinatum ex ore tuo exire, unde parvuli scandalizentur. Cito conquiescet commotio excitata, & dolor internus revertente dulcorabitur gratia. *Lib. 3. cap. 57. §. 2.*

III. *Servanda charitas & humilitas.*

Tu bene scis facta tua excusare & colorare, & aliorum excusationes non vis recipere. Justius esset, ut te accusares, & fratrem tuum excusares. Si portari vis, porta & alium. Vide, quam longe es adhuc a vera charitate & humilitate: quæ nulli novit irasci, vel indignari, nisi tantum sibi. *Lib. 2. cap. 3. §. 2.*

IV. *Iracundus sibi gravissimus.*

Sunt, qui se ipsos in pace tenent, & cum aliis etiam pacem habent. Et sunt, qui nec pacem habent, nec alios in pace dimittunt: aliis sunt graves, sed sibi semper graviores. Et sunt, qui se ipsos in pace retinent, & ad pacem alios reducere student. Est tamen tota pax nostra in hac misera vita, potius in humili sufferentia ponenda, quam in non sentiendo contraria. Qui melius scit pati, majorem tenebit pacem. Iste est victor sui, & dominus mundi, amicus Christi, & hæres cæli. *Lib. 2. cap. 3. §. 3.*

Passus



Passus CXLV.

Regulæ aliquot, ad diversos motus
Naturæ & Gratiæ discernendos.

I. *Motus naturæ & gratiæ penitus
contrarii.*

Fili, diligenter adverte motus Naturæ & Gratiæ, quia valde contrarie & subtiliter moventur: & vix, nisi a spirituali & intimo illuminato homine, discernuntur. Omnes quidem bonum appetunt, & aliquid boni in suis dictis vel factis prætendunt, ideo sub specie boni multi falluntur. *Lib. 3. cap. 54. §. 1.*

II. *Primus motus naturæ & gratiæ.*

Natura callida est, & multos trahit, illaqueat, & decipit, & se semper pro fine habet. Sed gratia simpliciter ambulat, & ab omni specie mala declinat, fallacias non prætendit, & omnia pure propter Deum agit, in quo & finaliter requiescit. *Lib. 3. cap. 54. §. 1.*

III. *Secundus motus.*

Natura invite vult mori, nec premi, nec superari, nec subesse, nec sponte subjungi. Gratia vero studet mortificationi propriæ, resistit sensualitati, quærit subjici, appetit vinci, nec propria vult libertate fungi: sub disciplina amat teneri, nec alicui cupit dominari, sed sub Deo semper vivere, stare, & esse: atque propter Deum, omni humanæ creaturæ humiliter parata est inclinari. *Lib. 3. cap. 54. §. 2.*



Passus CXLVI.

De diversis motibus naturæ & gratiæ.

I. *Tertius motus.*

Natura pro suo commodo laborat, & quid lucrari ex alio sibi proveniat, attendit. Gratia autem, non quid sibi utile & commodum sit, sed quod multis proficiat, magis considerat. *Lib. 3. cap. 54. §. 2.*

II. *Quartus motus.*

Natura libenter honorem & reverentiam accipit: Gratia vero omnem honorem & gloriam Deo fideliter attribuit. *Lib. 3. cap. 54. §. 2.*

III. *Quintus motus.*

Natura confusionem timet & contemptum: Gratia autem gaudet pro nomine Jesu pati contumeliam. *Lib. 3. cap. 54. §. 3.*

IV. *Sextus motus.*

Natura otium amat, & quietem corporalem: Gratia vero vacua esse non potest, sed libenter amplectitur laborem. *Lib. 3. cap. 54. §. 3.*

V. *Septimus motus.*

Natura quærit habere curiosa & pulchra, abhorret vilia & grossa: Gratia vero simplicibus delectatur & humilibus, aspera non aspernatur, nec vetustis refugit indui pannis. *Lib. 3. cap. 54. §. 3.*

Passus CXLVII.

De diversis motibus naturæ & gratiæ.

I. *Octavus motus.*

Natura respicit temporalia, gaudet ad lucra terrena, tristatur de damno, irritatur levi injuriæ verbo: sed gratia attendit æterna, non inhæret temporalibus, nec in perditione rerum turbatur, neque verbis durioribus acerbatur: quia thesaurum suum & gaudium in cœlo, ubi nil perit, constituit. *Lib. 3. cap. 54. §. 3.*

II. *Nonus motus.*

Natura cupida est, & libentius accipit, quam donat, amat propria & privata: Gratia autem pia est & communis, vitat singularia, contentatur paucis, beatius dare judicat, quam accipere. *Lib. 3. cap. 54. §. 4.*

III. *Decimus motus.*

Natura inclinatur ad creaturas, ad carnem propriam, ad vanitates & discursus: sed Gratia trahit ad Deum, & ad virtutes: renuntiat creaturis, fugit mundum, odit carnis desideria, restringit evagationes, erubescit in publico apparere. *Lib. 3. cap. 54. §. 4.*

IV. *Undecimus motus.*

Natura libenter aliquod solatium habet externum, in quo delectetur ad sensum: sed Gratia in solo Deo quærit consolari, & in summo bono super omnia visibilia delectari. *Lib. 3. cap. 54. §. 4.*



Passus CXLVIII.

De diversis motibus naturæ & gratiæ.

I. *Duodecimus motus.*

Natura totum agit propter lucrum & commo-
dum proprium, nihil gratis facere potest,
sed aut æquale, aut melius, aut laudem vel fa-
vorem pro benefactis consequi sperat: & mul-
tum ponderari sua gesta & dona concupiscit:
Gratia vero nihil temporale quærit, nec aliud
præmium, quam Deum solum, pro mercede po-
stulat: nec amplius de temporalibus necessariis
desiderat, nisi quantum hæc sibi ad assecutio-
nem æternorum valeant deservire. *Lib. 3. cap.*
54. §. 5.

II. *Tertius decimus motus.*

Natura gaudet de amicis multis & propin-
quis, gloriatur de nobili loco, & ortu generis:
arridet potentibus, blanditur divitibus, applau-
dit sibi similibus. Gratia autem, & inimicos
diligat, nec de amicorum turba extollitur; nec
locum nec ortum natalium reputat, nisi virtus
major ibi fuerit: favet magis pauperi, quam
diviti: compatitur plus innocenti, quam poten-
ti: congaudet veraci, non fallaci: exhortatur
semper bonos, meliora charismata æmulari, &
filio Dei per virtutes assimilari. *Lib. 3. cap. 54.*
§. 6.

III. *Quartus decimus motus.*

Natura de defectu & molestia cito conque-
ritur: Gratia constanter fert inopiam. *Lib. 3.*
cap. 54. §. 6.

Passus



Passus CXLIX.

De diversis motibus naturæ & gratiæ.

I. *Quintus decimus motus.*

Natura omnia ad se reflectit; pro se certat & arguit. Gratia autem ad Deum cuncta reducit, unde originaliter emanant: nihil boni sibi adscribit, nec arroganter præsumit; non contendit, nec suam sententiam aliis præfert: sed in omni sensu & intellectu, æternæ sapientiæ, ac divino examini se submittit. *Lib. 3. cap. 54. §. 7.*

II. *Sextus decimus motus.*

Natura appetit scire secreta, & nova audire: vult exterius apparere, & multa per sensus experiri: desiderat agnosci & agere, unde laus & admiratio procedit. Sed gratia non curat nova, nec curiosa percipere: quia totum hoc de vetustate corruptionis est ortum, cum nihil novum & durabile sit super terram. Docet itaque sensus restringere, vanam complacentiam & ostentationem devitare, laudanda & digne miranda, humiliter abscondere, & de omni re, & in omni scientia, utilitatis fructum, atque Dei laudem & honorem quærere. Non vult se nec sua prædicari, sed Deum in donis suis optat benedici, qui cuncta ex mera charitate largitur. *Lib. 3. cap. 54. §. 7.*

III. *Gratia quid?*

Hæc gratia supernaturale lumen, & quoddam Dei speciale donum est, & proprie electorum signaculum, & pignus salutis æternæ: quæ



quæ hominem de terrenis ad cœlestia amanda iustollit, & de carnali spiritualem efficit. Quanto igitur natura amplius premitur & vincitur, tanto major gratia infunditur, & quotidie novis visitationibus interior homo, secundum imaginem Dei, reformatur. *Lib. 3. cap. 54. §. 8.*

Passus CL.

Desideranda est gratia Dei, summis desideriiis.

I. *Quia summe necessaria.*

O quam maxime est mihi necessaria, Domine, tua gratia, ad inchoandum bonum, ad proficiendum, & ad perficiendum. Nam sine ea nihil possum facere: omnia autem possum in te, confortante me gratia. *Lib. 3. cap. 55. §. 4.*

II. *Quia præ omnibus donis naturalibus est.*

O vere cœlestis gratia, sine qua nulla sunt propria merita, nulla quoque dona naturæ ponderanda! Nihil artes, nihil divitiæ, nihil pulchritudo: nihil ingenium vel eloquentia valent apud te, Domine, sine gratia. Nam dona naturæ, bonis & malis sunt communia: electorum autem proprium donum est gratia sive dilectio, qua insigniti, digni habentur vitam æterna. *Lib. 3. cap. 55. §. 4.*

III.

III. Immo & præ supernaturalibus.

Tantum eminet hæc gratia, ut nec donum prophetiæ, nec signorum operatio, nec quantalibet alta speculatio, aliquid æstimeretur sine ea. Sed neque fides, neque spes, neque aliæ virtutes, tibi acceptæ sunt sine charitate & gratia. *Lib. 3. cap. 55. §. 4.*

Oratio.

Tua ergo me, Domine, gratia semper præveniat, & sequatur, ac bonis operibus jugiter præstet esse intentum, per Jesum Christum filium tuum. Amen, §. 6. *Ibidem.*





PARS II.

De Via Illuminativa.

Ad perfectionem non satis est, animam maculis expurgasse, opus præterea est, eandem variis virtutum ornamentis condecori, ut per viam perfectionis incedens Sponso suo Divino in dies magis ac magis placeat. Hanc porro viam ostendit nobis ille, qui est *Via, Veritas, & Vita*, qui *Lux* est illuminans omnem hominem venientem in hunc mundum. Ille se Magistrum constituit, ut nos doceat: *Ego Magister vester*. Ille nos excitat ad discendum: *discite a me*. Ille seipsum proponit in exemplum: *Exemplum dedi vobis*: hinc præprimis opus est, ut Divinum hunc Magistrum cognoscamus; tum attente, ut discipulos decet, eum audiamus, atque observemus: deinde etiam virtutes, quas docuit, aut exercuit, nos ipsi exerceamus.

SEMI-



SEMITA I.

*De Excellentia Divini Magisterii,
& dotibus ad discipulum requisitis.*

Passus I.

Christus se Magistrum & Viam constituit,
nosque ad sui sequelam
invitat.

I. *Christus illuminans.*

Qui sequitur me, non ambulat in tenebris:
dicit Dominus. Hæc sunt verba Christi
quibus admonemur, quatenus vitam ejus &
mores imitemur, si velimus veraciter illumi-
nari, & ab omni cæcitate cordis liberari. *Lib. I.
cap. I. §. I.*

II. *Magister noster.*

Ego, inquit Dominus, docui Prophetas ab
initio, & usque nunc non cesso omnibus loqui:
sed multi ad vocem meam surdi sunt & duri.
Lib. 3. cap. 3. §. 3. Si vis veritatem cogno-
scere, crede mihi. *Lib. 3. cap. 56. §. 2.*

III. *Via, veritas, & vita.*

Ego sum via, veritas, & vita. Sine via
non itur; sine veritate non cognoscitur; sine
vita non vivitur. Ego sum via inviolabilis,
veritas infallibilis, vita interminabilis. Ego
sum Via rectissima, Veritas suprema, Vita vera,
Vita beata, Vita increata. *Ibid, §. I.*

IV.



IV. *Nos hortatur ad sui sequelam.*

Fili, *sequere me.* Ego sum Via, quam sequi debes; Veritas, cui credere debes; Vita, quam sperare debes. Si manseris in via mea, cognosces veritatem, & veritas liberabit te, & apprehendes vitam æternam. *Lib. 3. cap. 56. §. 1.*

V. *Et sequi volumus, ut illuminemur.*

Summum igitur studium nostrum fit in vita Jesu Christi meditari. *Lib. 1. cap. 1. §. 1.* Hæc est veritas, qua fugatur gloriæ vanitas. *Lib. 3. cap. 9. §. 3.* Qui sequitur, non ambulat in tenebris.

Passus II.

Aestimatio Magisterii & Verbi Divini.

I. *Doctrina Christi præcellit.*

Doctrina Christi omnes doctrinas sanctorum præcellit: & qui spiritum haberet, absconditum ibi manna inveniret. *Lib. 1. cap. 1. §. 2.*

Tota cœlestis est.

Docet eos terrena despicere, & amare cœlestia; mundum negligere, & cœlum tota die ac nocte desiderare. *Lib. 3. cap. 4. §. 4.*

II. *Et immutabilis.*

Sine Personarum acceptione variis modis loquitur nobis Deus. Homines transeunt; sed veritas Domini manet in æternum. *Lib. 1. cap. 5. §. 2.*

III.



III. *Intellectum aperit.*

Illi clamant verbis, sed tu auditui intelligentiam tribuis. Literas tradunt; sed tu sensum aperis. Mysteria proferunt, sed tu referas intellectum signatorum. Illi foris tantum agunt, sed tu corda instruis & illuminas. *Lib. 1. cap. 2. §. 2.*

IV. *Et cor accendit.*

Pulchre dicunt; sed te tacente cor non accendunt. Possunt quidem verba sonare; sed spiritum non conferunt. Mandata edicunt; sed tu juvas ad perficiendum. Viam ostendunt; sed tu confortas ad ambulandum. Illi exterius rigant; sed tu fecunditatem donas. *Ibidem.*

Passus III.

Desiderium & aviditas audiendi Doctrinam Christi.

I. *Anima agnoscens suam cæcitatem*

Domine in cæcitate sumus, & vanitate cito seducimur. *Lib. 3 cap. 41. §. 2.* Modicum lumen est in nobis, & hoc cito per negligentiam amittimus. Sæpe etiam non advertimus, quod tam cæci intus sumus. *Lib. 2. cap. 5. §. 1.*

II. *Petit illuminari & instrui, potius a Christo Domino,*

Loquere igitur Domine, quia audit servus tuus: verba enim vitæ æternæ habes. Inclina cor meum in verba oris tui: fluat ut ros eloquium



quium tuum. *Loquere Domine, quia audit servus tuus. Servus tuus sum ego, da mihi intellectum, ut sciam testimonia tua. L. 3 c. 2. §. 1.*

III. *Quam ab aliis.*

Non loquatur mihi Moyſes, aut aliquis ex Prophetis; ſed tu potius loquere, Domine Deus, inspirator & illuminator omnium Prophetarum, quia tu ſolus ſine eis potes me perfecte imbuere; Illi autem ſine te nihil proficient. Dicebant olim filii Iſrael ad Moyſem: *Loquere tu nobis, & audiemus; non loquatur nobis Dominus, ne forte moriamur. Non ſic Domine, non ſic oro; ſed magis cum Samuele Propheta humiliter ac deſiderantur obſecro: Loquere Domine, quia audit ſervus tuus. Ibidem.*

IV. *Ad ſuum fructum, & majorem Dei gloriam.*

Non ergo loquatur mihi Moyſes, ſed tu Domine Deus meus, æterna Veritas: ne forte moriar & ſine fructu efficiar, ſi fuero tantum foris admonitus, & intus non accenſus. Loquere mihi ad qualemcunque animæ meæ conſolationem, & ad totius vitæ meæ emendationem: tibi autem ad laudem & gloriam & perpetuum honorem. *Ibidem §. 3.*

Paſſus IV.

Dispositiones a Chriſto Magiſtro in diſcipulis requiſitæ.

I. *Abnegatio ſui.*

Si vis eſſe diſcipulus meus, abnega temetipſum. *Lib. 3. cap. 56. §. 2.* Ideo enim tam pau-



pauci illuminati, & liberi intus efficiuntur, quia seipfos ex toto abnegare nesciunt. Est firma sententia mea: *Nisi quis renuntiaverit omnibus, non potest meus esse discipulus.* Tu ergo, si optas meus esse discipulus, offer te ipsum mihi cum omnibus affectibus tuis. *Lib. 4. cap. 8. §. 2.*

II. *Studium se conformandi Christo Magistro,*

Qui spiritum haberet, in doctrina Christi absconditum manna inveniret; sed contingit, quod multi ex frequenti auditu Evangelii parvum desiderium sentiunt, quia spiritum Christi non habent. Qui vult plene & sapide Christi verba intelligere, oportet, ut totam vitam suam illi studeat conformare. *Lib. 1. cap. 1. §. 2.* Vere benedictus est, qui Dei voluntatem facit, & suam voluntatem relinquit. *Lib. 1. cap. 3. n. 6.*

III. *Eique ostium cordis reserandi & claudendi creaturis.*

Libenter loquerer tibi verbum meum, & abscondita revelarem, si adventum meum diligenter observares, & ostium cordis mihi aperires. *Lib. 3. cap. 24. §. 2.* Animadvertite hæc anima mea, & claude sensualitati tuæ ostia, ut possis audire, quid in te loquatur Dominus Deus tuus. *Lib. 3. cap. 1. §. 2.* O si Jesus Crucifixus in cor nostrum veniret, quam cito & sufficienter docti essemus! *Lib. 1, cap. 25. §. 6.* Hoc mente pertracta: & cum impleveris, intelliges omnia. *Lib. 3. cap. 32. §. 1.*



Passus V.

Sensa discipuli dispositi.

I. *Discipulus agnoscit efficaciam hujus doctrinae :*

Domine sermo tuus iste brevis , multum in se continet perfectionis : parvus est dictu ; sed plenus sensu , & uber in fructu : nam si posset a me fideliter custodiri , non deberet tam facilis in me turbatio oriri ; nam quoties me impacatum sentio , & gravatum , ab hac doctrina me recessisse invenio. *Lib. 3. cap. 23. §. 4.*

II. *Rogat , ut sibi instilletur ,*

Fac Domine , quod dicis , quia hoc mihi gratum est audire. *Ibidem §. 2.* Aperi , Domine , cor meum in lege tua , & in praeceptis tuis doce me ambulare : da mihi intelligere voluntatem tuam. *Lib. 3. cap. 22. n. 1.*

III. *Se paratum offert ,*

Quid igitur faciam ? *Lib. 3. cap. 25. §. 2.*
Audiam quid loquatur in me Dominus Deus.

Seque per illam beatum reputat ,

Beata anima , quæ Dominum in se loquentem audit , & de ore ejus consolationis verbum accipit. Beatae aures , quæ venas Divini susurri suscipiunt , & de mundi hujus susurrationibus nihil advertunt. Beatae plane aures , quæ non vocem foris sonantem , sed intus auscultant Veritatem docentem. *Lib. 3. cap. 1. §. 1.*

IV.



IV. *Petitque gratiam, ut observet hanc doctrinam.*

Tu, qui omnia potes, & animæ profectum semper diligis, adauge majorem gratiam, ut possim tuum complere sermonem, & meam perficere salutem. *Lib. 3. cap. 23. §. 4.* Ne sit mihi ad judicium verbum auditum & non factum, cognitum nec amatum, creditum & non servatum. *Lib. 3. cap. 2. §. 3.*

Passus VI.

Gratiarum actio discipuli, pro tradita a Divino Magistro Doctrina.

I. *Reddendæ Divino Magistro gratiæ, quod nos docuerit Per seipsum.*

O ! quantas tibi gratias teneor referre, quod viam rectam & bonam dignatus es mihi, & cunctis a fidelibus ad æternum regnum tuum ostendere, nam vita tua, via nostra. *Lib. 3. cap. 18. §. 3.*

II. *Per suos Doctores,*

Gratias tibi Domine Jesu, Lux Lucis æternæ pro doctrinæ sacre mensa, quam nobis per servos tuos, Prophetas, & Apostolos, aliosque Doctores ministrasti. *Lib. 4. cap. 11. §. 4.*

III. *Et per sua exempla.*

Nisi tu nos præcessisses, & docuisses, quis sequi curaret? heu! quanti longe retroque manerent, nisi tua præclara exempla inspicerent! Ecce adhuc tepeſcimus auditis tot signis & doctrinis: quid fieret, si tantum Lumen ad sequendum te non haberemus? *Lib. 3. cap. 18. §. 3.*



Media proficiendi in schola Ckristi.

Passus VII.

Lectio Spiritualis.

I. Libri sacri illuminant,

Posuiſti Lncernam pedibus meis verbum tuum.
Habeo libros ſanctos, pro ſolatio & vitæ ſpe-
culo. *Lib. 4. cap. 11. §. 3. & 4.*

II. In iis quærenda veritas & utilitas,

Veritas eſt in Scripturis ſanctis quærenda, non eloquentia. Omnis Scriptura ſacra eo ſpiritu debet legi, quo facta eſt. Quærere potius debemus utilitatem in ſcripturis, quam ſubtilitatem ſermonis. *Lib. 1. cap. 5. §. 1.*

III. Cum affectu proficiendi,

Ita libenter devotos & ſimplices libros legere debemus, ſicut altos & profundos. Non te offendat auctoritas ſcribentis, utrum parvæ vel magnæ literaturæ fuerit, ſed amor puræ veritatis te trahat ad legendum. Non quæras, quis hoc dixerit: ſed quid dicatur, attende. *Ibidem.*

IV. Et attentione humili, ſimplici, & fidei.

Curioſitas noſtra ſæpe nos impedit in lectione Scripturarum. Si vis perfectum haurire, lege humiliter, ſimpliciter, & fideliter. *Ibid. §. 2.*

Passus VIII.

Alterum proficiendi medium Oratio.

I. *Anima per orationem petere debet scientiam sibi necessariam ;*

Da mihi Domine scire, quod sciendum est : hoc amare, quod amandum est : hoc laudare, quod tibi sume placet : hoc reputare, quod tibi pretiosum apparet : hoc vituperare, quod oculis tuis fordescit. Non me finas secundum visionem oculorum exteriorum judicare, neque secundum auditum aurium hominum imperitorum sententiare : sed in judicio vero de visibilibus & spiritualibus discernere, atque super omnia voluntatem beneplaciti tui semper inquirere. *Lib. 3. cap. 50. §. 7.*

II. *Debet Deum consulere,*

Si etiam in omni eventu stas, non in apparentia externa, nec oculo carnali lustras visa, vel audita ; sed mox in qualibet causa intras cum Moyse in tabernaculum ad consulendum Dominum : audies non nunquam Divinum responsum, & redies instructus de multis præsentibus & futuris. *Lib. 3. cap. 38. §. 2.*

III. *Et in omnibus ad eum confugere.*

Semper enim Moyse recursum habuit ad tabernaculum pro dubiis & quæstionibus solvendis, fugitque ad orationis adjutorium pro periculis & improbitatibus hominum sublevandis. Sic & tu confugere debes in cordis tui secretarium, divinum intentius implorando suffragium. *Ibidem.*



Passus IX.

Dispositiones ad orationem.

I. *Vigilantia & humilitas,*

Plures reperiuntur contemplationem desiderare; sed quæ ad eam requiruntur, non student exercere. *Lib. 3. cap. 31. §. 3.* Esto providus, & vigila in orationibus, & humilia te in omnibus. *Lib. 3. cap. 24. §. 2.* Non affectes contemplationem, quæ ducit in elationem: non enim omne altum, sanctum: nec omne dulce, bonum: nec omne desiderium, purum: nec omne charum, Deo gratum. *Lib. 2. cap. 10. §. 3.*

II. *Mortificatio,*

Beatus ille homo, qui propter te, Domine, omnibus creaturis licentiam abeundi tribuit, qui naturæ vim facit, & concupiscentias carnis fervore spiritus crucifigit:

Puritas conscientiae,

Ut serenata conscientia puram tibi orationem offerat, dignusque sit angelicis interesse choris, omnibus terrenis foris & intus exclusis. *Lib. 3. cap. 48. §. 6.*

III. *Præsentia Dei.*

Et merito multo plus debet esse intus, quam quod cernitur foris; quia inspector noster est Deus, quem summopere revereri debemus, ubicunque fuerimus, & tanquam angeli in conspectu ejus mundi incedere. *Lib. 1. cap. 19. §. 1.*

IV.



IV. *Avulsio a creaturis.*

Et nisi quis ab omnibus creaturis fuerit expeditus, non poterit libere intendere Divinis. Ideo enim pauci inveniuntur contemplativi, quia pauci sciunt se a perituris & creaturis ad plenum sequestrare. *Lib. 3. cap. 31. §. 1.*

Collectio animi.

Beati oculi, qui exterius clausi, interioribus autem sunt intenti. Beati, qui interna penetrant, & ad capienda arcana cœlestia magis ac magis per quotidiana exercitia se student præparare. Beati, qui Deo vacare gestiunt, & ab omni impedimento sæculi se excutunt. *Lib. 3. cap. 1. §. 1.*

V. *Resignatio orantis in Divinam voluntatem.*

Pete, non quod est delectabile & commodum, sed quod mihi est acceptabile, atque honorificum: quia si recte judicas, meam ordinationem tuo desiderio, & omni desiderato præferre debes, ac sequi. *Lib. 3. cap. 49. §. 3.*

Passus X.

Petendum imprimus Divinæ gratiæ adiutorium.

I. *Prærogativæ Divinæ gratiæ.*

Obsecro, Domine, ut inveniam gratiam in oculis tuis: sufficit enim gratia tua, cæteris non obtentis, quæ desiderat natura. Ipsa Magistra est veritatis, doctrix disciplinæ, lumen cordis, solamen pressuræ, fugatrix tristitiæ, ablatrix timoris, nutrix devotionis, productrix lachrymarum. *Lib. 3. cap. 55. §. 5. & 6.*



II. *Votis omnibus exoptandæ,*

O Beatissima gratia, quæ pauperem spiritu, virtutibus divitem facis: & divitem multis bonis, humilem corde reddis! Veni, descende ad me, reple me mane consolatione tua, ne deficiat præ lassitudine & ariditate mentis anima mea. *Ibidem.*

III. *Et in omnibus a Deo implorandæ.*

Quid sum sine gratia tua, nisi aridum lignum & stirps inutilis ad ejiciendum? Tua ergo me, Domine, gratia semper & præveniat & sequatur, ac bonis operibus jugiter præstet esse intentum. *Ibidem.*

Passus XI.

Oratio debet esse constans & fervida.

I. *Oratio animari debet ab extrinseco,*

Quidam solum portant suam devotionem in libris, quidam in imaginibus; quidam autem in signis exterioribus & figuris. Quidam habent me in ore, sed modicum est in corde. Sunt alii, qui intellectu illuminati, & affectu purgati ad æterna semper anhelant, de terrenis graviter audiunt, necessitatibus naturæ dolenter inserviunt: & hi sentiunt, quid spiritus veritatis loquitur in eis. *Lib. 3. cap. 4. §. 4.*

II. *Debet exemplo Sanctorum esse assidua.*

Sancti per diem laborabant, & noctibus orationi diutinæ vacabant: quamquam laborando ab oratione mentali iuvinime cessabant. Omne tempus utilitier expendebant. Omnis hora ad vacandum Deo brevis videbatur, & præ magna dulcedine
con-



contemplationis etiam oblivioni tradebatur necessitas corporalis refectionis. *L. 3. c. 18. §. 2. & 3.*

III. *Cum constantia & perseverantia.*

Si non habes devotionem, sed magis aridum te sentis, insiste orationi, ingemisce & pulsa, nec desistas, donec merearis micam, aut guttam gratiæ salutaris accipere. Tu mei indiges, non ego tui indigeo. *Lib. 4. cap. 12. §. 3.*

Passus XII.

Quid agendum in distractionibus?

I. *Anima suas distractiones in oratione confitetur.*

O quid intus patior! dum mente cœlestia tracto, & mox carnalium cogitationum turba occurrit oranti? confiteor etenim vere, quia valde distracte me habere consuevi. Nam ibi multoties non sum, ubi corporaliter sto, aut sedeo: sed ibi magis sum, quo cogitationibus feror, ibi sum, ubi cogitatio mea est. Ibi est frequenter cogitatio mea, ubi est, quod amo. Hoc mihi cito occurrit, quod naturaliter delectat, aut ex usu placet. *Lib. 3. cap. 48. §. 5.*

II. *Recurrit ad Deum & petit veniam.*

Succurre mihi æterna veritas, ut nulla me moveat vanitas. Adveni cœlesti suavitas, & fugiat a facie tua omnis impuritas. Ignosce quoque mihi, & misericorditer indulge, quoties præter te aliud in oratione revolveo. *Ibid.*

III.



III. *Ejusque implorat auxilium.*

Deus meus ne elongeris a me, neque declines in ira a servo tuo. Fulgura coruscationem tuam, & dissipa eas: emitte sagittas tuas, & conturbentur omnes phantasiæ inimici. Recollige sensus meos ad te: fac me oblivisci omnium mundanorum: da cito abjicere & contemnere phantasmata vitiorum. *Ibidem.*

Passus XIII.

De acquirenda Devotionis gratia.

I. *Postulanda instanter devotionis gratia,*

Oportet te devotionis gratiam instanter quære-
re, & desideranter petere, patienter & fidu-
cialiter expectare, gratanter recipere, humiliter
conservare, studiose cum ea operari, ac Deo ter-
minum & modum supernæ visitationis, donec ve-
niat, comittere. Lib. 4. cap. 15. §. 1.

II. *Non desistendum ab oratione, si non statim concedatur,*

Humiliare præcipue te debes, cum parum aut
nihil devotionis interius sentis; sed non nimium
dejici, nec inordinate contristari. Dat sæpe Deus
in uno brevi momento, quod longo negavit tem-
pore. Dat quandoque in fine, quod in principio
orationis distulit dare. Propterea in bona spe,
& humili patientia expectanda est devotionis gra-
tia. *Ibid.* §. 1. & 2.

III. *Sed potius removenda obstacula,*

Tibi tamen & peccatis tuis imputa, cum non
datur, vel etiam occulte tollitur. Modicum quan-
doque est, quod gratiam impedit & abscondit; si
tamen



tamen modicum & non potius grande dici debeat, quod tantum bonum prohibet. Et si hoc ipsum modicum vel grande amoveris, & perfecte viceris, erit, quod petisti. *Ibid.* §. 2.

IV. *Et obtinebitur devotionis gratia.*

Quisquis ergo intentionem suam simplici corde sursum ad Deum levaverit, seque ab omni inordinato amore, seu complacentia cujuslibet rei creatæ evacuaverit, aptissimus gratiæ percipiendæ, ac dignus devotionis munere erit. Dat enim Dominus ibi Benedictionem suam, ubi vasa vacua invenerit. *Ibid.* §. 3.

Passus XIV.

Studium ambulandi in via Domini.

I. *Ut nobis bene sit, oportet Deum quærere,*

Fili, ambula coram me in veritate, & in simplicitate cordis tui, quære me semper. *Lib. 3. cap. 4. §. 1.* Ecce sic benedicetur homo, qui quærit Deum in toto corde suo, nec in vanum accipit animam suam. Tunc videbit & affluet, & mirabitur, & dilatabitur cor ejus in ipso, quia manus Domini cum ea, & ipse se posuit totaliter in manus ejus usque in sæculum. *Lib. 4. cap. 15. §. 4.*

II. *Ac magna diligentia ad virtutes eniti:*

Sine sollicitudine & diligentia nunquam acquies virtutes. *Lib. 1. cap. 25. §. 11.* Multa diligentia opus est bene proficere volenti. *Lib. 1. cap. 19. §. 2.*

III. *Inter omnes vias, via crucis tutissima.*

Ecce! in cruce totum constat, & non est alia via ad vitam. Ambula ubi vis, quære quodcunque voveris, & non invenies altiorem viam supra, nec securiorem viam infra, nisi viam sanctæ crucis. *Lib. 2. cap. 12. §. 3.*

SEMITA



SEMITA II.

*Qua ratione homo habere se debeat
erga Deum.*

Passus XV.

De Fide.

I. *Fides imprimis exigitur.*

Fides a te exigitur & sincera vita non altitudo intellectus, neque profunditas mysteriorum Dei. Si talia essent opera Dei, ut facile ab humana ratione caperentur, non essent mirabilia, nec ineffabilia dicenda. *Lib. 4. cap. 18. §. 2. & 5.*

II. *Cui subdere se debet anima.*

Subde te Deo, & humilia sensum tuum fidei, & dabitur tibi Scientiæ Lumen. Non fallit te Deus; fallitur, qui sibi nimium credit. Ratio humana debilis est, & falli potest; Fides autem vera falli non potest. *Ibid. §. 4. Ego sum veritas, cui credere debes. Lib. 3. cap. 56. §. 1.*

III. *Et subdit se libenter.*

Me oportet contentum esse in Lumine veræ fidei, & in ea ambulare, donec aspiret dies æternæ claritatis, & umbræ figurarum inclinentur. *Lib. 4. cap. 11 §. 2.* Ambulabo interim in fide exemplis confortatus Sanctorum: nam, & sancti tui, Domine, qui tecum jam in regno cœlorum exultant, in fide & patientia magna,
dum



dum viverent, adventum gloriæ tuæ expectabant. Quod illi crediderunt, ego credo. *Ibid.* §. 3.

Passus XVI.

De Spe.

I. *Homo excitatur ad spem omnem in Deo reponendam.*

Fili, si recte sapias, in me solo sperabis, quia *nemo bonus, nisi solus Deus. Lib. 3. cap. 9. §. 3.* Teneas te apud Jesum, vivens ac moriens: & illius fidelitati te committe, qui omnibus deficientibus, solus te potest juvare. *Lib. 2. cap. 7. §. 2.* Quando enim gratia Dei venit ad hominem, tunc potens fit ad omnia; & quando recedit, tunc pauper & infirmus erit, & quasi tantum ad flagella relictus. *Lib. 2. cap. 8. §. 8.*

II. *Quod faciendum agnoscit.*

Domine Jesu Christe, sicut dixisti & promissisti, sic utique fiat, & mihi promereri contingat. *Lib. 3. cap. 56. §. 5.* Ecce! in te est totum, quod desiderare possum, ac debeo; tu salus mea & redemptio, spes & fortitudo, decus & gloria. *Lib. 4. cap. 3. §. 1.* In nullo possum plene confidere, |qui in necessitatibus auxilietur opportunius, nisi in te solo Deo meo. Tu es spes mea! tu fiducia mea, tu Consolator meus, & fidelissimus in omnibus. *Lib. 3. cap. 59. §. 1.*

III. *Et exequendi gratiam sperat.*

Quod Sancti speraverunt, ego spero: quo illi pervenerunt, per gratiam tuam me venturum



rum confido. *Lib. 4. cap. 11. §. 3.* Tu mihi in desiderio es, & ideo post te gemere, clamare, & exorare necesse est. *Lib. 3. cap. 59. §. 1.* Potens est autem misericordia tua etiam gratiam desideratam mihi præstare, & in spiritu ardoris, cum dies beneplaciti tui venerit, me clementissime visitare. *Lib. 4. cap. 14. §. 3.* Quia tu, o dulcissime! facis mecum supra meritum omne, & supra id, quam audeo sperare, vel rogare. *Lib. 3. cap. 8. §. 3.*

Passus XVII.

De Charitate.

I. *Chcritis non se ipsam quærit.*

Qui veram & perfectam charitatem habet, in nulla re se ipsum quærit; sed Dei solummodo gloriam in omnibus fieri desiderat. Nulli etiam invidet, quia nullum privatum gaudium amat: nec in se ipso vult gaudere, sed in Deo super omnia bona, optat beatificari. *Lib. 1. cap. 15. §. 3.*

Nemini invidet.

Et si intraverit celestis gratia & vera charitas, non erit aliqua invidia, nec contractio cordis, neque privatus amor occupabit. *Lib. 3. cap. 9. §. 3.*

II. *Sed omnia refert ad Deum.*

Nemini aliquid boni attribuit, sed totaliter ad Deum refert, a quo fontaliter omnia procedunt, in quo finaliter omnes Sancti fruibili-
ter requiescunt. O qui scintillam haberet veræ
cha-

charitatis ! profecto omnia terrena sentiret plena fore vanitatis. *Lib. 1. cap. 15. §. 3.*

III. *Et opera nostra reddit fructuosa.*

Vincit omnia Divina charitas, & dilatat omnes animæ vires. *Lib. 3. cap. 9. §. 3.* Sine charitate opus externum nihil predest : quidquid autem ex charitate agitur, quantumcunque etiam parvum sit, & despectum, totum efficitur fructuosum. Magis siquidem Deus pensat, ex quanto quis agit, quam opus, quod facit. Multum facit, qui multum diligit. *Lib. 1. cap. 15. §. 1. & 2.*

Passus XVIII.

De Fiducia.

I. *In Deo confidendum.*

Sine amico non potes bene vivere : & si Jesus non fuerit tibi præ omnibus amicus, eris nimis tristis & desolatus. Fatue igitur agis, si in aliquo altero confidis, aut lætaris. *Lib. 2. cap. 8. §. 3.* Pene totum perditum invenies, quidquid extra Jesum in hominibus posueris. *Lib. 2. cap. 7. §. 2.* Quia salus nostra tu es, virtus & fortitudo nostra. *Lib. 3. cap. 8. §. 3.*

II. *Non in hominibus.*

Falluntur sæpe hominum sensus in judicando : falluntur & amatores sæculi visibilia tantummodo amando. Fallax fallacem, vanus vanum, cæcus cæcum, infirmus infirmum decipit, dum exultat : & veraciter magis confundit, dum inaniter laudat. *Lib. 3. Cap. 50. §. 8.*



III. *Sit ergo Deus refugium nostrum.*

Tu (Deus) spes mea , & refugium meum in die tribulationis meæ. Lib. 3. cap. 5. §. 1. Si fuero tentatus & vexatus tribulationibus multis , non timebo mala , dum mecum fuerit gratia tua. Ipsa fortitudo mea , ipsa consilium confert & auxilium. Cunctis hostibus potentior est , & sapientior universis sapientibus. Lib. 3. cap. 55. §. 5.

Passus XIX.

Anima se Divinæ Protectioni committit.

I. *Cum in uno Deo solidum inveniatur solatium.*

Finis omnium bonorum & altitudo vitæ , & profunditas eloquiorum tu es , & in te super omnia sperare fortissimum solatium fervorum tuorum. *Lib. 3. cap. 59. §. 4. Nolle consolari ab aliqua creatura , magnæ puritatis , & internæ fiduciæ signum est. Qui nullum extrinsecus pro se testimonium quærit , liquet , quod totaliter se Deo commisit. Lib. 2. c. 6. §. 3. & 4.*

II. *Ad eum confugit anima.*

Ad te ergo sunt oculi mei , in te confido , Deus meus , Misericordiarum Pater. Benedic & sanctifica animam meam benedictione cœlesti , ut fiat habitatio sancta tua , & sedes æternæ gloriæ tuæ : nihilque in templo tuæ dignitatis inveniatur , quod oculos tuæ Majestatis offendat. *Lib. 3. cap. 59. §. 4.*



III. *Ejusque protectioni se totum committit.*

Secundum magnitudinem bonitatis tuæ, & multitudinem miserationum tuarum respice in me, & exaudi orationem pauperis servi tui, longe exulantis in regione umbræ mortis. Protege & conserva animam servuli tui, inter tot discrimina vitæ corruptibilis; ac comitante gratia tua, dirige per viam pacis ad Patriam perpetuæ claritatis. Amen. *Ibidem.*

Passus XX.

Submissio ad Ordinationem Divinam.

I. *Deo omnia in bonum nostrum ordinanti*

Fili, comitte mihi semper causam tuam; ego bene disponam in tempore suo. Expecta ordinationem meam, & senties inde profectum. *Lib. 3. cap. 39. §. Tunc deficient omnes vanæ phantasiæ, conturbationes iniquæ, & curæ superflue. Tunc etiam recedet immoderatus timor, & inordinatus amor morietur. Lib. 3. cap. 37. §. 4.*

II. *Se submittit anima.*

Domine satis libenter tibi omnes res comitto, quia parum potest cogitatio mea proficere. Utinam non multum adhærerem futuris eventibus; sed ad beneplacitum tuum incunctanter me offerrem. *Lib. 3. cap. 39. §. 1. Tu nosti ventura, antequam fiant, & non opus est tibi, ut quis te doceat, aut admoneat de his, quæ geruntur in terra. Lib. 3. c. 50. §. 6.* III.



III. *Seque paratam offert ad omnia.*

En ! fervus tuus ego paratus ad omnia : in manu tua sum , gyra & reversa me per circuitum , quoniam non desidero mihi vivere , sed tibi : utinam digne & perfecte ! *Lib. 3. c. 15. §. 2.*

Passus XXI.

Studium Beneplaciti Divini.

I. *Querendum in omnibus Dei beneplacitum cum indifferentia.*

Fili , sic dicas in omni re : Domine , si tibi placitum fuerit , fiat hoc ita. Domine , si fuerit honor tuus , fiat hoc in nomine tuo. Domine , si mihi videris expedire , & utile esse probaveris : tunc dona mihi hoc uti ad honorem tuum ; sed si mihi nocivum fore cognoveris , nec animæ meæ saluti prodesse , aufer a me tale desiderium. *Lib. 3. cap. 15. §. 1.*

II. *Atque ut fiat , votis omnibus petendum.*

Igitur semper cum timore Dei , & cordis humilitate desiderandum est , & petendum , quidquid desiderabile menti occurrit , maximeque cum propria resignatione mihi totum commitendum est , atque dicendum : Domine , tu scis , qualiter melius est ; fiat hoc vel illud , sicut volueris. Da , quod vis , & quantum vis , & quando vis. Fac mecum sicut scis , & sicut tibi magis placuerit , & major honor tuus fuerit. Pone me , ubi vis , & libere age mecum in omnibus. *Ibid §. 2.*

III. *Et*



III. *Et hoc ardentem exoptat anima.*

En ! servus tuus ego paratus ad omnia. Da mihi hoc semper desiderare & velle, quod tibi magis acceptum est, & charius placet. Tua voluntas mea sit, & mea voluntas tuam semper sequatur, & optime ei concordet. Sit mihi unum velle, & nolle tecum : nec aliud posse velle, aut nolle, nisi quod tu vis, & nolis. *Ibid. §. 3.*

Passus XXII.

De perfecta sui in voluntatem Dei Resignatione.

I. *Imperfecta Resignatio non sufficit;*

Quidam se resignant, sed cum aliqua exceptione, non enim plene Deo confidunt, ideo sibi providere fatagunt. Quidam etiam primo totum offerunt, sed postea tentatione pulsati, ad propria redeunt, ideo minime in virtute proficiunt. Hi ad veram puri cordis libertatem, & jucundæ familiaritatis meæ gratiam non pertingent, nisi integra resignatione, & quotidiana sui immolatione prius facta, sine qua non stat, neque stabit unio fruitiva. *Lib. 3. cap. 37. §. 3.*

II. *Sed plenam petit Dominus,*

Fili relinque te, & invenies me. Sta sine electione & omni proprietate, & lucraberis semper : nam & adjicietur tibi amplior gratia, statim ut te resignaveris, nec resumpseris. *Ibidem §. 1.* Quid magis a te requiro, quam ut te studeas mihi ex integro resignare ? Quidquid
N præ-



præter te ipsum das, nihil curo: quia non quaero datum tuum, sed te. *Lib. 4. cap. 8. §. 1.*

III. *Et ubique promptam atque continuam.*

Domine, quoties me resignabo, & in quibus me relinquam? semper & in omni hora, sicut in parvo, sic & in magno. Nihil excipio, sed in omnibus te nudatum invenire volo. Alioquin quomodo poteris esse meus, & ego tuus, nisi fueris ab omni propria voluntate intus & foris spoliatus? Quanto celerius hoc agis, tanto melius habebis: & quanto plenius & sincerius, tanto mihi plus placebis, & amplius lucraberis. *Lib. 3. cap. 37. §. 2.*

Passus XXIII.

De prompta voluntate serviendi Deo.

I. *Mercedem sponte sibi servientibus promittit Deus.*

Qui mihi sponte & libere deserviunt, gratiam pro gratia accipient. *Lib. 3. cap. 9. §. 2.* Age quod agis, fideliter labora in vinea mea: ego ero merces tua. Scribe, lege, canta, geme, tace, ora, sustine viriliter contraria: digna est his omnibus & majoribus præliis vita æterna. *Lib. 3. cap. 47. §. 2.*

II. *In cujus obsequio nos omnino impendere debemus,*

Vere Dominus meus es, & ego pauper servus tuus, qui totis viribus teneor tibi servire. Magnus honor, magna gloria tibi servire, & omnia prop-

propter te contemnere. Habebunt enim gratiam magnam, qui sponte se subjecerint tuæ sanctissimæ servituti. O grata & jucunda Dei servitus, qua homo veraciter efficitur liber & sanctus! o amplectendum & semper optandum servitium, quo summum promeretur bonum, & gaudium acquiritur sine fine mansurum! *Lib. 3. cap. 10. §. 4. 5. & 6.*

III. *Uti fecerunt Sancti & Amici Christi.*

Sancti & Amici Christi Domino servierunt in fame & siti, in frigore & nuditate, in labore & fatigatione, in vigiliis & jejuniis, in orationibus & meditationibus sanctis, in persecutionibus & opprobriis multis. *Lib. 1. cap. 18. §. 1.*

Passus XXIV.


Peculiare Dei beneficium est servire
Deo in statu Religioso.

I. *Felicitas & sublimitas hujus status,*

Qui arctam pro nomine tuo ingrediuntur viam, & omnem mundanam neglexerint curam, consequentur magnam mentis libertatem. O sacer status Religiosi famulatus, qui hominem Angelis reddit æqualem, Deo placabilem, dæmonibus terribilem & cunctis fidelibus commendabilem, *Lib. 3. cap. 10. §. 5. & 6.*

II. *In quo Religiosus per tria vota se totum Deo consecrat,*

Quid retribuam tibi pro gratia ista? non enim omnibus datum est, ut, omnibus abdicatis, sæculo renuntient, & Monasticam vitam assumant. *Ibid. §. 2.* Valde magnum est in obedientia stare,



sub Prælato vivere, & sui juris non esse. Multo tutius est stare in subjectione, quam in Prælatu-
ra. *Lib. 1. cap. 9. §. 1.* Qui pro amore tuo om-
nem carnalem abjecerint delectationem, invenient
suavissimam Spiritus sancti consolationem. *Lib. 3.
cap. 10. §. 5.*

III. *Et in Jesu Christo invenit omnia.*

Religiosus, qui se intente & devote in sanctis-
sima vita & Passione Domini exercet, omnia uti-
lia & necessaria sibi, abundanter ibi inveniet:
nec opus est, ut extra Jesum aliquid melius quæ-
rat. *Lib. 1. cap. 25. §. 6.* Vere vita boni Mo-
nachi crux est, & Dux paradisi. *Lib. 3 cap. 56. §. 5.*

Passus XXV.

Qualiter serviendum Deo in statu
Religioso.

I. *Virtus, fervor & disciplina in Re- ligioso exigitur*

Vita boni Religiosi omnibus virtutibus pollere
debet: ut sit talis interius, qualis videtur
hominibus exterius. *Lib. 1. Cap. 19. §. 1.* Quam
jucundum & dulce est, videre fervidos & devo-
tos Fratres bene morigeratos & disciplinatos!
Religiosus fervidus omnia bene portat & capit,
quæ illi jubentur. *Lib. 1. cap, 25. §. 5. & 7.*

II. *Cum variis operibus bonis,*

Quomodo faciunt tam multi alii Religiosi, qui
satis arctati sunt sub disciplina claustrali? Raro
exeunt, abstracte vivunt, pauperrime comme-
dunt, grosse vestiuntur, multum laborant, parum
lo-

loquuntur, diu vigilant, matutine surgunt, orationes prolongant, frequenter legunt, & se in omni disciplina custodiunt. *Ibid.* §. 8.

III. *Ad exemplum piorum Religiosorum,*

Attende Carthusienses, Cistercienses, & diversæ Religionis Monachos ac Moniales: qualiter omni nocte ad psallendum Domino assurgunt. Et ideo turpe esset, ut tu deberes in tam sancto opere pigritare, ubi tanta multitudo Religiosorum incipit Deo jubilaré. *Ibidem.*

Aliorumque Sanctorum.

Sancti dati sunt in exemplum omnibus Religiosis: & plus provocare nos debent ad bene proficiendum, quam tepidorum numerus ad relaxandum. *Lib. 1. cap. 18. §. 4.*

Passus XXVI.

De Cura Religioso adhibenda, ne remittat; sed semper proficiat.

I. *Primus Religiosorum fervor*

O quantus fervor omnium Religiosorum in principio suæ sanctæ institutionis fuit! O quanta devotio orationis! quanta æmulatio virtutis! quam magna disciplina vixit! quanta reverentia & obedientia sub regula Magistri in omnibus effloruit! Testantur adhuc vestigia derelicta, quod vere viri sancti & perfecti fuerunt, qui tam strenue militantes mundum suppeditaverunt. *Lib. 1. cap. 18. §. 5.*

II.



II. *Non debet tepefcere,*

Jam bene opus eſſet, quod adhuc iterum inſtrueremur, tanquam boni Novitii ad mores optimos, ſi forte ſpes eſſet de aliqua futura emendatione, & majori ſpirituali proſectu. *Lib. 1, cap. 22. §. 7.* Habitus & tonſura modicum confert, ſed mutatio morum, & integra mortificatio paſſionum verum faciunt Religioſum. Oportet te ſtultum fieri propter Chriſtum, ſi vis religioſam ducere vitam. *Lib. 1. cap. 17. §. 1. & 2.*

III. *Sed conſtanter excitari & conſervari.*

Ad ſerviendum veniſti, non ad regendum: ad patiendum & laborandum ſcias te vocatum, non ad otiaſcendum vel fabulandum. Hic ergo probantur homines, ſicut aurum in fornace. Hic nemo poteſt ſtare, niſi ex toto corde ſe voluerit propter Deum humiliare. Non eſt parvum in monaſteriis, vel in congregatione habitare, & in ibi ſine querela converſari, & uſque ad mortem fidelis perſeverare. Beatus qui ibidem bene vixerit, & feliciter conſummaverit. *Lib. 1. cap. 17. n. 1. & 3.*

Paſſus XXVII.

Fervor fovendus ſemper, licet quandoque intermittendus.

I. *Eſi fervor ſummopere in vita ſpirituali ſemper deſiderandus ſit,*

Intuere ſanctorum Patrum vivida exempla, in quibus vera perfectio refulſit, & religio, & videbis quam modicum ſit, & pene nihil, quod nos agimus. *Lib. 1. cap. 18. §. 1.* Si autem de-



deris te ad fervorem, invenies magnam pacem,
& senties leviozem laborem propter Dei gratiam,
& virtutis amorem. Homo fervidus & diligens
ad omnia est paratus. *Lib. 1. cap. 25. §. 11.*

*II. Quia tamen per infirmitatem nostram
quandoque impeditur,*

Fili, non vales semper in ferventiori deside-
rio virtutum stare, nec in altiori gradu contem-
plationis consistere: sed necesse habes interdum
ob originalem corruptelam ad inferiora descen-
dere, & onus corruptibilis vitæ, etiam invite,
cum tædio portare. Quamdiu mortale corpus
geris, tædium senties & gravamen cordis. *Lib. 3.
cap. 51. §. 1.*

*III. Expedit tunc de hoc dolere, &
aliis honeste ocupari.*

Oportet ergo sæpe in carne de carnis onere
gemere: eo quod non vales spiritualibus studiis
& divinæ contemplationi indefinenter inhærere.
Tunc expedit tibi ad humilia & exteriora opera
confugere, & in bonis actibus te recreare. *Ibidem,
§. 1. & 2.*

Passus XXVIII.

Deo ferviendum perseverantur.

*I. Instabilitas cordis impedire non de-
bet, quo minus firmi stemus in ob-
sequio Dei.*

Fili, noli credere affectui tuo: qui nunc est, ci-
to mutabitur in aliud. Quamdiu vixeris,
mutabilitati subjectus es, etiam nolens: ut modo
la-



latus, modo tristis, modo pacatus, modo turbatus; nunc devotus, nunc indevotus; nunc studiosus, nunc acediosus; nunc gravis, nunc levis inveniariis. Sed stat super hæc mutabilia sapiens, & bene doctus in spiritu: non attendens, quid in se sentiat, vel qua parte flet ventus instabilitatis; sed ut tota intentio mentis ejus ad debitum & optatum proficiat finem. *Lib. 3. cap. 33. §. 1.*

II. Sic inter mille difficultates magna animi constantia faciebant Sancti,

O quam strictam & abdicatam vitam sancti Patres in eremo duxerunt! quam longas & graves tentationes pertulerunt! quam frequenter ab inimico vexati sunt! quam crebras & fervidas orationes Deo obtulerunt! quam rigidas abstinencias peregerunt! quam magnum zelum & fervorem ad spirituales profectum habuerunt! quam forte bellum adversus edomationem vitiorum gesserunt! quam puram & rectam intentionem ad Deum tenuerunt! *Lib. 1. cap. 18. §. 2.*

III. Sic & nos oportet facere.

Inceptum est, retro abire non licet, nec relinquere oportet. *Lib. 3. cap. 56. §. 5.* Expedit tibi adventum meum & supernam visitationem firma confidentia expectare; exilium tuum & ariditatem mentis patienter sufferre, donec iterum a me visiteris, & ab omnibus anxietatibus libereris. Nam faciam te laborum oblivisci, & interna quiete perfrui. Expandam coram te prata Scripturarum; ut, dilatato corde, currere incipias viam mandatorum meorum. Et dices: *Non sunt condignæ passionēs hujus temporis ad futuram gloriam, quæ revelabitur in nobis. L. 3. c. 51. §. 2.*

Passus



Passus XXIX.

Deus suos fideles servos consolatur.

I. *Roborare nos debent promissiones
Divinæ,*

Fili, non te frangant labores, quos assumpsisti propter me, nec tribulationes te dejiciant usquequaque; sed mea promissio in omni eventu te roboret, & consoletur. Ego sufficiens sum ad reddendum supra omnem modum & mensuram. *Lib. 3. cap. 47. §. 1.*

II. *Laborum brevitās & Merces æterna,*

Non diu hic laborabis, nec semper gravaberis doloribus. Expecta paulisper, & videbis celerem finem malorum. Veniet una hora, quando cessabit omnis labor & tumultus. Modicum est & breve omne, quod transiit cum tempore. Non est parvum quid, perdere aut lucrari Regnum Dei. *Ibid. §. 1. & 4.*

III. *Atque in omni difficultate nos in
Deo firmare.*

Ideo deberet se homo in Deo taliter firmare, ut non esset ei necesse multas humanas consolationes quærere. *Lib. 1. cap. 12. §. 2.* Bonum nobis est, quod aliquando habeamus aliquas gravitates, & contrarietates, quia sæpe hominem ad cor revocant, quatenus se in exilio esse cognoscat, nec spem suam in aliqua re mundi ponat. *Ibid. §. 1.* In his non debet dejici, nec desperare: sed ad voluntatem Dei æquanimiter stare, & cuncta supervenientia sibi ad laudem Jesu Christi.



Christi perpeti : quia post hyemem sequitur æstas ;
post noctem redit dies ; & post tempestatem mag-
na serenitas. *Lib. 2. cap. 8. §. 5.*

Passus XXX.

Gratiæ Deo reddendæ pro gratia &
consolatione accepta.

I. *Gratiæ dicendæ sunt Adjutori Deo
pro auxiliis & solatiis,*

Redde amplissimas supernæ Bonitati gratias,
quæ tecum sic dignanter agit, clementer vi-
sitat, ardentem excitat, potenter subleuat, ne
proprio pondere ad terrena labaris. Neque enim
hoc cogitatu tuo, aut conatu accipis; sed sola
dignatione supernæ gratiæ & Divini respectus:
quatenus in virtutibus & majori humilitate pro-
ficias, & ad futura certamina te præpares, mi-
hiq; toto cordis affectu adhærere, ac ferventi
voluntate studeas deservire. *Lib. 3. cap. 49. §. 1.*


II. *Atque ut gratias plures accipiamus,*

Deus bene facit consolationis gratiam dan-
do: sed homo male agit, non totum Deo cum
gratiarum actione retribuendo. Et ideo non
possunt in nobis dona gratiæ fluere, qui in-
grati sumus Auctori: nec totum refundimus
fontali origini. Semper enim debetur gratia
digne gratias referenti, & aufertur ab elato,
quod dari solet humili. *Lib. 2. cap. 10. §. 2.*

III. *Grati esse debemus erga Deum ter
optimum pro acceptis omnibus.*

Esto igitur gratus pro minimo, & eris dig-
nus majora accipere. Sit tibi minimum etiam
pro

pro maximo, & magis contemptibile pro speciali dono. Si dignitas Datoris inspicitur, nullum datum parvum, aut nimis vile videbitur. Non enim parvum est, quod a summo Deo donatur. Etiam si pœnas & verbera dederit, gratum esse debet: quia semper pro salute nostra facit, quidquid nobis advenire permittit. Qui gratiam Dei retinere desiderat, sit gratus pro gratia data, patiens pro sublata: oret, ut redeat; cautus sit & humilis, ne amittat. *Ibidem. §. 5.*



SEMITA III.

*Qua ratione homo gerere se debeat
erga proximum, & erga seipsum.*

Passus XXXI.

De Charitate Proximi.

*I. Charitas ad omnes extendi debet,
atque opere ostendi,*

Charitas habenda est ad omnes. *Lib. I. cap. 8. §. 2.* Pro nulla re mundi, & pro nullius hominis dilectione aliquod malum est faciendum: sed pro utilitate tamen indigentis opus bonum libere aliquando intermittendum est, aut etiam pro meliori mutandum.

Proxi-



Proximum sublevando,

Hoc enim factum, opus bonum non destruitur, sed in melius mutatur. Multum facit, qui rem bene facit. Bene facit, qui communitati magis, quam suæ voluntati servit. *Lib. 1. cap. 15. §. 1. & 2.*

II. Fraterne corrigendo,

Si quis semel aut bis monitus, non acquiescit, noli cum eo contendere; sed totum Deo committe, ut fiat voluntas ejus & honor in omnibus servis suis, qui scit mala in bonum convertere. *Lib. 1. cap. 16. §. 2.*

III. Defectus patienter sufferendo,

Quæ homo in se, vel in aliis emendare non valet, debet patienter sustinere, donec Deus aliter ordinet. Debes tamen pro talibus impeditis supplicare, ut Deus tibi dignetur subvenire, & possis benigne portare. Si essent omnes perfecti, quid tunc haberemus ab aliis pro Deo pati? *Ibidem §. 1. & 3.*

IV. Et mutuis auxiliis onera portando.

Nunc autem Deus sic ordinavit, ut discamus, *alter alterius onera portare*: quia nemo sine defectu, nemo sine onere, nemo sibi sufficiens, nemo sibi satis sapiens: sed oportet nos invicem portare, invicem consolari, pariter adjuvare, instruere, & admonere. *Ibid. §. 4.*

Passus XXXII.

De Conversatione externa.

I. *Conversatio nostra debet esse simplex,
aliorum potius quam proprii
commodi studiosa,*

Fuerunt Apostoli sine querela conversati in mundo, humiles & simplices, sine omni malitia & dolo. *Lib. 3. cap. 22. §. 4.* Oportet, quod discas te ipsum in multis frangere, si vis pacem & concordiam cum aliis tenere. *Lib. 1. cap. 17. §. 1.*

II. *Non contentiosa, sed pacifica,*

Utilius est oculos a rebus displicentibus avertere, & unicuique suum sentire relinquere, quam contentiosis sermonibus deservire. *Lib. 3. cap. 44. §. 1.* Tene te primo in pace, & tunc poteris alios pacificare. Homo pacificus magis prodest, quam bene doctus. *Lib. 2. cap. 3. §. 1.*

III. *Non affectans laudem, nec amorem
alium, quam in Christo Jesu.*

Nunquam cupias singulariter laudari, vel amari: quia hoc solius Dei est, qui similem sibi non habet. Nec velis, quod aliquis tecum in corde suo occupetur, neque tu cum alicujus occuperis amore: sed sit Jesus in te, & in omni bono homine. *Lib. 2. cap. 8. §. 4.* Quærat alius hoc, alius illud: glorietur ille in illo, & iste in isto, laudeturque millies mille: tu autem nec in isto, nec in illo, sed in tui ipsius gaude contemptu, & in mei solius beneplacito & honore. *Lib. 3. Cap. 49. §. 7.*

Passus



Passus XXXIII.

Discretio in agendis.

I. *Omnis actio dirigi debet a ratione.*

Fili, ad istud diligenter tendere debes, ut in omni loco & actione, seu occupatione externa, sis intus, liber, & tui ipsius potens, & sint omnia sub te, & tu non sub eis: ut sis Dominus actionum tuarum & rector, non servus nec emptitius, sed magis exemptus. *Lib. 3. cap. 38. §. 1.*

II. *Uti vitandum otium, ita exercitia discrete assumenda.*

Nunquam sis ex toto otiosus: corporalia tamen exercitia discrete sunt agenda, nec omnibus æqualiter assumenda. *Lib. 1. cap. 19. §. 4.*

III. *Privata in secreto; communia promptius peragenda.*

Quæ communia non sunt, non sunt foris ostendenda: nam in secreto tutius exercentur privata. Cavendum tamen, ne piger sis ad communia, & ad singularia promptior: sed expletis integre & fideliter debitis & injunctis, si jam ultra vacat, redde te tibi, prout devotio tua desiderat. *Ibid. §. 5.*

Passus XXXIV.

De Vera Prudentia & Sapientia.

I. *Sapientia vera cœlestis est tota.*

Suadeo tibi emere a me aurum ignitum, ut locuples fias, id est, cœlestem sapientiam omnia infima conculcantem. Postpone terrenam

nam sapientiam, omnem humanam & propriam complacentiam. Dixi viliora tibi emenda pro pretiosis & altis, in rebus humanis.

Terrigenis fere incognita.

Nam valde vilis & parva, ac pene oblivioni tradita videtur vera cœlestis sapientia, non sapiens alta de se, nec magnificari quærens in terra: quam multi ore tenus prædicant, sed vita longe dissentiunt: ipsa tamen est pretiosa margarita, & multis abscondita. *Lib. 3. cap. 32. §. 2. & 3.*

II. Attendant isti, nede cipiantur.

Non enim omne desiderium est a Spiritu sancto, etiamsi homini videatur rectum & bonum. Difficile est pro vero judicare, utrum spiritus bonus, an alienus te impellat ad desiderandum hoc vel illud: an etiam ex proprio movearis spiritu? Multi in fine sunt decepti, qui primo bono spiritu videbantur inducti. *Lib. 3. cap. 15. §. 1.*

III. Humilitas, & terrenorum contemptus prudentem ostendunt.

Quanto quis in se humilior fuerit, & Deo subjectior: tanto in omnibus erit sapientior & pacatior. *Lib. 1. cap. 4. §. 2.* Vere prudens est, qui omnia terrena arbitratur ut stercora, ut Christum lucrifaciat. *Lib. 1. cap. 3. §. 6.*



Passus XXXV.

De Obedientia.

I. *Obediendum sponte, non coacte.*

Multi sunt sub obedientia, magis ex necessitate, quam ex charitate: & illi poenam habent, & leviter marmurant. Nec libertatem mentis acquirunt, nisi ex toto corde propter Deum se subjiciant. *Lib. 1. cap. 9. §. 1.*

II. *Multum perdit, qui non obedit, se amando inordinate.*

Fili, qui se subtrahere nititur ab obedientia, ipse se subtrahit a gratia: & qui quærit habere privata, amittit communia. Quia adhuc nimis inordinate te diligis, ideo plene te resignare aliorum voluntati trepidas. *Lib. 3. cap. 13. §. 1.*

III. *Discamus obedientiam a Christo, qui pro nobis factus est obediens.*

Sed quid magnum, si tu, qui pulvis es & nihil, propter Deum te homini subdis: quando ego Omnipotens & altissimus, qui cuncta creavi ex nihilo, me homini propter te humiliter subjeci? Disce obtemperare pulvis: disce te humiliare terra & limus, & sub omnium pedibus incurvare: disce voluntates tuas frangere, & ad omnem subjectionem te dare. *Ibidem §. 2.* Nemo secure præest, nisi qui libenter subest. Nemo secure præcipit, nisi qui bene obedire didicit. *Lib. 1. cap. 20. §. 2.*

IV.

IV. *Obedientia sincera suo non carebit fructu.*

Nunc ergo inclina te humiliter sub omnium manibus, nec sit tibi curæ, quis hoc dixerit, vel jussit: sed hoc magnopere curato, ut siue Prælatus, seu junior, aut æqualis aliquid a te exposcerit, vel innuerit, pro bono totum accipias, & sincera voluntate studeas adimplere. Apparebit in cœlis fructus obedientiæ: gaudebit labor pœnitentiæ: & humilis subiectio coronabitur gloriose. *Lib. 3. cap. 49. §. 6. & 7.*

Passus XXXVI.

De Humilitate.

I. *Christus nos ad humilitatem hortatur.*

Fili, humilia te in omnibus. *Lib. 3. cap. 24. §. 2.* Noli tibi attrahere, si videas alios honorari, & elevari, te autem despici & humiliari. Erige cor tuum ad me in cœlum, & non contristabit te contemptus hominum in terris. *Lib. 3. cap. 41. §. 1.*

II. *Gloriam inde resultantem ostendit.*

O! si vidisses Sanctorum in cœlo coronas perpetuas, quanta quoque nunc exultant gloria, qui huic mundo olim contemptibiles, & quasi vita ipsa indigni putabantur; profecto te statim humiliare usque ad terram, & affectares potius omnibus subesse, quam uni præesse; & pro nihilo inter homines computari, maximum lucrum duceres. *Lib. 3. cap. 47. §. 3.*



III. *Se ipsum & Sanctos in exemplum proponit,*

Factus sum omnium humilissimus & infimus, ut tuam superbiam mea humilitate vincerem. *Lib. 3. cap. 13. §. 2.* Sancti in humilitate stabant, sibi ipsis videbantur tanquam nihili, & huic mundo despecti: sed erant in oculis Dei pretiosi & dilecti. *Lib. 1. cap. 18. §. 4.*

IV. *Et modum se humiliandi exponit.*

Summi Sancti apud Deum, minimi sunt apud se: & quanto gloriosiores, tanto in se humiliores. Pleni veritate & gloria cœlesti non sunt vanæ gloriæ cupidi. In Deo fundati & confirmati, nullo modo possunt esse elati. Et qui totum Deo adscribunt, quidquid boni acceperunt, gloriam ab invicem non quærunt; sed gloriam, quæ a solo Deo est, volunt: & Deum in se & in omnibus Sanctis laudari super omnia cupiunt, & semper in id ipsum tendunt. Pone te semper ad infimum, & dabitur tibi summum: nam summum non stat sine infimo. *Lib. 2, cap. 10. §. 4.*

Passus XXXVII.

Nihil habet homo, quo gloriatur.

I. *Christi discipulus agnoscit, qua ratione se debeat humiliare,*

O Quam humiliter, & abjecte mihi de me ipso sentiendum est! quam nihili pendendum, si quid boni videar habere! *Lib. 3. cap. 14. §. 3.* Libenter accepto gratiam unde
sem-

femper humilior & timoratioꝛ inveniar, atque ad relinquendum me paratioꝛ fiam. Doctus dono gratiæ, & eruditus subtractionis verbere, non sibi audebit quidquam boni attribuere; sed potius se pauperem & nudum confitebitur. *Lib. 2. cap. 10. §. 3.*

II. *Se nunquam supra alios extollere,*

Ille, qui majora accepit, non potest merito suo gloriari, neque super alios extolli, nec minori insultare; quia ille major & melior, qui sibi minus adscribit, & in regratiando humilior est, atque devotioꝛ: & qui omnibus vilioꝛem se existimat, & indignioꝛem se judicat, aptioꝛ est ad percipienda majora. *Lib. 3. cap. 22. §. 2.*

III. *Inanem gloriam uti pestem fugere.*

Ego vanitas & nihilum ante te, inconstans homo & infirmus. Unde ergo possum gloriari, aut cur adpeto reputari? Nunquid de nihilo? & hoc vanissimum est. Vere inanis gloria mala pestis, vanitas maxima: quia a vera trahit gloria & cœlesti spoliât gratia. Dum enim homo complacet sibi, displicet tibi: dum inhiat laudibus humanis, privatur veris virtutibus. *Lib. 3. cap. 40. §. 4.*

IV. *Omne bonum Deo adscribere,*

Nihil ergo tibi de bono adscribere debes, nec alicui homini virtutem attribuas: sed totum da Deo, sine quo nihil habet homo. *Lib. 3. cap. 9. §. 2.*



Seque servum inutilem reputare.

Non grande homo ponderet, quod grande æstimari possit: sed in veritate servum inutilem se pronuntiet, sicut Veritas ait: *Cum feceritis omnia, qua præcepta sunt vobis, dicite: servi inutiles sumus. Lib. 2. cap. 11. §. 5.*

Passus XXXVIII.

Adminicula & signa humilitatis.

I. *Humilis accepta confusione non turbatur, sed proficit.*

Sæpe valde prodest ad majorem humilitatem servandam, quod defectus nostros alii sciunt, & redarguant. Quando homo pro defectibus suis se humiliat, tunc faciliter alios placat, & leviter satisfacit sibi irascentibus. Humilis accepta confusione satis bene est in pace: quia stat in Deo, & non in mundo. *Lib. 2. cap. 2. §. 1. & 2.*

II. *Quovis loco sit, contentus est.*

De Divina dispositione tantum contentari debet & consolari, ut ita libenter velit esse minimus, sicut aliquis optaret esse maximus. Et ita pacificus & contentus in novissimo, sicut in loco primo: atque ita libenter despiciabilis & abjectus, nullius quoque nominis & famæ, sicut cæteris honorabilior & major in mundo. *Lib. 3. cap. 22, §. 5.*

III. *Dum descendit, Deum ad se trahit.*

Homo tanto altius ad Deum ascendit, quanto profundius in se descendit, & plus sibi ipsi vilescit. Qui autem sibi aliquid boni attribuit, gratiam Dei in se venire impedit: quia gratia Spiritus sancti cor humile semper quærit. *Lib. 3. cap. 42. §. 1. & 2.* Humili sua secreta revelat, & ad se dulciter trahit & invitat. *Lib. 2. cap. 2. §. 2.*

IV. *Et in infimis delectatur.*

Bene semper agere & modicum de se tenere humilis animæ indicium est. *Lib. 2. cap. 6. §. 3.* Nam quantum unusquisque est in oculis tuis, tantum est & non amplius, ait humilis sanctus Franciscus. *Lib. 3. cap. 50. §. 8.* Non reputes, te aliquid profecisse, nisi omnibus inferiorem te esse sentias. *Lib. 2. cap. 2. §. 2.* Vere magnus est, qui in se parvus est, & pro nihilo omne culmen honoris ducit. *Lib. 1. cap. 3. §. 6.*

Passus XXXIX.

De Paupertate.

I. *Ut tibi bene sit, nudus nudum Jesum sequere.*

Tene breve & consummatum verbum: dimitte omnia, & invenies omnia. *Lib. 3. cap. 32. §. 1.* Si vis perfectus esse, vende omnia. *Lib. 3. cap. 56. §. 2.* Ad hoc conare, hoc ora, hoc desidera, ut ab omni proprietate possis expoliari, & nudus nudum Jesum sequi:
tibi



tibi mori, & mihi æternaliter vivere. *Lib. 3. cap. 37. §. 4.* Tunc vere pauper & nudus spiritu esse poteris, & cum Propheta dicere: *Quia unicus & pauper sum ego. Lib. 2. cap. 11. §. 5.*

II. *Dimitte temporalia, & quære æterna.*

Dimitte omnia transitoria, quære æterna. Quid sunt omnia temporalia, nisi seductoria? & quid juvant omnes creaturæ, si fueris a Creatore deserta? Omnibus ergo abdicatis, Creatori tuo te redde placitum ac fidelem, ut veram valeas apprehendere beatitudinem. *Lib. 3. cap. 1. §. 3.* Multum proinde proficies, si te feriatum ab omni temporali cura conserves. Valde deficies, si aliquid temporale reputaveris. *Lib. 2. cap. 5. §. 3.*

III. *Transitoriis non inhæreas, sed iis bene utere.*

Sis verus Hebræus in sortem ac libertatem transiens filiorum Dei, qui stant super præsentia, & speculantur æterna: qui transitoria sinistro intuentur oculo, & dextro cœlestia: quos temporalia non trahunt ad inhærendum, sed trabunt ipsi magis ea ad bene ferviendum, prout ordinata sunt a Deo & instituta a summo opifice, qui nil inordinatum in sua reliquit creatura. *Lib. 3. cap. 38. §. 1.*

IV. *Et pauperem divite feliciorem reputa.*

Væ divitibus, qui habent hic consolationes suas! Quia pauperibus intrantibus in regnum Dei,

Dei, ipsi stabunt foris ejulantes. Gaudete humiles, & exultate pauperes, quia vestrum est regnum Dei, si tamen in veritate ambulatis. *Lib. 3. cap. 58. §. 10.*

Passus XL.


De Terrenorum contemptu.

I. *Quam rarus est terrenorum contemptus, tam proficiuus est mortalibus.*

Raro invenitur tam spiritualis aliquis, qui omnibus sit nudatus; nam verum pauperem spiritu, & ab omni creatura nudum, quis inveniet? Procul & de ultimis finibus pretium ejus. *Lib. 2. cap. 11. §. 4.* Qui autem mundum perfecte contemnunt, & Deo vivere sub sancta disciplina student, isti Divinam dulcedinem, veris abrenuntiatoribus promissam, non ignorant, & quam graviter mundus errat, & varie fallitur, clarius vident. *Lib. 3. cap. 20. §. 5.*

II. *Id magno cum solatio experti sunt Sancti.*

Sancti omnibus divitiis, dignitatibus, honoribus, amicis & cognatis renuntiabant: nil de mundo habere cupiebant, vix necessaria vitæ fumebant: corpori servire, etiam in necessitate, dolebant. Pauperes igitur erant rebus terrenis, sed divites valde in gratia & virtutibus. Foris egebant, sed intus gratia & consolatione Divina reficiebantur. *Lib. 1. cap. 18. §. 3.*



III. *Idipsum & nos experiamur.*

Unde, Domine Deus, pro magno etiam reputo beneficio, non multa habere, unde exterius, & secundum homines laus & gloria apparet; ita ut considerata quis paupertate, & vilitate personæ suæ, non modo gravitatem aut tristitiam, vel dejectionem inde concipiat, sed potius consolationem & hilaritatem magnam; quia tu Deus pauperes & humiles, atque huic mundo despectos tibi elegisti in familiares, & domesticos. Testes sunt ipsi Apostoli tui, quos *Principes super omnem terram constituisti. Lib. 3. cap. 22. §. 4.*

Nil cupientes extra Jesum.

Malo pauper esse propter te, quam dives sine te. Eligo potius tecum in terra peregrinari, quam sine te cœlum possidere, *Lib. 3. cap. 59. §. 1.*

Passus XLI.

De Patientia.

I. *Christus patientiam docet verbo & exemplo,*

Fili, ego descendi de cœlo pro tua salute: suscepi tuas misérias, non necessitate, sed charitate trahente, ut patientiam disceres, & temporales misérias non indignanter ferres. *Lib. 3. cap. 18. §. 1.*

Et patientes vult habere discipulos.

Discipulos meos utique non misi ad gaudia temporalia, sed ad magna certamina: non ad ho-

honores, sed ad despectiones; non ad otium, sed ad labores, non ad requiem, sed ad afferendum fructum multum in patientia. Horum memento fili mi verborum. *Lib. 3. cap. 30. §. 6.*


II. *Verus patiens adversa omnia de manu Dei accipit, & pro Deo patitur.*

Non est verus patiens, qui pati non vult, nisi quantum sibi visum fuerit, & a quo sibi placuerit. Verus autem patiens non attendit, a quo homine, utrum a Prælato suo, an ab aliquo æquali, aut inferiori: utrum a bono & sancto viro, vel a perverso & indigno exerceatur. Sed indifferenter ab omni creatura, quantumcunque, & quotiescunque ei aliquid adversi acciderit, totum hoc de manu Dei grantanter accipit, & ingens lucrum reputat; quia nil apud Deum, quantumlibet parvum, pro Deo tamen passum, poterit sine merito transire. *Lib. 3 cap. 19. §. 3.*

III. *Nec respicit, a quo patiatur.*

Nec dicas, non valeo hæc ab homine tali pati, nec hujusmodi mihi patienda sunt: grave enim intulit damnum, & impropereat mihi, quæ nunquam cogitaveram: sed ab alio libenter patiar, & sicut patienda videro. Insuper est talis cogitatio, quæ virtutem patientiæ non considerat, nec a quo coronanda erit: sed magis personas & offensas, sibi illatas, perpendit. *Ibidem §. 2.*

Passus



Passus XLII.

Patientia est necessaria.

I. *Quidquid agat homo, semper habebit, quod patiatur.*

Disipone, & ordina omnia secundum tuum velle, & videre, & non invenies, nisi semper aliquid pati debere, aut sponte, aut invite; & ita crucem semper invenies. Aut enim in corpore dolorem senties, aut in anima spiritus tribulationem sustinebis. Interdum a Deo relinqueris, interdum a Proximo exercitaberis: & quod amplius est, sæpe tibimet ipsi gravis eris. Nec tamen aliquo remedio vel solatio liberari, seu alleviari poteris: sed, donec Deus voluerit, oportet, ut sustineas. *Lib. 2. cap. 12. §. 3. & 4.*

II. *Quocunque se vertat, idem inveniet.*

Converte te supra, converte te infra: converte te extra, converte te intra: & in his omnibus invenies crucem: & necesse est, te ubique tenere patientiam, si internam vis habere pacem, & perpetuam promereri coronam. Non potes effugere, quocunque iveris, teipsum tecum portas, & semper teipsum invenies. *Ibidem. §. 4.*

III. *Nec aliud est remedium, quam ut se præparet, & patienter sustineat.*

Præpara te ad toleranda multa adversa, & varia incommoda in hac misera vita; quia sic tecum

cum erit, ubicunque fueris, & sic revera invenies, ubicunque latueris. Oportet ita esse, & non est remedium evadendi a tribulatione morborum & dolore, quam ut patiaris. Etiam si raptus fueris usque ad tertium cœlum cum Paulo, non es propterea securatus de nullo contrario patiundo. Ego (inquit Jesus) ostendam illi, quanta oporteat eum pro nomine meo pati. *Ibidem.* §. 10. & 12.

Passus XLIII.

Patiendum libenter.

I. *Patiendum sine querela considerata Christi & Sanctorum passione,*

Quid est, quod loqueris, Fili? Cessa conqueri considerata mea & aliorum Sanctorum passione. Nondum usque ad sanguinem restitisti. Parum est, quod tu pateris, in comparatione eorum, qui tam multa passi sunt, tam fortiter tentati, tam graviter tribulati, tam multipliciter probati & exercitati. *Lib. 3. cap. 19. §. 1.*

Et utilitate propria.

Cogita, quia sic forte melius est pro tua probatione & patientia, sine qua non sunt multum ponderanda merita nostra. *Lib. 1. cap. 16. §. 1.*

II. *Patiendum libenter & æqualiter omnia.*

Oportet te igitur aliorum graviora ad mentem reducere, ut levius feras tua minima. E si tibi minima non videntur, vide, ne hoc tua faciat impatientia. Sive tamen parva, sive magna sint, stude cuncta patienter sufferre. *Lib. 3. cap. 19. §. 1.*



III. *Patiendum animo ad hoc præparato,*

Non ponas te ad multam requiem, sed ad magnam patientiam. Si quæris in hac vita requiem, quomodo tunc pervenies ad æternam requiem. *Lib. 3. cap. 35. §. 2.* Quanto melius ad patiendum te disponis, tanto sapientius agis, & amplius promereris: feres quoque levius animo & usu ad hoc non segniter paratis. *Lib. 3. cap. 19. §. 2.*

IV. *Patiendum pro Christo voluntate prompta.*

Merito deberes libenter modicum pati pro Christo, cum multi graviora patiuntur pro mundo. Utinam dignus esses aliquid pro nomine Jesu pati! quam magna gloria remaneret tibi, quanta exultatio omnibus sanctis Dei, quanta quoque ædificatio esset proximi. Nam patientiam omnes recommendant, quamvis pauci tamen pati velint. *Lib. 2. cap. 12. §. 13.*

Passus XLIV.

Anima se disponit ad Patientiam.

I. *Anima necessitatem patientiæ agnoscit,*

Domine Deus, ut video, patientia est mihi valde necessaria: multa enim in hac vita accidunt contraria. Nam qualitercunque ordinavero de pace mea, non potest esse sine bello & dolore vita mea. *Lib. 3. cap. 12. §. 1.*

II. *Se submittit,*

Ideo oportet, ut me ponam ad magnam patientiam, & me ipsum in omni desiderio tibi submit-

mittam. *Lib. 4. cap. 11. §. 3.* Per sanctam patientiam ambulamus ad te, qui es corona nostra. *Lib. 3. cap. 18. §. 3.*

III. *Et gratiam roborantem implorat.*

Tu scis, quod modicum possum pati, & quod cito dejicior levi exurgente adversitate. Efficiatur mihi quælibet exercitatio tribulationis pro nomine tuo amabilis, & optabilis: nam pati & vexari pro te, valde salubre est animæ meæ. *Lib. 3. cap. 19. §. 4.*

Passus LXV.

Quam proficiuæ sint Adversitates.

I. *Adversitates hominem probant & Deo subjiciunt.*

Quantæ virtutis quisque fuerit, melius patet occasione adversitatis. *Lib. 1. cap. 16. §. 4.* Utilior est sæpe talis probatio, quam si semper prospera pro tua haberes voluntate. *Lib. 3. cap. 7. §. 5.* Vult enim Deus, ut tribulationem sine consolatione pati discas, & ut illi totaliter te subjicias, & humilior ex tribulatione fias. *Lib. 2. cap. 12. §. 4.*

II. *In hac vita meliora sunt adversa quam prospera.*

Nunquam sentire aliquam turbationem, nec aliquam pati cordis vel corporis molestiam, non est præsentis temporis, sed status æternæ quietis. Non ergo æstimes, te veram pacem invenisse, si nullam senseris gravitatem: nec tunc totum esse bonum, si neminem pateris adversarium, nec
hoc



hoc esse perfectum, si cuncta fiant secundum tuum affectum. *Lib. 3. cap. 25. §. 3.*

III. *Adversa omnia in bonum nostrum ordinat Deus, amandus & laudandus in omnibus.*

Etiam si me Domine, variis tentationibus, & adversitatibus exponas, hoc totum ad utilitatem meam ordinas, qui mille modis dilectos tuos probare consuevisti. In qua probatione non minus diligi debes, & laudari, quam si cœlestibus consolationibus me repleres. Omnes, quæ sua sunt, quærunt; Tu salutem meam & profectum meum solummodo prætendis, & omnia in bonum mihi convertis, *Lib. 3. cap. 59. §. 2.*

Passus XLVI.

De Tolerantia in adversis.

I. *Adversa patienter tolerata Deo sunt gratiora,*

Fili, magis placent mihi patientia & humilitas in adversis, quam multa consolatio & devotio in prosperis. *Lib. 3. cap. 57. §. 1.*

Nobis autem longe utiliora, quam læti vitæ dies.

O si vidisses Sanctorum in cœlo coronas, non hujus vitæ lætos dies concupisceres, sed magis pro Deo tribulari gauderes. O si tibi hæc saperent, & profunde ad cor transfirent! quomodo auderes vel semel conqueri? Nonne pro vita æterna cuncta laboriosa sunt toleranda? *Lib. 3. cap. 47. §. 3. & 4.*

II.



II. *Tribulationes passi sunt sancti sequendo vestigia Christi,*

O quam multas & graves tribulationes passi sunt Apostoli, Martyres, Confessores, Virgines, & reliqui omnes, qui Christi vestigia voluerunt sequi? *Lib. 1. cap. 18. §. 2.*

*Qui totam vitam in doloribus trans-
egit.*

Nam ab hora ortus mei usque ad exitum in cruce, non defuit mihi tolerantia doloris. Defectum rerum temporalium magnum habui: multas querimonias de me frequenter audiui: confusiones & opprobria benigne sustinui: pro beneficiis ingratitudinem recepi: pro miraculis blasphemias: pro doctrina reprehensiones. *Lib. 3. cap. 18. §. 1.*

III. *Unde & nos similia tolerare oportet, ut comprehendamus cœlestia, & Christo conformes efficiamur.*

Nemo aptus est ad comprehendendum cœlestia, nisi se submiserit ad portandum pro Christo adversa. Nihil Deo acceptius, nihil tibi salubrius in mundo isto, quam libenter pati pro Christo. Et si eligendum tibi esset, magis optare deberes pro Christo adversa pati, quam multis consolationibus recreari: quia Christo similior esses, & omnibus sanctis magis conformior. Non enim stat meritum nostrum, & profectus status nostri in multis suavitatibus & consolationibus; sed potius in magnis gravitatibus & tribulationibus perferendis. *Lib. 2. cap. 12. §. 14.*

Passus



Passus XLXII.

De non curandis hominum judiciis
& dicteriis.

I. *Humilis corde, qui Deo firmiter in-
hæret, non curat vana hominum
judicia,*

Fili, jacta cor tuum firmiter in Domino, & humanum ne metuas judicium, ubi te conscientia pium reddit, & infontem. Bonum est & beatum taliter pati, nec hoc erit grave humili cordi, & Deo magis, quam sibi ipsi confidenti. *Lib. 3. cap. 36. §. 1.*

II. *Nec laudes aut vituperia, quæ in-
ternum hominem non mutant:*

Non es sanctior, si laudaris: nec vilior, si vituperaris. Quod es, hoc es: nec major dici vales, quam Deo teste sis. Si attendis, quid apud de sis intus, non curabis, quid de te loquuntur homines. *Homo videt in facie, Deus autem in corde. Homo considerat actus, Dens vero pensat intentiones. Lib. 2. cap. 6. §. 3.*

III. *Sed Deo totum comittit, cum om-
nibus satisfacere non sit possibile;*

Sed & omnibus fatis esse non est possibile. **E**t si Paulus omnibus studuit in Domino placere, & omnibus omnia factus est, tamen etiam pro minimo duxit, quod ab humano die judicatus fuerit. Egit satis pro aliorum ædificatione & salute, quantum in se erat, & poterat: sed ne ab aliis aliquando judicaretur, vel non despice-
re

retur, cohibere non potuit. Ideo totum Deo commisit, qui totum noverat: & patientia ac humilitate contra ora loquentium iniqua, aut etiam vana ac mendosa cogitantium, atque pro libitu suo quæque jactantium se defendit.

Subinde tamen respondet, ne ex taciturnitate infirmis generetur scandalum.

Respondit tamen interdum, ne infirmis ex sua taciturnitate generaretur scandalum. Lib. 3. cap. 36. §. 1. & 2.

Passus XLVIII.

De perferendis injuriis & despectionibus.

I. Deus timendus est, non homines, qui per injurias sibi potius nocent, quam tibi:

Quis tu, ut timeas a mortali homine? hodie est, & cras non comparet. Deum time, & hominum terrores non expavesces. Quid potest aliquis in te verbis aut injuriis? sibi potius nocet, quam tibi: nec poterit judicium Dei effugere, quicumque est ille. Tu habe Deum præ oculis & noli contendere verbis querulosis. Lib. 3. cap. 36. §. 3.

II. Causam tuam Deo committe, qui unicuique reddet secundum merita,

Quod si ad præsens tu videris succumbere, & confusionem pati, quam non meruisti: ne indigneris ex hoc, neque per impatientiam minuas coronam tuam. Sed ad me potius respice in cœ-
P lum,



lum, qui potens sum eripere ab omni confusione & injuria, & unicuique reddere secundum opera sua. *Ibidem.*

III. Et sine querela ad tuum emolumentum despectiones libenter sustine,

Domine, si recte me inspicio, nunquam mihi facta est injuria ab aliqua creatura; unde nec juste habeo conqueri adversum te. Et nisi me ad hoc præparavero, quod velim libenter ab omni creatura despici, & relinqui, atque penitus nihil videri, non possum interius pacificari, & stabiliri, nec spiritualiter illuminari, neque plene tibi uniri. *Lib. 3. cap. 41. §. 2.*

IV. Nec modicum inde fructum referes.

Bonum est, quod patiamur quandoque contradictiones, & quod male & imperfecte de nobis sentiatur, etiamsi bene agimus & intendimus. Ista sæpe juvant ad humilitatem, & a vana gloria nos defendunt. Tunc enim melius interiorum Deum quærimus, quando foris vilipendimur ab hominibus, & non bene nobis creditur. *Lib. 1. cap. 12. §. 1.*

Passus XLIX.
Gloriandum & gaudendum in contemptu & contrarietatibus.

I. Gloria tua non est in ore hominum.

Qui veram, & æternam gloriam desiderat, temporalem non curat. Brevis gloria, quæ ab hominibus datur & accipitur. Mundi gloriam semper comitatur tristitia. Bonorum gloria



ria in conscientiiis eorum, & non in ore hominum. *Lib. 2. cap. 6. §. 2.*

II. *Quidquid dicant, aut faciant isti,*

Erunt alii magni in ore hominum, de te autem tacebitur. Quod aliis placet, processum habebit: quod tibi placet, ultra non proficiet. Quod alii dicunt, audietur: quod tu dicis, pro nihilo computabitur. Petent alii, & accipient: tu petes, nec impetrabis. Aliis hoc vel illud committeretur: tu autem ad nihil utilis judicaberis. Propter hoc natura quandoque contristabitur, & magnum, si filens portaveris. *Lib. 3. cap. 49. §. 4. & 5.*

III. *Si in interiora Jesu penetres, non curabis, sed gaudebis cum Apostolis pro nomine Jesu contumeliam pati.*

Sed si semel perfecte introisses in interiora Jesu, & modicum de ardenti amore ejus sapuisses: tunc de proprio commodo vel incommodo nihil curares, sed magis de opprobrio illato gauderes: quia amor Jesu facit hominem seipsum contemnere. *Lib. 2. cap. 1. §. 6.* Gloriari in tribulatione non est grave amanti: sic enim gloriari, est gloriari in cruce Domini. *Lib. 2. cap. 6. §. 2.* Testes sunt Apostoli, ita conversati in mundo, ut etiam pati contumelias gauderent pro nomine tuo, & quæ mundus abhorret, ipsi amplecterentur affectu magno. *Lib. 3. cap. 22. §. 4.*



Passus L.

Gloria nostra per contemptum omnis
temporalis honoris in Deo
quærenda.

I. *Vanus est omnis honor temporalis.*

Quærant Judæi gloriam, quæ ab invicem est:
ego hanc requiram, quæ a solo Deo est.
Omnis quidem gloria humana, omnis honor
temporalis, omnis altitudo mundana, æternæ
gloriæ tuæ comparata, vanitas est & stultitia.
*Lib. 3. cap. 40. §. 6. Non enim, qui se ip-
sum commendat, ille probatus est (ait B. Paulus)
sed quem Deus commendat. Lib. 2. cap. 6. §. 4.*

II. *Nec quærendus honor alius, quam honor Dei,*

Nam merita non sunt ex hoc æstimanda, si
quis plures visiones aut consolationes habeat;
vel si peritus sit in scripturis, aut in altiori
ponatur gradu; sed, si vera fuerit humilitate
fundatus, & Divina charitate repletus: si Dei
honorem pure & integre semper quærat: si se-
ipsum nihil reputet, & in veritate despiciat,
atque ab aliis etiam despici & humiliari ma-
gis gaudeat, quam honorari. *Lib. 3. Lib. 7. §. 5.*

III. *In quo solo vera est gloria, & exultatio nostra.*

Est autem vera gloria & exultatio sancta,
gloriarī in te, & non in se: gaudere in nomi-
ne tuo, non in propria virtute: nec in aliqua
creatura delectari, nisi propter te. Laudetur



nomen tuum non meum : magnificetur opus
tuum non meum : benedicatur nomen sanctum
tuum, nihil mihi autem attribuat de laudi-
bus hominum. Tu gloria mea, & exultatio
cordis mei. In te gloriabor & exultabo tota
die : pro me autem nihil, nisi in infirmitatibus
meis. *Lib. 3. cap. 40. §. 5.*

Passus LI.

In tribulationibus & opprobriis reno-
vanda Christi patientis me-
moria.

I. *Memoria Christi patientis nos in
tribulationibus corroborat.*

Requiesce in passione Christi, & in sacris
vulneribus ejus libenter habita ; si enim
ad vulnera & pretiosa stigmata Jesu devote
confugis, magnam in tribulatione confortationem
senties : nec multum curabis hominum despe-
ctiones, faciliterque verba detrahentia perfe-
res. *Lib. 2. cap. 1. §. 4.*

II. *Cum Christo patiente libenter pati-
tur amicus Christi.*

Christus fuit etiam in mundo ab hominibus
despectus, & in maxima necessitate a notis &
amicis inter opprobria derelictus. Christus pati
voluit & despici : & tu audes de aliquo con-
queri ? Christus habuit adversarios, & oblocu-
tores ; & tu vis omnes habere amicos & bene-
factores ? unde coronabitur patientia tua, si
nihil adversitatis occurrerit ? si nihil contrarium
vis



vis pati, quomodo eris amicus Christi? sustine cum Christo, & pro Christo, si vis regnare cum Christo. *Ibidem* §. 5.

III. Et tribulationes hujus temporis reputat ad vitam æternam pretiosas.

Calicem Domini affectanter bibe, si amicus ejus esse & partem cum eo habere desideras. Nemo ita cordialiter sentit passionem Christi, sicut is, cui contigerit similia pati. Consolationes Deo committe. Faciat ipse cum talibus, sicut sibi magis placuerit. Tu vero pone te ad sustinendum tribulationes, & reputa eas maximas consolationes; quia non sunt condignæ passionibus hujus temporis ad futuram gloriam promerendam, etiamsi solus omnes posses sustinere. *Lib. 2. cap. 12. §. 4. & 10.*

Passus LII.

Cruz, quam necessaria, tam libenter amplectenda.

I. In hac vita nemo quærat requiem.

Tota vita Christi cruz fuit, & martyrium: & tu tibi quæris requiem & gaudium? Erras, erras, si aliud quæris, quam pati tribulationes: quia tota ista mortalis vita plena est miseriis, & circumsignata crucibus. Cruz ergo semper parata est, & ubique te expectat. *Lib. 2. cap. 12. §. 4. & 7.*



II. Sed crucem libenter portet, ut facilius portet, & fructuosius.

Si libenter crucem portas, portabit te: & ducet ad desideratum finem, ubi scilicet finis patiendi erit, quamvis hic non erit. Si invite portas, onus tibi facis; & te ipsum magis gravas: & tamen oportet, ut sustineas. Si abjicis unam crucem, aliam procul dubio invenies, & forsitan graviolem. *Ibidem §. 5.*

III. Nec enim aliam viam nobis ostendit Christus, quam viam crucis.

Et quomodo tu aliam viam quæris, quam hanc regiam viam, quæ est via sanctæ crucis? Credis tu evadere, quod nullus mortalium potuit præterire? Quis sanctorum in mundo sine cruce & tribulatione fuit? Nec enim Jesus Christus Dominus noster una hora sine dolore passionis fuit, quamdiu vixit. *Oportebat* (ait) *Christum pati & resurgere a mortuis & ita intrare in gloriam suam.* Quid igitur times tollere crucem, per quam itur ad regnum? *Ibidem §. 2. & 6.*

Passus LIII.

Crux cum fiducia in Christum nos homines debiles corroborat, & consolatur.

I. Homo, et si infirmus in se;

Non est secundum hominem crucem portare, crucem amare, corpus castigare, & servituti subicere, honores fugere, contumelias liben-



libenter sustinere, seipsum despicere, & despici optare, adversa quæque cum damnis perpeti, & nihil prosperitatis in hoc mundo desiderare.

Si tamen confidat in Domino, portando crucem fortis evadit.

Sed si in Domino confidis, dabitur tibi fortitudo de cœlo, & subjicientur ditioni tuæ mundus & caro. Sed nec inimicum diabolum timebis, si fueris fide armatus & cruce Christi signatus. *Lib. 2. cap. 12. §. 9.*

II. Crucem ergo sibi paratam amplectatur viriliter:

Pone te ergo sicut bonus & fidelis servus Christi ad portandum viriliter crucem Domini tui, pro te ex amore crucifixi. Pati tibi remanet, si Jesum diligere, & perpetuo illi servire placet. Et quanto altius quis in spiritu profecerit, tanto graviores sæpe cruces inveniet, quia exilii sui pœna magis ex amore crescit. *Ibid. §. 7. 10. & 12.*

III. Inde hauriet tantum robur & solatium,

Sed tamen iste sic multipliciter afflictus, non est sine levamine consolationis: quia fructum maximum sibi sentit accrescere ex sufferentia suæ crucis. Nam, dum sponte se illis subjicit, omne onus tribulationis in fiduciam divinæ consolationis vertitur. Et quanto caro magis per afflictionem atteritur, tanto spiritus amplius per internam gratiam roboratur. *Ibidem §. 8.*

IV. *Ut etiam plura perferre desideret.*

Et nonnunquam in tantum confortatur ex affectu tribulationis & adversitatis ob amorem conformitatis crucis Christi, ut se sine dolore & tribulatione esse non vellet; quoniam tanto se acceptiorem Deo credit, quanto plura & graviora pro eo perferre potuerit. Non est istud hominis virtus sed gratia Christi, quæ tanta potest & agit in carne fragili, ut, quod naturaliter semper abhorret & fugit, hoc fervore spiritus aggrediatur & diligat. *Ibid.*

Passus LIV.

De Fructu & Utilitate crucis.

I. *In cruce optabilia sunt omnia,*

Ecce in cruce totum constat! In cruce salus, in cruce vita, in cruce perfectio ab hostibus, in cruce infusio supernæ suavitatis, in cruce robur mentis, in cruce gaudium spiritus, in cruce summa virtutis, in cruce perfectio sanctitatis. Non est salus animæ, nec spes æternæ vitæ nisi in cruce. *Lib. 2. cap. 12. §. 2. & 3.*

II. *Nec aliquid melius proposuit nobis Christus.*

Si quidem aliquid melius & utilius salutem hominum, quam pati fuisset; Christus utique verbo & exemplo ostendisset; nam & sequentes se Discipulos, omnesque eum sequi cupientes, manifeste ad crucem portandam hortatur, & dicit: *Si quis vult venire post me, abneget semetipsum, & tollat crucem suam, & sequatur me. Ibid. §. 15.*



III. *Tollamus ergo crucem, & sequamur Jesum.*

Omnibus ergo perlectis & scrutatis, sit hæc conclusio finalis. Quoniam per multas tribulationes oportet nos intrare in regnum Dei. Tolle ergo crucem tuam, & sequere Jesum, & ibis in vitam æternam. *Ibid.* §. 2. & 15.

Passus LV. Christi Discipulus crucem amplectitur.

I. *Fidelis discipulus Magistrum suum sequitur,*

Domine Jesu, quia arcta est via tua, & mundo despecta, dona mihi te cum mundi despectu imitari. Non est discipulus super Magistrum, nec servus super Dominum suum. Exerceatur servus tuus in via tua, quia ibi est salus mea, & sanctitas vera. Quidquid extra eam lego, vel audio, non me recreat, nec delectat plene. *Lib. 3. cap. 56. §. 3.*

II. *Seque ad portandam strenue crucem animat.*

Suscepi, suscepi de manu tua crucem, portabo & portabo eam usque ad mortem, sicut imposuisti mihi. Eja! Fratres pergamus simul: Jesus erit nobiscum. Propter Jesum suscepi-
mus hanc crucem: propter Jesum perseve-
remus in cruce. Erit adjutor noster, qui est Dux noster & Præcessor. *Ibidem* §. 5. & 6.



Passus LVI.

Anima præparatur ad pugnam.

I. *Pugnandum est in terris.*

Probandus es adhuc in terris, & in multis exercitandus; consolatio tibi interdum dabitur, sed copiosa satietas non concedetur. Confortare igitur, & esto robustus tam in agendo, quam in patiendi naturæ contraria. Oportet te novum induere hominem & in alterum virum mutari. Oportet te sæpe agere, quod non vis; & quod vis, oportet relinquere. *Lib. 3. cap. 49. §. 4.*

II. *Qui cupit victoriam, expeditus sit ad pugnam,*

Esto itaque expeditus ad pugnam, si vis habere victoriam: sine certamine non potes venire ad patientiæ coronam. Si pati non vis, recusas coronari: si autem coronari desideras, certa viriliter, sustine patienter. Sine labore non tenditur ad requiem: nec sine pugna pervenitur ad victoriam. *Lib. 3. cap. 19. §. 4.*

III. *Et Regem suum sequatur viriliter.*

En! Rex noster ingreditur ante nos, qui pugnabit pro nobis. Sequamur viriliter, nemo metuat terrores, simus parati mori fortiter in bello, nec inferamus crimen gloriæ nostræ, ut fugiamus a cruce. *Lib. 3. cap. 56. §. 6.*



Passus LVII.

Victoria sui.

I. *Diu certandum, ut te vincas propter Deum:*

Multum & diu oportet hominem in seipso certare, antequam discat seipsum plene superare, & totum affectum suum in Deum trahere. *Lib. 2. Cap. 9. §. 3.* Disce te in omnibus propter creatorem vincere, tunc ad divinam valebis cognitionem pertingere. *Lib. 3. cap. 42. §. 2.*

II. *Si difficultates occurrant,*

Vix est aliquid tale, in quo tantundem mori indiges, sicut videre & pati, quæ voluntati tuæ adversa sunt; maxime autem, cum disconvenientia, & quæ minus utilia tibi apparent, fieri jubentur. Et quia non audes resistere altiori potestati, sub dominio constitutus: ideo durum tibi videtur, ad nutum alterius ambulare, & omne proprium sentire omittere.

Pensa laborum finem, & præmium æternum.

Sed pensa, Fili, horum fructum laborum, celerem finem, atque præmium nimis magnum: & non habebis inde gravamen, sed fortissimum patientiæ tuæ solamen. *Lib. 3. cap. 49. §. 5. & 6.*

III. *Incipe a temetipso, & facilius cætera superabis.*

Si bene steteris cum Deo, & ejus judicium aspexeris, facilius te victum portabis. *Lib. 3. cap. 44. §. 1.* Si temetipsum perfecte viceris, cate-



cetera facilius subjugabis. Perfecta victoria est de semetipso triumphare. *Lib. 3. cap. 53. §. 2.* Beatus ille homo, qui naturæ vim facit, & concupiscentias carnis fervore spiritus crucifigit. *Lib. 3. cap. 48. §. 6.*

Passus LVIII.

Mortificatio continua.

I. *Qui sibi & cum Christo in cruce moritur, cum Christo vivet;*

Scias pro certo, quia morientem te oportet ducere vitam. Et quanto quisque plus sibi moritur, tanto magis Deo vivere incipit. Præcessit Jesus bajulans sibi crucem, & mortuus est pro te in cruce: ut & tu tuam portes crucem, & mori affectes in cruce. Quia si commortuus fueris, etiam cum illo pariter vives: et si socius fueris pœnæ, eris & gloriæ. *Lib. 2. cap. 12. §. 2. & 14.*

II. *Nam mortificatio continua, vera est ad vitam via:*

Ecce! in moriendo totum jacet: & non est alia via ad vitam, & ad veram internam pacem, nisi via sanctæ crucis, & quotidianæ mortificationis. *Ibidem. §. 3.*

III. *Hanc tenuerunt Sancti, ut æternum viverent:*

Qui Christi vestigia voluerunt sequi, animas suas in hoc mundo oderunt, ut in æternam vitam eas possiderent. Mundo erant alieni, sed Deo proximi ac familiares amici. *Lib. 1. cap. 18. §. 2. & 4.*

Hanc



Hanc ingrediamur omnes.

Da mihi, Domine, omnibus mori, quæ in mundo sunt: & propter te amare contemni, & nesciri in hoc sæculo. *Lib. 3. cap. 15. §. 4.*

Passus LIX.

Abnegatio sui perfecta.

I. Imprimis abnega te metipsum,

Fili, non potes perfectam possidere libertatem, nisi totaliter abneges te metipsum. *Lib. 3. cap. 32. §. 1.* Verus profectus hominis est abnegatio sui ipsius; & homo abnegatus, valde liber est & securus. *Lib. 3. cap. 39. §. 3.*

II. Sequendo Christum,

Volo te addiscere perfectam abnegationem tuam in voluntate mea, sine contradictione & querela: *Sequere me. Lib. 3. cap. 56. §. 1.*

Tuam deferendo voluntatem,

Nam & pro modica hac voluntate, quam nunc sponte deferis, habebis semper voluntatem tuam in coelis. *Lib. 3. cap. 49. §. 6.*

III. Renunciando propinquis & remotis,

Attamen si homo vere velit esse spiritualis, oportet eum renunciare tam remotis, quam propinquis, & a nemine magis cavere, quam a se ipso. *Lib. 3. cap. 53. §. 2.* In his & similibus multis probari solet fidelis Domini servus; qualiter se abnegare, & in omnibus frangere quiverit. *Lib. 3. cap. 49. §. 5.*

IV.



IV. *Minimis & maximis,*

Non est ergo minimum etiam in minimis se ipsum relinquare. *Lib. 3. cap. 39. §. 2.* Et quanto perfectius infimis quis renunciat, & magis sibi ipsi per contemptum sui moritur, tanto gratia celerius venit, copiosius intrat, & altius liberum cor elevat. *Lib. 4. cap. 15. §. 3.*

V. *Et quietam duces vitam, ac Deo placentem.*

Utinam sic tecum esset, & ad hoc pervenisses, ut tui ipsius amator non esses! sed ad nutum meum pure stares, & ejus, quem tibi præposui, Patris: tunc mihi valde placeres, & tota vita tua in gaudio & pace transiret. Adhuc multa habes ad relinquendum, quæ, nisi mihi ex integro resignaveris, non acquires, quod postulas. *Lib. 3. cap. 32. §. 2.*

Passus LX.

De studio perfectionis.

I. *Remotis impedimentis, & calcatis inferioribus, enitendum ad superiora:*

Fili, non debes averti, nec statim dejici audita via perfectorum, sed magis ad sublimiora provocari, & ad minus ad hæc ex desiderio suspirare. *Lib. 3. cap. 32. §. 2.* Est magnum impedimentum, quia in signis & sensibilibus rebus statur, & parum de perfecta mortificatione habetur. *Lib. 3. cap. 31. §. 3.* Nam & raro totus liber quis invenitur a navo propriæ exquisitionis. Sic Judæi olim venerant, in Bethaniam ad Mar-



Martham & Mariam: non propter Jesum tantum, sed & ut Lazarum viderent. *Lib. 3. Cap. 33. §. 2.*

II. *Atque ut magna animi libertate
cœlestibus inhæreamus semper,*

Domine, hoc opus est perfecti viri, nunquam ab intentione cœlestium animum relaxare: & inter multas curas, quasi sine cura transire: non more torpentis, sed prærogativa quadam liberæ mentis, nulli creaturæ inordinata affectione adhærendo. *Lib. 3. cap. 26. §. 1.* Hoc non est opus unius diei, nec ludus parvulorum: imo in hoc brevi includitur omnis perfectio Religiosorum. *Lib. 3. cap. 32. §. 2.*

III. *Petenda a Deo gratia, qua a terrestribus abstrahamur.*

Confirma me Deus per gratiam sancti Spiritus. Da virtutem corroborari in interiori homine, & cor meum ab omni inutili sollicitudine, & angore evacuare, nec variis desideriis trahi cujuscunque rei, vilis aut pretiosæ; sed omnia inspicere sicut transeuntia, & me pariter cum illis transiturum; quia nihil permanens sub sole. *Lib. 3. cap. 27. §. 4.*

Passus LXI.

De Profectu spirituali.

I. *Si vis proficere, teneas te tanquam peregrinum in terris, & ambula in simplicitate cordis.*

Si vis debite stare, & proficere, teneas te tanquam exulem peregrinum super terram. *Lib. 1. cap. 17. §. 1.* Sancti in vera humilitate stabant,
in



in simplici obedientia vivebant, in charitate & patientia ambulabant; & ideo quotidie in spiritu proficiebant, & magnam apud Deum gratiam obtinebant. Heu! quid est vita nostra, si illis fuerit comparata! *Lib. 1. cap. 18. §. 1. & 4.*

II. Profectum, & perfectionem non reponas in dulcedine devotionis;

Neque tunc aliquid magni te reputes, aut specialiter dilectum existimes, si in magna fueris devotione, atque dulcedine: quia in istis non cognoscitur verus amator virtutis; nec in istis consistit profectus, & perfectio hominis. *Lib. 3. cap. 25. §. 2.*

III. Sed in conformitate cum Divina voluntate.

In quo ergo Domine? In offerendo te ex toto corde tuo voluntati Divinæ: non quærendo, quæ tua sunt, nec in parvo, nec in magno, nec in tempore, nec in æternitate; ita ut una æquali facie in gratiarum actione permaneas inter prospera & contraria, omnia æqua lance pensando. *Ibid. §. 3.*

Passus LXII.

De acquirenda Pace animi.

*I. Christus pacem suam dat humilibus
& mansuetis corde,*

Fili, ego locutus sum: *Pacem relinquo vobis, pacem meam do vobis: non quomodo mundus dat, ego do vobis.* Pacem omnes desiderant: sed quæ ad veram pacem pertinent, non omnes



curant. Pax mea cum humilibus, & mansuetis corde. Pax tua erit in multa patientia. Si me audieris, & vocem meam secutus fueris, poteris multa pace frui. *Lib. 3. cap. 25. §. 1.*

II. *Docet modum ingrediendi viam pacis,*

Fili, nunc docebo te viam pacis, & veræ libertatis. Stude, Fili, alterius potius facere voluntatem, quam tuam. Elige semper minus, quam plus habere. Quære semper inferiorem locum, & omnibus subesse. Opta semper & ora, ut voluntas Dei integre in te fiat. Ecce! talis homo ingreditur fines pacis & quietis. *Lib. 3. cap. 23. §. 1. & 2.*

III. *Et illam denique obtinendi.*

Dixi tibi sapissime, & nunc iterum dico: Relinque te, resigna te, & frueris magna interna pace. Da totum pro toto: nil exquire, nil repete; sta pure & inhæsitanter in me, & habebis me. Eris liber in corde, & tenebræ non conculcabunt te. *Lib. 3. cap. 37. §. 4.*

Passus LXIII.

Quomodo quærenda Pax animi?

I. *Pax non est quærenda in tribulationum carentia,*

Ita est, Fili; sed volo te non talem quærere pacem, quæ tentationibus careat, aut contraria non sentiat: sed tunc etiam æstima, te pacem invenisse, cum fueris variis tribulationibus exercitatus, & in multis contrarietatibus probatus. *Lib. 3. cap. 12. §. 2.*

II.



II. *Sed acceptando, atque laudando in omnibus dispositionem Divinam.*

Si fueris tam fortis & longanimis in spe, ut, subtracta interiori consolatione, etiam ad ampliora sustinenda cor tuum præparaveris, nec te justificaveris, quasi hæc, tantaque pati non deberes; sed me in omnibus dispositionibus justificaveris, & sanctum laudaveris: tunc in vera & recta via pacis ambulas, & spes indubitata erit, quod rursus in jubilo faciem meam sis visurus. Quod si ad plenum tui ipsius contemptum perverneris, scito, quod tunc abundantia pacis perfruearis, secundum possibilitatem tui incolatus. *Lib. 3. cap. 25. §. 4.*

Passus LXIV.

De removendis Pacis internæ obstaculis.

I. *Ut pacem habeas, ambula in veritate.*

Qui ambulat coram me in veritate, tutabitur ab incurribus malis, & veritas liberabit eum a seductoribus, & detractionibus iniquorum. Si veritas te liberaverit, vere libereris, & non curabis de vanis hominum verbis. *Lib. 3. cap. 4. §. 1.*

Non cura vana hominum verba,

Magnam habet cordis tranquillitatem, qui nec laudes curat, nec vituperia. *Lib. 2. cap. 6. §. 2.*



II. *Relinque cupidinem,*

Relinque cupidinem, & reperies requiem.
Lib. 3. cap. 32. §. 1. Si autem persecutus fuerit, quod concupiscit, statim ex reatu conscientiae gravatur: quia secutus est passionem suam, quæ nihil juvat ad pacem, quam quæsit.
Lib. 1. Cap. 6. §. 2.

III. *Sis humilis, benefac aliis, & conscientiam serva mundam.*

Non potest etiam diu stare pacificus, qui non nititur esse minimus & omnibus subjectus.
Lib. 1. cap. 17. §. 2. Leviter etiam indignatur, si quis ei resistit. *Lib. 1. cap. 6. §. 1.* Noli lætari, nisi cum benefeceris. Facile erit contentus & pacatus, cujus conscientia munda est. Suaviter requiesces, si cor tuum te non reprehenderit. *Lib. 2. cap. 6. §. 1. & 3.*

Passus LXV.

De Consolatione interna.

Benedicendus Deus, dum nos consolatur, atque invocandus in infirmitatibus nostris.

Domine, benedictum sit verbum tuum dulce super mel & favum ori meo. Quid facerem in tantis tribulationibus & angustiis meis, nisi me confortares tuis sanctis sermonibus?
Lib. 3. cap. 57. §. 4. Quia adhuc debilis sum in amore, & imperfectus in virtute: ideo necesse habeo a te confortari, & consolari: propte-

terea visita me sæpius, & instrue disciplinis sanctis. *Lib. 3. cap. 5. §. 2.* Si autem subito me respexeris, statim fortis efficior, & novo repleor gaudio. *Lib. 3. cap. 8. §. 1.*

**II. Christo paranda mansio, ut ad nos
veniat, aut confugiendum
ad ejus vulnera.**

Veniet ad te Christus, ostendens tibi consolationem suam, si dignam illi ab intus paraveris mansionem. *Lib. 2. cap. 1. §. 1.* Si necis speculari alta, & cœlestia, requiesce in passione Christi: si enim ad pretiosa vulnera Jesu devote confugis, magnam in tribulatione confortationem senties. *Lib. 2. cap. 1. §. 4.*

III. Consolator Jesus omni alio solatio pretiosior.

Devotus homo ubique secum fert Consolatorem suum Jesum, & dicit ad eum: adesto mihi, Domine Jesu, in omni loco & tempore. Hæc mihi sit consolatio, libenter velle carere omni humano solatio. Et si tua defuerit consolatio, sit mihi tua voluntas, & justa probatio pro summo solatio. Non enim in perpetuum irasceris, neque in æternum comminaberis. *Lib. 3. cap. 16. §. 2.*





PARS III.

De Via Unitiva.

Tertiam denique viam ingredimur, quæ Sponsam maculis depurgatam, variisque ornata virtutibus, ad Sponsum Divinum propius ducit, illique unit perfectius: quamvis enim hæ tres viæ ita sint inter se connexæ, ut ad eundem scopum tendant, & in earum qualibet reperiantur aliqua, quæ conveniant omnibus; sunt tamen in unaquaque specialia quædam, quæ illi sunt propria, & a quibus nomen habet. Et quidem tertiam hanc viam dicimus unitivam, quia ex contemplatione Bonitatis & Perfectionis Dei, prorumpimus in laudes divinas, & amorem illum, qui nos Deo conjungit, Principio ac Fini nostro: nam *Deus charitas est, & qui manet in charitate, in Deo manet, & Deus in eo.* Dupliciter autem unionem hanc considerat devotissimus Asceta noster, Deo unitissimus; uno modo, quatenus Deo Eucharistico unimur in terris: *Qui enim manducat meam carnem (ait Dominus) & bibit meum sanguinem, in me manet, & ego in illo.* Altero, dum Eidem, quantum possumus, per desiderium & amorem unimur in cœlis. Ad utrumque in prioribus viis jam aspirabat Anima; in ista ascendit altius, & Deo suo unitur plenius.

SEMI-



SEMITA I.

*Qua ratione Deo Eucharistico uniri
debeamus in terris?*

Passus I.

Christus seipsum præbet in cibum, & ad
sacram mensam omnes invitat.

Sententia I.

*Christus Jesus nos pascit suo corpore
& sanguine:*

*Venite ad me omnes, qui laboratis, & one-
rati estis, & ego reficiam vos: dicit Do-
minus. Panis quem ego dabo, caro mea est
pro mundi vita. Accipite & comedite: hoc est
corpus meum, quod pro vobis tradetur: hoc
facite in meam commemorationem. Qui man-
ducat meam carnem, & bibit meum sangui-
nem, in me manet, & ego in illo. Verba quæ
ego locutus sum vobis, spiritus & vita sunt.
Lib. 4.*

*II. Et ideo Pastori optimo gratias di-
camus immensas.*

Hæc sunt verba tua, Christe, Veritas æter-
na, quamvis non uno tempore prolata, nec
uno in loco conscripta. Gratias tibi, Jesu bo-
ne, Pastor æterne, qui nos pauperes & exu-
les dignatus es pretioso corpore & sanguine
tuo reficere: & ad hæc mysteria percipienda
etiam



proprii oris tui alloquio invitare: *Venite id me omnes, qui laboratis, & onerati estis, & ego reficiam vos. Lib. 4. cap. 1. §. 1. & 13.*

Passus II.

De Excellentia Mysterii Eucharistiæ.

I. *Eucharistia infinite superat, quidquid magnum habebatur in Lege.*

Ecce! tu præsens es hic apud me in altari, Deus meus, Sanctus Sanctorum, Creator hominum, & Dominus Angelorum. Est valde magna distantia inter arcam fœderis cum suis reliquiis, & mundissimum corpus tuum cum suis ineffabilibus virtutibus: inter legalia illa sacrificia, futurorum præfigurativa, & veram Corporis tui hostiam, omnium antiquorum sacrificiorum completivam. *Lib. 4. cap. 1. §. 5. & 9.*

II. *Nemo satis capit hoc mysterium, nihil habemus sanctius, nihil melius, nihil pretiosius.*

Non enim ad hæc capienda, & intelligenda aliquis idoneus per se reperitur, quæ Angelicam etiam subtilitatem transcendunt. *Lib. 4. cap. 4. §. 1.* Ipse enim est sanctificatio nostra, & redemptio: ipse consolatio viatorum & Sanctorum æterna fruitio. *Lib. 4. cap. 1. §. 12.* Nam quoties hoc mysterium recolis, & Christi Corpus accipis, toties tuæ redemptionis opus agis, & particeps omnium meritorum Christi efficeris. *Lib. 4. cap. 2. §. 6.*

Passus

Passus III.

Admiratio tanti Mysterii.

I. Admiratur anima summam, quæ in hoc mysterio elucet, Dei benignitatem,

O Invisibilis conditor mundi Deus! quam admirabiliter agis nobiscum! quam suaviter & gratiose cum Electis tuis disponis! quibus temetipsum in Sacramento sumendum proponis. Hoc namque omnem intellectum superat: hoc specialiter devotorum corda trahit, & accendit affectum. *Lib. 4. cap. 1. §. 10.* Tu Domine univerforum, qui nullius habes indigentiam, voluisti per Sacramentum tuum habitare in nobis. *Lib. 4. cap. 2. §. 5.*

II. Uti & potentiam.

O quam admirabilis operatio tua, Domine! quam potens virtus tua! quam ineffabilis veritas tua! dixisti enim, & facta sunt omnia: & hoc factum est, quod ipse iussisti. *Lib. 4. cap. 2. §. 4.*

III. Vere non est alia Natio, quæ tam pretiosum habeat thesaurum:

O quam suavis est, Domine, Spiritus tuus! qui, ut dulcedinem tuam in filios demonstrates, Pane suavissimo, de cœlo descendente, illos reficere dignaris. Vere non est alia Natio tam grandis, quæ habeat Deos appropinquantes sibi, sicut tu Deus noster ades universis fidelibus tuis, quibus ob quotidianum so-

la-



latium & cor erigendum in cœlum, te tribuis ad edendum & fruendum. Quæ est enim alia gens tam inclyta, sicut plebs Christiana? aut quæ creatura sub cœlo tam dilecta, ut anima devota, ad quam ingreditur Deus, ut pascat eam carne sua gloriosa? O ineffabilis gratia! admirabilis dignatio! O amor immensus homini singulariter impensus! *Lib. 4. cap. 13. §. 2. & 3.*

IV. Nam qui omnium habet Dominum, habet omnia,

O quam magnum suscipit Dominum, quam dilectum inducit hospitem, quam jucundum recipit socium, quam fidelem acceptat amicum, quam speciosum & nobilem amplectitur sponsum, præ omnibus dilectis, & super omnia desiderabilia amandum! fileant a facie tua (dulcissime Dilecte mi) cœlum & terra, & omnis ornatus eorum; quoniam quidquid laudis habent ac decoris, ex dignatione tuæ est largitatis, nec ad decorem tui pervenient nominis, cujus sapientiæ non est numerus. *Lib. 4. cap. 3. §. 4.*

Passus IV.

Suavitas & dulcedo cœlestis convivii.

I. Nil dulcius convivio cœlesti,

O Dulcissime Domine Jesu! quanta est dulcedo devotæ animæ tecum epulantis in convivio tuo! ubi ei non alius cibus manducandus propenitur, nisi tu unicus dilectus ejus, super omnia desideria cordis ejus desiderabilis. *Lib. 4.*

Lib. 4. cap. 11. §. 1. O quam magna multitudo dulcedinis tuæ, Domine, quam abscondisti timentibus te! Lib. 4. cap. 14. §. 1.

II. *In quo latet fons omnis suavitatis.*

O quam salutare & utile consilium tuum, cum istud instituisti! quam suave & jucundum convivium, cum Teipsum in cibum donasti! *Lib. 4. cap. 2. §. 4. Visita me in salutari tuo ad gustandum in spiritu suavitatem tuam, quæ in hoc Sacramento, tanquam in fonte, plenarie latet. Lib. 4. cap. 4. §. 1.*

Passus V.

Quantum robur ex mensa, in qua pascimur verbo & pane vitæ?

I. *Nil ita nos roborat, sicut verbum & panis vitæ:*

Habeo super hæc omnia sanctissimum corpus tuum pro singulari remedio & refugio. Duo namque mihi necessaria permaxime sentio in hac vita, sine quibus mihi importabilis foret ista miserabilis vita. In carcere corporis hujus detentus, duobus me egere fateor, cibo scilicet & lumine. Dedisti itaque mihi infirmo sacrum Corpus tuum ad refectionem mentis & corporis, & posuisti lucernam pedibus meis verbum tuum. Sine his duobus bene vivere non possem: nam verbum Dei, lux animæ: & Sacramentum tuum, panis vitæ. *Lib. 4. cap. 11. §. 3. & 4.*



II. *Hæc animæ vitam conferunt temporalem & æternam.*

Hæc possunt etiam dici mensæ duæ, hinc & inde in gazophylacio sanctæ Ecclesiæ positæ. Una mensa est sacri altaris, habens Panem sanctum, id est, corpus Christi pretiosum. Altera est Divinæ Legis, continens doctrinam sanctam, erudiens fidem rectam, & firmiter usque ad interiora velaminis, ubi sunt sancta sanctorum, perducens. *Ibidem.* Tu es enim suavis refectio animæ: & qui te digne manducaverit, particeps & hæres erit æternæ gloriæ. *Lib. 4. cap. 3. §. 2.*

Passus VI.

**Mensa cœlestis copiosorum bonorum
fons perpetuus.**

I. *Mensa cœlestis nos erigit & recreat,*

Multa namque bona largitus es, & adhuc sæpius largiris in Sacramento dilectis tuis devote communicantibus, Deus meus, susceptor animæ meæ, reparator infirmitatis humanæ, & totius dator consolationis internæ.

Solatur, & in melius mutat,

Nam multam ipsis consolationem adversus variam tribulationem infundis, & de imo dejectionis propriæ ad spem tuæ protectionis erigis, atque nova quadam gratia eos intus recreas, & illustras: ut, qui anxii primum, & sine affectione se ante Communionem senserant, postea refectioni cibo, potuque cœlesti, in melius se mutatos inveniant. *Lib. 4. cap. 4. §. 3.*

II. *Nos ferventes efficit & devotos,*

Quod idcirco cum electis tuis dispensanter agis, ut veraciter agnoscant, & patenter experiantur, quantum infirmitatis ex seipsis habeant, & quid bonitatis ac gratiæ ex te consequantur. Quia ex semetipsis frigidi, duri, & indevoti: ex te autem ferventes, alacres, & devoti esse merentur. *Ibid.*

III. *Et bonorum omnium fons est perpetuus.*

Quis enim ad fontem suavitatis humiliter accedens, non modicum suavitatis inde reportat? aut quis juxta copiosum ignem stans, non parum caloris inde percipit? Et tu fons es semper plenus, & superabundans, ignis jugiter ardens, & nunquam deficiens. *Ibidem.*

Passus VII.

Confessio negligentiae & teporis nostri.

I. *Si tanta aviditate curritur ad visitandas Sanctorum Reliquias,*

Currunt multi ad diversa loca pro visitandis Reliquiis Sanctorum, & mirantur, auditis gestis eorum, ampla ædificia templorum inspicunt, & osculantur fericis, & auro involuta sacra Ossa ipsorum. Sæpe in talibus videndis curiositas est hominum, & novitas invisorum, & modicus reportatur emendationis fructus: maxime ubi est tam levis sine vera contritione discursus. *Lib. 4. cap. 1. §. 9.*



II. *Quanta vi nos trahere debet Sacramentum Altaris?*

Hic autem in Sacramento altaris totus præsens es, Deus meus, homo Christus Jesus: ubi & copiosus percipitur æternæ salutis fructus, quotiescunque fueris digne & devote susceptus. Ad istud vero non trahit levitas aliqua, nec curiositas, aut sensualitas, sed firma fides, devota spes, & sincera charitas. *Ibidem.*

III. *Et tamen, quod dolendum, tepescimus,*

Dolendum tamen valde, & miserandum super tepiditate, & negligentia nostra, quod non majori affectione trahimur ad Christum sumendum, in quo tota spes salvandorum consistit & meritum.

Et tam salutare mysterium negligimus.

Dolendum valde, quod multi tam parum hoc salutare mysterium advertunt, quod cælum lætificat, & mundum conservat universum. Heu cæcitas! & duritia cordis humani! tam ineffabile donum non magis attendere, & ex quotidiano usu etiam ad inadvertentiam defluere. *Ibid.* §. 12.

Passus VIII.

Quanta esse deberet ad tantum hospitem suscipiendum præparatio?

I. *Si veteris testamenti Patres pro arca & tabulis*

Ecce! Noe vir justus in arcæ fabrica centum annis laboravit, ut cum paucis salvaretur: & ego quomodo me potero una hora præparare,
ut

ut mundi Fabricatorem cum reverentia sumam? Moyſes famulus tuus, magnus & ſpecialis amicus tuus, Arcam ex lignis imputribilibus fecit, quam & mundiffimo veſtivit auro, ut tabulas Legis in ea reponeret; & ego putrida creatura audebo te Conditorem legis, ac vitæ Datorem tam facile ſuſcipere? *Lib. 4. cap. 1. § 4.*

II. *Tam magnificum præpararunt locum.*

Salomon ſapientiffimus Regum Iſrael templum magnificum ſeptem annis in laudem nominis tui ædificavit, & octo diebus feſtum Dedicatio- nis ejus celebravit, mille hoſtias pacificas obtulit, & arcam fœderis in clangore buccinæ & jubi- lo in locum ſibi præparatum ſolenniter collocavit.

Quid nos agere oportet, ut omnium Conditorem ſuſpiciamus?

Et ego infelix & pauperrimus hominum quo- modo te in domum meam introducam, qui vix mediam expendere devote novi horam? & uti- nam vel ſemel digne fere mediam! O mi Deus! quantum illi ad placendum tibi agere ſtuduerunt! heu quam puſillum eſt, quod ago! *Ibid. § 4. & 5.*

III. *Utique omni conatu illi cor noſ- rum præparare debemus.*

Eſſi necdum totus cœleſtis, & tam ignitus, ut Cherubim & Seraphim eſſe poſſum: conabor ta- men devotioni inſiſtere, & cor meum præparare, ut vel modicam divini incendii flammam ex hu- mili ſumptione vivifici Sacramenti conquiram. *Lib. 4. cap. 4. §. 4.* Ideo nova ſemper mentis renovatione ad hoc diſponere te debes, & mag- num ſalutis Myſterium attenta conſideratione pen- ſare. *Lib. 4. cap. 2. §. 6.*

Paſſus



Passus IX.

Anima erubescit, & coram Deo se humiliat.

I. Erubescendum plane, quod tam frigidi simus,

Quando recordor Devotorum aliquorum, ad Sacramentum tuum, Domine, cum maxima devotione & affectu accedentium, tunc sæpius in me ipso confundor, & erubesco, quod ad Altare tuum, & sacræ Communionis mensam tam tepide & frigide accedo:

Dum alii tanto fervore & amore ad Sacramentum Altaris accedunt:

Quod ita aridus, sine affectione cordis maneo: quod non sum totaliter accensus coram te Deo meo: nec ita vehementer attractus & affectus, sicut multi devoti fuerunt, qui præ nimio desiderio Communionis & sensibili cordis amore a fletu se non potuerunt continere; sed ore cordis & corporis pariter ad te Deum fontem vivum medullitus inhiabant, suam esuriem non volentes aliter temperare nec fatiare, nisi Corpus tuum cum omni jucunditate & spirituali aviditate accepissent. *Lib. 4. cap. 14. §. 1.*

II. Dolendum, quod non melius nos disponamus.

Quid ergo peccator indignus, terra & cinis, de tam alto sacro secreto potero investigare & capere? *Lib. 4. cap. 4. §. 1.* Heu! quam pusillum est, quod ago! quam breve expleo tempus, cum me ad communicandum dispono! Raro totus collectus, rarissime ab omni distractione purgatus. *Lib. 4. cap. 1. §. 5.*

Passus



Passus X.

Petitio luminis & gratiæ ad præparationem.

I. *Petenda proin lux & gratia superna,*

Domine Deus meus, præveni servum tuum in benedictionibus dulcedinis tuæ, ut ad tuum magnificum Sacramentum digne ac devote merear accedere. Excita cor meum in te, & a gravi torpore exue me. *Lib. 4. cap. 4. §. 1.*

II. *Quæ nos miseros & indignos*

Cum tuam dignitatem Domine, & meam vilitatem penso, valde contremisco, & in me ipso confundor; si enim non accedo, vitam fugio; & si indigne me ingessero, offensam incurro. Quid ergo faciam, Deus meus, Auxiliator meus, & Consiliator in necessitatibus? *Lib. 4. cap. 6. §. 1.*

III. *Excitet & instruat ad dignam præparationem.*

Tu doce me viam rectam: propone breve aliquod exercitium, sacrae communioni congruum; utile est enim scire, qualiter scilicet devote ac reverenter tibi præparare debeam cor meum ad recipiendum salubriter tuum Sacramentum, seu etiam celebrandum tam magnum, & Divinum Sacrificium. *Ibid. §. 2.*



Passus XI.

Præparatio ad Communionem.

I. *Non obiter, sed assidue præparandum cor nostrum.*

Qui aliter se non præparat, nisi instante festo, vel consuetudine compellente, sæpius imparatus erit. *Lib. 4. cap. 10. §. 7.* Ego sum puritatis amator, & dator omnis sanctitatis. Ego corpus quæro, & ibi est locus requietionis meæ. Para mihi cœnaculum grande stratum, & faciam apud te Pascha cum discipulis meis. *L. 4. c. 12. §. 1.*

II. *Expurgandum vetus fermentum,*

Si vis, ut veniam ad te, & apud te maneam, expurga vetus fermentum & munda cordis tui habitaculum. Exclude totum sæculum, & omnem vitiorum tumultum:

Et quæ mundana sunt, excludenda.

Sede tanquam passer solitarius in tecto, & cogita excessus tuos in amaritudine animæ tuæ; omnis namque amans suo dilecto amatori optimum & pulcherrimum præparat locum, quia in hoc cognoscitur affectus suscipientis Dilectum.

Ibidem.

III. *Divinæ confidamus misericordiæ,*

Scito tamen, te non posse satisfacere huic præparationi ex merito tuæ actionis, etiamsi per integrum annum te præparares, & nihil aliud in mente haberes. Sed ex sola pietate & gratia mea permitteris ad mensam meam accedere, ac si mendicus ad prandium vocaretur divitis; & ille nihil aliud habeat ad retribuendum beneficiis ejus, nisi se humiliando, & ei regratiando.

Et



Et faciamus, quod in nobis est:

Fac, quod in te est, & diligenter facito: non ex consuetudine, non ex necessitate, sed cum timore & reverentia, & affectu, accipe corpus dilecti Domini Dei tui, dignantis ad te venire. *Ibidem.* §. 2.

IV. Dilectus noster, qui ad nos venire dignatur, supplebit reliqua.

Nec tu me sanctificare venis, sed ego te sanctificare & meliorare venio: Tu venis, ut ex me sanctificeris & mihi uniaris: ut novam gratiam recipias, & de novo ad emendationem accendaris. Noli negligere hanc gratiam, sed præpara cum omni diligentia cor tuum, & introduce ad te Dilectum tuum. Ego sum, qui vocavi, ego jussi fieri, ego supplebo, quod tibi deest: veni & suscipe me. *Ibidem.* §. 2. & 3.

Passus XII.

Puritas Conscientiæ.

I. Felix ille, qui mundam semper habet conscientiam,

Quam felix ille & Deo acceptus habetur, qui sic vivit, & in tali puritate conscientiam suam custodit, ut etiam omni die communicare paratus, & bene affectus esset, si ei liceret, & sine nota agere posset! *Lib. 4. cap. 10. §. 5.*

II. Uti oportet, ad suscipiendum Angelorum Dominum.

Et certe in tua salutari Deitatis præsentia, nulla deberet occurrere indecens cogitatio, nulla



etiam occupare creatura, quia non Angelum, sed Angelorum Dominum suscepturus sum hospitio. *Lib. 4. cap. 1. §. 5.*

III. *Hanc gratiam instanter petamus.*

Conserua, Domine, cor meum & corpus immaculatum, ut læta & pura conscientia sæpius tua valeam celebrare mysteria, & ad meam perpetuam accipere salutem, quæ ad tuum præcipue honorem, & memoriale perenne sanxisti & instituisti. *Lib. 4. cap. 2. §. 5.*

Passus XIII.

Fides viva.

I. *Petendum fidei lumen,*

Illumina, Domine, oculos meos ad intuendum tantum mysterium, & ad credendum illud indubitata fide me roborare; est enim operatio tua, non humana potentia; tua sacra institutio, non hominis adinventio. *Lib. 4. cap. 4. §. 1.*

II. *Ut, quæ de hoc sunt mysterio, firmiter credamus:*

Mira res & fide digna, ac humanum vincens intellectum, quod tu, Domine Deus meus, verus Deus & homo, sub modica specie panis & vini integer containeris, & sine consumptione a sumente manducaris. *Lib. 4. cap. 2. §. 5.* Plus ergo credere debes Deo omnipotenti in hoc excellentissimo Sacramento, quam proprio sensui, aut alicui signo visibili. *Lib. 4. cap. 5. §. 2.*

III.

III. *Tum eliciendi actus vivæ fidei.*

Domine, in simplicitate cordis mei, in bona firma fide, & in tua jussione ad te cum spe ac reverentia accedo, & vere credo, quia tu præsens es hic in Sacramento, Deus & homo. *Lib. 4. cap. 4. §. 2.* Habeo enim te in Sacramento vere præsentem, quamvis aliena specie occultatum. *Lib. 4. cap. 11. §. 1.*

Passus XIV.

Ardens desiderium.

I. *Ex eo quod hoc mysterium non in uno tantum loco celebretur,*

Si hoc sanctissimum Sacramentum in uno tantum celebraretur loco, & ab uno tantum consecraretur Sacerdote in mundo: quanto putas desiderio ad illum locum, & ad talem Dei Sacerdotem homines afficerentur, ut Divina Mysteria celebrari viderent? *Lib. 4. cap. 1. §. 13.*

II. *Sed in pluribus; augeri potius, quam minui debet desiderium nostrum.*

Nunc autem multi facti sunt Sacerdotes, & in multis locis offertur Christus, ut tanto major appareat gratia & dilectio Dei ad hominem, quanto latius est sacra Communio diffusa per orbem. *Ibidem.* Quare igitur non magis ad tuam venerabilem inardesco præsentiam? *Ibid. §. 7.*

III. *Igitur vehementi inarDESCAMUS desiderio ad illius præsentiam,*

Cum summa devotione & ardenti amore, cum toto cordis affectu & fervore desidero te, Domine,



ne, suscipere, quemadmodum multi Sancti, & devotæ Personæ in communicando te desideraverunt, qui tibi maxime in sanctitate vitæ placuerunt, & in ardentissima devotione fuerunt. O Deus meus, Amor æternus, totum bonum meum, felicitas interminabilis, cupio te suscipere cum vehementissimo desiderio, & dignissima reverentia, quam aliquis Sanctorum unquam habuit, & sentire potuit! & licet indignus sum, omnia illa sentimenta devotionis habere, tamen offero tibi totum cordis mei affectum, ac si omnia illa gratissima inflammata desideria solus haberem. *Lib. 4. cap. 17. §. 1. & 2.*

IV. *Et sitim nostram in hoc cœlesti fonte refocillemus.*

Unde si mihi non licet haurire de plenitudine fontis, nec usque ad satietatem potare, apponam tamen os meum ad foramen cœlestis fistulæ, ut saltem modicam inde guttulam capiam ad refocillandam sitim meam, & non penitus exarescam. *Lib. 4. cap. 4. §. 4.*

Passus XV.

Fervida Devotio.

I. *Anima exemplo Sanctorum se ad devotionem excitat:*

Cur non majori me præparo sollicitudine ad tua sancta sumenda? quando illi antiqui sancti Patriarchæ & Prophetæ, Reges quoque & Principes cum universo populo tantum devotionis demonstrarunt affectum erga cultum Divinum? *Lib. 4. cap. 1. §. 7.*

II. *Cupit cum Magdalena præ devotione lacrymas fundere,*

Et mihi quidem dulce foret in præsentia tua ex intimo affectu lacrymas fundere, & cum pia Magdalena pedes tuos lacrymis irrigare. Sed ubi est hæc devotio? ubi lacrymarum sanctarum copiosa effusio? Certe in conspectu tuo & sanctorum Angelorum tuorum totum cor meum arde-
re deberet, & ex gaudio flere. *Lib. 4. cap. 11. §. 1.*

III. *Hinc devotionis gratiam veris fidelibus concessam suppliciter postulat.*

Præsta, Domine Deus, salutaris meus, ut cum frequentatione Mysterii tui crescat meæ devotionis affectus. *Lib. 4. cap. 4. §. 5.* Ipsi enim veri fideles tui, qui totam vitam suam ad emendationem disponunt, ex hoc dignissimo Sacramento magnam devotionis gratiam & virtutis amorem frequenter recipiunt. *Lib. 4. cap. 1. §. 10.*

Passus XVI.

Reverentia & Adoratio.

I. *Oportet magna cum reverentia accedere,*

Si tanta agebatur devotio, ac divinæ laudis extitit recordatio coram Arca Testamenti, quanta nunc mihi, & omni populo Christiano habenda est reverentia, & devotio in præsentia Sacramenti, in sumptione excellentissimi Corporis Christi? *Lib. 4. cap. 1. §. 8.* Ideoque cum timore & reverentia ad hoc opus est accedendum. *Lib. 4. cap. 5. §. 2.*



II. *Et latentem in Eucharistia Deum adorare.*

Habeo vere & adoro, quem Angeli adorant in cœlo; sed ego adhuc interim in fide, illi autem in specie, & sine velamine. Nam in propria, & divina claritate te conspiciere, oculi mei ferre non possent: sed neque totus mundus in fulgore gloriæ Majestatis tuæ subsisteret. In hoc ergo imbecillitati meæ consulis, quod te sub Sacramento abscondis. *Lib. 4. cap. 11. §. 2.*

Passus XVII.

Accessus ad Divinum Sacramentum Spe & Charitate plenus.

I. *Anima in accessu ad Communionem, ea animi sensa cupit habere, quæ Beatissima Virgo Maria,*

Domine Deus meus, Creator meus, & Redemptor meus, cum tali affectu, reverentia, laude & honore, cum tali gratitudine, dignitate & amore, cum tali fide, spe & puritate, te affecto hodie suscipere, sicut te suscepit & desideravit, sanctissima Mater tua, gloriosa Virgo Maria, quando Angelo, evangelizanti Incarnationis Mysterium, humiliter ac devote respondit: *Ecce Ancilla Domini, fiat mihi secundum verbum tuum. Lib. 4. cap. 17. §. 2.*

II. *Et B. Præcursor Joannes in præsentia Verbi incarnati olim habuere:*

Et sicut Beatus Præcursor tuus, Excellentissimus Sanctorum Joannes Baptista, in præsentia
tua

tua lætabundus exultavit in gaudio Spiritus sancti, dum adhuc maternis clauderetur visceribus: & postmodum cernens inter homines Jesum ambulantiem, valde se humilians, devoto cum affectu dicebat: *Amicus autem Sponsi, qui stat, & audit eum, gaudio gaudet propter vocem Sponsi*: sic & ego magnis & sacris desideriis opto inflammari, & tibi ex toto corde me ipsum præsentare. *Ibidem* §. 3.

III. *Desiderat præ amore liquefcere,*

Vis ergo, ut te suscipiam, & meipsum tibi in charitate uniam? unde tuam precor Clementiam, & specialem ad hoc imploro mihi donari gratiam, ut totus in te liquefiam, & amore pereffluam, atque de nulla aliena consolatione amplius me intromittam. *Lib. 4. cap. 4. §. 2.*

IV. *Et Dilecto suo plene uniri.*

Ecce! ego ad te venio Domine, ut bene mihi sit ex munere tuo, ut lætificer in convivio sancto tuo, quod parasti in dulcedine tua pauperi Deus. *Lætifica ergo hodie animam servi tui, quoniam ad te.* Domine Jesu, *animam meam levavi.* Desidero te nunc devote ac reverenter suscipere: cupio te in domum meam inducere, quatenus cum Zachæo merear a te benedici, ac inter filios Abrahamæ computari. Anima mea corpus tuum concupiscit, cor meum tecum uniri desiderat. Trade te mihi, & sufficit; nam præter te nulla consolatio valet. Sine te esse nequeo, & sine visitatione tua vivere non valeo. *Lib. 4. cap. 3. §. 1. & 2.*

Passus



Passus XVIII.

Gratiarum Actio.

I. *Anima pro tanto beneficio gratias dicit, quas potest maximas,*

Lætare anima mea, & gratias age Deo pro tam nobili munere & solatio singulari, in hac lacrymarum valle tibi relicto. *Lib. 4. cap. 2. §. 6.* Gratias tibi Creator ac Redemptor hominum, qui ad declarandam toti mundo charitatem tuam, Cœnam parasti magnam, in qua non Agnum typicum, sed tuum sanctissimum Corpus & Sanguinem proposuisti manducandum: lætificans omnes fideles convivio sacro, & calice inebrians salutari, in quo sunt omnes deliciae paradisi, & epulantur nobiscum Angeli sancti, sed suavitatem feliciorem. *Lib. 4. cap. 11. §. 5.*

II. *Et vicissim cor suum offert, & acceptari suppliciter petit.*

Sed quid retribuam Domino pro gratia ista, pro charitate tam eximia? Non est aliud, quod gratus donare queam, quam ut cor meum Deo meo totaliter tribuam, & intime jungam. *Lib. 4. cap. 13. §. 3.* Suscipe me in laudem & gloriam Nominis tui, qui Corpus tuum, & Sanguinem in cibum & potum mihi parasti. *Lib. 4. cap. 4. §. 5.*

Passus XIX.

Laus & Jubilatio.

I. *Si tanta fuit laus & lætitia coram Arca Dei,*

Saltavit devotissimus Rex David coram Arca Dei totis viribus, recolens beneficia olim indulta Patribus: fecit diversi generis organa, psalmos edidit, & cantari instituit cum lætitia, cecinit & ipse frequenter in cithara, Spiritus Sancti afflatus gratia: docuit populum Israel toto corde Deum laudare, & ore consona diebus singulis benedicere & prædicare. *Lib. 4. cap. 1. §. 8.*

II. *Quantæ laudes debentur ipsi Deo Eucharistico?*

Tu es panis vivus, qui de cælo descendisti, & das vitam mundo. Ecce! unde dilectio procedit, qualis dignatio illucescit! quam magnæ gratiarum actiones & laudes tibi pro his debentur! *Lib. 4. cap. 2. §. 3. & 4.*

III. *Has cum summa jubilatione agamus omnes.*

Laudent te universi populi tribus & linguæ, & sanctum ac mellifluum Nomen tuum, cum summa jubilatione, & ardenti devotione magnificent. *Lib. 4. cap. 17. §. 5.*



Passus XX.

Petitio fructus spiritualis ex Communione.

I. *Anima recedens a mensa cœlesti fructum spirituales ardentem petit.*

Ne patiaris me jejunum, & aridum a te recedere, sed operare mecum misericorditer, sicut sæpius operatus es cum Sanctis tuis mirabiliter. *Lib. 4. cap. 16. §. 3.* O vera ardens fides eorum, probabile existens argumentum sacræ præsentiae tuæ! isti enim veraciter cognoscunt Dominum suum in fractione panis, quorum cor tam valide ardet in eis, de Jesu ambulante cum eis. Longe est a me sæpe talis affectus & devotio, tam vehemens amor & ardor. *Lib. 4. cap. 14. §. 2.*

II. *Cupit crescere in fide, spe, & amore Dilecti,*

Esto mihi propitius, Jesu bone, dulcis & benigne: & concede pauperi mendico tuo, vel interdum modicum de cordiali affectu amoris tui in sacra Communione sentire, ut fides mea magis convalescat: spes in bonitate tua proficiat: & charitas semel perfecte accensa, & cœleste manna experta nunquam deficiat. *Ibid.*

III. *Ac fervoris Devotorum omnium particeps fieri.*

Etenim licet tanto desiderio tam specialium Devotorum tuorum non ardeo, tamen de gratia tua illius magni inflammati desiderii desiderium

rium habeo , orans & desiderans omnium talium fervidorum Amatorum tuorum participem me fieri , ac eorum sancto consortio annumerari. *Ibid.* §. 3.

Passus XXI.

Custodia sui post Communionem.

- I. *Uti præparatio ante , sic custodia sui post Communionem est necessaria :*

Oportet autem , ut non solum te præpares ad devotionem ante Communionem , sed ut etiam te solícite conserves in ea post Sacramenti perceptionem. Nec minor custodia post exigitur , quam devota præparatio prius. *Lib. 4. cap. 12. §. 4*

- II. *Nam talis custodia nova est ad majorem gratiam præparatio.*

Nam bona postmodum custodia , optima iterum est præparatio ad majorem gratiam consequendam. Ex eo quippe valde indispositus quis redditur , si statim fuerit nimis effusus ad exteriora solatia. Mane in secreto , & frui Deo tuo. *Ibidem.*

Passus XXII.

Frequens sumptio Eucharistiæ.

- I. *Torpens animus se ad frequentem Communionem debet excitare ,*

Heu ! quam modicam charitatem , & debilem devotionem habent , qui sacram Communionem tam facilliter postponunt ! Si quis inter-



terdum abstinet humilitatis gratia, aut legitima impediēte causa, laudandus est de reverentia. Si autem torpor obrepserit, seipsum excitare debet & facere, quod in se est; & Dominus aderit desiderio suo pro bona voluntate, quam specialiter respicit. *Lib. 4. cap. 10. §. 5.*

II. *Certis diebus actu communicare,*

Et tamen certis diebus & statuto tempore Corpus sui Redemptoris cum affectuosa reverentia sacramentaliter debet suscipere, & magis laudem Dei, & honorem prætere, quam suam consolationem quærere. *Ibid. §. 6.*

III. *Et quidem frequenter, ne deficiat in via,*

Ideoquē oportet me frequenter ad te accedere, & in remedium salutis meæ recipere, ne forte deficiam in via, si fuero cœlesti fraudatus alimonia. Sic enim tu, misericordissime Jesu, prædicans populis, & varios curans languores, aliquando dixisti: *Nolo eos jejunos dimittere in domum suam, ne deficiant in via.* Age igitur hoc mecum modo, qui te pro fidelium consolatione in Sacramento reliquisti. *Lib. 4. cap. 3. §. 2.*

IV. *Adeoquē operam dare, ut cum fructu sæpius id faciat.*

Et licet omni die non sum aptus, nec ad celebrandum bene dispositus: dabo tamen operam, congruis temporibus divina percipere mysteria, ac tantæ gratiæ participem me præbere. Nam hæc est una principalis fidelis animæ



mæ consolatio, quamdiu peregrinatur a te in mortali corpore, ut læpius memor Dei sui, Dilectum suum devota suscipiat mente. *Ibid.* §. 3.

Passus XXII.

Communio Spiritualis.

I. *Quærendus ex toto corde in Eucharistia Deus;*

Benedicetur homo, qui quærit Deum in toto corde suo. Hic in accipiendo sacram Eucharistiam magnam promeretur divinæ unionis gratiam, quia non respicit ad propriam devotionem & consolationem, sed super omnem devotionem & consolationem ad Dei gloriam & honorem. *Lib. 4. cap. 15. §. 4.*

II. *Id possumus quotidie per communionem spirituales summo cum fructu nostro facere.*

Cum vero legitime præpeditus est, habebit semper bonam voluntatem, & piam intentionem communicandi, & sic non carebit fructu Sacramenti. Potest enim quilibet devotus omni die & omni hora ad spirituales Christi communionem salubriter & sine prohibitionem accedere. Nam toties mystice communicat & invisibiliter reficitur, quoties Incarnationis Christi Mystrium, Passionemque devote recolit, & in amore ejus accenditur. *Lib. 4. cap. 10. §. 6.*



Passus XXIV.

De Excellentia Sacrificii Missæ, & Dignitate Sacerdotali.

I. *Quantæ efficacix sit Sacrificium Missæ.*

Quando Sacerdos celebrat, Deum honorat: Angelos lætificat: Ecclesiam ædificat: vivos adjuvat: defunctis requiem præstat, & sese omnium bonorum participem efficit. *Lib. 4. cap. 5. §. 3.*

II. *Quanta Sacerdotum dignitas.*


Grande mysterium & magna dignitas Sacerdotum, quibus datum est, quod Angelis non est concessum. Soli namque Sacerdotes, rite in Ecclesia ordinati, potestatem habent celebrandi, & Corpus Christi consecrandi. *Ibid. §. 1.*

III. *Quantum ministerium.*

Sacerdos quidem minister est Dei, utens verbo Dei, per jussionem & institutionem Dei: Deus autem ibi principalis est Auctor & invisibilis Operator, cui subest omne, quod voluerit, & paret omne, quod jusserit. *Ibidem.*

IV. *Et quam honorabile officium.*

O quam magnum & honorabile est officium Sacerdotum, quibus datum est Dominum Majestatis verbis sacris consecrare, labiis benedicere, manibus tenere, ore proprio sumere, & cæteris ministrare! *Lib. 4. cap. 11. §. 6.*



Passus XXV.

Obligatio Sacerdotis.

I. *Sacerdotem oportet irreprehensibilem esse,*

Attende tibi & vide, cujus ministerium tibi traditum est per impositionem manus Episcopi. Ecce! Sacerdos factus es, & ad celebrandum consecratus; vide nunc, ut fideliter & devote in suo tempore Deo Sacrificium offeras, & te ipsum irreprehensibilem exhibeas. Non alleviasti onus tuum, sed arctiori jam obligatus es vinculo disciplinæ, & ad majorem teneris perfectionem Sanctitatis. *Lib. 4. cap. 5. §. 2.*

II. *Et omnibus virtutibus ornatum.*

Sacerdos omnibus virtutibus debet esse ornat, & aliis bonæ vitæ exemplum præbere. Ejus conversatio non cum popularibus & communibus hominum viis, sed cum Angelis in cœlo, aut cum perfectis viris in terra. *Ibidem.*

III. *Crux in sacris vestibus*

Sacerdos sacris vestibus indutus, Christi vices gerit, ut Deum pro se, & pro omni populo suppliciter & humiliter roget. Habet ante se, & retro Dominicæ crucis signum, ad memorandam jugiter Christi Passionem.

Varias, quas habet,

Ante se crucem in casula portat, ut Christi vestigia diligenter inspiciat, & sequi ferventer studeat. *Ibid.*



IV. *Obligationes designat.*

Post se cruce signatus est, ut adversa qualibet ab aliis illata, clementer pro Deo toleret. Ante se crucem gerit, ut propria peccata lugeat: post se, ut aliorum etiam commissa per compassionem defleat, & se medium inter Deum & peccatorem constitutum esse sciat: nec ab oratione & oblatione sancta torpescat, donec gratiam & misericordiam impetrare mereatur. *Ibid.*

Passus XXVI.

**Præparatio ad Sacrum, & celebrandi
modus.**

I. *Præparatio ad sacrum imprimis est necessaria:*

Super omnia cum summa humilitate cordis & supplici reverentia, cum plena fide, & pia intentione honoris Dei, ad hoc Sacramentum celebrandum, tractandum & sumendum, oportet Dei accedere Sacerdotem, ita ut nil habeat, quod liberum accessum impediat. *Lib. 4. cap. 7. §. 1.*

II. *Deinde immolatio sui in ara cordis.*

Deinde cum plena resignatione, & integra voluntate, offer te ipsum in honorem nominis mei, in ara cordis tui holocaustum perpetuum: corpus tuum scilicet, & animam mihi fideliter commit-
tendo. Quatenus & sic digne merearis ad offerendum Deo Sacrificium accedere, & Sacramentum Corporis mei salubriter suscipere. *Ibid. §. 3.*

III. *In celebrando non proprio tantum, sed aliorum etiam commodo studendum.*

Non sis in celebrando nimis prolixus aut festinus, sed serva bonum communem modum, cum
qui-



quibus vivis. Non debes aliis generare molestiam & tedium, sed communem servare viam, secundum Majorum institutionem: & potius aliorum servire utilitati, quam propriae devotioni vel affectui. *Lib. 4. cap. 10. §. 7.*

Passus XXVII.

Puritas in Sacerdote requisita.

I. *Quanta debeat esse puritas Sacerdotis?*

Si haberes Angelicam puritatem, & sancti Joannis Baptistæ sanctitatem, non esses dignus hoc Sacramentum accipere, nec tractare: non enim hoc meritis debetur hominum, quod homo consecret, & tractet Christi Sacramentum, & sumat in cibum Panem Angelorum. *Lib. 4. cap. 5. §. 1.*

II. *Quam munda,*

O! quam munda debent esse manus illæ, quam purum os, quam sanctum corpus, quam immaculatum cor erit Sacerdotis, ad quem toties ingreditur Auctor puritatis! Ex ore Sacerdotis nihil nisi sanctum, nihil nisi honestum & utile procedere debet verbum, qui tam sæpe Christi accipit Sacramentum. *Lib. 4. cap. 11. §. 6.*

III. *Quam sancta omnia?*

Oculi ejus simplices & pudici, qui Christi Corpus solent intueri. Manus præ & in cælum elevatae, quæ Creatorem cœli & terræ solent contrectare. Sacerdotibus specialiter in Lege dicitur: *Sancti estote, quoniam ego sanctus sum Dominus Deus vester. Ibidem §. 7.*



Passus XXVIII.

Oratio Sacerdotis ad Deum.

I. *Sacerdos implorat Divinae gratiae auxilium :*

Adjuvet nos gratia tua, Omnipotens Deus, ut, qui officium Sacerdotale suscepimus, digne ac devote tibi in omni puritate, & conscientia bona famulari valeamus. Et si non possumus in tanta innocentia vitae conversari, ut debemus: concede nobis tamen, digne flere mala, quæ gessimus, & in spiritu humilitatis ac bonæ voluntatis proposito tibi ferventius de cætero deservire. *L. 4. c. 11. §. 8.*

II. *Petit, ut abstrahatur a terrenis, & inhæreat cœlestibus.*

Hoc oro, hoc desidero, ut tibi totus uniar, & cor meum ab omnibus creatis rebus abstraham: magisque per sacram communionem, ac frequentem celebrationem cœlestia & æterna sapere discam. *Lib. 4. cap. 13. §. 1.*

Passus XXIX.

Uti Christus se Deo Patri obtulit, ita & nos offerte Ipsi debemus.

I. *Christus exigit a nobis oblationem puram :*

Beatus, qui se Domino in holocaustum offert, quoties celebrat, aut communicat. *Lib. 4. cap. 10. §. 7.* Sicut ego meipsum expansis in cruce manibus, & nudo corpore pro peccatis tuis Deo Patri sponte obtuli, ita ut nihil in me remaneret, quin totum in Sacrificium divinae placationis transfiret:



siret: ita debes & tu temetipsum mihi voluntarie in oblationem puram & sanctam, quotidie in Missa, cum omnibus viribus & affectibus tuis, quanto intimius vales offerre. *Lib. 4. cap. 8. §. 1.*

II. *Ita quidem, ut petat totum pro toto.*

Ecce! Ego me totum obtuli Patri pro te: dedi etiam totum corpus meum, & sanguinem in cibum, ut totus tuus essem, & tu meus permaneres. Sicut non sufficeret tibi, omnibus habitis præter me: ita nec mihi placere poterit, quidquid dederis, te non oblato. Offer te mihi, & da te totum pro Deo, & erit accepta oblatio. *Ibid. §. 2.*

Passus XXX.

Oblatio Sui.

I. *Anima Deo suo se offert in perpetuum,*

Domine, omnia tua sunt, quæ in cælo sunt, & quæ in terra. Desidero meipsum tibi in spontaneam oblationem offerre, & tuus perpetuo permanere. Domine in simplicitate cordis mei offero meipsum tibi hodie in servum sempiternum, in obsequium & in Sacrificium laudis perpetuæ. *Lib. 4. Cap. 9, §. 1.*

II. *Rogat, ut suscipiatur,*

Suscipe me, cum hac sancta oblatione tui pretiosi Corporis, quam tibi hodie in præsentia Angelorum, invisibiliter assistentium, offero, ut sit pro me, & pro cuncto populo tuo in salutem. *Ibidem.*

III. *Et secum sua offert omnia.*

Nihil opto mihi reservare, sed me & omnia mea tibi sponte & libentissime immolare. Sed & quæ-



quæcunque potest pia mens concipere, & desiderare, hæc omnia tibi cum summa veneratione, & intimo favore præbeo & offero. *Lib. 4. cap. 17. §. 2.*

Passus XXXI.

Oblatio aliorum omnium.

I. *Homo viator specialiter offert sua opera.*

Offero etiam tibi omnia bona mea, quamvis valde pauca & imperfecta, & tu ea emendes & sanctifices; ut ea grata habeas, & accepta tibi facias, & semper ad meliora trahas: nec non ad beatum ac laudabilem finem me pigrum & inutilem homuncionem perducas. *Lib. 4. cap. 9. §. 4.*

II. *Offert quoque necessitates parentum, amicorum &c.*

Offero quoque tibi omnia pia desideria Devotorum, necessitates parentum, amicorum, fratrum, sororum, omniumque charorum meorum, & eorum, qui mihi vel aliis propter amorem tuum benefecerunt: & qui orationes & Missas pro se suisque omnibus dici a me desideraverunt, & petierunt, sive in carne adhuc vivant, sive jam sæculo defuncti sint, ut omnes sibi auxilium gratiæ tuæ, opem consolationis, protectionem a periculis, liberationem a pænis advenire sentiant, & ut ab omnibus malis erepti gratias tibi magnificas læti persolvant. *Ibid. §. 5.*

III. *Offert denique omnes omnium actus virtutum.*

Unde & omnium devotorum Cordium jubilationes, ardentes affectus, mentales excessus, ac supernaturales illuminationes, & cœlicas visiones

nes tibi offero, & exhibeo, cum omnibus virtutibus & laudibus, ab omni creatura in cœlo & in terra celebratis, & celebrandis: pro me, & omnibus mihi in oratione commendatis; quatenus ab omnibus digne lauderis, & in perpetuum glorificeris. *Lib. 4. cap. 17. §. 3.*

SEMITA II. O

Quomodo tendere debeamus ad unionem cum Deo in Cœlis.

Passus XXXII.

Cor præparandum Sponso Divino.

I. Parandus in corde Sponso Divino locus:

Eja anima fidelis, præpara huic Sponso cor tuum: quatenus ad te venire, & in te habitare dignetur. Sic enim dicit: Si quis diligit me, sermonem meum servabit, & ad eum veniemus, & mansionem apud eum faciemus. Da ergo Christo locum, & cæteris omnibus nega introitum. *Lib. 2. cap. 1. §. 2.*

II. Id potest internus homo facere omni loco & tempore,

Qui ab intra scit ambulare, & modicum ab extra res ponderare, non requirit loca, nec expectat tempora ad habenda devota exercitia. Homo internus cito se recolligit; quia nunquam se totum ad exteriora effundit. Non illi obest labor exterior aut occupatio ad tempus necessaria; sed sicut res eveniunt, sic se illis accomodat. Qui intus bene



bene dispositus est, & ordinatus, non curat mirabiles & perversos hominum gestus. *Ibidem §. 7.*

III. *Et in tali sibi complacet Sponsus.*

Omnis gloria ejus & decor ab intra est, & ibi complacet sibi. Frequens illi visitatio cum homine interno, dulcis fermocinatio, grata consolatio, multa pax, familiaritas stupenda nimis. *Ibid. §. 1.*

Passus XXXIII.

Removenda obstacula.

I. *Oportet cor esse ab omni impedimento liberum,*

Esto purus & liber ab intus sine alicujus creaturæ implicamento. Oportet te esse nudum & purum cor ad Deum gerere, si vis vacare & videre, quam suavis sit Dominus. Et revera ad hoc non pervenies, nisi gratia ejus fueris præventus, & attractus, ut omnibus evacuatis & licentiatis, solus cum solo uniaris. *Lib. 2. cap. 8. §. 5.*

II. *Elevatum ad Deum,*

Ad hoc magna requiritur gratia, quæ animam levet, & supra semetipsam rapiat. Et nisi homo sit in spiritu elevatus, & ab omnibus creaturis liberatus, ac Deo totus unitus; quidquid scit, quidquid etiam habet, non est magni ponderis. *Lib. 3. cap. 31. §. 2.*

III. *Et a creaturis vacuum, ut Dilectus in eo habitet.*

Si scires te ab omni creatura evacuare, Jesus deberet libenter tecum habitare. Dilectus tuus talis est naturæ, ut alienum non velit admittere: sed solus vult cor tuum habere, & tanquam Rex in proprio throno sedere. *Lib. 2. cap. 7. §. 2.*

Passus



Passus XXXIV.

Præ omnibus quærendus est Jesus, & sollicitè retinendus.

I. In Jesu omne bonum.

Qui invenit Jesum, invenit thesaurum bonum, imo bonum super omne bonum. Pauperri-
mus est, qui vivit sine Jesu: & ditissimus, qui be-
ne est cum Jesu. Quam aridus & durus es sine
Jesu! quam insipiens & vanus, si cupis aliquid
extra Jesum! Nonne hoc est majus damnum, quam
si totum perderes mundum? Quid potest tibi mun-
dus conferre sine Jesu? *Lib. 2. cap. 8. §. 1. & 2.*

II. Hinc in omnibus quærendus est Jesús,

Si quæris in omnibus Jesum, invenies utique
Jesum: si autem quæris teipsum, invenies etiam
teipsum, sed ad tuam perniciem. Plus enim ho-
mo nocivior sibi, si Jesum non quærit, quam to-
tus mundus, & omnes sui adversarii. *Lib. 2. cap. 7.
§. 3.* Si fuerit tecum Jesus, nullus poterit nocere
inimicus. *Lib. 2. cap. 8. §. 2.*

III. Et sollicitè retinendus.

Scire Jesum tenere, magna prudentia est. Esto
humilis & pacificus, & erit tecum Jesus. Sis de-
votus & quietus, & manebit tecum Jesus. Potes
cito fugare Jesum: & si illum effugaveris & perdi-
deris; ad quem fugies, & quem tunc quæres Ami-
cum? *Ibid. §. 3.*



Passus XXXV.

De Conversatione interna cum Dilecto.

I. *Vox Jesu dulcis est,*

Quando Jesus adest, totum bonum est, nec quidquam difficile videtur: quando vero Jesus non adest, totum durum est. Quando Jesus intus non loquitur, consolatio vilis est: si autem Jesus unum tantum verbum loquitur, magna consolatio sentitur. *Lib. 2. cap. 8. §. 1.*

II. *Et conversatio ejus jucunda.*

Nonne Maria Magdalena statim surrexit de loco, in quo flevit, quando Martha illi dixit: *Magister adest, & vocat te.* Felix hora, quando Jesus vocat de lacrymis ad gaudium Spiritus! Esse sine Jesu gravis est infernus: & esse cum Jesu dulcis paradisos. *Ibid. §. 1. & 2.*

III. *Ut hac fruamur, cor illi nostrum, purum ac integrum offeramus.*

Magna ars est, scire cum Jesu conversari. *Ibid. §. 3.* Vere tu es Deus absconditus, & consilium tuum non est cum impiis, sed cum humilibus & simplicibus sermo tuus. *Lib. 4. cap. 13. §. 2.* Ambulare cum Deo intus, nec aliqua affectione teneri foris, status est interni hominis. *Lib. 2. cap. 6. §. 4.* Nulla bona actio te impediet, si liber intus ab inordinato affectu fueris. Si nihil aliud, quam Dei beneplacitum & proximi utilitatem intendis, & quæris, interna libertate perfrueris. *Lib. 2. cap. 4. §. 1.* Fili, quantum a te vales exire, tantum in me poteris transire. Sicut nihil foris concupiscere, internam pacem facit; sic se interius relinquere, Deo conjungit. *Lib. 3. cap. 56. §. 1.*

Passus

Passus XXXVI.

Contemplatio Beneficiorum Dei.

I. *Bonorum omnium fons Deus est, Sicut dilexit me Pater, & ego vos diligo. Dixi dilectis Discipulis meis. Lib. 3. cap. 30. §. 6. Ex me pusillus & magnus, pauper & dives, tanquam ex fonte vivo aquam vivam hauriunt. Lib. 3. Cap. 9. §. 2.*

II. *Qui dat singulis, quod expedit, & omnibus affluenter.*

Tu scis, quid unicuique donari expediat: & cur iste minus, & ille amplius habeat, non nostrum, sed tuum est hoc discernere, apud quem singulorum definita sunt merita. Qui autem pauciora accepit, contristari non debet, nec indignanter ferre, neque ditiori invidere: sed te potius attendere, & tuam bonitatem maxime laudare, quod tam affluenter, tam gratis & libenter, sine Personarum acceptione, tua munera largiris. *Lib. 3. cap. 22. §. 3.*

III. *Ac præterea nos ab innumeris custodit & eripit malis.*

Et mirum valde, quod sic repente sublevor, & tam benigne a te complector, qui proprio pondere semper ad ima feror. Facit hoc amor tuus, gratis præveniens me, & in tam multis subveniens necessitatibus, a gravibus quoque custodiens me periculis, & ab innumeris (ut vere dicam) eripiens malis. Me siquidem male amando, me perdidi: & te solum quærendo, & pure amando, me & te pariter inveni, atque ex amore profundius ad nihilum me redegi. *Lib. 3. cap. 8. §. 1. & 2.*



Passus XXXVII.

Gratitudo erga Deum.

I. *Deus petit debitas gratiarum actiones.*

Ego totum dedi, ego totum a te habere volo, & cum magna districtione, gratiarum actiones requiro. *Lib. 3. cap. 9. §. 2.* Cum gratiam devotionis tribuo, gratias age Deo tuo: non quia dignus es, sed quia tui misertus sum. *Lib. 4. cap. 12. §. 3.*

II. *Ad has se obstrictissimam agnoscit anima,*

Ecce! omnia tua sunt, quæ habeo, & unde tibi fervio. Verumtamen vice versa tu magis mihi servis, quam ego tibi. *Lib. 3. cap. 10. §. 3.* Benedictus sis Deus meus, quia licet ego omnibus bonis sim indignus, tua tamen Nobilitas, & infinita Bonitas nunquam cessat benefacere etiam ingratissimis, & longe a te aversis. Convertite nos ad te, ut simus grati, humiles & devoti. *Lib. 3. cap. 8. §. 3.*

III. *Et quas potest, reddit maximas.*

Benedico te Pater cœlestis, Pater Domini mei Jesu Christi, quia mei pauperis dignatus es recordari. O Pater misericordiarum, & Deus totius consolationis! gratias tibi, qui me indignum omni consolatione, quandoque tua recreas consolatione. *Lib. 3. cap. 5. §. 1.* Gratias tibi, unde totum venit, quotiescunque mihi bene succedit. *Lib. 3. cap. 40. §. 4.*



Passus XXXVIII.

Laus Dei.

I. *Deus laudandus, & benedicendus est in omnibus:*

Hoc optandum est tibi, ut sive per vitam, sive per mortem, Deus semper in te glorificetur.

Lib. 3. cap. 49. §. 7. Domine benedictum sit verbum tuum, dulce super mel & favum ori meo.

Lib. 3. cap. 57. §. 4. Tu facis bene sentire de omnibus, & in omnibus te laudare. *Lib. 3. cap. 34. §. 1.*

Qui es super omnia laudandus & in omnibus benedicendus. *Lib. 3. cap. 9. §. 3.* Tibi laus, honor & gloria. *Lib. 3. cap. 41. §. 2.*

II. *Illi soli laus, honor, & gloria.*

O si nihil aliud faciendum incumberet, nisi Dominum Deum nostrum toto corde & ore laudare! *Lib. 1. cap. 25. §. 9.* Laudetur nomen tuum, non meum.

O veritas mea & misericordia mea, Deus meus, Trinitas beata! Tibi soli laus, honor, virtus & gloria per infinita sæculorum sæcula.

Lib. 3. cap. 40. §. 5. & 6.

III. *Quas dare laudes ore non possumus, desiderio suppleamus.*

Accipe vota mea, Domine Deus meus, & desideria infinitæ laudationis, ac immensæ benedictionis, quæ tibi, secundum multitudinem ineffabilis magnitudinis tuæ, jure debentur. Hæc tibi reddo, & reddere desidero per singulos dies & momenta temporum, atque ad reddendum mecum tibi gratias & laudes, omnes cœlestes spiritus, & cunctos fideles tuos precibus & affectibus invito

&



& exoro. *Lib. 4. cap. 17. §. 4.* Benedico te semper & glorifico cum unigenito Filio tuo, & Spiritu sancto Paraclete in sæcula sæculorum, *Lib. 3. cap. 5. §. 1.*

Passus XXXIX.

**Vera quies & lætitia in solo Deo
quærenda.**

**I. *Si non sapiant creaturæ, tibi sapiet
Deus, & vives contentus.***

Quando homo ad hoc pervenit, quod de nulla creatura consolationem suam quærit, tunc ei Deus primo perfecte sapere incipit: tunc etiam bene contentus de omni eventu rerum erit. Tunc nec pro magno lætabitur, nec pro modico contristabitur: sed ponit se integre, & fiducialiter in Deo, qui est ei omnia in omnibus, cui nihil utique perit, nec moritur, sed omnia ei vivunt, & ad nutum incunctanter deserviunt. *Lib. 1. cap. 25. §. 10.*

II. *Non est pax & quies vera, nec solidum gaudium extra Deum.*

Hæc dicit Dilectus tuus: Salus tua ego sum, Pax tua, & Vita tua. Serva te apud me, & pacem invenies. *Lib. 3. cap. 1. §. 2.* Quære veram pacem non in terris, sed in cœlis: non in hominibus, nec in cæteris creaturis, sed in Deo solo. *Lib. 3. cap. 35. §. 2.* Justorum lætitia de Deo, & in Deo est; & gaudium eorum de Veritate. *Lib. 2. cap. 6. §. 2.* Si recte sapis, in me solo gaudebis. *Lib. 3. cap. 9. §. 3.*

III. *Ut ergo tibi bene sit, vive extra teipsum totus intra Deum.*

Ego sum, cui te totum dare debes: ita ut jam ultra non in te, sed in me absque omni sollicitudine vivas. *Lib. 4. cap. 12. §. 4.* Statim namque ut te Deo ex toto corde tradideris, nec hoc vel illud pro tuo libitu seu velle quæsieris, sed integre te in ipso posueris, unitum te invenies & pacatum, quia nil ita bene sapiet, & placebit, sicut beneplacitum Divinæ voluntatis. *Lib. 4. cap. 15. §. 3.* Si autem in teipso steteris, nec sponte te ad voluntatem meam obtuleris, non est plena oblatio, nec integra erit inter nos unio. Igitur omnia opera tua præcedere debet spontanea tui ipsius in manus Dei oblatio, si libertatem consequi vis, & gratiam. *Lib. 4. cap. 8. §. 2.*

Passus XL.
Anima in Deo gaudet & plene quiescit.

I. *Anima cognoscit, non esse felicitatem extra Deum:*

Eja Domine Deus, amator sancte meus, cum tu veneris in cor meum, exultabunt omnia interiora mea. *Tu es gloria mea & exultatio cordis mei. Lib. 3. cap. 5. §. 1.* Tu facis cor tranquillum, & pacem magnam, lætitiāque festivam. *Lib. 3. cap. 34. §. 1.* Omnia namque, quæ ad pacem videntur esse, & felicitatem habendam, te absente nihil sunt, nihilque felicitatis in veritate conferunt. *Lib. 3. cap. 59. §. 4.* Vere tu Pacificus meus, in quo pax summa, & requies vera, extra quem labor & dolor & infinita miseria. *Lib. 4. cap. 13. §. 2.*



II. *Hinc omne solatium reponit in beneplacito Voluntatis Divinæ,*

Nihil ergo amatorem tuum, & cognitorem tuorum beneficiorum ita lætificare debet, sicut voluntas tua in eo, & beneplacitum æternæ dispositionis tuæ. Nam voluntas tua, & amor honoris tui omnia excedere debet: & plus eum consolari, magisque placere, quam omnia beneficia sibi data, vel danda. *Lib. 3. cap. 22. §. 5.*

III. *Et in uno Deo, summo ac æterno Bono, plene quiescit.*

Da mihi super omnia desiderata in te requiescere, & cor meum in te pacificare. Tu vera pax cordis, tu sola requies; extra te dura sunt omnia, & inquieta. *In hac pace in idipsum, hoc est, in te uno, summo, æterno Bono, dormiam & requiescam, Amen. Lib. 3. cap. 15. §. 4.*

Passus XLI.

Quam pauci Jesum diligant.

I. *Multi volunt cum Christo regnare, & nolunt pro eo aliquid sustinere:*

Habet Jesus nunc multos amatores regni sui cœlestis, sed paucos bajulatores suæ crucis. Multos habet desideratores consolationis, sed paucos tribulationis. Plures invenit socios mensæ, sed paucos abstinentiæ. Omnes cupiunt cum eo gaudere, pauci volunt pro eo aliquid sustinere. *Lib. 2. cap. 11. §. 1.*

II. *Multi sequuntur Jesum in prosperis, & deserunt in adversis.*

Multi Jesum sequuntur usque ad fractionem panis: sed pauci usque ad bibendum calicem Passionis. Multi miracula ejus venerantur, pauci ignominiam Crucis sequuntur. Multi Jesum diligunt, quamdiu adversa non contingunt. Multi illum laudant, & benedicunt, quamdiu consolationes aliquas ab ipso percipiunt: si autem Jesus se absconderit, & modicum eos reliquerit, aut in querimoniam, vel in dejectionem nimiam cadunt.

Ibidem.

III. *Tales sunt mercenarii, & non Amatores veri.*

Nonne omnes mercenarii sunt dicendi, qui consolationes semper quærunt? Nonne amatores sui magis quam Christi probantur, qui sua commoda, & lucra semper meditantur? Ubi invenietur talis, qui velit Deo servire gratis? *Ibidem* §. 3.

Passus XLII.

Probandus est verus Amator.

I. *Fortis amator est, cui Dominus placeat in adversis, ut in prosperis.*

Fili, non es adhuc fortis & prudens amore. Quare, Domine? Quia propter modicam contrarietatem deficis a captis, & nimis avide consolationem quæris. Fortis Amator stat in tentationibus, nec callidis credit persuasionibus inimici. Sicut ei in prosperis placeo, ita nec in adversis displiceo. *Lib. 3. cap. 6. §. 1.*



II. Prudens amator est, qui infra Dilectum ponit omnia.

Prudens amator non tam donum amantis considerat, quam dantis amorem. Affectum potius attendit, quam censum, & infra Dilectum omnia data ponit. Nobilis amator, non quiescit in dono, sed in me super omne donum. *Ibidem §. 2.*

III. Verum Amatorem nec paupertas, nec tribulatio impedit, quin Jesum amet propter Jesum.

Nonte pudeat aliis servire amore Jesu Christi, & pauperem in hoc saeculo videri: *Lib. 1. cap. 7. §. 1.* Qui Jesum propter Jesum, & non propter suam aliquam consolationem diligunt, ipsum in omni tribulatione, & angustia cordis, sicut in summa consolatione, benedicunt. Et si nunquam eis consolationem dare vellet, ipsum tamen semper laudarent, & semper gratias agere vellent. *Lib. 2. cap. 11. §. 2.*

Passus XLIII.

Proprietates veri Amoris.

I. Amor omnia sustinet propter Dilectum,

Qui non est paratus omnia pati, & ad voluntatem stare Dilecti, non est dignus amator appellari. Oportet amantem omnia dura, & amara propter Dilectum libenter amplecti, nec ob contraria accidentia ab eo deflecti. *Lib. 3. cap. 5. §. 8.*

II. Promptus est ac sincerus, & solum quærit Dilectum.

Amans volat, currit, & lætatur, liber est, & non tenetur. Dat omnia pro omnibus, & habet



omnia in omnibus; quia in uno summo super omnia quiescit, ex quo omne bonum fluit & procedit. Non respicit ad dona, sed ad donantem se convertit super omnia bona. Amor modum saepe nescit, sed super omnem modum fervescit. Est amor velox, sincerus, pius, jucundus & amoenus, fortis, patiens, fidelis, prudens, longanimis, virilis, & seipsum nunquam quærens: ubi enim seipsum aliquis quærit, ibi ab amore cadit. *Ibidem* §. 4. & 7.

III. *Stabilis est, & in solo quiescit Dilecto.*

Est amor circumspectus, humilis & rectus, non mollis, non levis, nec vanis intendens rebus, sobrius, castus, stabilis, quietus, & in cunctis custoditus. Est amor subjectus & obediens Prælati, sibi vilis & despectus, Deo devotus & gratificus, fidens & sperans semper in eo, etiam cum sibi non sapit Deus: quia sine dolore non vivitur in amore. *Ibidem* §. 7.

Passus XLIV.

Effectus Divini Amoris.

I, *Amor Divinus valet ad omnia, nec onus sentit,*

Magna res est amor, magnum omnino bonum, quod solum leve facit omne onerosum, & fert æqualiter omne inæquale; nam onus sine onere portat, & omne amarum dulce ac sapidum efficit. Amor onus non sentit, labores non reputat, plus affectat, quam valet: de impossibilitate non causatur, quia cuncta sibi posse, & licere arbitrat. Valet igitur ad omnia, & multa implet, & effectui mancipat, ubi non amans deficit, & jacet. *Lib. 3. cap. 5. §. 3. & 4.*



II. *Vigilat & sursum tendit semper.*

Amor vigilat, & dormiens non dormitat: fatigatus non lassatur, arctatus non coarctatur, territus non conturbatur; sed sicut vivax flamma, & ardens facula sursum erumpit, secureque pertransit. Amor vult esse sursum, nec ullis infimis rebus retineri. *Ibidem* §. 3. & 5.

III. *Impellit ad operanda magna,*

Amor Jesu nobilis, ad magna operanda impellit, & ad desideranda semper perfectiora excitat. Amor vult esse liber, & ab omni mundana affectione alienus, ne internus ejus impediatur aspectus: ne per aliquod commodum temporale implicationes sustineat, aut per incommodum succumbat. *Ibid.* §. 3.

IV. *Et in uno Deo plenam invenit quietem.*

Nihil dulcius est amore, nihil fortius, nihil altius, nihil latius, nihil jucundius, nihil plenius, nec melius in coelo & in terra: quia amor ex Deo natus est, nec potest nisi in Deo, super omnia creatura quiescere. *Ibidem.*

Passus XLV.

Felicitas eorum, qui Jesum diligunt.

I. *Felix ille, qui uni adhæret Dilectio Jesu!*

Beatus qui intelligit, quid sit amare Jesum, & contemnere seipsum propter Jesum. Oportet Dilectum pro Dilecto relinquere, quia Jesus vult solus super omnia amari. Dilectio creaturæ fallax & instabilis: Dilectio Jesu fidelis & perseverabilis. *Lib. 2. cap. 7. §. 1.*



II. *Jesus Amicus est omnium optimus:*

Qui adhæret creaturæ, cadet cum labili: qui amplectitur Jesum, firmabitur in ævum. Illum dilige, & Amicum tibi retine, qui omnibus recedentibus, te non relinquet, nec patietur in fine perire. *Ibid.* Ex omnibus ergo charis sit Jesus solus Dilectus specialis. *Lib. 2. cap. 8. §. 3.*

III. *Reliqui diligantur propter Jesum.*

Diligantur omnes propter Jesum, Jesus autem propter seipsum. Solus Jesus Christus singulariter est amandus, qui solus bonus & fidelis præ omnibus invenitur amicis. Propter ipsum & in ipso tam amici quam inimici tibi sint chari: & pro omnibus his exorandus est, ut omnes ipsum cognoscant & diligant. *Ibid. §. 4.*

Passus XLVI.

Anima cupit exuere amorem creaturarum, ut cor liberius ad Deum elevet.

I. *Ubi thesaurus noster, ibi cor nostrum:*

Si cælum diligo, libenter de cœlestibus penso. Si mundum amo, mundi felicitatibus congaudeo, & de adversitatibus ejus tristor. Si carnem diligo, quæ carnis sunt, sæpe imaginor. Si spiritum amo, de spiritualibus cogitare delector. Quæcunque enim diligo, de his libenter loquor, & audio, atque talium imagines mecum ad domum reporto. Unde tu Veritas aperte dixisti: *Ubi enim est thesaurus tuus, ibi est & cor tuum.* *Lib. 3. cap. 48. §. 6.*

II. *Dum nitimur sursum, sæpe retrahimur deorsum.*

Desidero te intime frui, sed nequeo apprehendere, Opto inhærere cœlestibus, sed deprimunt
res



res temporales, & immortificatæ passiones. Mente omnibus rebus superesse volo; carni autem invite subesse cogor. Sic ego homo infelix mecum pugno, & factus sum mihi inet ipsi gravis, dum spiritus sursum, & caro quærit esse deorsum. *Ibid.* §. 4.

III. Solvenda sunt vincula, ut sursum evolemus,

Domine, bene indigeo adhuc majori gratia, si debeam illuc pervenire, ubi me nemo poterit, nec ulla creatura impedire; nam quamdiu res aliqua me retinet, non possum libere ad te volare. Cupiebat libere volare, qui dicebat: *Quis dabit mihi pennas sicut columbæ, & volabo, & requiescam?* Quid simplici oculo quietius? & quid liberius nil desiderante in terris? *Lib. 3. cap 31. §. 1.*

IV. Et relictis creaturis ad Creatorem ascendamus.

Oportet igitur omnem supertransire creaturam, & seipsum perfecte deferere, ac in excessu mentis stare, & videre te, omnium Conditorum, cum creaturis nil simile habere. *Ibid.* Fili, quia hæc scis & legisti omnia: beatus eris, si feceris ea. *L. 3. c. 56. §. 4.*

Passus XLVII.

Anima aspirat ad amplexum Dilecti.

I. Anima ardenter desiderat amplexum Sponsi,

O mi dilectissime Sponse, Jesu Christe! amator purissime, dominator universæ creaturæ: quis mihi det pennas veræ libertatis ad volandum & pausandum in te? O quando ad plenum dabitur mihi vacare, & videre, quam suavis es, Domine Deus meus!



meus ! Quando ad plenum me recolligam in te , ut
præ amore tuo non sentiam me : sed te solum supra
omnem sensum & modum , in modo non omnibus
noto. *Lib. 3. cap. 24. §. 3.*

**II. Et gemit , quod in hac miseriarum
valle ab accessu impediatur. III**

Nunc autem frequenter gemo , & infelicitatem
meam cum dolore porto , quia multa mala in hac
valle miseriarum occurrunt , quæ me sæpius con-
turbant , contristant , & obnubilant : sæpius impe-
diunt & distrahunt , alliciunt & implicant , ne libe-
rum habeam accessum ad te , & ne iucundis fruam
amplexibus , qui præsto semper es beatis spiritibus.
Moveat te suspitum meum ! Ibid.

Passus XLVIII.

Amanti sapit Deus super omnia.

I. Amanti nil sapit , nisi Deus ,

Ecce , Deus meus & omnia ! quid volo amplius ,
& quid felicius desiderare possum ? O sapidum
& dulce verbum ! sed amanti verbum , non mun-
dum , nec ea quæ in mundo sunt. Deus meus & om-
nia ! intelligenti satis dictum est : & sæpe repetere
iucundum est amanti. *Lib. 3. cap. 34. §. 1.*

**II. Illo præsentē iucunda , illo absente
fastidiosa sunt omnia. I**

Te siquidem præsentē iucunda sunt omnia : te au-
tem absente , fastidiunt cuncta : nec potest aliquid
sine te diu placere , sed si debet gratum esse , & bene
sapere , oportet gratiam tuam adesse , & condi-
mento tuæ sapientiæ condiri. *Ibid.*

III.



III. *Quibus sapit Deus, omnia referunt ad laudem Conditoris,*

Qui te sequuntur, istis sapit Deus: & quidquid boni invenitur in creaturis, totum ad laudem referunt sui Conditoris. Dissimilis tamen & multum dissimilis sapor Creatoris & creaturæ, æternitatis & temporis, lucis increatæ, & lucis illuminatæ. *Ibidem §. 2.*

IV. *Illique soli pleno cum gaudio inhærere cupiunt:*

O lux perpetua! cuncta creata transcendens lumina, fulgura coruscationem de sublimi, penetrantem omnia cordis mei intima. Purifica, lætifica, clarifica, & vivifica spiritum meum cum suis potentiis ad inhærendum tibi jubilosis excessibus. Quamdiu hoc datum non fuerit, nec plenum gaudium erit. *Ibid. §. 3.*

Passus LXIX.

Anima inardescit in amore Dei.

I. *Animæ proponitur, quam perfectæ sit charitas Sanctorum,*

Vere magnus est, qui magnam habet charitatem.

Lib. 1. cap. 3. §. 6. Adhuc autem Sancti (quod multo altius est) plus me, quam se & sua merita diligunt; nam supra se rapti, & extra propriam dilectionem tracti, toti in amorem mei pergunt, in quo & fruitive quiescunt. Nihil est, quod eos avertere possit, aut deprimere, quippe qui æterna veritate pleni, igne ardescunt inextinguibilis charitatis. *Lib. 3. cap. 58. §. 5.*



H. Quantum possit amor Dei purus :

O quantum potest amor Jesu purus, nullo proprio commodo vel amore permixtus! *L. 2. c. 11. §. 3.* Magnus clamor in auribus Dei est ipse ardens affectus animæ, quæ dicit: *Deus meus, Amor meus: tu totus meus, & ego totus tuus.* Si quis amat, novit, quid hæc vox clamet. *Lib. 3. cap. 5. §. 5.*

III. Unde & ipsa inardescit, & cupit in amore Dei liquefieri.

Dilata me in amore, ut discam interiori cordis ore degustare, quam suave sit amare, & in amore liquefieri & natare. Tenear amore vadens supra me præ nimio fervore & stupore. Cantem amoris canticum, sequar te Dilectum meum in altum, deficiat in laude tua anima mea, jubilans ex amore. Amem te plus quam me, nec me nisi propter te: & omnes in te, qui vere amant te, sicut jubet Lex amoris, lucens ex te. *Ibid. §. 6.*

Passus L.

Anima per amorem Deo suo perfecte uniri cupit in hac vita.

I. Anima ardentissime desiderat Dilecto suo frui,

Quis mihi det, Domine, ut inveniam te solum, & aperiā tibi totum cor meum, & fruār te sicut desiderat anima mea; & jam me nemo despiciat, nec ulla creatura me moveat, vel respiciat, sed tu solus mihi loquaris, & ego tibi, sicut solet Dilectus ad Dilectum loqui, & amicus cum amico convivari. *Lib. 4. cap. 13. §. 1.*



II. Et per amorem in ipsum transmutari.

Unam me totaliter ex tua præsentia accendas, comburas, & in te transmutes, ut unus tecum efficiar spiritus, per gratiam internæ unionis, & liquefactionem ardentis amoris! Quid mirum, si totus ex te ignescerem, & in meipso deficerem, cum tu sis ignis semper ardens, & nunquam deficiens, amor corda purificans, & intellectum illuminans.

Lib. 4. cap. 16. §. 3.

III. Omnis mora illi longa, donec in Dilecto absorbeat, & dilectionis vinculo,

Ah Domine Deus! quando ero tecum totus unius & absorptus, meique totaliter oblitus? Tu in me & ego in te: & sic nos pariter in unum manere concede. Vere tu es Dilectus meus, electus ex millibus, in quo complacuit animæ meæ habitare omnibus diebus vitæ suæ. *Lib. 4. cap. 13. §. 1. & 2.* Junge me tibi inseparabili dilectionis vinculo, quoniam tu solus sufficis amanti, & absque te frivola sunt universa. *Lib. 3. Cap. 23. §. 10.*

IV. Illi perfecte uniatur.

Tunc exultabunt omnia interiora mea, cum perfecte fuerit unita Deo anima mea. Tunc dicet mihi: si tu vis esse mecum, ego volo esse tecum. Et ego respondebo illi: dignare, Domine, manere mecum, ego volo libenter esse tecum. Hoc est totum desiderium meum, ut cor meum tibi sit unitum. *Lib. 4. cap. 13. §. 3.*

Passus LI.

Quam exoptanda sit cœlestis Patria?

I. Expetenda omnino est cœlestis Patria,

Et cum tibi desiderium æternæ beatitudinis desuper infundi sentis, & de tabernaculo corpo-

ris exire concupiscis, ut claritatem meam sine vil-
e similitudinis umbra contemplari possis: dilata cor
tuum, & omni desiderio hanc sanctam inspiratio-
nem suscipe. *Lib. 3. cap. 49. §. 1.*

II. In qua invenitur omne bonum,
- & Ibi quippe invenies omne, quod volueris; om-
ne, quod desiderare poteris. Ibi aderit tibi totius
facultas boni, sine timore amittendi: ibi voluntas
tua, una semper mecum, nil cupiet extraneum vel
privatum. *Ibid. §. 6.*

III. Et nullum metuendum est malum.
- Ibi nullus resistet tibi, nemo de te conquere-
tur, nemo impedit, nihil obviabit: sed cuncta de-
siderata simul erunt praesentia, totumque affectum
tuum reficient, & adimplebunt usque ad summum.
Ibi reddam gloriam pro contumelia perpeisa: pal-
lium laudis pro moerore; pro loco novissimo se-
dem regni in saecula. *Ibid.*

Passus LII.

**Quam purum esse debeat coelestis Pa-
triae desiderium?**

**I. Desiderium coelestis Patriae debet
esse purum,**

Fili, saepe ignis ardet, sed sine fumo flamma non
ascendit. Sic & aliquorum desideria ad coe-
lestia flagrant, & tamen a tentatione carnalis af-
fectus liberi non sunt. Idcirco nec omnino pure
pro honore Dei agunt, quod tam desideranter ab
eo petunt. Tale est & tuum saepe desiderium, quod
insinuasti, forte tam importunum; non enim est
hoc purum & perfectum, quod propria commodita-
te est infectum. *L. 3. c. 49 §. 2.*



Secundum Dei voluntatem,

Qui habet mandata mea & servat ea, ipse est, qui diligit me: & ego diligam eum, & manifestabo ei meipsum: faciam eum confidere mecum in regno Patris mei. Lib. 3. cap. 56. §. 4.

II. Et modum ac tempus a Deo præstitutum,

Novi desiderium tuum & frequentes gemitus audiui. Jam velles esse in libertate gloriæ Filiorum Dei: jam te delectat domus æterna & cœlestis patria, gaudio plena; sed nondum venit hora ista, sed est adhuc aliud tempus, scilicet tempus belli, tempus laboris, & probationis. Optas summo repleti Bono, sed non potes hoc assequi modo. Ego sum: expecta me (dicit Dominus) donec veniat regnum Dei. Lib. 3. cap. 49. §. 3.

III. Et dies veniet, qua plene satiabitur.

Veniet pax in die una, quæ nota est Domino: & erit non dies, neque nox, hujus scilicet temporis, sed lux perpetua, claritas infinita, pax firma, & requies secura. Non dices tunc: *Quis me liberabit de corpore mortis hujus?* Neque claimabis: *Heu mihi, quia incolatus meus prolongatus est!* Quoniam præcipitabitur mors, & salus erit infectiva, anxietas nulla, jucunditas beata, societas dulcis & decora. Lib. 3. cap. 47. §. 2.

Passus LIII.

Recta in Cœlum Via.

I. Qui servant mandata,
Si vis ad vitam ingredi, serva mandata. Si vis beatam vitam possidere, præsentem vitam contemne. Lib. 3. cap. 56, §. 2. Qui temporalem requirit



rit gloriam, aut non ex animo contemnit, minus amare convincitur cœlestem. *Lib. 2. cap. 6. §. 2.*

II. Et Christum sequuntur in terris,

Si vis exaltari in cœlo, humilia te in mundo. Si vis regnare mecum, porta crucem mecum; soli enim servi crucis inveniunt viam beatitudinis & veræ lucis. *Lib. 3. cap. 56. §. 2.*

III. Cum Christo regnabunt in cœlis.

Leva igitur faciem tuam in cœlum. Ecce! Ego & omnes Sancti mei mecum, qui in hoc sæculo magnum habuere certamen, modo gaudent, modo consolantur, modo securi sunt, modo requiescunt, & sine fine mecum in regno Patris mei permanebunt. *Lib. 3. cap. 47. §. 4.*

Passus LIV.

Aspiratio Animæ ad cœlestem Patriam.

I. Anima contemplatur cœlestem Patriam,

O supernæ civitatis mansio beatissima! O dies æternitatis clarissima! quam nox non obscurat, sed summa Veritas semper irradiat: dies semper læta, semper secura, & nunquam statum mutans in contraria! *Lib. 3. cap. 48. §. 1.*

II. Ad illam aspirat ex hac lacrymarum valle,

O utinam dies ille illuxisset, & cuncta hæc temporalia finem accepissent! Lucet quidem sanctis perpetua claritate splendida, sed non nisi a longe & per speculum peregrinantibus in terra. Norunt cœli cives, quam gaudiosa sit illa: gemunt exules filii Evæ, quod amara & tœdiosa sit ista. *Ibid. §. 1. & 2.*

III.



III. *Ut miseriis liberata, fruatur deliciis cœlestibus,*

Cum autem venerit, quod perfectum est, cessabit usus Sacramentorum : quia Beati in gloria cœlesti non egent medicamine sacramentali ; gaudent enim sine fine in præsentia Dei, facie ad faciem gloriam ejus speculantes, & de charitate in charitatem abyssalis Deitatis transformati, gustant Verbum Dei caro factum, sicut fuit initio, & manet in æternum. *Lib. 4. cap. 11. §. 2.*

IV. *Et periculis erepta, secura sit, & felix in æternum.*

Dummodo tandem ad portum salutis perveniam : quid curæ est, quæ & quanta passus fuero ? Da finem bonum : da felicem ex hoc mundo transitum. Memento mei, Deus meus, & dirige me recto itinere in regnum tuum, Amen. *Lib. 3. cap. 57. §. 4.*

Passus LV.

Anima cupit exsolvi vinculis terrenis, ut Deo suo uniatur in cœlis.

I. *Anima omnis jam moræ impatiens cupit sibi exsolvi vincula,*

O Jesu ! splendor æternæ gloriæ, solamen peregrinantis animæ : apud te est os mutum sine voce, & silentium meum loquitur tibi. Moveat te suspirium meum, & desolatio multiplex in terra. Usquequo tardat venire Dominus meus ? Veniat ad me pauperculum suum, & latum faciat. Mittat manum suam, & miserum eripiat de omni



angustia. Miser sum, & quodammodo incarcera-
tus, & compedibus gravatus, donec luce præsenti-
æ tuæ me reficias, ac libertati dones, vultum-
que amicabilem demonstres. *Lib. 3. cap. 21.*
§. 3. & 4.

II. Ut ocyus ad Dilectum evolet:

Quando erit pax solida, pax imperturbabilis,
& secura, pax intus & foris, pax ex omni parte
firma? Jesu bone! quando stabo ad videndum te?
quando contemplabor gloriam regni tui? quando
eris mihi omnia in omnibus? O! quando ero te-
cum in regno tuo, quod præparasti Dilectis tuis
ab æterno? *Lib. 3. cap. 48. §. 3.*

**III. Nil amplius in terris est, quod
ipsam consolari possit:**

Memor horum mirabilium grave mihi fit tœ-
dium, etiam quodlibet spirituale solatium: quia
quamdiu Dominum meum aperte in sua gloria
non video, pro nihilo duco omne, quod in mun-
do conspicio & audio. Testis es tu mihi, Deus,
quod nulla res me potest consolari, nulla creatu-
ra quietare, nisi tu, Deus meus, quem desidero
æternaliter contemplari. Sed non est hoc possi-
bile, durante me in hac mortalitate. *Lib. 4. cap.*
11. §. 3.

**IV. Unde omni desiderio cupit Deo
suo uniri in coelis.**


Consolare exilium meum, mitiga dolorem
meum, quia ad te suspirat omne desiderium me-
um. Nam onus mihi totum est, quidquid hic
mundus offert ad solatium. *Lib. 3. cap. 48. §. 4.*
O!




O! quando veniet hæc beata & desiderabilis hora, ut tua me faties præsentia, & sis mihi omnia in omnibus! *Lib. 3. cap. 34. §. 3.* Veni veni, quia sine te nulla erit læta dies, aut hora; quia tu lætitia mea, & sine te vacua est mensa mea. *Lib. 3. cap. 2. §. 4.* Rape me & eripe ab omni creaturarum indurabili consolatione: quia nulla res creata appetitum meum valet plenarie quietare, & consolari. Junge me tibi. *Lib. 3. cap. 23. §. 10.*

OMNIA AD MAJOREM DEI GLORIAM.







Heser, Georg, / Thomas / Neumayr, Franz,

R. P. Georgii Heseri Thomas a Kempis, Ceu Summa Theologise Mysticae, Et
Mantissa Asceseos Rythmicae R. P. Francisci Neumayr perinde Ad Exercitia
Spiritualia S. P. N. Ignatii Accomodata Pro Lectione Spirituali, et D. D.
Sodalibus Congregationis Majoris Latinae Matris Propitiae B. V. Mariae

Monachii 1793

P.lat. 1256 g

urn:nbn:de:bvb:12-bsb10743623-5

VD18 14480727-001